

**PRAKRIT TEXT SERIES No.31**

**SVAYAMBHŪDEVA'S  
RITṬHANĒMICARIYA  
(HARIVAMŚAPURĀṆA)**

**PART III (2)  
JUJJA-KAMḌA**

**EDITED  
BY  
RAM SINH TOMAR**

**PRAKRIT TEXT SOCIETY  
AHMEDABAD  
1997**

**PRAKRIT TEXT SERIES No.31**

: General Editors :

**D. D. Malvania      H. C. Bhayani**

**SVAYAMBHŪDEVA'S**

**RIT̥THANEMICARIYA**

**(HARIVAM̐SAPURĀNA)**

**PART III (2)  
JUJ̐JHA-KAM̐DA**

**EDITED  
BY  
RAM SINH TOMAR**

**PRAKRIT TEXT SOCIETY  
AHMEDABAD  
1997**

*Published by :*  
**Dalsukh Malvania**  
Secretary,  
Prakrit Text Society  
Ahmedabad-380 009.

(c) Ram Sinh Tomar

First Edition 1997

Price : Rs. 200/-

*Printed by :*  
**Ramaniya Graphics**  
44/451, Greenpark Appartments,  
Sola Road, Naranpura,  
Ahmedabad-380 063.  
Ph. 7451603.

प्राकृत ग्रन्थ परिषद् : ३१

कइराय-सयंभूदेव-किउ

रिट्टणेमिचरिउ  
(हरिवंसपुराणु)

तृतीय खण्ड (द्वितीय भाग)

जुज्झ-कंडु

: संपादक :

राम सिंह तोमर

प्राकृत ग्रन्थ परिषद्

अहमदाबाद

१९९७



## विषयानुक्रम

संधि	पृष्ठांक
चउसट्टिमो	१
पंचसट्टिमो	११
छासट्टिमो	२२
सत्तसट्टिमो	३५
अट्टसट्टिमो	४२
ऊणहत्तरिइमो	५०
सत्तरिमो	६०
एकहत्तरिमो	७१
बाहत्तरिमो	८२
तेहत्तरिमो	९२
चउहत्तरिमो	९९
पंचहत्तरिमो	१०८
छहत्तरिमो	११७
सत्तहत्तरिमो	१२६
अट्टहत्तरिमो	१३४
ऊणासीइमो	१४३
असीइमो	१५२
इक्कासीइमो	१६१
बयासीइमो	१६९
तेयासीइमो	१७७
चउरासीइमो	१८३
पंचासीइमो	१९४
छायासीइमो	२०२
सत्तासीइमो	२१३
अट्टासीइमो	२२२
णवासीइमो	२३३
णवइमो	२४४
इक्काणवइमो	२५४
दो-उत्तर-णवइमो	२६१

## GENERAL EDITORS' FOREWARD

The Prakrit Text Society has great pleasure in publishing herewith one further part of Svayambhūdeva's *Ritthanemicariya* also called *Harivaṃsapurāṇa*, viz., the remaining portion of the *Jujjha-kāṇḍa* (Sandhis 64-92), edited by Professor Ram Sinh Tomar. Due to several difficulties, personal and others, we had almost decided to stop the publication of the remaining part of the work, but fortunately we got Dr. Ramanik Shah's sincere co-operation in the printing and related matters and we are able to bring out the text up to the end of the *Jujjha-kāṇḍa*. The last part of the *Ritthanemicariya*, viz. sandhis 93-112 we hope to take up for publication shortly. We have also planned in its introduction to deal with, among other matters, Svayambhū's dependence upon Vyāsa's *Mahābhārata*, about which we have referred to in our Introduction to part III (1). In this part also Svayambhū's use of the *Droṇa*, *Karṇa* and *Salya Parvans* of the *Mahābhārata* is quite evident. As an important link in the long and illustrious tradition of the *Mahābhārata* narrative and for its eminent qualities of language, style and narrative power, Svayambhū's place in the first rank of Indian Classical poets is unquestionable.

It is a very rare case in the Indian Classical tradition that the poets have left for us any information regarding their personal life, mode of writing etc. In this matter also Svayambhū is uniquely original. He has recorded meticulously at the close of the *Yuddha-Kāṇḍa* (end of sandhi 92) that it took him six years, three months

and eleven days to write 92 sandhis, adding further on what day exactly he began to compose the remaining Uttara-Kāṇḍa. It so happened that we have followed Svayambhū in this matter. We sent the Riṭṭhaṇemicariya to the press sometime in 1991. It is an interesting coincidence (although rather not earning any credit for us) that the printing of the portion up to Yuddha-Kāṇḍa (and publishing it in 1997) took almost the same period as taken by Svayambhū to write it !

V. S. 2054, Kārtik Sukla Pratipadā  
1-11-1997, Ahmedabad

H. C. Bhayani

रिट्ठणेमिचरिउ  
(हरिवंसपुराणु)  
जुज्झ-कंडु



## चउसड्डिमो संधि

कइचिंधु ण दीसइ सद-सर सुव्वइ महुमह-जलयरहो ।  
सच्चइ पड्डविउ जुहिड्डिलेण वत्त-गवेसउ भायरहो ॥ १

[१]

णरवइ दुम्मण-दुम्मणउ वाह-जलोल्लिय-लोयणउ ।  
वंधव-सोय-समाउलउ पभणइ चित्तुत्तावलउ ॥ १

सच्चइ समर-सएहिं समत्थहो एक-वि वत्त ण णावइ पत्थहो  
पइं मुएवि कहो पेसणु सीसइ वड्डु-वार कइ-चिंधु ण दीसइ  
वड्डु-वार हरि जलयरु पूरइ वड्डु-वार महु हियउ विसूरइ ४  
कउरव-कंस-वंस-विणिवायण जाहि गवेसहि णर-णारायण  
तुहुं सुहि सूरु सुरिंद-परकम्मु चित्त-जोहि लहु-करु लहु-विकम्मु  
तो विहसेप्पिणु पभणइ जायउ णिय-तणु-तेय-तविय-तवणायउ  
भुय-परिहविय-पुरंदर-करि-करु वयण-पहोहामिय-छण-ससहरु ८  
जामि सुट्ठु पर आएं थक्कमि पइं एकल्लउ मुएवि ण सक्कमि

घत्ता

अच्छइ फुरंतु दोणायरिउ णवर करेवए चप्पणउं ।  
हउं जामि जुहिड्डिल-पड्डविउ छुडु जसु रक्खहि अप्पणउं ॥

[२]

णर-णारायणेहिं चविउ पइ-मि णराहिव पड्डविउ ।  
अग्गए दोणु परिड्डियउ जइ ण जामि तो संकियउ ॥ १

जइयहुं इंदपत्थे णिवसंतउ णरवइ-अद्ध-रज्जु भुंजंतउ  
तइयहुं जे जियंत मुहु जोएवि एवहिं आइय ते अरि होएवि  
थिय सण्णहेवि मेच्छ वहु-वारण रूप-महारह-गय-धणु-पहरण ४

## रिद्धणेमिचरिउ

२

अवरइं सत्त सयाइं गइंदहं  
जे चिरु वस विहेय रवि-जायहो  
आजाणेय-विलास धणुद्धर  
आयस-कंस-कवय-धूमप्पह  
वूह-वारि सण्णहेवि परिट्टिय

अग्गिम-खंधे थियाइं णरिंदहं  
जे वट्टंति भिच्च जुयरायहो  
मक्खि-अग्गि-गोजाणि-भयंकर  
दंतुर-पट्टिस-उग्ग-कुविग्गह  
मइं समाणु जुज्झणहं समुट्टिय

८

घत्ता

भंजेवा दोण-कलिंग-किव हउं एकल्लउ एक-रहु ।  
रक्खेवउ तुहुं सव्वायरेण जाणेवि मइं पट्टवहि पहु ॥

१०

[३]

दोणें पीडिउ हउं-वि रणे जइ अलियउ तो तुहुं जे भणे ।  
तो-वि णाह वुत्तउं करमि पहु-मित्तत्थेण सिरु धरमि ॥

१

पभणइ पहु परिवड्डिय-णेहउ  
एकसि करहि महारउं वुत्तउं  
सो एकल्लउ कुरुहुं विरुज्झइ  
अणालिउ पाण विसज्जिय पत्थे  
सच्चइ चवइ जाव तव-णंदण  
धीरउ होहि काइं किर चिंतए  
दोमइ-लंभे सयंवर-मंडवे  
तालुय-वम्म-वहणे वंदि-ग्गहे  
तइयहुं किण्ण होंतु एकल्लउ

तुहुं अम्हहं महसूयणु जेहउ  
णरेण मरतें मरमि णिरुत्तउं  
पासत्थु-वि गोविंदु ण जुज्झइ  
चलणेहिं लग्गु जाहि परमत्थे  
वट्टइ कवण तुज्झु आकंदण  
ण मरइ णरु णारायणे संतए  
सुरहं भंडु जुज्झंतए खंडवे  
जइयहुं जुज्झिउ उत्तर-गोग्गहे  
एवहिं वट्टइ काइं नवल्लउं

४

८

घत्ता

मइं पट्टवंतु कुढे अज्जुणहो अप्पउ महु उवलक्खवहि ।  
एत्तियहं मज्झे पइं समर-मुहे जो रक्खइ सो दक्खवहि ॥

११

[४]

सामिय-विहुर धुरंधरउ समर-भरोड्डिय-खंधरउ ।  
जाउहाण-जम-गोयरउ झत्ति पलित्तु विओयरउ ॥

१

कोव-जलण-जालोलि-भयंकरु  
 बग-किम्मीर-हिडिंव-खयंकरु  
 पभणइ भीमु भीम-भड-भंजणु  
 अज्जुण-सीसु णरिंद-सुहंकरु  
 हत्थे छिवइ दोणु जइ राणउ  
 जायव जाहि काइं किर वुच्चइ  
 एम चवंतु णिवारिउ राएं  
 महु जसु अज्जुणेण पालिज्जइ

कीयाकुल-कयंतु कुरु-डामरु  
 पय-भर-भग्ग-भुवंग-मडप्फरु  
 तुहुं वोल्लहि महूसूयण-सज्जणु ४  
 अण्णहो वयणु णेमि सय-सक्करु  
 तो हउं दहणे डहमि अप्पाणउं  
 एक्कु भीमु पयरक्खु पहुच्चइ  
 कउ रक्खिज्जइ पइं अ-सहाएं ८  
 धट्टज्जुणेण दोणु पीडिज्जइ

घत्ता

विहसेविणु ताम विओयरेण सिणि-णंदणु एम मरिसावियउ ।  
 तुहुं पंचहिं पंकयणाह-समु खेड्डे मइं रोसावियउ ॥

[५]

तो ण्हायाणुविलित्त-तणु आउच्छिय-वंधव-सयणु ।  
 णर-मग्गेण समुच्चलितउ मंगल-सट्टु समुच्छलितउ ॥ १

वुच्चइ णंद वद्ध जय राएं  
 गोमुह-डंवर-पडहप्फालिय  
 लग्ग पढेवए तेत्थु पगामइं  
 दाणइं देवि केवि सुणिमित्तइं  
 संदणु वद्धु वम्मो ओणद्धउं  
 घोडा किय विसल्ल जुए जोत्तिय  
 चडिउ महारह-वीढे सुवित्थए  
 तोणालिद्ध-पुट्टि धणु-करयलु

अम्मणुअंचिउ भड-संघाएं  
 मागह सूय वंदि वेयालिय  
 इच्छिय जाइं किया-गुण-णामइं ४  
 दहि दुव्वक्खय फलइं विचित्तइं  
 उब्भिय-कंचण-सीह-महाधउ  
 भीम-पमुह सुहि सव्व णियत्तिय  
 णं पंचाणणु महिहर-मत्थए ८  
 भग्गालाण-खंभु णं मयगलु

घत्ता

णिउ रहु जोत्तार-तुरंगमेहिं अहिमुहु गुरु-थाणंतरहो ।  
 लक्खिज्जइ देवेहिं ढोइयउ मंदरु णं रयणायरहो ॥ १०



[६]

सच्चइ चोइय-रहवरउ	धणु-परिवेस-भयंकरउ ।	
सरवर-किरण-करालियउ	वइरिहिं रवि-व णिहालियउ ॥	१
ताम सत्त सुट्टुण्णय-माणा	गय-साहणेण पधाइय राणा	
वाहिय-रहेहिं अखंचिय-वगेहिं	गंधवहुद्धुय-धवल-धयगेहिं	
सुर-वेयंड-सुंड-भुय-दंडेहिं	इंदाउह-पयंड-कोयंडेहिं	४
विसहर-देह-दीह-णाराएहिं	मेह-मइंद-समुद्द-णिणाएहिं	
तो सिणि-णंदणेण अविओलें	जयसिरि-रामालिंगण-लोलें	
छाइय सत्त-वि सरवर-जालें	णं विंझइरि महाधण-जालें	
स-धय स-सारहि चूरिय रहवर	णं वासवेण णिसूडिय महिहर	८
णिहय तुरंगम छिण्णइं छत्तइं	खुडियइं सिरइं णाइं सयवत्तइं	
	घत्ता	
सिणि-तणएं सत्त-वि पवर भड	णिविसें वइवस-णयरु णिय ।	
णं कालें कवलु करंतएण	पढमु जे आपोसाणु किय ॥	१०

[७]

तहिं अवसरे मच्छर-भरिउ	अंतरे थिउ दोणायरिउ ।	
वाणासण-अक्खय-णिहिय-करु	णाइं स-सुर-धणु अंबुहरु ॥	१
ओसरु ताय ताय णिय-थामहो	रहु पइसरइ मज्झे संगामहो	
कण्हाऊरिय-संख-णिणाएं	हउं पट्टविउ जुहिड्डिल-राएं	
रण-मुहे वत्त-गवेसउ पत्थहो	करि पसाउ गुरु ओसरु पंथहो	४
अज्जुणु तुम्ह पुत्तु हउं पोत्तउ	भदिय-भायरु णिम्ल-गोत्तउ	
भणइ दोणु वोळ्ळिउं चंगारउं	पेक्खहु धणु-विण्णाणु तुहारउं	
दिट्ठि-मुट्ठि-संधाणु सरुग्गमु	सिक्खिउ कवणु एत्थु पइं आगमु	
सच्चइ चवइ पवेस-णिवारा	दरिसावमि लइ पहरु भडारा	८
जइ पइं मइं समाणु खणु जुज्झिउ	तो विण्णाणु असेसु-वि वुज्झिउ	

घत्ता

जइ रएवि थाणु संधाणु किउ वाणु-वि सज्जिउ धणु-गुणहो ।  
 कुरु-कालहो खंडव-डामरहो तो हउं सीसु ण अज्जुणहो ॥ १०

[८]

पज्जलिय कोव-हुवासणउ कड्डिय-ससर-सरासणउ ।  
 णं गउ गयहो समावडिउ सच्चइ दोणहो अब्भिडिउ ॥ १

जाउ महाहउ विहि-मि भयंकरु	चरणुच्चालण-चलिय-वसुंधरु	
रहवर-भग्गु भुवंगम-सेहरु	हय-खुर-खय-खम-रय-चय-धूसरु	
दिट्ठि-मुट्ठि-संधाण-णिरंतरु	धणु-टंकार-भरिय-भुवणंतरु	४
हुंकाराणिल-चालिय-महिहरु	सरवर-णियर-णिवारिय-रवियरु	
इसु-णिहसग्गि-तिडिक्किय-णहयलु	वार-वार-परिवड्डिय-कलयलु	
वार-वार-अप्फालिय-तूरउ	वार-वार-पडिब्रक्ख-विसूरउ	
वार-वार-आमेल्लिय-मग्गणु	वार-वार-तोसविय-सुरंगणु	८
वार-वार-विरइय-सर-मंडवु	वार-वार-वणिय-कुरु-पंडवु	

घत्ता

पहरंतु ण भज्जए आहयणे एक्क-वि एक्कहो माण-सिह ।  
 वण-वेयण-चेयण-मुच्छणेहिं रणु परिवड्डिउ सुरउ जिह ॥ १०

[९]

सीसायरिय रणंगणेण रहसाऊरिय-सुरयणेण ।  
 तालुय-वम्म-णिणासयरु पोमाइउ गंडीव-धरु ॥ १

तो संजमिया णिज्जिय-तोणे	सिणि-णंदणु पच्चारिउ दोणे	
कहिं महु जाहि अज्जु गलगज्जेवि	पत्थु-वि गउ काउरिसु व भज्जेवि	
एम भणेवि वहु-मच्छर-भरिएं	पंचहिं सरेहिं विद्धु आइरिएं	४
पुणु छहिं पुणु पडिवारिउ सत्तहिं	दसहिं थणंतरम्मि पुणु अट्ठहिं	
तो सच्चइ सहस त्ति पलित्तउ	णं दवग्गि दुप्पवणे छित्तउ	

## रिद्धणेमिचरिउ

६

कलस-महद्धउ पंचहिं वाणेहिं  
पुणु वीसद्ध-सरेहिं उरे ताडिउ  
एकें रहवर सारहि एकें

विज्झइ दुज्जण-वयण-समाणेहिं  
एकें फरहरंतु धउ पाडिउ  
मोडिउ आयवत्तु अवरेकें

८

घत्ता

चउ-सरेहिं चयारि तुरंग हय  
णिल्लक्खणु णिद्धणु रामु जिह

कह-कह-वि ण दोणायरिउ ।  
रणे एकल्लउ उव्वरिउ ॥

१०

[१०]

अण्णहिं रहवरे ठंताहो  
धणु पडिवारउ ताडियउ

दोणहो पडिपहरंताहो ।  
सुरगिरि-सिंगु व पाडियउ ॥

१

वीयउं सुर-धणु-अणुहरमाणउं  
छिण्णु चउत्थउं जम-भू-भंगुरु  
छट्टउं खगवइ-पेहुण-सच्छहु  
अट्टमु दोण-महादुम-सूलु व  
दसमउं रिउ-णयरु व विद्धंसिउ  
जं जं दोणहो धणु करे पावइ  
जं जं लेइ तं जि ण वलग्गइ  
किउ णिरत्थु दरिसाविय-भंगउ

तइयउं वंक-मयंक-समाणउं  
पंचमु वइवस-महिस-सिंगु व गुरु  
सत्तमु सुरकरि-दंत-सम-प्पहु  
णवमउं णारसीह-लंगूलु व  
एयारहमउं जिह कुल-णासिउ  
तं तं हरइ मंडु विहि णावइ  
णिग्गुणे कहि-मि धम्मु कहिं लग्गइ  
वंक-संगु किं कासु-वि चंगउ

४

८

घत्ता

णिच्चेट्टु परव्वसु पत्थ-गुरु  
णिद्धणउ जुण्णउ जज्जरउ

ढुक्क पमाणु भग्ग-सिहउ ।  
णं थिर-दोणु जे सच्च-मउ ॥

१०

[११]

तहिं अवसरे तोसिय-मणेहिं  
लेवि लेवि सुर-पायवहो

सइं हरि-हर-कमलासणेहिं ।  
कुसुमइं धित्त सिरि जायवहो ॥

१

विंधइ दूरु दोणु एत्तिय-गुणु  
तिण्णि-वि गुण सच्चइहे रणंगणे

कण्णु दिढ-प्पहारि वलि अज्जुणु  
एम देव बोल्लंति णहंगणे

स-धणु स-तोणु ताम सिणि-णंदणु	दारुअ-अणुव-पचोइय-संदणु	४
वासव-सुयहो सीसु जस-लुद्धउ	कंचण-केसर-सीह-महद्धउ	
सयड-वूहु फेडंतु अगायरु	मच्छु जेम गउ भिंदेवि सायरु	
पेक्खंतहं किव-कण्ण-विगण्णहं	रहवरु वाहिउ उप्परि अण्णहं	
जो जो दारुणु णु विण्णासइ	सो सो सर-भरियंगु पणासइ	८
हय-गय-णर-णरिंद संघारेवि	सच्चइ-वाण जंति महि दारेवि	

घत्ता

दुम्मुह सलोह वण्णुज्जला	विंधण-सीला पाणहर ।	
गुण-मुक्का धम्म-विवज्जिया	तो-वि मोक्खु पावंति सर ॥	१०

[१२]

सच्चइ सच्चाहिट्टियउ	रणे पहरंतु अणिट्टियउ ।	
एम महारहु संचरइ जमु	जिह वाल-कील करइ ॥	१

गेज्जुज्जले सारंग-पसाहणे	भिडिउ कलिंग-महागय-साहणे	
हय-ढक्का-रव-वहिरिय-णहयले	पायवीढ-पीडिय-पिहिवीयले	
दंति-दंत-दंतुरिय-दियंतरे	मय-सरि-सित्त-सोत्त-गत्तरे	४
कर-मंडव-परिपिहिय-दिवायरे	मय-णइ-पूराऊरिय-सायरे	
कण्ण-पवण-कंपाविय-महिहरे	मय-परिमल-मेलाविय-महुयरे	
लइय णिरंतरं जायव-वाणेहिं	आयए णाय-काय-परिमाणेहिं	
छिण्ण हत्थ पाडियइं विसाणइं	विसहर-वेणु-करीर-समाणइं	८
सिरइं स-देहइं भिंदेवि घाएं	णीसरंति सर पच्छिम-भाएं	

घत्ता

सच्चइ-णाराय ण वीसमिय	दारेवि करि-कुंभत्थलइं ।	
णव-पाहुडु अज्जुण-केसरिहिं	णिंति णाइं मुत्ताहलइं ॥	१०

[१३]

दलिय-कुंभि-कुंभत्थलइं	कड्डिय-सिय-मुत्ताहलइं ।	
केसरि जिह परिसक्कियउ	तिह पहरिउ जिह परिसक्कियउ ॥	१

## रिद्धणे मिचरिउ

तहिं अवसरे धाइउ सइणेयहो  
 चंड-कंड-कोयंड-भयंकरु  
 वाहिय-रहु पवणुद्धुय-धयवडु  
 आसत्थाम-मामु सिय-माणणु  
 तो सिणि-सुएण सरेहिं पच्छाइउ  
 वणिय तुंगम किउ विणिवारिउ  
 भगइं रह-गय-तुरयाणीयइं  
 छिण्णइं सिरइं कमल-संकासइं

खय-दिणयर-कर-दूसह-तेयहो  
 हय-विवक्ख-पडिवक्ख-सुहंकरु  
 रणसिरि-रामालिंगण-लेहडु  
 णं केसरि रव-वहिरिय-काणणु  
 चक्क-रक्ख-हय-सारहि घाइउ  
 पुट्टि देंतु गउ कह-वि ण मारिउ  
 णरवर-विंदइं कियइं अजीयइं  
 णच्चावियइं कबंध-सहासइं

घत्ता

भंजंतु असेस णराहिवइ  
 मसि-कुच्चउ देविणु दूहवइ

सच्चइ वूहे पइडु किह ।  
 सुहय विलासिणि हियइं जिह ॥

[१४]

सिणि-णंदण वइसाणरेण  
 दड्डइं रिउ-साहण-वणइं

सर-जालोलि-भयंकरेण ।  
 रह-गिरि-धय-तरुवर-घणइं ॥

भगइं दारुण-पहरण-वीयइं  
 अंगराय-वल्हिक-वलाइ-मि  
 तहिं अवसरे विष्कारिय-धम्मं  
 जायव थाहि थाहि कहिं गम्मइ  
 भुंजउ अज्जु रज्जु हरसिय-मणु  
 तं णिसुणेविणु रोसिउ माहउ  
 छहिं सोलहहिं णिहउ सिणि-तोएं  
 उरे माहवेण समाहउ सत्तिए

दाहिणत्त-कंवोयाणीयइं  
 भिण्णइं दूसहइं गिरि अचलाइ-मि  
 सिणिवइ हक्कारिउ कियवम्मं  
 जिवं विहिं हणइ एक्कु जिह हम्मइ  
 धम्म-पुत्तु जिम जिम दुज्जोहणु  
 पुणु किउ घोरुगारु महाहउ  
 एक्कवीस सर लाइय भोएं  
 पडिवउ पूरिउ सरवर-पंतिए

घत्ता

हयवर-सारहि-सिरु खुडिउ  
 कियवम्मउ पंडव-वलहो गउ

लहु अण्णहिं रहवरे संचडिउ ।  
 सच्चइ कंवोयहं भिडिउ ॥

[१५]

गंधवाह-धूवंत-धउ भद्विउ दोणहो पासु गउ ।  
 वूह-वारे एक-रहु थिउ दारुणु समरारंभु किउ ॥ १

ताम तुरंगम-रह-गय-वाहणु धाइउ सरहसु पंडव-साहणु  
 हय-पडु-पडह-पवाड्विय-कलयलु णं पसरिउ मयरहर-महाजलु  
 भद्विय-थाणंतरु पेळंतउ कुरु-गुरु वूह-वारे भेळंतउ ४  
 रहवरु देवि अमाणुस-गम्में तव-सुय-वइणि(?) धरिय कियवम्में  
 जमल-सिंहंडि-राय-धड्डज्जुण पंचहिं पंचहिं सरेहिं कियारुण  
 विद्धु भीमु सत्तरिहिं पिसक्केहिं पुणु आसीविसहर-लल्लक्केहिं  
 कंपिउ भूमि-कंपेण व महिहरु णिवाडिउ मुच्छा-विहलु विओयरु ८  
 चेयण पावेवि कोतिहे तोएं मुक्क सत्ति विहिं खंडिय भोएं

घत्ता

तिहिं मारुइ तिहिं अवर हय छिण्ण सिंहंडिहे तणउ धणु ।  
 धाइउ फर-करवाल-करु णं स-पयंगु स-विज्जु धणु ॥ १०

[१६]

कियवम्महो गुण-मंडियउं धणु करवालें खंडियउं ।  
 तो विरइय-सर-मंडवेहिं विद्धु अणंतरु पंडवेहिं ॥ १

अवरइं चावइं लेवि भयंकर भिडिय जुहिडिल-कुरुवइ-किंकर  
 हउ असीहि मग्गणेहिं थणंतरे मुच्छा-विहलु पडिउ णिय-रहवरे  
 ओसारिउ सिंहंडि-जुत्तारें कलयलु किउ कुरु-खंधावारें ४  
 पंडव दसहिं दसहिं विणिवारिय ओणय-मुह अमरेहिं धिक्कारिय  
 तहिं अवसरे हरि-वल-कुल-दीवउ सच्चइ जंतु णियंतु पडीवउ  
 सारहि वाहि वाहि रहु तेत्तहे धम्म-पुत्तु परिपीडिउ जेत्तहे  
 वट्टइ गमणु ताम परिसेसहु पच्छइ पत्थहो कुढे लग्गोसहु ८

घत्ता

णिउ रहवरु दारुय-भायरेण वेण्णि-वि सरेहिं समावडिय ।  
 आमिस-लालस सदूल जिह णहेहिं परोप्परु अब्भिडिय ॥ ९

[१७]

तो कियवम्मं हियए हउ तेण-वि धय-धणु-छेउ कउ ।  
 वि-रहु अ-सारहि णित्तुरउ कह-वि ण वइवस-णयरु गउ ॥ १

पाडेवि चक्क-रक्ख गउ सच्चइ सरहसेण विहसेप्पिणु वुच्चइ  
 सारहि जाहि जाहि वीसत्थउ को महु रण-मुहे भिडेवि समत्थउ  
 एहु जे दोणहो अवरेहिं पासेहिं भणमि अणीउ पिसक्क-सहासेहिं ४  
 वाहि वाहि रह-तुरय-वरेण्णइं जहिं तिगत-संसत्तग-सेण्णइं  
 दिणमणि-वण्ण-महाहय-जोडा वाहिय चंद-समप्पह घोडा  
 वेढिउ हत्थि-हडेहिं पडिवारउ मघ-गउ घणेहिं णां अंगारउ  
 विंधइ आयस-सिरेहिं कियायरु गिरिहिं व उप्परि तवइ दिवायरु ८  
 छिण्णइं स-गयइं गय-उवगरणइं कंवल-पक्खर-सय-आवरणइं

घत्ता

अण्णहिं कर अण्णहिं देह गय अण्णहिं करि-कुंभत्थलइं ।  
 सइं भूमिहे णां परिट्टियइं अहि-वम्मीय-सिलायलइं ॥ १०

इय रिद्धणेमिचरिए धवलइयासिय-सयंभुएव-कए  
 चउसट्टिमो सगो ॥

## पंचसङ्घिमो संधि

गय-साहणु चूरिय समर-मुहे गं पंचाणणु णिच्चडिउ ।  
वाणासण-वीयउ एक-रहु सच्चइ जलसंधहो भिडिउ ॥ १

[१]

भिडिय वे-वि गं मत्त महा-गय रुप्पिय-कवय सुवण्ण-मयंगय  
तावणीय-माला-मंडिय-सिर जलहर-रव-गंभीर-महग्गिर  
चित्त-जोहि केसरि लहु-विक्रम वसह-खंध देविंद-परक्कम  
सुरधणु-अणुहरमाण-धणुद्धर कुंडल-पह-जिय-चंद-दिवायर ४  
तो सिणि-णंदणेण अपमाणेहिं भिण्ण कुंभि-कुंभ-त्थल वाणेहिं  
णिय-कुल-विक्रम-राय-मयंधे धणु सच्चइहे भिण्णु जलसंधे  
पुणु पंचहिं पडिविद्धु थणंतरे अवरु सरासणु लेवि खणंतरे  
तिक्ख-खुरुप्पे मुट्टिहे ताडिउ सङ्घिहिं कह-व कह-व उप्पाडिउ ८

घत्ता

जलसंधे आयस-तोमरेण भिण्णु महा-भुउ जायवहो ।  
लक्खिजइ पवरु भुवंगु जिवं डाले वइट्टउ पायवहो ॥ ९

[२]

तीसहिं जायवेण धणु छिज्जइ तेण-वि स-फरु क्वाणु लइज्जइ  
धाइउ दुद्धम-देह-वियारउ धणु सच्चइहे छिण्णु वे-वारउ  
अवरु लेवि जमदूय-समाणेहिं पाडिय वाहु वे-वि विहिं वाणेहिं  
सिरु तइएण खुरुप्पे तोडिउ हंसं सहसवत्तु णं मोडिउ ४  
तो रुप्प-रह णिसायर धाइय विहिं मग्गणेहिं वे-वि विणिवाइय  
पच्छए लग्गु दोणु तहिं अवसरे णाइं कयंतु चडेप्पिणु रहवरे  
तेहत्तरिहिं विद्धु पुणु सत्तहिं दूसासणेण समाहउ अट्टहिं  
दुम्मरिसणेण चउवीसद्धेहिं दूसासणे चालीसद्धेहिं ८  
दुम्मुहेण तेत्तिएहिं जे वाणेहिं दुज्जोहणेण अणेय-पमाणेहिं



घत्ता

ते सयल-वि एक्कें जायवेण सरवर-लक्ख परज्जिय ।  
 गय गरुडहो पवर-भुवंग जिह कहि-मि मडप्पर-वज्जिय ॥

१०

[३]

तो सिणि-णंदणेण ते सव्व-वि आयामिय परिवड्ढिय-गव्व-वि  
 विद्धु विगण्णु पंचवीसहिं खणे दुम्मरिसणु वारहेहिं रणंगणे  
 णवहिं सरेहिं लिहिउ सच्चव्वउ ++++++  
 दूसहु दसहिं दोणु तिहिं ताडिउ अट्टहिं चित्तसेणु णिद्धाडिउ  
 अट्टहिं विजउ विविंझइ वीसेहिं दुम्महु विहिं दूसासणु तीसेहिं  
 दुज्जोहणहो सरासणु खांडिउ अवरु लयउ चामीयर-मंडिउ  
 छाइउ सर-सएण सिणि-णंदणु कुरुव-भडेहि-मि वेढिउ संदणु  
 तेण-वि जो जो तहिं पारक्कउ तच्छिउ दसहिं दसहिं एक्केक्कउ

४

८

घत्ता

रहु सारहि धउ धणुवरु तुरय पाडेवि अट्टहिं सरेहिं हउ ।  
 दुज्जोहणु भंजिउ सच्चइहे चित्तसेण-रहवरे गउ ॥

९

[४]

पच्छए लग्गु ताम कियवम्मउ वाहिय-रहु अप्फालिय-धम्मउ  
 करि णिएवि पंचाणण-पोएं णिय-जुत्तारु वुत्तु सिणि-तोएं  
 सारहि वाहि वाहि रहु भोयहो हम्मउं पेक्खंतहो कुरु-लोयहो  
 वाहिउ रवि-ससिहर-लल्लक्केहिं रहु चिक्कार-करंतेहिं चक्केहिं  
 विण्णि-वि भिंडिय विविह-विण्णाणेहिं विण्णि-वि पोमाइय गिक्वाणेहिं  
 एक्कमेक्क पहरंति समच्छरु किउ कडवंदणु विहि-मि भयंकरु  
 भीम-भुअंग-भोय-भय-भीसेहिं सच्चइ विद्धु सरेहिं छवीसेहिं  
 तेण-वि हउ असीहिं तेसट्टिहिं धुरि सत्तरिहिं सिलीमुह-लट्टिहिं

४

८

घत्ता

अवरेक्कु देहु देहावरणु भिंदेवि महिहे पइड्डु सरु ।  
 आसीविसु पवर-भुयंगु जिह भक्खेवि गउ अप्पणउं घरु ॥

९

[५]

पाडेवि कियवम्माणु पवच्चिउ  
 ताडेवि तिहि-मि तिविक्कम-भायरु  
 अवर-वि जे पिसक्क परिपेसिय  
 वीसहिं पंचासहिं सोणासेहिं  
 तेण-वि तेत्तिएहिं गुरु छाइउ  
 दियवइ पडिवउ णवहिं णिवारिउ  
 सारहि रहवरु सएण विहट्टिउ  
 थिउ सु-परिट्टिउ दोणु महाहवे

घत्ता

तिहिं तिहिं तुरंग एक्केण धउ  
 को ण मुयइ दुट्टु कलत्तु जिह

पडिवउ दोणायरिएं खंचिउ  
 णाइं ति-सिंगु परिट्टिउ महिहरु  
 ते विउणेहिं सब्व णीसेसिय  
 पुणु पडिवउ परिपिहिउ सहासेहिं ४  
 विहि-मि परोप्परु कह-वि ण घाइउ  
 णवहिं महद्धउ दंडु वियारिउ  
 सोण-तुरंग-वेगु ओहट्टिउ  
 सत्तरि मग्गण लाइय माहवे ८

अवरें धणु दोहाइयउं ।

जं ण-वि मुट्टिहे माइयउं ॥

९

[६]

मुक्क गयासणि सिणि-दायाएं  
 अवरु सरासणु लेवि किया-वरु  
 सारहि ताम समाहउ सत्तिए  
 विहलंधल-सरीरु मुच्छाविउ  
 पंचहिं कवउ भिण्णु उरु रक्खेवि  
 भदिय-भायरेण जुजुहाणें  
 एक्कें कणय-कलसु धणु एक्कें  
 पाडिय चक्क-रक्ख रह-चक्कइं

घत्ता

जो दुण्णय-दोसु आसि कियउ  
 धणु कट्टेवि सच्चइ-राउलेण

वारिय आसत्थामहो ताएं  
 विंधइ जाम जणट्टण-भायरु  
 पुणु पडिवारउ सरवर-पंतिए  
 कह-व कह-व ण वसुंधर पाविउ ४  
 तं गुरु-चरिउ असेसु-वि लक्खेवि  
 सारहि पाडिउ एक्कें वाणें  
 तुरय चयारि-वि णिहय चउक्कें  
 दुट्ट-कलत्तइं जिह वि ण थक्कइं ८

सो एवहिं णिव्वाडिउ ।

दोणु णाइं विब्भाडिउ ॥

९

[७]

गय कियवम्म-दोण तहो भज्जेवि  
 सिणि-णंदणु पइट्टु अणिवारिउ

णिय-थाणंतरे कुरव पलज्जेवि  
 सुअरिसणेण ताम हक्कारिउ

## रिद्धणेमिचरिउ

१४

तुहं हेवाइउ अवरेहिं लोएहिं  
पहरु पहरु जय-सिरि आसंघेवि  
एम भणेवि विद्धु थिरु थाएवि  
ते सर छिण्ण जणदण-भाएं  
सुअरिसणेण चयारि-वि घोडा  
तो माहवेण तुरंगम घाइय

कण्ण-कलिंग-दोण-किव-भोएहिं  
कउ पइसरहि वूहे मइं लंघेवि  
अग्गि-सुवण्ण-वण्ण-णाराएहिं  
कम्म-बंधु जिह खीण-कसाएं  
हणिय सिलीमुह लाएवि थोडा  
हउ धउ चाव-लट्टि दोहाइय

४

८

घत्ता

सारहि-सुयरिसण-महा-सिरइं  
णक्खत्तइं विण्णि वलंताइं

भल्ल-खुरुप्पेहिं ताडियइं ।  
णं आयासहो पाडियइं ॥

९

[८]

जायवेण वोल्लाविउ सारहि  
दोण-महा-समुदु मइं लंघिउ  
अज्जुण-कर-विप्फारिय-जीवहो  
वट्टइ सुहइं णिमित्तइं जायइं  
जवण-किराय-दरय-कंवोयहं  
केरल-मुरलाणीय-णर-जट्टहं  
गुज्जर-गउड-लाड-सोरडहं  
कोहड-कुसिय-कुणीर-कुणिंदहं

वाहि वाहि रहु अगए सारहि  
एवहिं कुरु-णिहाउ आसंघिउ  
सट्टु सुणिज्जइ उहु गंडीवहो  
वाहि वाहि जहिं सेण्णइं आयइं  
टक्काहीर-कीर-खस-लोयहं  
पच्छल-सिंधल-मेहल-भोट्टहं  
कच्छ-खुद्द-मालव-मरहट्टहं<sup>१</sup>  
जालंधर-णारायण-विंदहं

४

८

घत्ता

आयइं समरंगणे सयलइ-मि  
वहु-कालहो कालें भुक्खिएण

सेण्णइं मइं मारेवाइं ।  
कल्लेवउ अज्जु करेवाइं ॥

९

[९]

आयइं वलइं ताम मारेसमि  
होहि सुमित्त महाहवे धीरउ

पच्छए णरहो पासु जाएसमि  
हउं सच्चइ दुब्भेय-सरीरउ

१. हि. वंग तिलंग मलय मरहट्टहं

पत्थ-मूले सिक्खियइं महत्थइं  
 दूर वाउ(?) सिक्खविउ अणंते  
 दिण्णु गयायरिणण असक्कें  
 कामें सद्द-वेहु सहुं दिट्ठिए  
 तो जोत्तारें वाहिउ संदणु  
 वंचेवि णर-णरिंद जे थोडा

देवासुर-विद्दवण-समत्थइं  
 दिढ-पहरत्तणु रेवइ-कंते ४  
 दोमइ-वल्लहेण लहु एक्कें  
 को चुक्कइ रिउ णिवडिउ दिट्ठिए  
 कुरु-मज्जेण गयउ सिणि-णंदणु  
 गयणु पियंत जंति णं घोडा ८

घत्ता

सव्वइं दुज्जोहण-साहणइं एक-रहेण णिरुद्धाइं ।  
 गय-जूहइं जिह पंचाणणेण जीविय-संसए लुद्धाइं ॥ ९

[१०]

समारंभिओ भीसणो संपहारो  
 सरुक्करण-संछाइए अंतराले  
 खुडिज्जंत-चूडामणि-छिण्ण-पट्टो  
 दलिज्जंत-मायंग-कुंभत्थलोहो  
 पहम्मंत-चिंधो खुडंतायवत्तो  
 स-सीसक्क-छिज्जंत-सुंडीर-सीसो  
 वसा-मेय-मज्जंत-णच्चंत-भूओ  
 ण सो तत्थ वाहो ण जो भिण्ण-गत्तो  
 ण सो संदणो जस्स चक्कं ण छिण्णं  
 ण सो किंकरो जेण सीसं ण दिण्णं  
 ण सेण्णस्स तं तेरिसं आयवत्तं  
 पणट्ठा भडा के-वि अण्णे णियत्ता

विहंगावली-जाय-गयणंधयारो  
 स-माणिक-तुटंत-सण्णाह-जाले  
 ललंतंत-गुप्पंत-पाइक्क-थट्टो  
 विणिग्गंत-मुत्तावली-दिण्ण-सोहो ४  
 वसा-वीसढो लोहिओहाणुरत्तो  
 सिवा-मुक्क-फेक्कार-पब्भार-भीसो  
 इमो एरिसो संगरो एम हूओ  
 ण सो कुंजरो जो धरित्तिं ण पत्तो ८  
 ण सो पत्थिवो जस्स अंगं ण भिण्णं  
 ण सो सामिओ जेण पासं ण रुण्णं  
 ण तं पंडुरं जं च भूमिं ण पत्तं  
 रणे वावरंता सुभिज्जंत-गत्ता १२

घत्ता

गय णव दस वीस तीस तुरय सत्तरि सङ्घि असी-वि णर ।  
 रणे ओलि णिवद्ध कडंतरेवि पुणु महियले खुप्पंति सर ॥ १३

[११]

एम करेवि महंतु महाहउ  
दुज्जोहणेण ताम तिहिं अत्थेहिं  
सारहि विहिं परिवड्ढिय-माणेहिं  
पेसिय-घोर-महाहव-कामे  
दूसहेण पण्णारस तोमर  
तिहिं तिहिं सो-वि हणंतु ण थक्कइं  
विंधइ वलइ धाइ हक्कारइ  
खंडिउ सउणिहे धणु एत्थंतरे

सरहसु जाम पयइइ माहउ  
चउहिं तुरंगम चिंधउ सत्तेहिं  
सत्तहिं चित्तसेण-अहिहाणेहिं  
पंचवीस सर सउणीय-मामे  
सोलह दूसासणेण महा-सर  
सच्चइ सेण्णु जेवं परिसक्कइं  
छिंदइ सर णरवर विणिवारइ  
कुरुव-राउ तिहिं भिण्णु थणंतरे

४

८

घत्ता

हउ चित्तसेणु मग्गण-सएण दूसहु दसहिं सिलीमुहेहिं ।  
दूसाणणु दूसिउ सत्तरिहिं रुहिरु वहाविउ रण-मुहेहिं ॥

९

[१२]

अवरु लेवि धणु सउणिय-मामे  
दुम्मुहेण वारहेहिं समाहउ  
दूसासणेण दसहिं सम-घाएं  
तिहिं सुमित्तु सारहि उरे ताडिउ  
तो सिणि-णंदणेण ते तज्जिय  
सारहि मारिउ कुरुवइ-केरउ  
तं णिएवि साहणइं पणइइं  
पच्छए लग्गु खत्तु रिउ-वूहए

पण्णारहेहिं विद्धु जस-कामे  
दूसहे णवेहिं दूसह-साहउ  
तेहत्तरिहिं णिहउ कुरु-राएं  
णवहिं महद्धउ कह-वि ण पाडिउ  
पंचहिं पंचहिं सब्व परज्जिय  
रहवरु तुरएहिं णिउ विवरेरउ  
गरुडहो णायउलाइं व तद्धइं  
णं सुंघंतु वग्घु मिगि-जूहए

४

८

घत्ता

जहिं हत्थि-हडउ जहिं तुरय-थड रहवर-विंदइं जहिं जे जहिं ।  
जिह विज्जु-पुंजु उप्परि गिरिहे सच्चइ णिव्वडइ तहिं जे तहिं ॥

९

[१३]

ते अट्टठु कुणिंद-कुणीरेहिं  
सिल-प्पहाण-सिलिक्का-हत्थेहिं

दय-किराय-पमुह वर-वीरेहिं  
खेवणि-मुट्ठि-गयासणि-हत्थेहिं(?)

सव्वेहिं सच्चइ लइउ अक्खत्तें	तेण-वि ते आढत्त पयत्तें	
तिरिय-तोमर-कणिय-घाएहिं	वइहत्थिय-विवाड-णाराएहिं	४
वच्छदंत-खुर-थूणा-कण्णेहिं	एवं सिलीमुहेहिं अण्णण्णेहिं	
णहे पेक्खंतहं सुरवर-विंदहं	दिण्णइं पहरण-णिवह णरिंदहं	
तोडइ सिर-कमलइं कर-पल्लव	पाय-पओरु हणिय सर-पल्लव	
तिण्णि सहासइं हयइं हयत्थहं	पंच-सयइं वर-खेवणि-हत्थहं	८

घत्ता

दस सयइं गइंदहं मत्ताहं	एयारह सय रहवरहं ।	
घाइय वे सहस तुरंगहं	केण संख वुज्झिय णरहं ॥	९

[१४]

हय-गय-रह-णरवर-उवगरणेहिं	छाइय मेइणि विविहाहरणेहिं	
वावण-कुमुएरावय-संभव	मंद-भद्द-संकिण्ण-मउब्भव	
संचूरिय(?) मेइणि असेस तंवेरम	कइकय-आजाणेय-तुरंगम	
जं सिणि-णंदणेण सर-सीरिउ	तं दूसासणेण वलु धीरिउ	४
दुज्जोहणेण सेण सु-गवेसिय	जे पहाण जोह ते पेसिय	
एहु गावग्गणु घाय ण वुज्झइ	पर सामण्णेहिं अत्थइं जुज्झइ	
तो आढत्तु तेहिं सामण्णेहिं	तेण-वि ते मग्गणेहिं अग्गण्णेहिं	
कय पाहण फुट्टंति सिलिकेहिं	भग्गइं वलइं वलंत-तिडिकेहिं	८

घत्ता

तो सहस-सयहं पंचहं सयहं	लक्खहं सीसइं छिण्णइं ।	
जायवेण रणंगणे देवयहो	णं ओवाइउ दिण्णइं ॥	९

[१५]

णासइ कुरुव-राउ दूसासणु	दुम्महु चित्तसेणु दुम्मरिसणु	
तहिं अवसरे परिवट्ठिय-वेरें	वुज्झइ आसत्थाम-जणेरें	
सारहि णेहि महारहु तेत्तहे	सच्चइ कुरु-कडवंदणु जेत्तहे	
जे एवहिं जे हयइं कोवंडइं	अज्ज-वि थरहरंति उरे कंडइं	४
जायउ जाउ धणंजय-मग्गे	खज्जउ वलु जिह जगु उवसग्गे	

## रिद्धणेमिचरिउ

१८

ताम विसज्जिय-ससर-सरासणु  
पभणइ गुरु णासंतु ण लज्जहि

दिट्ठु पलायमाणु दूसासणु  
एक्कहो किह समरंगणे भज्जहि

घत्ता

विस-जउहर जूउ केस-ग्गहणु  
कहिं एवहिं णासइ णीसुइय

गो-ग्गहु कवडु मंतु करेवि ।  
जायव-जम-मुहि पइसरेवि ॥

८

[१६]

अच्छउ मारुइ पत्थु स-घुडुक्कउ  
दोमइ दासि संब भीमज्जुण  
पउ एवहिं म देहि विवरेरउ  
तं णिसुणेवि वलिउ दूसासणु  
छाइउ सिणि-सुउ सरवर-जालें  
अंतरे वाहिउ ताम तिगत्तेहिं  
तिण्णि सहास ताहं वइसारिय  
सारहि णिहउ महारहु खंडिउ

सच्चइ-सरेहिं जे पाणेहिं मुक्कउ  
एम भणंतओ सि कुरु णिग्गुण  
भीमें सिरु तोडेवउ तेरउ  
जम-भू-भंगुरु लेवि सरासणु  
तेण-वि सो-वि अणिओह-करालें  
जय-सिरि-सुर-वहु-रामासत्तेहिं  
चउ जुवराय-तुरंगम मारिय  
धउ स-पडाउ-वि हासेवि छंडिउ

४

८

घत्ता

दूसासणु सल्लिउ वच्छयले  
पच्छा एवि णिउ सवडम्महउ

सो-वि सुसम्मं जय-मणहो ।  
दुज्जसु णं दुज्जोहणहो ॥

९

[१७]

सच्चइ धरेवि ण सक्किउ आएहिं  
णक्कण-तामलित्त-तुक्खारेहिं  
अंग-कलिंग-वंग-मंगालेहिं  
आजाणेय-जवण-जउहेएहिं  
तो णारायणेण णरु वुच्चइ  
दीसइ कंचण-केसरि-चिंधउ  
पभणइ सव्वसाइ किं आए  
जो परिरक्खइ सो-वि विसज्जिउ

दरय-कुणिंद-कुणीर-किराएहिं  
मागह-सूरसेण-गंधारेहिं  
उडु-पउडु-मुंड-महिपालेहिं  
ओयहिं अवरेहि-मि अपमेएहिं  
अच्छइ आउ गवेसउ सच्चइ  
रुंजइ जलयरु जय-जस-लुद्धउ  
णासिउ कज्जु जुहिंट्टिल-राएं  
को पहु णंदइ णाइ-विवज्जउ

४

८

घत्ता

रवि लंवइ रिउ ण समावडइ दोणु ण जाणहुं किं करइ ।

एकल्लउ अच्छइ धम्म-सुउ अज्जुणु चिंतहे पइसरइ ॥

९

[१८]

सच्चइ एइ जाम जहिं केसवु

अंतरे थक्कु ताम भूरीसवु

जायव-हरिण दुक्कु लइ ओरें

कमु णिवद्धु मइं सीह-किसोरें

धाइउ तो णारायण-भायरु

जगु लंघंतु णाइं खय-सायरु

भिडिय परोप्परु सरवर-जालेहिं

केसरि-दीहर-णहर-करालेहिं

४

करयर-राउ करंतेहिं चावेहिं

सुरधणु-विब्भम-भंगुर-भावेहिं

विहि-मि परोप्परु सारहि ताडिय

विहि-मि परोप्परु रहवर पाडिय

विहि-मि परोप्परु णिहय तुरंगम

वे-वि वलुद्धुर णाइं विहंगम

विहि-मि परोप्परु कवयइं भिण्णइं

विहि-मि परोप्परु चावइं छिण्णइं

८

विहि-मि चम्म-रयणइं उरे भरियइं

विहि-मि करेहिं करवालइं धरियइं

घत्ता

उडुंति पडंति भमंति णहे

घाय दिंति सिरे उर-करहं ।

फर-विंदहं असिवर-विज्जुलहं

अणुहरंति णव-जलहरहं ॥

१०

[१९]

विहि-मि चमर-रयणइं रणे भग्गइं

विहि-मि परोप्परु छिण्णइं खग्गइं

विहि-मि परोप्परु चावइं भिण्णइं

विहि-मि परोप्परु कवयइं छिण्णइं

विण्णि-वि वावरंति कर-पहरेहिं

दसणेहिं करि व हरि व वर-णहरेहिं

दाढेहिं कोल व सिंगेहिं महिस व

तिहिं भूविहिं सच्चइ-भूरीसव

४

पुणु अब्भंतर-वाहिर-मगेहिं

विग्गह-पग्गह-पमुहेहिं करणेहिं

सोमयत्त-णंदणेण विरुद्धें

पाडिउ जायउ वेहाविद्धें

पाउ दिण्णु गले पच्चुच्चाइयु

किर अप्फालहिं महिहे पडाइउ

घत्ता

तो वुच्चइ णरु णारायणेण

सीसु धणंजय तउ तणउ ।

लहु छिंदहि भुय भूरीसवहो

मारिउ भायरु महु-तणउ ॥

८



[२०]

जाम ण मुच्चइ सच्चइ पाणेहिं	लइ विभच्छ ताम रिउ वाणेहिं	
भण्णइ किरीडि अकज्जु ण किज्जइ	खत्तु मुएवि केम पहरिज्जइ	
तो सहसत्ति कुविउ णारायणु	दुद्धम-दाणविंद-विणिवायणु	
कवणु खत्तु जहिं विसु संचारिउ	कवणु खत्तु जहिं जउहरु वालिउ	४
कवणु खत्तु जहिं किउ केस-ग्गहु	कवणु खत्तु जहिं मंडिउ गो-ग्गहु	
कवणु खत्तु जहिं मिलेवि तिगत्तेहिं	तुहुं एक्कल्लउ लयउ अणंतेहिं	
कवणु खत्तु जहिं विहउ णरिंदेहिं	रुद्धु भीमु भयदत्त-गइंदेहिं	
कवणु खत्तु तुह णंदण-घायणे	कवणु खत्तु घोडा-पय-पायणे	८

घत्ता

तो पत्थे अमरिस-कुद्धएण	पेक्खंतहो तहो केसवहो ।	
कुरुवइहे जयासालंभु जिह	छिण्णु वाहु भूरीसवहो ॥	९

[२१]

तो परिहरेवि जणदण-भायरु	धिद्धिक्कारिउ खंडव-डामरु	
णिम्मल-सोम-वंसे उप्पण्णहो	सयल-कला-कलाव-संपुण्णहो	
ण-वि जुज्जइ तुम्हारिस-पुरिसहं	एहु कम्मु पर महुमह-सरिसहं	
जे समुद्ध-पच्चंत-णिवासिय	णंद-गोव-सिणि-जायव-वंसिय	४
भण्णइ पत्थु सव्वहो तणु तम्मइ	जासु णियंतहो भाइ णिहम्मइ	
सोमयत्ति तं वयणु सुणेप्पिणु	थिउ देवाहिदेउ चिंतेप्पिणु	
जासु ण कोहु ण कामु ण कामिणि	जेण विवज्जिउ जम्मण-जामिणि	
जो संसार-मडप्पर-भंजणु	णिक्कलु परमु णिराउ णिरंजणु	८
सयल-भुवण-जण-मंगलगारउ	जो रुच्चइ सो होउ भडारउ	
तं झाएवि णिय-देहभंतरे	थिउ पाउग्गमे रणे सर-सत्थरे	

घत्ता

तिहि तिविहेण णीसल्लु किउ	सिणि-तणयहो सउरिहे णरहो ।	
देवाहिदेउ जिणु संभरेवि	सग्गहो गउ वंभुत्तरहो ॥	११

[२२]

पुच्छिउ सेणिएण तो गणहरु  
 सच्चइ जो तियसह-मि ण जिज्जइ  
 कहइ महा-रिसि मागहणाहहो  
 पुरु पउलासु णामु तं देवउ  
 तासु धीय देवय उप्पणी  
 णियय-सयंवरे वहु-अवलेयहो  
 धाइउ सोमयत्तु वर-वाएं  
 दिण्णु पाउ गले कह व ण मारिउ  
 लज्जेवि कह-वि पइट्ठु वणंतरे  
 जो पहु जेड्ड-पुत्तु तउ होसइ

कहि महु पहु संदेहु महत्तरु  
 कंठहो पाउ केम तहो दिज्जइ  
 तिविह-परम-सम्मत्त-सणाहहो  
 भुंजइ सयल-राय-किय-सेवउ ४  
 गुण-विण्णाण-कला-संपुणी  
 घत्तिय ताए माल वसुएवहो  
 पडिवाउ जुज्जे सिणि-राएं  
 रोहिणि-वल्लहेण विणिवारिउ ८  
 दइवी वाणि समुट्ठिय अंवरे  
 सो सिणि-सुयहो पाउ गले देसइ

घत्ता

तें कज्जे सच्चइ अहिहविउ समर-काले भूरीसवेण ।  
 उच्चाइउ लेवि सयं भुएहिं जिह गोवद्धणु केसवेण ॥

११

इय रिट्ठणेमिचरिए धवलइयासिय-सयंभुएव-कए  
 पंचसङ्घिमो सग्गो ॥

## छासडिमो संधि

किय सच्चइ णर-णारायणहं कुढे लगंतउ णिड्डविउ ।  
गुण-वयणेहिं भीमु जुहिड्डिलेण तिहि-मि गवेसउ पड्डविउ ॥ १

[१]

एत्तहे सिणि-णंदणु मिलिउ णं जम-दंडु समावडिउ ।  
एत्तहे कुरुव-राउ चलिउ पंडव-साहणे अब्भिडिउ ॥ १

तो दुमय-विराड धणुद्धरेण हय सर-सएण वाहत्तरेण  
विहि भल्लेहिं रायहो छिण्णु धणु पुणु पंचासिहिं रणे वणिउ तणु  
मच्छाहिउ तीसहिं उरे लिहिउ धड्डज्जुणु वीसहि विहलु किउ ४  
दस-सरेहिं परज्जिउ पवण-सुउ सहएउ णउलु तिहिं तिहिं तणउ  
पंचाल-पुत्त तिहिं तिहिं जे जिय अवर-वि सामंत णिरत्थ किय  
वलु सधणु वणिउ वइरिहिं तणउं पुणु गउ थाणंतरु अप्पणउं  
जहिं अज्जुणु दुक्कु जयदहहो णं पलय-महाधणु हुयवहहो ८  
एत्तहे-वि णवर दोणायरिउ पंचाल-पवले वले उत्थरिउ  
सरवरोहिं विहत्थी-मेत्तएहिं करिवर-कुंभत्थल-भेत्तएहिं

घत्ता

वले जले थले णहयले दिसि-वलये सर पज्जुण्णे दरिसियउं ।  
सो दीसइ कवणु पएसु ण-वि जेत्थु ण दोणे वरिसियउ ॥ ११

[२]

सो ण तुरंगमु सो ण गउ ण-वि रहु ण-वि पहु ण-वि य धउ ।  
रण-मुहे को-वि ण उव्वरिउ जो ण दोण-वाणेहिं भरिउ ॥ १

तं अलमल-मयगल-रव-मुहलु तुरमाण-तुरंगम-चलण-वलु  
रह-चक्क-किलामिय-धरणियलु धय-चिंधालुंखिय-गयणयलु

दप्प-हरण-पहरण-रण-कुसलु	गयमय-मेलाविय-अलि-सयलु	४
पडु-पडहहो सद्धिय-भुवणयलु	रण-रामालिंगिय-वच्छयलु	
पडिपेळ्ळिउ दोणे पंडु-वलु	णं पवण-गलत्थियउ उवहि-जलु	
पंचमुह-चवेड-चुक्क-सवलु	णं हरिण-जूहू छंडिय-कवलु	
ओलंविय-असि-फरु-कर-जुयलु	पल्लट्टिय-रहवरु वण-वियलु	८
ल्लिक्कविय-चिंधु परिचित्त-वलु	संभरिय-जुहिट्टिल-कम-कमलु	

घत्ता

तं पंडव-साहणु धीरवेवि	पंच कुमार समावडिय ।	
पंचेदिय जेम महारिसिहे	दोणायरियहो अब्भिडिय ॥	१०

[३]

सव्वाहरणालंकरिय	सुर-कुमार णं अवयरिय ।	
जण-मण-णयणाणंदयर	पंच-वि णाई अणंग-सर ॥	१

धट्टज्जुण-सोयर दुमय-पुत्त	कंचणमय-देहावरण-गुत्त	
सोवणण-महारह कणय-चिंध	दुव्वार-वइरि-वाहिणि-णिसिंध	
वीराहिवीरु वरवीरु केउ	पर चित्तणु कित्तणु चित्तकेउ	४
चित्तरहु सुवम्मउ चित्तवम्मु	धाइउ संबंधु करेवि धम्मु	
धउ पाडिउ मोडिउ आयवत्तु	धणु खंडिउ कह-वि ण परिसमत्तु	
तो कंचण-कलस-महा-धएण	किवि-कंते वेहाविद्धएण	
पंचहिं पंचहिं उर-लग्गणेहिं	जम-पट्टणु पेसिय मग्गणेहिं	८
णिय-बंधव-णिहणे पवत्तमाणे	धट्टज्जुणु धाइउ तहिं पमाणे	
सर मुएवि महारहु रहहो देवि	किर छिंदइ सिरु करवालु लेवि	

घत्ता

तो दोणे वइहत्थिय-सरेण	दुमय-पुत्तु विणिवारियउ ।	
धउ पाडिउ सारहि विद्धियउ	तुरएहिं रहु ओसारियउ ॥	११

[४]

तो धट्टज्जुण-णंदणेण गुरुभय-चोइय-संदणेण ।  
अद्धइं दस सर ताडियउ स-सरु सरासणु पाडियउ ॥ १

तो अवरु पवरु करे करेवि धम्म उरे विद्धु खुरुप्पे खत्तधम्म  
दोहाइउ धाइउ धरणि पत्तु णं दुमु दुव्वाएं भग्ग-गत्तु  
धट्टज्जुण-णंदणे विगय-पाणे विहखत्तु पधाइउ तहिं पमाणे ४  
कइकय-पहु वसह-समुद्ध-घोणु सर वीस चउकेहिं विद्धु दोणु  
तेण-वि वाहत्तरि वाण मुक्क विहखत्तहो णं जम-दूय दुक्क  
स-तुरंग स-सारहि सायवत्तु रहु भग्गु सो-वि जम-णयरु पत्तु  
दप्पुद्धरु धाइउ धट्टकेउ किउ तह-वि खणद्धे कंठ-छेउ ८  
तिह चेइयाणु तिह सइंभुमालि जरसंधहो सुउ तिह रयणमालि

घत्ता

जो जो दोणहो रणे अब्भिडइं तहो तहो भंजइ माण-सिह ।  
खर-णहर चवेडावट्टणेहिं हरिणु वेयारइं सीहु जिह ॥ १०

[५]

दुम्मएं अक्खोहणि-वलेण पेळ्ळिउ दोणु महा-वलेण ।  
रिउहुं करेप्पिणु चप्पणउं गउ थाणंतरु अप्पणउं ॥ १

विद्विउ गिएप्पिणु णियय-सेणु आयण्णेवि अण्णु-वि पंचयण्णु  
जाणावइ भीमहो धम्म-पुत्तु विणिवाइउ अज्जुणु रणे गिरुत्तु  
पालिय-परिहास-कियावलेउ सइं पहरइं मंछुडु वासुएउ ४  
सच्चइहे ण आया का-वि वत्त लइ जाहि वच्छ करि विजय-जत्त  
सिणि-णंदणु आहवे जइ समत्तु तो अक्खु लहेसहु सुद्धि केत्तु  
वुल्लेसइ मं पुणु को वि धुत्तु अहो पंडव-णाहें किउ अजुत्तु  
कुढे लाएवि णियय सहोयरासु माराविउ सुहि दामोयरासु ८  
तो वग-हिडिं व-वल-मदणेण वोळ्ळिज्जइ पवणहो णंदणेण

घत्ता

जइ आसिय वा मोक्कल्लिउ दोमइ-परिहवे दुविसहे ।  
तो सव्वु समप्पइ कुरु-वलु किउ विहवत्तणु उत्तरहे ॥ १०

[६]

तो-वि जुहिड्डिल अज्जु हउं करमि विहासिउ भाइ-सउं ।  
दुमय-सुयहे वद्धावणउं भाणुवइहे विहवत्तणउं ॥ १

थिउ मारुइ उप्परि संदणहो जयकारु करेवि तव-णंदणहो  
णं केसरि सिहरे महीहरहो णिक्खेवउ दोण-भयंकरहो  
अप्पाहिउ पहु धट्टज्जुणहो हउं वत्त-गवेसउ अज्जुणहो ४  
विप्फारिय-धणुवरु तुलिय-सरु णं तिउरहो समुहु पयड्डु हरु  
णं मंदरु खीर-महण्णवहो थाणंतरु कलस-समुब्भवहो  
किर दुक्कइ परिह-पयंग-भुउ रण-भोयण-कंखउ पवण-सुउ  
गय-साहणु अंतरे ताव थिउ तमि-पाराउड्डउ तेण किउ ८  
सरणियर -णिवारिउ दिसिहिं गउ णं जलण-जालु दुप्पवण्ण-हउ

घत्ता

तो दोणें विद्धु णिडालयले भीमें रोस-वसंगएण ।  
सरु मोडिवि घत्तिउ धरणि-वहे अंकुसु णाइं महागएण ॥ १०

[७]

तो सोणास-महारहेण वुच्चइ सुर-गुरु सच्छिवेण ।  
जाहि विओयर ओसरेवि इत्थु ण सक्कहि पइसरेवि ॥ १

जइ किर अणुमइए महारियए अज्जुणु पइड्डु गुरुयारियए  
तो मारुइए तुज्जु कहिं तणउं कुरु-वूहब्भंतरे पइसणउं  
पुणु पावणि पभणइ पणय-सिरु मयरहर-महारव-गहिर-गिरु ४  
पंचासी वरिसइं ताम तउ णरु णव-जुवाणु किर कवणु भउ  
अणुमइए जेण सो पइसरइ केसउ साहिज्जउ जसु करइ

## रिद्धणेमिचरिउ

२६

एवङ्क वार हउं अज्जुणहो  
एवहिं गुरु तव पच्चारियउ  
मेल्लिय सुघोस णामेण गय

आसंकिउ अण्णु-वि अवगुणहो  
वलु वलु कहिं जाहि अमारियउ  
तहो उप्परि णं जम-दिट्ठि गय

८

घत्ता

पंडव-पयंड-भुयदंड-धुय-लउडि-घाय-दुव्वाय-हउ ।

उप्पएवि महारह-पायवहो दोण-विहंगमु कहिमि गउ ॥

९

[८]

तहिं अवसरे दूसासणेण  
पेसिय सत्ति विओयरहो

णिय-कुल-कित्ति-विणासणेण ।  
सरि गिरिवरेण व सायरहो ॥

१

अद्ध-वहे जे पवण-सुएण छिण्ण  
धयरद्धहो णंदण दुण्णिवार  
विंदार-जेट्ट-विंदाणुविंद  
सुयारिसण-दुव्विमोयण-सुधम्म  
सुविसाल-णिरिक्खण-कुंडभेइ  
स-तुरंग स-सारहि स-रह दुक्क  
ते भीमें परिविंधण-मुहेहिं  
भड भिंदेवि हेट्टाणण पयट्ट

चउ-सरेहिं चयारि तुरंग भिण्ण  
एयारह अंतरे थिय कुमार  
धाइय मुक्कंकुस जिह गइंद  
सु-रउद्द-सुसेण-रउद्दकम्म  
जम-चंड-दंड-कोवंड-हेइ  
रवि-किरण-भयंकर सर विमुक्क  
तो सयल-वि लइय सिलीमुहेहिं  
गुण-धम्म-विहूणहं सा जि वट्ट

४

८

घत्ता

तो कुरुव करेप्पिणु सत्तुयउ  
केतहिं दूसासण जीय-जलु

पुणु-वि समच्छरु धाइयउ ।  
जोयइ णाइं तिसाइयउ ॥

९

[९]

तहिं अवसरे दोणाइरिउ  
पइसेप्पिणु सरवर-णिवहे

णाइं महाघणु उत्थरिउ ।  
रहु अप्फालिउ धरणि-वहे ॥

१

पुणु वीयउ लयउ विओयरेण  
पुणु तइयउ विप्फुरियाणणेण

गोवद्धणु णं दामोयरेण  
अट्टावउ णाइं दसाणणेण

पुणु लइउ चउत्थउ दुम्मुहेण  
 उच्चाइउ पुणु पंचमउ रहु  
 पुणु छट्टउ वइरि-वियारणेण  
 आयामिउ पुणु सत्तमउ रहु  
 अट्टमउ वि एम स-विग्गहेण  
 ते अट्ट महा-रहवर णिमिय

णं अमिय-महण-गिरि महुमहेण  
 सेसें असेसु णं धरणि-वहु ४  
 स-मघेण व धणु अंगारएण  
 णं वाहुवलीसरेण भरहु  
 णं ससहरु लइउ महागहेण  
 स-तुरंगम-सारहि धूलिकिय

घत्ता

तो अण्णेहिं अण्णेहिं रहे चडेवि  
 गउ पुट्टि देवि दोणायरिउ

झड ण सहंति विओयरहो ।  
 पडिवउ णिय-थाणंतरहो ॥ ८

[१०]

अज्जुण-धणु-गुण-गुंजियउ  
 भीमें सीह-णाउ कियउ

पंचयण्णु ओरुंजियउ ।  
 धम्म-पुत्तु आसासियउ ॥ १

पवि-पुत्तें जं किउ सीह-णाउ  
 खल खुद्द विओयर थाहि थाहि  
 तो एम भणेवि सर धिविय वीस  
 पंचहिं अवेरेहिं जुत्तारु लिहिउ  
 चउसट्टि विओयरु धिवइ तासु  
 कण्णेण चयारि विमुक्क वाण  
 पंडवेण मुक्क वहु वंस-वाण  
 रवि-सुएण सरेहिं सरोहु छिण्णु

तं धाइउ सरहसु अंगराउ  
 कहिं वलु अमणूसउ करेवि जाहि ४  
 पहु पासे ठंति किं कहि-मि वीस  
 स-धुरंधरु कासु ण जणइ दिहिउ  
 सइं मग्गण चाइहे जंति पासु  
 काणीण होति सइ तुच्छ-दाण  
 गुण-धम्म-रहिय सइ अप्पमाण ८  
 णिसियरहं विहंजेवि वलि व दिण्णु

घत्ता

कण्णहो कोवंडु पंडु-सुएण  
 को धणु णिज्जीउ ण परिहरइ

खंडिउ महि-मंडले पडिउ ।  
 जइ-वि महग्घ-कोडि-घडिउ ॥ १०

[११]

अवरु चाउ किर करइ करे  
 ताडिउ तिहिं तोमरेहिं उरे

ताम विओयरेण समरे ।  
 कह-वि ण छुद्धु कयंत-पुरे ॥ १



## रिद्धणे मिचरिउ

२८

धणु वीयउ छिण्णु महावलेण	सहुं सारहि सिरेण स-कुंडलेण	
सहुं तुरय-चउक्क-धवलुद्धुरेण	सहुं रहेण धएण कवंधुरेण	
तहिं अवसरे कायरु कुरुव-राउ	विहडण्णु दोणहो पासु आउ	४
अहो ताय ताय तुहुं काइं सिण्णु	जें तिहि-मि जणहुं पइसारु दिण्णु	
अज्जुण-जुज्जुहाण-विओयराहं	विस-विसमउ विसम-धणुद्धाराहं	
तिण्णि-वि महु साहणु विद्वंति	जम-काल-कयंतहं अणुहरंति	
तं णिसुणेवि पभणइ भूमि-देउ	वुच्चइ किं णरवइ णिरवलेउ	८
महु सरि-सुय-विउरहं ण किय वाय	एवहिं वोल्लहि किर काइं राय	
घत्ता		

जाहि जयद्दहु धीरवहि अक्खेवि कण्णहो सउवलहो ।  
हउं सच्चइ भीमें सूरियउ तुम्हे-वि ते-वि तामब्भिडहो ॥ ११

[१२]

जउहरे जुए केसग्गहणे गो-ग्गहे दूय-समागमणे ।  
ण किउ णिवारिउ महु तणउ एवहिं जीविउ कहिं तणउं ॥ १

तुहुं वेयारिउ तिहिं णीसण्णेहिं	सउणि-माम-दूसासण-कण्णेहिं	
जेहिं विरोहिय पंडव डंभें	लइय वसुंधर जूयारंभे	
जो जूवारु अज्जु सो दुक्कउ	रण-पिडु मंडेवि दाणउ मुक्कउ	४
जो गय-घड-सारिउ संपाडइ	जो भीमज्जुण पासा पाडइ	
चरु गमु छक्कु वज्जु जो लक्खइ	सिंधव-सीस-मरणु सो रक्खइ	
तो धर-कामधेणु-संदोहणु	दोणहो वयणेहिं गउ दुज्जोहणु	
जहिं परिवारिउ भड-संदोहेहिं	णरहो जयद्दहो विहिं सर-छोहेहिं	८
ताम दिट्ठ रवि-ससि-समतुल्ला	अज्जुण-चक्क-रक्ख जे भुल्ला	

घत्ता

(ताम) उत्तमोज्ज-जुहमण्ण रणे पत्थहो पहेण समुच्चलिय ।  
(लइ) वलहो वलहो कहिं पइसरहु कुरुव-णरिंदें पीडखलिय ॥ १०

[१३]

ते दुइ जण सो एक्कु जणु तिहि-मि भयंकरु जाउ रणु ।  
सर-सरवरेहिं अणेय हय चूरिय चामर छत्त धय ॥ १

दुज्जोहणेण ते वे-वि जिय तेहि-मि तहो संदण-हाणि किय  
गय चक्क-रक्ख पत्थहो मिलिय कुरु-मदराय एक्कहिं मिलिय  
एत्तहे वि विओयरु वावरिउ णं णर-णिहेण जमु संचरिउ ४  
वर-गय-चोवाण-हत्थु भमिउ णरवर-सिर-झेण्डुण रमिउ  
जगाडियइं असेसइं रिउ-वलइं उम्मण लण सोणिय-जलइं  
पाडियइं छत्त-चामर-धयइं णाडियइं महा-कवंध-सयइं  
कप्पियइ कुंभि-कुंभत्थलइं धिवियइं चउदिसु मुत्ताहलइं ८  
हय हय वर-सारहि णिड्डविय वहु वइवस-पट्टणु पट्टविय

घत्ता

रह मोडिय वूहइं फोडियइं गय-घड विहडाविय णट्ट णर ।  
जिह सीहहो तेम विओयरहो कण्णु जे अगगइ थाइ पर ॥ १०

[१४]

कुरु सेण्णहे सीमंतिणिहे णावइ दुच्चारित्तिहे ।  
भीमें सव्वु विणासु किउ एक्कु कण्णु पर कहि-मि थिउ ॥ १

रवि-सुएण रवि-किरण-करालें छायाउ माया-सरवर-जालें  
हसेवि सविब्भमु केरल-जाएं उरयडे विद्धु कण्णु णाराएं  
तेण-वि धणु-विण्णाणु पगासिउ पावणि देहावरणु विणासिउ ४  
कुरुव-कुरंगालंधिय-सीमें पंचवीस सर पेसिय भीमें  
धणु दोहाइउ रहवरु खंडिउ आयवत्तु धउ छिंदेवि छंडिउ  
सारहि भिण्णु तुरंगम घाइय वइवस-पुरवर-पंथें लाइय  
अंगराउ ओसरिउ रहंतरु कलयलु किउ सुरवरेहिं अणंतरु ८  
अण्णहिं रहवरे णवर चडेप्पिणु अहिणवु करे कोवंडु करेप्पिणु

घत्ता

स-विलकखु स-सज्झसु सूर-सुउ पडिवउ कह-वि कह-वि वलिउ ।  
सोमाइउ मत्त-महागएण लीलए कमलु जेवं कलिउ ॥ १०

[१५]

पुणु वि भिडिय परिकुविय-मण कण्ण-विओयर वे-वि जण ।  
सर जालालुंखिय-गयण तोसिय-हरि-हर-चउवयण ॥ १

विण्णि-वि सधणु रुहरि-जलोल्लिय जमल-पलास णाइं पप्फुल्लिय  
णित्तम-तवण-तणुत्तम-तोएं सर तेवीस मुक्क राहेएं  
तो कुरु-कुल-कलि-काल-विलासें रक्खस-वंस-विणास-पयासें ४  
विसु जउहरु पासा केस-ग्गहु दोमइ-हरणु वसणु वणु गोग्गहु  
गुण-विच्छाउ सरेप्पिणु वालहो चाउ चउत्थउ चंपा-पालहो  
पाडिउ हियउ णाइं कुरु-णाहहो दाढा-खंडु व आइ-वराहहो  
धणु पंचमउं छिण्णु रहु पाडिउ णं कुरुवाहं मडप्फरु साडिउ ८  
अवर-महारहे सिहर-णिसण्णे अच्चगलउ कम्मु किउ कण्णे

घत्ता

रहे अण्णहिं अण्णहिं संकमइ मासे मासे दस-सय-किरणु ।  
आइय पुणु घडियभंतरेण पंच वार किउ संकमणु ॥ १०

[१६]

तहिं अवसरे दुज्जोहणेण पर-वल-जल-अड्डोहणेण ।  
रवि-तणयहो उद्धरण-मण पेसिय भायर पंच जण ॥ १

दुम्मरिसण-दुज्जय-चित्तसेण दुम्मुह-दूसह बहु-अमरिसेण  
संकुद्धुद्धाइय रहवरत्थ वर सर-सरासण-हेइ-हत्थ  
गुरु-गंधवहुद्धुय-धयवडोह आइद्धावरण-णिवद्ध-कोह ४  
तो तेहिं महाहवणुज्जएहिं पंचहि-मि कुमारेहिं दुज्जएहिं  
आरोडिउ भीमु मइंद-कीलु रह-महिहर-धय-लंगूल-लीलु

संजमिय-तोण-केसर-सणाहु	णिप्पसर-सरासण-रसण-राहु	
सर-णहर-भयंकरु वलेवि थाइ	सारंगहं सीह-किसोरु णाइं	८
ते पंच-वि कम-वहे पडिय तासु	मुसुमूरिय-एक्कु वि णहु गयासु	
घत्ता		
तो अण्णें कण्णायट्टिएहिं	लइउ अणंतेहिं सरवरेहिं ।	
लक्खिज्जइ मारुइ मलउ जिह	रुदु चउदिसु विसहरेहिं ॥	१०
[१७]		
सो सर-पंजरु सर-सएण	विणिवारिउ पवणंगएण ।	
कण्णहो छट्टउ छिण्णु धणु	चूरिउ सयडु सोवकरणु ॥	१

रवि-सुएण विसज्जिउ लउडि-दंडु	सो भीमें किउ सय-खंड-खंडु	
तं वि-रहु णिराउहु णीएवि कण्णु	दुज्जोहणु दुम्मणु थिउ विसण्णु	
पट्टविय पडीवा अट्ट भाय	णिय-मित्तहो मित्त-सुयहो सहाय	४
ते चित्ताउह-चित्ताउ-चित्त	चित्तस्स-सरासण-चारुचित्त	
वुह-चित्तधम्म ओ अट्ट भाय	णं वग्घहो कम-वहे हरिण आय	
समकंडिउ मारुइ समुहु धाइ	आरोडिउ मिगेहिं गइंदु णाइं	
णाराएहिं पंडु-सुएण भिण्ण	गय धरणि महा-दुम णाइं छिण्ण	८
स-तुरंग स-सारहि सायवत्त	स-सरासण स-रह स-धय समत्त	
घत्ता		
अण्णहिं भुय अण्णहिं चरण गय	अण्णहिं सीसइं पाडियइं ।	
णं जउहर-ज्ज-महा-दुमहो	फलइं स-डालइं साडियइं ॥	१०
[१८]		
चडेवि महारहे सत्तमए	वल्लिउ समच्छरु तहिं समए ।	
पडिवउ भीमें वि-रहु किउ	सत्तम वार णे कण्णु जिउ ॥	१

हय सत्त महा हय सत्त सूव	हरि अट्टवीस णिज्जीव हूव
रुहिरारुणु सहुं सुहडेहिं कण्णु	णं धाउ सिलावडे गिरि-णिसण्णु

## रिद्धणे मिचरिउ

३२

तो कुरुव-णरिंदें तहो सहाय  
दिढरहु सत्तुंजउ सत्तुहणु  
धाइय दुद्धरिस विओयरासु  
आढत्तु महाहउ परम-घोरु  
सो मारुइ कम्मइं करइं वे-वि  
कण्णहो विणिवारइ वाण-जालु  
मणि-कुंडलु कण्णहो तणउ छिण्णु  
घत्ता

पडिवारा पेसिय सत्त भाय  
दुद्धरु जउ विजउ विगण्णु महणु  
णं मत्त महागह ससहरासु  
णं धरिउ करिहिं केसरि-किसोरु  
कण्णहो आभिद्धइ हणइ ते-वि ते-वि ८  
ताह-मि दुक्कइ णं पलय-कालु  
ताह-मि एक्केक्कउ सरेहिं भिण्णु

जे कुरुव-णरिंदें पट्टविय  
जेमंतहो कण्णहो भोयणए

तेण-वि भीमहो आलणउं ।  
णं किय सत्त-वि सालणउं ॥

१२

[१९]

तो सोणिय-पव्वाल्लिएण  
कड्ढेवि स-सरु सरासणउं

कण्णें कोव-करालिएण ।  
छिण्णु कवउ भीमहो तणउं ॥

१

पंडवेण-वि तासु ण दिण्णु खणु  
सत्तमउ खुरुपें खंडियउ  
णवमउं खल-हियउ व वंकुडउ  
एयारहमउं सरु ताडियउ  
वारहमउं कोडि-वल्लगणउ  
तेरहमउं वइरि-णिसंधणउ  
चउदहमउं वासव-चाव-समु  
सोलहमउं रवि-तणयहो तणउं

जं लेइ सइं करे तं हणइ धणु  
अट्टमउं विहंजेवि छंडिउ  
दसमउं कु-कलत्तु व थद्धुडउ  
ससि-खंडु व गयणहो पाडियउ  
किविणहरु व घल्लिय-मगणउ  
दुज्जण-दुव्वयणु व विंधणउ  
पण्णारहमउं संगाम-खमु  
गुण-विद्धि-रहिउ णं कित्तणउं

४

८

घत्ता

धणु उदलिय-लयंताहं  
सम-सीसी वट्टइ विहि-मि रणे

भीमसेण-चंपाहिवहिं ।  
णं णं दइव-पयावहिं ॥

१०

[२०]

तो आरोसिउ रवि-तणउ खंडिउ रहु भीमहो तणउ ।  
हउ सारहि हयवर तुरय स-धय स-चामर धरणि गय ॥ १

तो णिय-रहवरेण विसुद्धएण कण्णाणुअ-अणुएं कुद्धएण  
पट्टविय सत्ति रवि-णंदणहो किर णिवडइ उप्परि संदणहो  
णं धगधगंति पलयग्गि-सिह रवि-सुएण णिवारिय असइ जिह ४  
तो भीमें करे असि-लाट्टि किय स-वि छिंदेवि भिंदेवि खयहो णिय  
पुणु हणइ णवल्लेहिं पहरणेहिं णिज्जीव-तुरंगम-वारणेहिं  
रहवरेहिं रहंगेहिं वर-भडेहिं जंपाणेहिं छत्तेहिं धयवरेहिं  
रवि-तणएं ताइ-मि णिज्जियइं मुसुमूरेवि महिहे विसज्जियइं ८  
वड्डारिय सुद्धि विओयरेण विज्जु व महिहरहो पओहरेण

घत्ता

जा जाहि कण्ण णउ हणमि पइं सुद्धु किएण-वि अवगुणेण ।  
फुडु दिवसे चउत्थए पंचमए तुहुं मारेव्वउ अज्जुणेण ॥ १०

[२१]

हसेवि दिवायर-णंदणेण किय-रिउ-कुल-कडवंदणेण ।  
धणु-कोडिए पडिपेल्लियउ पुणु मारुइ णित्तेल्लियउ ॥ १

जाहि विओयर भोयण-सालउ अहवइ कहिं मग्गे भिक्खालउ  
णउ मारमि कुंतिहे आएसें हउं तुम्हहं पंचमउ विसेसें  
जइ मारिउ गंडीव-धणुद्धरु णं तो ते जि तुम्हि सो भायर ४  
ताम जणट्टणेण णरु पेसिउ एहु सो कण्णु तुहारउ वइरिउ  
जाम ण आएं भीमु णिहम्मइ अरि सवसाणु ताम वरि गम्मइ  
तो गंडीव-महाउह-हत्थें सत्तु-विणासु मुक्कु सरु पत्थें  
सो विणिवारिउ आसत्थामें रवि-सुउ ल्हसिउ धणंजय-णामें ८  
सच्चइ-रहवरे चडिउ विओयरु मिलिउ किरीड-मालि दामोयरु

घत्ता

ते णिएवि चयारि-वि कुरुव-पहु णाइं तिसूले सल्लियउ ।  
हरि-हर-सइंभुव-वासवेहिं कुसुमवासु णरे घल्लियउ ॥

१०

इय रिद्धणेमिचरिए धवलइयासिय-सयंभुएव-कए  
छासट्टिमो सगो ॥

## सत्तसट्टिमो संधि

\*सच्चइ-भीम-समागमणे गिय-कुल-गिरि-सिहर-सयदहहो ।  
जिणेवि असेस णराहिवइ रणे अज्जुणु भिडिउ जयदहहो ॥ १

[१]

सच्चइ-भीम-पत्थ ते दुद्धर	तिण्णि-वि एक्कहिं मिलिय धणुद्धर	
तिण्णि-वि णं पच्चक्ख हुवासण	तिण्णि-वि णं हरि-हर-कमलासण	
तिण्णि-वि रवण्णइं तिहिं भुवणहिं	+++++	
तिण्णि-वि सिहर णाइं अचलिंदहो	तिण्णि-वि णं चूडामणि इंदहो	४
तिण्णि-वि वंधव वद्धिय णेहा	जम-वइसवण-पुरंदर जेहा	
तिण्णि-वि काल णाइं णर-वेसें	कुरुव-णरिंदहो कुविय विसेसें	
णं थिय तिण्णि लोय एकंतहो	दुरुदुल्लंति जयदहु जेतहो	
तिण्णि कयंत व विहि उप्पाइय	रण-भोयणु भुंजणहं पराइय	८

घत्ता

ताहं चउत्थु जणदणु	सच्चइ-वीभच्छ-विओयरहं ।	
णं परमप्पउ परम-गुरु	वंदणउ पियामह-हरि-हरहं ॥	९

[२]

चलिय चयारि-वि वइरि-वियारा	णं सणि-राहु-केउ-अंगारा	
वलिउ विओयरु मत्त-गइंदहं	उत्तमोज्ज-जुहमन्न-णरिंदहं	
सच्चइ दूसासणेण खलिज्जइ	तेण-वि तासु पडुत्तरु दिज्जइ	
तउ पेक्खंतहो कुरु ओसारिउ	+++++	४
तउ पेक्खंतहो जिउ कियवम्मउ	जसु धयरइ-सुएहिं सहं सम्मउ	

\*ज. gives the following verse in the beginning :

गज्जंति ताम्व कइ-मत्त-कुंजरा लक्ख-लक्खण-विहीणा ।

जा सत्त-दीह-जीहं सयंभु-सीहं ण पेच्छंति ॥



## रिद्धणेमिचरिउ

३६

तउ पेक्खंतहो तहो जलसिंधहो  
हउ सुअरिसणु भग्गु दुज्जोहणु  
हय-पहाण-जोहेहिं पइं जुज्झिउ  
अवरु तिगतउ हणिउ अलंवुसु

पाडिउ सीसु सवाहहो खंडहो  
तुहु-मि पणडु णडु कलि-रोहणु  
तहिं मइं सयलु वलावलु बुज्झिउ  
णाइं महा-भुवंगु आसीविसु

घत्ता

ताहं णियंतहं तुहु-मि रणे  
तं दोमइ-केसग्गहणु

जं महु उव्वरिउ अ-मारियउ ।  
किर भीमें थुत्थुक्कारियउ ॥

८

१०

[३]

थिउ दूसासणु णं हउ खग्गे  
मारुइ हत्थि-हडउ मुसुमूरुइ  
उत्तमोज्जु उत्तमह वियट्टइ  
णर-सरवरहं मरइ जो दुक्कइ  
हय गय जोह वसुंधर पाविय  
सिरइ तरंति समउ सीसक्केहिं  
छत्तइं चामराइं धय-चिंधइं  
के-वि तरंति तहि-मि अणुवद्धेहिं

गउ सच्चइ कण्हज्जुण-मग्गे  
णिय-बंधवहं मणोरह पूरइ  
जूहमणु-वि सेण्णइं दलवट्टइ  
पंचहं जमहं को-वि किं चुक्कइ  
रत्त-तरंगिणि तुरिउ वहाविय  
रह वहंति वुडुंतेहिं चक्केहिं  
आहरणइं मणि-रयण-समिद्धइं  
से वि(?) वंधु वंधंति कबंधेहिं

४

८

घत्ता

रत्त-तरंगिणि उत्तरेवि  
वाउरंति सहं अज्जुणेण

सामिय-पसाय-रिणु हिए ठवेवि ।  
णिय-जीविउ जम्महो हत्थे ठवेवि ॥

९

[४]

तहिं अवसरे किय-परम-विसाएं  
कण्ण कण्ण रवि लंवइ लगउ  
पेक्खु पेक्खु किह साहणु मारइ  
पइ-मि जियंते अम्हहं आवइ  
रक्खु जयद्दहु वलु साहारहि  
एहु सो अवसरु पाडिउवयारहो  
पभणइ सउरि ण सक्कमि धीमें

वुच्चइ अंगराउ कुरु-राएं  
अज्जुणु केण-वि समरि ण भग्गउ  
सुण्णउ जमहो रडु वड्डारइ  
हणु हणु जाम ण उप्परि आवइ  
विहवत्तणु दूसलहे णिवारहि  
अद्धासणहो कत्त-सर-भारहो  
वडु-वार खलियारिउ भीमें

४

एव-मि तउ आएसें जुज्झमि

विजउ पराजउ कासु ण वुज्झमि

८

घत्ता

एवं चवेवि चंपाहिवइ तइलोकुकुच्छलिय-महागुणहो ।

जेम गइंदु महा-गयहो सवडम्महु धाइउ अज्जुणहो ॥

९

[५]

ताव स-चकरक्खु स-जणदणु

स-धणु स-भीमु स-माहवि-णंदणु

स-रह स-सारहिं पत्तु धणंजउ

वलइं हणंतु रणंगणे दुज्जउ

णं हुयवहु डहंतु तण-कट्टइं

गरुडहो णायउलाइं व तट्टइं

णव सर संधेवि सव्वायामे

विद्धु थणंतरे आसत्थामे

४

सत्तहिं वासुएउ वच्छत्थले

णं सारंग लग्ग णीलुप्पले

ते सर स-सर-सरासण-हत्थे

दसहिं दसहिं विणिवारिय पत्थे

पंचवीस गुरु-सुएण विसज्जिय

सत्तरि दुज्जोहणेण पउंजिय

दस रवि-सुएण सत्त तहो ताएं

अवर-वि अवरें कउरव-लोएं

८

घत्ता

सउणि-सल्ल-सल-कण्ण-किव

अवर-वि णरेण सामंत-सय ।

पंचहिं छहिं सत्तहिं हणेवि

पुणु सट्टिहिं सट्टिहिं सव्व हय ॥

९

[६]

दसहिं सरेहिं विद्धु चंपावइ

भूमि-भाउ भुवणिंदिहिं णावइ

पुणु पडिवउ सत्तहिं धणु-धीमें

तिहिं सिणि-णंदणेण तिहिं भीमें

तेण-वि दीहर सर सर-लट्टिहिं

तिणि-वि ताडिय सट्टिहिं सट्टिहिं

लइउ धणंजएण सय-गण्णे

सो पंचासहिं घाइउ कण्णे

४

णरेण सरासणु छिण्णु खणंतरे

णवहिं पडीवउ भिण्णु थणंतरे

अवरे रवि-णिहेण णाराएं

चक्क-रक्ख दोहाइय घाएं

ताम णिवारिउ आसत्थामे

अवरु लेवि धणु सव्वायामे

दिणमणि-णंदणेण णरु छाइउ

विहि-मि परोप्परु कहव ण घाइउ

८

घत्ता

जलु थलु णहयलु दिस-वलउ  
जुज्झंतहं कण्णज्जुणहं

रवि-मंडलु मंडिउ सरवरेहिं ।  
विहिं अंतरु दिट्ठु ण सुरवरेहिं ॥

९

[७]

सच्चइ भीमें लयउ अखत्तें  
कुरु-जणु कुरु-णिवेण पच्चारिउ  
करिवर कक्क(?)महाधउ पाडिउ  
चक्क-रक्ख-हय धुरि विणिवाइउं  
राहा-सुउ सरेहिं मुच्छाविउ  
पुणु पउरंदरि विलिहिउ तीसहिं  
सत्तहिं तावणि-तणएं तच्छिउ

विद्धु अणेयहिं सरेहिं पयत्तें  
धावहो कण्णु रणंगणे मारिउ  
+++++  
हरिहिं चउक्कउ जसु जलु धाइउ  
णिय-रहे गुरु-णंदणेण चडाविउ  
णरु वारहहिं किविं(?) हरि वीसेहिं  
चउहिं जयद्दहेण उम्मच्छिउ

४

घत्ता

सरहं सहासइं पेसियइं  
ताइं समुद्दहो सरि-मुहइं

कउरवेहिं जाइं रणे दुज्जयहो ।  
सव्वइं णासंति धणंजयहो ॥

८

[८]

सो सर-णियरु णिवारिउ पत्थें  
दोण-पुत्तु चउसट्ठिहिं छाइउ  
तिहिं विससेणु भिण्णु किउ वीसहिं  
दसहिं सरेहिं जयद्दहु ताडिउ  
रहवर-हय-गय-जोह-णिसिंधइं  
दूसहु दुण्णिरिक्खु संभूयउ  
सत्थ-वारु दिव्वत्थु विसज्जिउ  
णरवइ णिरवसेसु वामोहिय

णरवइ सव्वु-वि लद्धउ हत्थें  
विहिं दुज्जोहणु कह-वि ण धाइउ  
मद्दाहिउ सएण सलु तीसहिं  
तिहिं दूससणु कह-व ण पाडिउ  
जो जो दुक्कइ तं तं विंधइं  
णं अवसाण-काले जम-दूयउ  
कउरव-साहणु तेण परज्जिउ  
सीहे जेम महा-गय रोहिय

४

८

घत्ता

रहियहं रहहं तुरंगमहं  
भिंदेवि अंगइं जंति सर

कुरु-णरहं णरिंदहं गयवरहं ।  
रवि-किरण णाइं णव-जलहरहं ॥

९

[९]

मुहरंगेहिं तुरंगे रंगाविय  
चित्तइं णिवडियाइं सामंतहं  
कुरुवइ थंभ(?) जाय गइ-भग्गी  
के-वि चवंति जाहु वरि तेत्तहे  
ल्लिक्क के-वि रह-गय-तुरियंतरे  
जाउ धणंजउ धरेवि ण सक्कहु  
किहि-मि पहरणाइं परिचत्तइं  
केहि-मि भरिय वाहु सर-दंडेहिं

खंडिय रहवर कडि कडुवाविय  
णिसुढिय वाहु-दंड पहरंतहं  
केवल मरण-चिंत परिलग्गी  
फग्गुण-धणु-गुणु-सहु ण जेतहे ४  
चिंतवंति कि-वि चित्तभंतरे  
मरउ जयद्दहु पुरउ ण थक्कहु  
केहि-मि ल्लिक्काविय णिय-छत्तइं  
के-वि णट्ट लग्गंतेहिं कंडेहिं ८

घत्ता

वण-वियणाउरु करेवि वलु  
राहु जेम रवि-मंडलहो

तहो अवजस-सलिल-महद्दहहो ।  
गउ अज्जुणु भिडिउ जयद्दहहो ॥ ९

[१०]

तो हक्कारिउ सेंधव-राएं  
वाहि वाहि किं धरहि महारहु  
विजयासंघ करेवि णिय-खंडए  
वूहहो वारि जेण जिय पंडव  
एम भणेवि भुवइंद-करालें  
णउ तुरंग णउ दीसइ संदणु  
णउ गंडीउ ण कंचण-वाणरु  
भग्गइं वलइं जाइं किय-जत्तइं

पंडव संढ भरिउ जम-राएं  
हउं सो अच्छमि एहु जयद्दहु  
दोमइ जेण हरिय वलिवंडए  
सीहहो णासेवि गय वेयंड व ४  
छाइउ अज्जुणु सरवर-जालें  
णउ सच्चइ ण भीमु ण जणद्दणु  
लग्गु जयद्दहु जिह वइसाणरु  
ताइ-मि तहिं अवसरे परिपत्तइं ८

घत्ता

सएण पत्थु हरि सत्तिरिहिं  
चक्क-रक्ख तिहिं तिहिं हणेवि

छहिं सच्चइ सत्तहिं पवण-सुउ ।  
दुप्पेक्खु जयद्दहु रवि व हुउ ॥ ९

[११]

पंडव पहरु पहरु किं अच्छहि  
तुहुं हेवाइउ केहि-मि अण्णेहिं

मइं विंधंतउ किं ण वि अच्छहि  
भूरीसव-कलिंग-किव-कण्णेहिं

## रिद्धणेभिचरिउ

४०

हउं सो सिंधव-णाहु ण वुज्झहि  
खंडवु दड्ढु जेण सब्भावें  
जेण णियत्तउ उत्तर-गोग्गहु  
तेण परक्कमेण लइ वावरु  
पभणइ पत्थु कोवाणले चडियउ  
तोणा-जुयले सिलीमुह जेतिय

सव्व-परक्कमेण लइ जुज्झहि  
कालकंज जिय जेण पयावें  
जेण परक्कमेण किउ विग्गहु  
णं तो इट्ठा-देवय संभरु  
कहिं महु अज्जु जाहि कमे पडियउ  
मेल्लि मेल्लि समरंगणे तेत्तिय

४

८

घत्ता

कुरु पच्चारिउ अज्जुणेण  
रक्खहो सीसु जयदहहो

ते तुम्हइं सो हउं एहु रणु ।  
लइ धरहु सव्व मइं एक्कु खणु ॥

९

[१२]

एम भणेवि तोसिय-सुर-सत्थें  
छिण्ण णहंगणे सिंधव-राएं  
तिहिं गांडीउ विद्धु ण महा-गुणु  
अट्ठहिं घोडा अट्ठहिं वाणरु  
सच्चइ सच्चवंतु चउवीसेहिं  
विहिं जुहवणु थणंतरे ताडिउ  
तो णरेण सारहि-सिरु ताडिउ  
चक्क-रक्ख हय रहवरु खंडिउ

सर चउसट्ठि विसज्जिय पत्थें  
सिल-धोएण वाण-संघाएं  
छहिं णाराएहिं ताडिउ अज्जुणु  
पंचहिं रहु सएण दामोयरु  
छाइउ भीमसेणु वत्तीसेहिं  
उत्तमोज्जु तिहिं कह-वि ण पाडिउ  
कणय-वराह-चिंधु तमि तोडिउ  
तुरय-चउक्कु वियारेवि छंडिउ

४

८

घत्ता

वुच्चइ णरु णारायणेण  
खुडहि जयदह-सिर-कमलु

पहरंतहं किज्जइ खेउ ण-वि ।  
अत्थवणहो जाम ण जाइ रवि ॥

९

[१३]

विद्धखत्तु णामेण मह-प्पहु  
दइवी वाणि समुट्ठिय जम्मणे  
जइ कयाइ धरणियले पलोड्डइ  
तो एं कारणेण रणे दुज्जय  
जो सुइणंतरे देवेहिं दिण्णउं

तासु पुत्तु इहु जाउ जयदहु  
आयहो सिरु छिज्जंतु रणंगणे  
तो हंतारहो सीसु विसट्ठइ  
अंजलीउ सरु मेल्लि धणंजय  
अहि पच्छण्ण-वेसु अवइण्णउं

४

तेहिं खुडेप्पिणु तेहिं णहंगणे	विद्धखत्तु जहिं तवइ तवोवणे	
तासु करंजलि-जले जइ धिप्पइ	तो सिरु फुट्टेवि सो-जि समप्पइ	
तं उवएसु लहेवि सेयासें	खुडिउ सीसु णिउ सरेणायासें	८

घत्ता

हंसें तोडेवि कमलु जिह	उच्छंगे णिमिउ तहो तावसहो ।	
तेण-वि घत्तिउ धरणियले	सिरु फुट्टेवि गउ पुरु वइवसहो ॥	९

[१४]

णिहए जयद्ध-राए रणंगणे	तूरइं हयइं जुहिडिल-साहणे	
कलयलु सुट्टु घुट्टु वड्डारउ	चेलु भमाडिउ अगणिय-वारउ	
पूरिय पइज्ज धणंजय-केरी	भमिय कित्ति आणंद-जणेरी	
कउरव-साहणु चिंतावण्णउं	णं वहे हरिण-जूहु आदण्णउं	४
परिहव-दवेण दड्डु विद्दाणउं	णिंदइ वार-वार अप्पाणउं	
एक्कु धणंजउ धरउ सरासणु	मगाइ दइउ जासु रणे पेसणु	
जउहर-जूय-कयग्गह-गोग्गह	ते जे जाय णव गह साणुग्गह	
पाडिय जे कवडेण दुरोयर	एवहिं ते परिणविय महा-सर	८

घत्ता

ताम सयंभुवणाहिवइ	सुर-सत्थु सुरिंदहो पासे थिउ ।	
मेळ्ळिउ कुसुम-वासु णरहो	हय दुंदुहि साहुक्कारियउ ॥	९

इय रिद्धणेमिचरिए धवलइयासिय-सयंभुएव-कए ।  
 [णामे] जयद्धवहो[उ]सत्तसद्धिमो[इमो] सग्गो ॥

## अट्टसट्टिमो संधि

णिहए जयदहे दुव्विसहे अम्हहं जयास ण पूरइ ।  
एवहिं को साहारु महु दुज्जोहणु हियए विसूरइ ॥१

[१]

धवलु महारउ तेण तेण चित्ते । थिउ धुर छंडेवि तेण तेण चित्ते ।  
को भरु कड्डइ तेण तेण चित्ते । खंधु समोड्डेवि तेण तेण चित्ते ॥

१

सव्वहं संगरे पहरंताहं	ओ मंडु हरंतु धरंताहं	
किह खुडिउ जयदह-सिर-कमलु	दुज्जोहणु मेल्लइ अंसु-जलु	
खउ आउ असेसहं सज्जणहं	परिणविय वसुंधर दुज्जणहं	
पहु धीरेवि धीरेवि कुरुव-वलु	गुरु-णंदणु पभणइ अतुल-वलु	४
परिरोवहि णरवइ काइं तुहुं	साहारहि साहणु लुहहि मुहु	
ण करेवउ परम-विसाउ पइं	पहरंतहे सयल मरंति सइं	
जो मुउ सो मुउ किर कवणु छलु	अच्छउ चंपाहिउ सल्लु सलु	
णित्तिसहो पावहो णिग्गुणहो	हउं एक्कु पडुच्चमि अज्जुणहो	८

घत्ता

सव्वहो लोयहो पीड कर दुव्विसह पुरस्सर कामहो ।  
फग्गुण-माहव विद्धि-कर पर एक्कहो आसत्थामहो ॥

९

[२]

एम भणेप्पिणु तेण० पडिभडे भिडिउ तेण०  
मेहु महीहरे तेण० जिह ओवडिउ तेण०  
एम भणेप्पिणु पडिभडे भिडियउ मेहु महिहरे जिह ओवडिउ

गुरु-णंदण अमरिस-कुविय-मण	पहरंति परोप्परु के-वि जण	
एक्कहो-वि एक्कु ण-वि ओसरइ	एक्कहो एक्कु-वि णउ खउ करइ	
पेक्खंतहो तहो दुज्जोहणहो	णीसेसहो कउरव-साहणहो	४
गुरु-सुएण धणुहे गुणे करेवि कर	पहिलारा पेसिय सउ-वि सर	
तेहत्तरि पुणु णारायणहो	सउ सड्डि णरहो णारायणहो	
सेयासहो दस दस दारुयहो	णव भीमहो वारह सिणि-सुयहो	
जुहमणुहे सत्त रणुद्धयहो	वत्तीस कणय-वाणर-धयहो	८
पंचहिं गंडीव-लड्डि पहय	छहिं उत्तमोज्जु अड्डहिं तुरय	

घत्ता

सच्चइ-हरि-भीमज्जुणहुं	रह-छत्त-धयहिं सर लग्ग ।	
दीहर-विग्गह विसम-मुह	णं विसहर दुमेहिं वलग्ग ॥	१०

[३]

ताव धणंजउ तेण०	विप्फुरियाणणु तेण० ।	
कुविउ गइंदहो तेण०	जिह पंचाणणु तेण० ॥	१

तहो रण-रस-रहस-वसुद्धयहो	सर-सहसु विसज्जिउ गुरु-सुयहो	
तें पाडिउ हरि-लंगूल-धउ	वारहहिं तुरंग-चउक्कु हउ	
छहिं सारहि सत्तहिं दोण-सुउ	मुच्छाविउ कह-वि कह-वि ण मुउ	
गुरु-णंदणु भणेवि ण घाइयउ	किउ णिक्किउ ताम पथाइयउ	४
वाहत्तरि पेसिय तेण सर	जम-राएं णावइ आण-कर	
सेयांसं ताहं विणासु कउ	एक्केक्कउ तिहिं तिहिं झत्ति हउ	
अवरोक्किं ताडिउ वच्छयले	तणु छिंदेवि णिवाडिउ धरणियले	
कह-कह-वि ण मुउ रहे उल्लरिउ	णिउ सूएं कहि-मि राउ तुरिउ	८

घत्ता

तो अप्पुणु गंडीव-धरु	णिंदइ हेड्डामुहु होएवि ।	
कवण लहेसमि सुद्धि हउं	गुरु-पियर-पियामह घाएवि ॥	९



[४]

दोणहो पासिउ तेण० किउ पराणउं तेण० ।  
हउ मइं पावें तेण० पंडु-समाणउं तेण० ॥ १

तो पुरिसु धिगत्यु धिगत्यु करु गंडीउ धिगत्यु धिगत्यु सरु  
चारहडि धिगत्यु धिगत्यु रणु जहिं हम्मइ वंधव-सयण-जणु  
जे मुक्क वाण णइ-णंदणहो अवरत्तउ सो अज्ज-वि मणहो ४  
भयवत्त-महत्तरु णिट्ठविउ पेयाहिव-पट्टणु पट्टविउ  
जो वंदणीउ समु केसवहो तहो छिण्णु वाहु भूरीसवहो  
रोवाविय दूसल विहव किय संदेहे किवासत्थाम थिय  
महि होसइ सयल जुहिट्टिलहो महु पाउ जयासुकंडुलहो ८  
णिक्कारणे रइआरोहणेण माराविय मुहि दुज्जोहणेण

घत्ता

रण-रंगंगणे पत्थु णडु किर हरिस-विसायहिं णच्चइ ।  
ताम महीहरे मेहु जिह उत्थरिउ कण्णु जहिं सच्चइ ॥ १०

[५]

पत्थु पधाइउ तेण० तवणाणंदहो तेण० ।  
मत्त-गइंदु व तेण० मत्त-गइंदहो तेण० ॥ १

हरि भणइ वाम करे केसविय किं सत्ति ण पेक्खहि वासविय  
आयहे कहिं जाहि अ-मारियउ वीभच्छु समासए वारियउ  
चंपाहिउ माहवे लहउ स-वि विहिं एक्कु-वि एक्कहो वज्जु ण-वि ४  
सच्चइहे समप्पिउ णियय-रहु थिउ दारुइ सारहि दुव्विसहु  
उब्भिउ चामीयर-गरुड-धउ सव्वहो कुरु-जणहो जणंतु भउ  
सुगीव सेण्ण घण पुप्फहय सवलाह जुत्त तुरंग गय  
रणु जाउ सूर-सिणि-णंदणहं बहु-मग्गोवाहिय-संदणहं  
छिंदंत परोप्परु सरेहिं सर णं चंद दिवायर करेहिं कर ८

घत्ता

गुणु दोहाइउ सच्चइहो हरि भीमज्जुणहं णियंतहं ।  
कण्ण-धणुगय-पीडियहं को रक्खइ जीउ मरंतहं ॥ ९

[६]

अवरु सरासणु तेण० लेवि तुरंतें तेण० ।  
विद्ध थणंतरे तेण० रोस-फुरंतें तेण० ॥ १

कण्णहो सव्वंगिउ भरिय सर णं कालहो-केरा आण-कर  
सारहि भल्लेण वियारिउ पेयाहिव-पुरे पइसारियउ  
चउ-भल्लेहिं तुरय-चउक्कु हउ तिहिं पाडिउ रहवर-कक्ख-धउ ४  
धणु छिण्णु भिण्णु देहावरणु णर वज्जु भणेप्पिणु पत्तु मरणु  
कुरुवइ स-रहेण ण वाहियउ सइणेउ ण केण-वि साहियउ  
तहिं अवसरे रहसुद्धाइयउ रहु लेवि सुमित्तु पराइयउ  
सो सिणि-णंदणहो समावाडिउ दासारुहु दारुय-रहे चडिउ ८  
अत्थवणहो ताम पयंगु गउ कुरु दुम्मणु अवरहं जाहु खउ

घत्ता

मं लग्गेसहि दुव्विसहु धगधगंतु णहयल-घरहो ।  
रवि कोव-पलित्तु पयावइणा णं घत्तिउ पच्छिम-सायरहो ॥ १०

[७]

ताम विओयरु तेण० उम्मण-दुम्मणु तेण० ।  
कह किरीडिहे तेण० मसिवुण्णाणणु तेण० ॥ १

चंपाहिउ चावहिं छिण्णएहिं महु गालि-सहासेहिं दिण्णएहिं  
जं मुट्टिए हणेवि ण मारियउ तं पइं किर थुथुक्कारियउ  
तिह करु जिह तोडहि सिर-कमलु विससेणु ण जीवइ जेम खलु ४  
तो णिरु परिवड्ढिय-मच्छरेण पच्चारिउ अंगराउ णरेण

## रिद्धणे मिचरिउ

४६

सय-वार वियत्तणे वि-रहु किय  
जं सत्तु भीमु जं संभरहि  
जं गुणु अहिमण्णहो छिण्णु पइं  
जइ आयहं एक्कु वि णउ करमि

णउ केण वि गालि-सएहिं लइउ  
महु कल्लहो कल्ल-कल्ले मरहि  
मारेवउ तं विससेणु मइं  
तो चियहे वलंतिहे पइसरमि

८

घत्ता

ताम पसंसिउ महुमहेण पइं सरिसु अवरु को महियले ।  
जो उज्जलहो जयद्दहो सिरु खुड्डइ जियंतए कुरु-वले ॥

१०

[८]

तो गंडीवेण तेण० जाउ विहत्तउ तेण० ।  
अक्खोहणियउ तेण० सत्त समत्तउ तेण० ॥

१

णरु पभणइ थोत्तुगिण्ण-गिरु  
जं जउहरे चुक्क हुआसणहो  
जं खंडवे सुरवरे परिहविय  
जं कुरुवइ विग्गहे वावरिउ  
जं धरेवि ण सक्किउ दुद्धरेहिं  
जं णिहउ जयद्दहु पइसरेवि  
तं सव्वु पसाएं तउ तणेण  
गय एवं चवंत चवंत तहिं  
अवरोप्परु दिण्णइं साइयइं

कर-कमल-कयंजलि-पणय-सिरु  
जं पाडिय राह णहंगणहो  
जं कालकंज-वणे विद्विय  
जं उत्तर-गोगहे उव्वरिउ  
एक्कल्लउ वहु-जालंधरेहिं  
अ-मणूसउं कुरुव-सेणु करेवि  
को जिज्जइ वलेण महु तणेण  
सो अच्छइ पंडव-णाहु जहिं  
अंसुवइं स-हरिसइं आइयइं

४

८

घत्ता

कहिं सच्चइ कहिं पवण-सुउ कहिं अज्जुणु कहिं तव-णंदणु ।  
कहिं मेलावउ भायरहं पवियंभइ सव्वु जणदणु ॥

११

[९]

ताव णिरुज्जमु तेण० चत्ताओहणु तेण० ।  
गुरु-थाणंतरु तेण० गउ दुज्जोहणु तेण० ॥

१

अहो ताय तुज्जु जइ णावडइ	तो सिंधउ केम समावडइ	
वीभच्छु केम वले पइसरइ	कडवंदणु सच्चइ किह करइ	
किह भिडइ भीमु मह भायरहं	हय एकतीस एक्कोयरहं	४
किह होइ विणासु वरूहिणिहे	रण-मुहे सत्तहे अक्खोहिणिहे	
लोलंत पेक्ख सामंत-सय	दोहाइय रहवर तुरय गय	
अम्हारउ जीवणु संगहहि	भीमज्जुण-पक्खु समुव्वहहि	
पर-तक्कणेण पर-डंभणहो	को णंदइ भिच्चं वंभणहो	८
दुज्जोहण-दुव्वयणासि-हउ	गुरुदेवु पडुत्तरु कोव-गउ	

घत्ता

वहुअ वइरि एकल्लएण	वंभणेण होवि मइं मुक्किय ।	
तुम्हेहिं सव्वेहिं खत्तिएहिं	ते तिण्णि धरेवि ण सक्किय ॥	१०

[१०]

णियय-हियाहिउ तेण०	अवुहु ण वुज्जइ तेण०।	
पर णिक्कारणे तेण०	दिवे दिवे जुज्जइ तेण०॥	१

विउरेण-वि तुहुं [ण]-वि सिक्खविउ	को णउ जो तेण ण दक्खविउ	
पहु हउ-मि हियत्तणेण कहमि	भीमज्जुण-पक्खु ण उव्वहमि	
राहाहवे खंडवे कंज-वहे	वंदि-गहे गो-गहे दुव्विसहे	४
गंगेय-तिगत-महाहयणे	भयवत्त-जयदह-णिट्टवणे	
पंडवहं परक्कम दिट्ठ पइं	दुव्वयणेहिं विंधहि तो-वि मइं	
रत्ति-दिउ वइरिहिं अब्भिडमि	दुज्जोहण केम-वि णावडमि	
दूसासण-सउणि-कण्ण-चविउ	लग्गइ ण महारउ सिक्खविउ	८
विद्वियइं अज्जु जाइं वलइं	आयइं अहिमण्ण-दुमहो फलइं	

घत्ता

तो वुच्चइ दुज्जोहणेण	पर जाम ताम पहरेवउं ।	
जहिं असेस सामंत गय	तहिं मइ-मि ताय जाएवउं ॥	९

[११]

ताह-मि अम्ह-वि तेण० अज्जु ण अंतरु तेण०।  
होउ णिसारणे तेण० वइ एकंतरु तेण०॥ १

जिम ताहं जिमम्हहं जाव जउ जिव ताहं जिम्हहं छत्तु धउ  
जिम ताहं जिम्हहं पाण गय जिम ताहं जिमम्हहं रज्ज-मय  
जिम ताहं जिमम्हहं वज्जाइं जिम ताहं जिमम्हहं कज्जाइं ४  
जिम ताहं जिमम्हहं वइसणउं जिम ताहं जिमम्हहं णीसरणउं  
जिम ताहं जिमम्हहं चामरइं जिम ताहं जिमम्हहं पुरवरइं  
जिम ताहं जिमम्हहं सयल महि जिम ताहं जिमम्हहं परम दिहि  
जिम ताहं जिमम्हहं भूय-चिहि जिम ताहं जिमम्हहं मरण-विहि ८

घत्ता

तो वोळ्ळइ दोणायरिउ कुरुवइ विहिं एक्कु करेवउं ।  
जिम विणिवाइय पंडु-सुव जिम लग्गेवि परए मरेवउं ॥ ९

[१२]

जाहि णराहिव तेण० धीरु म छंडहि तेण०।  
वलइं णियत्तिवि तेण० जुज्झु समंडहि तेण०॥ १

सण्णाहु ण मेल्लमि ताम पहु विणिवारिउ जाम ण असि-णिवहु  
दुज्जोहणु भीम-भुवंग-धउ सणि णावइ कण्णहो पासु गउ  
किह हम्मइ विद्धखत्तु भणउ जइ संमउ ण-वि दोणहो तणउ ४  
तो तिण्णि-वि भड पइसंति किह मयरहरु वियारेवि मयर जिह  
चंपाहिउ पभणइ थाउ मणे देव वि अ-देव पंडवहं रणे  
जगे णरहो धणुद्धरु को-वि णरु ण पुरंदरु जमु वइसवणु हरु  
ण-वि हउं ण-वि दोणु ण दोण-सुउ ण पियामहु णउ भयवत्तु हुउ ८  
सयल-वि पहेरेवि णिय-थामे थिय विद्विय के-वि के-वि वि-रह किय

घत्ता

तो-वि भिडेवउं खत्तिएण जउ अवजउ दइवायत्तउं ।  
 रयणि-महाहउ आढवहि जा मिलउ सइं भुवण-त्तउ ॥

१०

इय रिद्वणेमि-चरिए धवलइयासिय-सयंभुएव-कए  
 अद्वसद्विमो इमो सगो ॥

## ऊणहत्तरिइमो संधि

स-विलक्खेहिं सिंधव-मारणेण अज्जुण-वाण-णिसिद्धएहिं ।  
णिसि-झुज्झु पडीवउ मण्णियउ कुरुवेहिं वेहाविद्धएहिं ॥ १

[१]

रयणिहे उहय-वलइं सण्णद्धइं	उहय-वलइं लग्गग्गिम-खंधइं	
उहय-वलइं वल-विक्कम-सारइं	उहय-वलइं किय-हण-हण-कारइं	
उहय-वलइं उब्भिय-धय-चिंधइं	उहय-वलइं अइ-वेहाविद्धइं	
उहय-वलइं वाइय-वाइत्तइं	उहय-वलइं कोवग्गि-पलित्तइं	४
उहय-वलइं तोरविय-तुरंगइं	उहय-वलइं चोइय-मायंगइं	
उहय-वलइं परिहिय-सण्णाहइं	उहय-वलइं हल-वाण-सणाहइं	
उहय-वलइं सुर-महिहर-धीरइं	उहय-वलइं वण-विहुर-सरीरइं	
उहय-वलइं रण-रहसुब्भिण्णइं	उहय-वलइं हणंति अणिविण्णइं	८

घत्ता

तमु पसरिउ उद्धाइयउ रुहिर-महाणइ णीसरिय ।  
जम-महिसहो फेणु मुयंतहो जीह णाइं थिय दीहरिय ॥ ९

[२]

उहओवास-वलइं तम-जाले	पच्छाइयइं पडेण व काले	
उहओवास-वलेहिं रउ धावइ	रण-रक्खसु वस-लालसु णावइ	
उहओवास-वलइं रेळंती	रत्त-तरंगिणि वहइ महंती	
उहओवास-वलइं रस-भरियइं	णं रवि-विंवइं किरणावरियइं	४
उहओवास-वलइं रुहिरोल्लइं	णाइं पलास-वणइं पप्फुल्लइं	
उहओवास-वलइं वहु-रुंडइं	ताल-मुंड-काणणइं व भंडइं	
उहओवास-वलेहिं गय साडिय	णं घण दइवें गयणहो पाडिय	
उहओवास-वलइं सिय-छत्तइं	वसुमइ-गयइं णाइं सयवत्तइं	८

घत्ता

तहिं अवसरे पंडव-वाहिणि कुवियएं कुरु-परमेसरेण ।  
समरंगणे सरेहिं विरोलिय णल्लिणि णाइं सरे कुंजरेण ॥ ९

[३]

विद्धु विओयरु दसहिं पिसक्केहिं तिहिं तिहिं मदिपुत्त लल्लक्केहिं  
णवहिं घुडुक्कउ अट्टहिं अज्जुणु छहिं सिहांडि सत्तहिं धट्टज्जुणु  
पंचहिं वासुएउ विहिं वाणरु सच्चइ चउहिं विराडु णिरंतरु  
एक्कें जण्णसेणु उरे ताडिउ रायहो थरहरंतु धउ पाडिउ ४  
तव-सुएण जम-भउंह-समाणउं विहिं धणु छिण्णु दसहिं तणु-ताणउं  
अवरें मगणेण फणि-केयणु मुच्छविउ रहे थिउ णिच्चेयणु  
गुरु उत्थरिउ ताम सर-जालेहिं सो-वि णिरुद्धु णवर पंचालेहिं  
सोमय-सिंजय-पंडव-मच्छेहिं अवरेहिं-मि कर-सर-परिहच्छेहिं ८

घत्ता

वेढिज्जइ दोणु रणंगणे सव्वेहिं पंडव-साहणेहिं ।  
णं दूसहु किरण-भयंकरु जरढ-दिवायरु णव-घणेहिं ॥ ९

[४]

दुक्कु संझ सहुं तइमिर-जालें जीह पसारिय णं खय-कालें  
भुक्खालुएण महासम-संतें वे-वि वलइं वे कवल करंतें  
वुक्कण करकरंति चउ-पासेहिं किय वमाल गोमाउ-सहासेहिं  
गुरु ढेक्कार मुक्क भल्लुक्केहिं वस-लालसेहिं पसएहिं दुक्कंतेहिं ४  
कुद्दिउ वद्धावणउं करालेहिं जोइणि-भूव-भाव-वेयालेहिं  
गय-गज्जिएहिं चक्क-चिक्कारेहिं किं-पि ण सुव्वइ धणु-टंकारेहिं  
तिमिर-रएहिं ण दीसइ अंतरु पर सदेण भिडंति परोप्परु

घत्ता

तहिं संझा-समए व भयंकरे रणु-वि भयंकरु वाहिणिहिं ।  
सहयारु जेम लूसिज्जइ णरु णिवंडतु जे जोइणिहिं ॥ ८



[५]

आहउ कहो-मि अत्थि करवालें	सो णिवडंतु लइउ वेयालें	
थवेवि महारहे-ईसासुट्टए	पउलिउ पहरणग्गि-अंगिट्टए	
सोणिय-पाणु करंतें चक्खिउ	मिद्धु भणेवि णिय-कंतेहिं रक्खिउ	
कहि-मि भडहो सिव उवरे विलग्गइ	हियउ लेवि कंतुल्लए लग्गइ	४
अहरु धरइ सरु करइ सुहाविणि	पुरिसायंति णाइं वर-कामिणि	
कहि-मि कवंधु णडइ परितुट्टउं	चंगउ जं रिउ-वयणु ण दिट्टउ	
कहि-मि कवंधे णहंगण-गामिणि	झत्ति परिट्टिय रेवा सामिणि	
णाइ सवेयणेहिं व णियंगेहिं	परुवइ भडु णाणाविह-भंगेहिं	८

घत्ता

कत्थइ असि-करहो कवंधहो	उप्परि गिद्धु परिट्टियउ ।	
सामिय संमाणु सरेप्पिणु	णं पाडिवउ भडु उट्टियउ ॥	९

[६]

तहिं रयणी-मुहे अक्खय-तोणें	पंडव-वळु संताविउ दोणें	
आयस-तोमरेहिं ओसारिउ	तम-पडलु व रवियरि [वि]णिवारिउ	
ता मंभीस देवि सिवि धाइउ	णं गयवरु गयवरहो पराइउ	
दसहिं सरेहिं विद्धु किवि-कंतें	तेण-वि तीसेहिं कोवु वहतें	४
गुरु-सारहि भल्लेण वियारिउ	घुम्माविउ कह कह-वि ण मारिउ	
तो हय हणेवि सिविहे सोणासें	सीसु छिण्णु सयवत्तु व हंसें	
ताव रणंगण-पंकय-भिंणें	विद्धु भीमु वारहहिं कलिंणें	
तिहिं सारहि वच्छच्छलि ताडिउ	विहलंगळु रह-कुव्वरे पाडिउ	८

घत्ता

उप्पइउ णहंगणु लंघेवि	मारुइ रोसाऊरियउ ।	
स-गइंदु कलिंगु पडंतेण	मुट्टि-पहारे चूरियउ ॥	९

[७]

धुय-जयराय णराहिव धाइय  
 चामीयर-घंटालि-वमालिय  
 मुक्क सत्त रवि-सुएण सुधीमें  
 तहिं अवसरे धयरड्डहो णंदणु  
 विद्धु तेण चउसड्डिहिं वाणेहिं  
 सर-सएण पवि-पुत्तें खंडिय  
 चडिउ गंपि दुक्कणहो संदणे  
 धाइउ अहिमुहु वाण-पहारहं

विण्णि-वि मुट्ठि-पहारें घाइय  
 अहिणव-कउसुममालोमालिय  
 ताइं जे पडिवउ आहउ भीमें  
 दुम्मउ अग्गए थक्कु स-संदणु  
 सेण-विहंगम-अणुहरमाणेहिं  
 सारहि सद्धय छिंदिवि छंडिय  
 विद्धु विहि-मि तहिं भड-कडवंदणे  
 वसहु णाइं णव-जलहर-धारहं

४

८

घत्ता

रणे दुज्जोहणहो णियंतहो

सुरहं णियंतहं गयणयले ।

सो भीमें पाय-पहारेण

रहु पइसारिउ धरणियले ॥

९

[८]

कह-वि कह-वि परिवज्जिय-संदण  
 हरिण व हरिणाहिवहो णिलुक्का  
 पभणइ सोमयत्तु एत्थंतरे  
 विण्णि महारह सच्चइ अज्जुणु  
 तहो विक्कमहो एउ किं जुज्जइ  
 किय-अवराह-महादुम-डालहो  
 जइ पइं कल्लए णिसिहे ण मारमि  
 पभणइ सच्चइ सव्वइ घाइउ

णासेवि गय गंधारिहिं णंदण  
 जहिं दुज्जोहणु तेत्तहे दुक्का  
 सच्चइ जायव-लोयब्भंतरे  
 तुहुं पहिलारउ वीयउ पज्जुणु  
 सलु सहुं पुत्तु अखत्तें छिज्जइ  
 फलु दक्खवमि अज्जु वहु-कालहो  
 तो णिय-देहु णरइ पइसारमि  
 तुहु मि ण चुक्कहि उप्परि आइउ

४

८

घत्ता

सिणि-सोमवंस-वंसुब्भव

णं वण-हत्थि समावडिय ।

अवरोप्परु थाहि भणेप्पिणु

सच्चइ-सोमयत्त भिडिय ॥

९

[९]

तहिं अवसरे रहवरहं सहासें  
 दसहिं सहासेहिं पवर-तुरंगहं

धाइउ कुरुवइ सव्वायासें  
 सत्तहिं सयहिं मत्त-मायंगहं

## रिद्धणेमिचरिउ

सउणि वि हयहं सहासें लक्खे  
 धट्टज्जुणेण ताम रहु वाहिउ  
 सिणि-णंदणु भूरीसव-वप्पे  
 सोमयत्तु रहवरि वइसारिउ  
 रण-वहु-गाढालिंगण-कामे  
 जायव थाहि थाहि कहिं गम्मइ

घत्ता

तो विण्णि-वि भिडिय परोप्परु  
 रहु वाहिउ आसत्थामहो

वेढिउ सच्चइ मिलेवि विवक्खे  
 कउरव-लोउ सव्वु अवगाहिउ  
 णवहिं विद्धु तेण-वि तं मप्पे  
 जत्तारेण कहि-मि ओसारिउ  
 तो हक्कारिउ आसत्थामे  
 जिम्ब विहि एक हणइ जिम्ब हम्मइ

४

८

[१०]

परकलेण कालायस-घडिएं  
 तीस णियत्तण-वर-विकखंभे  
 अट्ट-महारहंग-संचारे  
 रुहिरारत्त पडाउघाएं  
 खय-रवि-जुयल-समप्पह-णयणउ  
 विज्जुल-लोल-ललाविय-रसणउ  
 विउड-णासु लंबोडुदंतुरु  
 वियड-दाढु पडिभड-भेसंतउ

घत्ता

रिउ गंधु-वि सहेवि ण सक्कियउ  
 पर आसत्थामु ण कंपिउ

दुण्णिरिक्ख-रिक्खाजिण-जडिएं  
 उब्भिय-गिद्ध-महद्धय-खंभे  
 रक्खस-अक्खोहिणि-परिवारे  
 आउ महारहेण भडवाएं  
 मंदर-कंदर-दारुण-वयणउ  
 धूसरु धूम-वण्णु घण-कसणउ  
 पेडिसु(?) कविल-केसु भू-भंगुरु  
 सिल-पाहाण-विट्ठि-पेसंतउ

४

८

[११]

तो एत्थंतरे छाया-भेसिय  
 विद्धु घुडुक्कण वहु-वाणेहिं  
 गुरु-सुएण अद्ध-वहे जे खंडिउ  
 ताम समच्छरु अंजण-पावउ  
 तेण महंतउ किउ कडवंदणु

रणे रक्खसिय विज्ज विद्धंसिय  
 सयल-विहंगम-अणुहरमाणेहिं  
 ++++++  
 णं गज्जंतु पत्तु अइरावउ  
 घाइउ मग्गणेहिं गुरु-णंदणु

४

तेण-वि छिण्णु विद्धु स-सरासणु धुरि स-तुरंगमु णिउ जम-सासणु  
लइयइं णिसियरेण फर-खगगइं ताइ-मि कुतवसि-वयइं व भगगइं

घत्ता

गय मुक्क खुरुप्पे खंडिय पुणु अण्णहिं रहवरे चडिउ ।

पायव-पाहाण-पिसक्केहिं णं खय जलहरु ओवडिउ ॥

८

[१२]

ते पायव पाहाण सिलीमुह णिय दोणायणेण हेड्डामुह  
छिंदेवि छिंदेवि थूणा-कण्णेहिं रिउ वच्छयले भिण्णु अण्णणेहिं  
पाडिउ महियले अंजण-पावउ सूडिउ वासवेण णं पावउ  
ताम घुडुक्कएण हक्कारिउ थाहि थाहि जिह णंदणु मारिउ ४  
गुरु-सुएण विहसेप्पिणु वुच्चइ पइं समाणु महु भिडेवि ण रुच्चइ  
जाहि वच्छ जइ चंगे कारणु णं तो मेल्लि मेल्लि णिय-पहरणु  
पभणइ भीमसेणि करि वुत्तउं जाहि ताय रणे मरहि णिरुत्तउं  
हउं सो जाउहाणु जमु वीयउ तासु पुत्तु जें घाइउ कीयउ ८

घत्ता

अवरोप्परु पच्चारेप्पिणु णं वे गिरि एक्कहिं घडिय ।

पंडव-कउरवहं णियंतहं भीम-दोण-णंदण भिडिय ॥

९

[१३]

भीम-सुएण सरासणि मेल्लिय सयल-वि गुरु-सुएण पडिपेल्लिय  
जं जं रणे रयणियरे पगासिउ तं तहो माया-जालु विणासिउ  
जाउहाणु थिउ होवि महीहरु किउ गुरु-सुएण सो-वि सय-सक्करु  
भीम-सुएण ण अप्पउ दरिसिउ जलहरु होवि णहंगणे वरिसिउ ४  
पवणत्थेण सो-वि विणिवारिउ लक्खु णिसायराहं तहिं मारिउ  
ताम घुडुक्कएण दुव्वारइं रूवइं कियइं अणेय-पयारइं  
गिरि-धीरइं सायर-गंभीरइं सरह-सीह-सदूल-सरीरइं  
महिस-वराह-रिक्ख-सारंगइं सव्वइं करेवि मडप्परु भगगइं ८

८

घत्ता

पहरंते आसत्थामेण जोइयउ दुज्जोहणहो मुहु ।  
किं होमि ण होमि तुहारउं किंकरु णाह णिहालि तुहुं ॥ ९

[१४]

तो दुज्जोहणेण वोल्लिज्जइ अण्णहो सुहड-लीह कहो दिज्जइ  
गुरु-वयणेहिं गुरु-पुत्ते विसेसिउ सउणि किरीडिहे उप्परि पेसिउ  
किउ गुरुमित्तु णीलु किववम्मउ दूसासणु णिकुंभु जयवम्मउ  
णंदसेणु कमलक्खु पुरंजउ दिढरहु सल्लु सयप्पणु संजउ ४  
ओय-वि अवर-वि पाडिवलु दिण्णा धाइय रण-रस-रहसुब्धिण्णा  
वेढिउ तेहिं अखत्तें जुत्तउ एक्कु अणेक्कहिं मिलेवि धणंजउ  
ताव विओयर-सुएण स-संदणु दसहिं सरेहिं विद्धु गुरु-णंदणु  
मुच्छा-विहलंघलु रहे पाडिउ णं गिरि हरि-कुलिसाउह-ताडिउ ८

घत्ता

चेयण कह कह-वि लहेप्पिणु पुणु पाडिवारउ घाइयउ ।  
लक्खिज्जइ णिसियर-लोयणहिं णं खय-कालु पराइयउ ॥ ९

[१५]

पीडिउ जाउहाण-वलु वाणेहिं पंडव-सेण्णु मुक्कु णं पाणेहिं  
दिट्ठि-वि को-वि धरेवि ण सक्कइ एक्कु घुडुक्कउ पर परिसक्कइ  
णिय जोत्तारु वुत्तु लहु तेत्तहे वाहि वाहि रहु गुरु-सुउ जेत्तहे  
तो सहस त्ति तुरंगम खेडिय णरवर रक्खु दंड जिम मोडिय ४  
दारुणद्ध-चक्कासणि मुक्की णं खयकाल-रत्ति उवदुक्की  
करणु देवि गुरु-सुएण लइज्जइ णं जयलच्छि मंड कड्ढिज्जइ  
णं णव-वहु वरेण परिणिज्जइ णं सरि सायरेण आणिज्जइ  
भुयहिं भमाडिवि तहो जे विसज्जिय विज्जु जेवं गयणंगणे गज्जिय ८

घत्ता

कल-किंकिणि-घंटा-मुहलिय चंदण-चच्चिय लद्ध-जय ।  
हरि सारहि संदणु चूरेवि पुणु पायालहो असणि गय ॥ ९

[१६]

जं संदणु मुसुमूरेवि मुक्कउ	धट्टज्जुण-रहे चडिउ घुडुक्कउ	
विहि-मि सरेहिं विद्धु गुरु-णंदणु	तेण वि गरुयउ किउ कडवंदणु	
ताम विओयरु रहसुद्धाइउ	पुत्तहो केरए विहुरे पराइउ	
रह-सहसेच्छहिं(?) पवर तुरंगहं	सत्त-सएहिं मत्त-मायंगहं	४
तेण वि षडिगाहिउ णिय-णंदणु	दिण्णु स-तुरउ स-सारहि संदणु	
दोण-सुएण ताम सर लाइय	रयणियरहं अक्खोहणि घाइय	
पेक्खंतहो तहो पंडव-रणहो	गयणे चडंति ताम अत्थाणहो	
रहवर-णर-तुरंग-महि पाविय	रुहिर-महाणइ-णिवह वहाविय	८

घत्ता

तो दोणायरियहो पुत्तेण	विद्धु थणंतरे रयणियरु ।	
उरु भिंदेवि सहु संगाहेण	धरणिहे गंपि पइडु सरु ॥	९

[१७]

रहवरे घुम्मेवि पडिउ घुडुक्कउ	कह व कह व जीविण ण मुक्कउ	
ताम जुहिड्डिलु मणे चिंताविउ	महणावत्थ समुट्टु व पाविउ	
विहि-मि अणीयहिं दोणि विसेसिउ	कुसुम-वासु सुरवरेहिं पदरिसिउ	
सच्चइ सोमयत्तु तहिं अवसरे	कुविय वे-वि णं गह खय-वासरे	४
भीमें अंतराले तो थाएवि	विद्धु सिलीमुह दह उरे लाएवि	
तेण-वि वाण-सएण विओयरु	छाइउ णं घण-जालें महिहरु	
जायवेण दस विसिह विसज्जिय	पुणु पडिवारी सत्ति पउंजिय	
सत्तहिं कप्पिउ कवउ खणंतरे	अवरें पाडिउ हणेवि थणंतरे	८

घत्ता

रहु छंडेवि भीमहो पुत्तेण	रिउ-मुहु रोसाऊरियउ ।	
पेक्खंतहो कउरव-लोयहो	परिह-पहारिहिं चूरियउ ॥	९

[१८]

चूरिउ सीसु वि सहु मत्थिकें	धरिउ विओयरु तो वल्लिकें	
पंडु-सुएण णवहिं णारायहिं	विद्धु थणंतरे णिब्भर-घायहिं	

## रिद्धणेमिचरिउ

५८

तेण-वि धित्त सत्ति उरे लग्गी  
मुच्छाविय मायरिसहो णंदणु  
गिरिवर-गरुय-भयंकर-काएं  
दसहिं सरेहिं स-सूय स-संदण  
पंचहिं पंच-वि सउणिहे भायर  
ताव जुहिंङ्खलु भिडिउ तिगत्तहं  
सिवि-अंवट्टाभीरहं भोयहं

णाग-कण्ण दुमे णाइ वलग्गी  
कह-वि समुट्ठिउ किय-कडवंदणु  
चूरिउ सीसु गयासणि-घाएं  
घाइय दह धयरट्टहो णंदण  
णं खय-दिवसहिं सोसिय सायर  
मद्द-खुद्द-मालव-सामंतहं  
सग-पमुहहं अवरहं मि अणेयहं

घत्ता

सर-णियर-णिरंतर-भिण्णेण णिययाणीएं भग्गएण ।  
तव-तणउ पडिच्छिउ दोणेण णाइं गइंदु महागएण ॥

१०

[१९]

दोण-जुहिंङ्खलु भरिय रणंगणे  
विण्णि वि वावरंति लहु-हत्थेहिं  
वारुण-वायव-गिरि-अग्गेयहिं  
ताम धणंजएण लहु-हत्थे  
सीसु भणेवि वंचिय-पउरंदरि  
सयल-वि वायवेण उट्टाविय  
विण्णि-वि वलइं ताम णिद्दइयइं  
वण-वियणाउराइं समसीणइं

पिक्खाविय गिब्बाण णहंगणे  
पउरंदर कउवेरेहिं अत्थेहिं  
तामस-सउर-सएहिं अणेयहिं  
दोणायरिउ लइउ वंभत्थे  
धाइउ पुणु पंचालहं उप्परि  
अज्जुण-भीमेहिं मंभीसाविय  
सीय-वाय-तम-रय-पच्छइयइं  
मिहुणइं थियइं णाइं रय-खीणइं

४

८

घत्ता

तेहए-वि काले पडिवण्णए मुएवि महारह हत्थि-हड ।  
पहरंति केवि पडिसदणे रुहिरे तरंत तरंत भड ॥

९

[२०]

ताम णरेण वुत्तु णिय-सारहि  
जहिं किउ कण्णु दोणु दुज्जोहणु  
जहिं किववम्मू सउणि दूसासणु  
जायव लइ वस-कद्दमे खुत्तइं

तुरिउ महारहु अग्गए सारहि  
जहिं गुरु-णंदणु रइयारोहणु  
जहिं विससेणु सल्लु स-सरासणु  
जाव रहह चक्कइं पंगुत्तइं

जाम तुरंगम सर जज्जरियइं  
जाम णिद् वट्टइ सामंतहं  
जाम तमंधयारु णउ पेळ्ळइ  
ताम भिडिउ धट्टज्जुणु दोणहो

जाव हत्थि असि-खंडह सरियइं ४  
पविरलु जाम सट्टु वाइत्तहं  
रुहिर-महाणइ जाम ण रेळ्ळइ  
अवरहो अवरु अणिट्टिय-तोणहो

घत्ता

जिम्ब अम्हेहिं मुव समरंगणे

सत्तु व साहणेहिं मुएहिं ।

जिवं पर-वलु सयलु जिणेप्पिणु

जयसिरि लइय सइं भुएहिं ॥ ८

इय रिट्टणेमिचरिए धवलइयासिय-सयंभुएव-कए  
ऊणहत्तरिइमो सग्गो ॥



## सत्तरिमो संधि

चत्ताओहणु दुज्जोहणु ताम पासु गउ कण्णहो ।  
पइ-मि सुमित्तेण जियंतेण अकुसल-कउरव-सेण्णहो ॥ १

[१]

अहो अमर-धराधर-धीर-चित्त रक्खेवा कुरु पइं परम-मित्त  
मारेवा पंच-वि पंडु-पुत्त सिणि-णंदण-हरि-वलएव-जुत्त  
मच्छाहिव वेइ व कइकया-वि पंचाल-वि सोमय-सिंजया-वि  
तं णिसुणेवि पभणइ अंगराउ किं करहिं जियंतें मइ विसाउ ४  
सुणु कुरुवइ सव्व णरिंद पवर पढमज्जुणु पच्छइ हणमि अवर  
परमत्थें पिसुणहं सिरइं लेमि तउ वसुमइ णीसावण्ण देमि  
चंपाहिव-वयणेहिं किउ पलित्तु णं चित्तभाणु दुप्पवण-छित्तु  
मुहे दुम्मह किह णीसरिय वाय जिह मारमि पंच-वि पंडु-जाय ८

घत्ता

एक्कें पत्थेण लहु-हत्थेण सिंधव-वहि किय-तज्जिय ।  
समर-भडुज्जय ते दुज्जय पंच-वि केण परज्जिय ॥ ९

[२]

भणु कहिं ण भग्गु तुहुं अज्जुणेण तिण-कट्ट-णिवहु जिह फग्गुणेण  
दोमइहे सयंवेरे इक्क-वार जिउ उत्तर-गोग्गहे तिण्णि-वार  
भीमेण भग्ग रह सत्त-वार छिण्णइं धणुहरइं अणेय-वार ४  
सिंधवहो पत्थें एक्क-वार सिणि-णंदणेण अण्णेक्क-वार  
वेयारिउ कुरुवइ वहुय-वार जिह मारमि पंडव दुण्णिवार  
तो वुच्चइ चंप-पुरेसरेण गज्जेवउ पाउसे जलहरेण  
अहि-भक्खणे गरुड-विहंगमेण मय-काले मत्त-तंवेरेमेण  
करि-कुंभ-दलणे पंचाणणेण पडिवक्ख-समागमे भडयणेण ८

घत्ता

खत्तिउ गज्जइ तहो छज्जइ जो जुज्जइ अवियारेण ।

वंभण भोयणे रण-रंगणे तासु काइं वावारेण ॥

९

[३]

तुहुं गुरु गुरु-णंदणु वंभयारि

जुज्जेवि दस दिवस महा-रहेण

दुज्जोहणु दुहेवि कियाहिसेउ

सावेण सरेण-वि जो समत्थु

णासंतु जयद्दहु धीरवेवि

गुरु-सुउ अक्खोहणि हणइ जाम

संगाम-हरिण पइं कवणु कज्जु

किउ पभणइ तेरी लुहिय जीह

णिय-सामिय-वले दोहावयारि

किउ सुंदरु कवणु पियामहेण

पंडवहं मरंते दिण्णु भेउ

तेण -वि विहि-वइरिहिं दिण्णु हत्थु ४

माराविउ पत्थइ भेउ देवि

पंचह-मि मज्जे किण्णेकु ताम

जुज्जहि पारक्कउ होवि अज्जु

मरु पाएं पेळ्ळिवि लुणामि जीह ८

घत्ता

पेक्खेवि माउलु गुरु-कोवालु

किं भडवाएण मरु घाएण

लइउ खग्गु गुरु-पुत्तेण ।

पाडमि सीसु निरुत्तेण ॥

९

[४]

अवरुप्परु उट्टाउट्टि जाम

चंपाहिउ पभणइ एउ एउ

जा णिज्जइ वइवसपुर-पहेण

घरे भमइ ण जुज्जहि सामि-कज्जे

णरु दीसइ इंतउ रहवरेण

मइं घइं मारेवउ समरे पत्थु

पणवेप्पिणु पभणइ कुरुव-राउ

अवरोप्परु किं भड-मच्छरेण

दुज्जोहणु मज्जे पइड्डु ताम

परमेसरु मा धरि घाउ देउ

फलु एत्तिउ वंभण-संगहेण

कलहिज्जइ जं मणु सइय सज्जे ४

भिडु गज्जहि जेम मडप्फरेण

एहु अच्छइ उज्जिउ धम्म-हत्थु

गुरु-पुत्त होहि आहवे सहाउ

सव्वहो पहरेवउ सहु णरेण ८

घत्ता

ताव तुरंतउ पहरंतउ हय-गय-रह-सय-वाहणु ।

रवि-सुउ जेत्ते रणे तेत्ते धाइउ पंडव-साहणु ॥

९

[५]

वाहितु असेसहिं थाहि थाहि  
सव्वहं अणत्थहं तुहु-मि मूलु  
तुहुं वीसु तुहुं जउहरु जलण-जालु  
तुहुं गोग्गहे तुहुं जि असंधि-कञ्जु  
णारायहिं छाइउ दुब्भेवणेवि(?)  
रह खंडिय पाडिय णरवरिंद  
दुज्जोहणु पभणइ पेक्खु पेक्खु  
गुरु-तोय तो-वि णावडइ तुज्जु

चंपाहिव रहवरु वाहि वाहि  
तुहुं वंधव-सयलहं हियय-सूलु  
तुहुं जूउ कय-ग्गहु वसण-कालु  
तुहुं कउरव-लोयहो पलउ अञ्जु  
सहसत्ति णिवारिय तेण ते-वि  
हय हय गय गय णागय गइंद  
पडिपीडउ कण्णे जिह विवक्खु  
देव-वि अदेव जइ देहि जुज्जु

४

८

घत्ता

जाहि समाउलु किं आउलु  
पइं किव-कण्णहिं अपसण्णहिं

आयहो होहि सहिज्जउ ।  
कहिं धम्मु कहिं धणंजउ ॥

९

[६]

तो दूरायड्ढिय धणु-गुणाहं  
दुज्जोहण-तवसुय-किंकराहं  
विणिवद्ध-गोह-ताणंगुलीहिं  
कल-किंकिणि-मुहलिय-कडियलाहं  
विप्फुरिय-दिव्व-मणि-कुंडलाहं  
णारायहिं विण्णि-वि वावरंति  
णं दाणेहिं मत्त महा-गइंद  
णं सिंगेहिं महिस महा-रउद

आभिद्धु जुज्जु कण्णज्जुणाहं  
सुरवर-करि-कर-दीहर-कराहं  
सुरपहु-वि मुक्कु कुसुमंजलीहिं  
आवरणावरिय-उरत्थलाहं  
सर-णिवह-पिहिय-रवि-मंडलाहं  
णं धारें जलहर उत्थरंति  
णं दीह-णहर-पहरेहिं मइंद  
णं पवर-भुवंगेहिं वेण्णि रुद

४

८

घत्ता

णीवण्णहं णर-कण्णहं विहि-मि परोप्परु वाणेहिं ।  
जाउ रणंगणु गयणंगणु छाइउ अमर-विमाणेहिं ॥

९

[७]

रवि-सुएण विद्धु समुहुत्थरंतु  
चउ तुरय वियारिय अञ्जुणेण

तिहिं फग्गुणु तिहिं गुणु तिहिं अणंतु  
धणु हत्थहो पाडिउ सहु गुणेण

सारहि-सिरु खुडिउ महा-खुरेण	विणिभिण्णु कण्णु उरे तोमरेण	
किउ कलयलु अमरच्छर-जणेण	रहे किवेण चडाविउ दुम्महेण	४
तहिं अवसरे हय-गय-रह-वरेण्णु	दुज्जोहणु धीरइ गियय-सेण्णु	
मा भज्जहु वइरि-महा-भएण	हउं जुज्झमि समउ धणंजएण	
किर एम भणेवि उत्थरइ जाम	गुरु-णंदणु पेरिउ किवेण ताम	
धरे धरे रक्खेवउ कुरुव-राउ	मा होसइ आयहो रणे पमाउ	८

घत्ता

अम्हेहिं संतेहिं जीवंतेहिं	पिहिवि-पालु किह धावइ ।	
एक्के अंगेण	सहु खग्गेण सयण-विहूणउं णावइ ॥	९

[८]

तो तेण धरिज्जइ कुरुव-राउ	अप्पणु पहेरेवउ कवणु णाउ	
वोल्लिज्जइ णर-परमेसरेण	मइं काइं जियंतें महि-भरेण	
जो भण्णइ सण्णइ सो जि दुक्खु	मुए मुए पाडिज्जउ वइरि रुक्खु	
वुच्चइ दोणायरियहो सुएण	दुज्जोहण जुज्झमि तुह कएण	४
जउ अवजउ विहि-आयत्तु होइ	उप्पण्ण-णाणु किं अच्छि कोइ	
किं करहि जियंतेंहिं कवणु कज्जु	जइ भिडहि भडारा तुहुं जे अज्जु	
दोणायणु एम भणेवि थक्कु	भज्जंतु असेसु-वि वइरि-चक्कु	
दस दसहिं सरहिं पंचाल भिण्ण	णं वलि रण-वणदेवयहे दिण्ण	८

घत्ता

णाविय-खग्गए	वले भग्गए	कड्ढिय स-सरु धणुग्गुणु ।	
आसत्थामहो	उद्दामहो	थक्कु एक्कु धड्ज्जुणु ॥	९

[९]

रहसें परिवारिय-संदणेण	हक्कारिय दुमयहो णंदणेण	
उवजीवहि वंभणु होवि खत्तु	पइं घाइए दुरियागमणु कत्तु	
किह एहिं वरायहिं किंकरेहि	लइ जुज्झहो वे-वि महा-सरेहिं	
हउं दोणायरियहो पलय-कालु	उच्चारेवि पेसिउ वाण-जालु	४
गुरु-सुएण णीवारिउ दुहइं देंतु	णं अंविय-कंता-छोह देंतु	

धउ विद्धु महा-रहु किउ दु-खंडु सहु छत्तें पाडिउ कणय-दंडु  
 रहु सारहि वारह अंगरक्ख किय सयल-वि गिरि जिह लुत्त-पक्ख  
 सउ सएण तिण्णि तिहिं तिण्णि विद्ध पंचाल-वरूहिणि रणे णिसिद्ध ८

घत्ता

दुमयहो णंदणु हय-संदणु ओसारिउ णिय-थामहो ।  
 ताम विओयरु स-सहोयरु धाइउ आसत्थामहो ॥ ९

[१०]

एत्थंतरे अंतरे थिय णरिंद केरल कुणीर कोहव कुणिंद  
 जालंधर जाउण जवण जट्ट खस टक्क कीर टंकण अरट्ट  
 मेहल चिलाय पत्थल विसेस गंधार मद् मागह महेस  
 जउहेयाहीरह तामलित्त सग भरुस कच्छ अवर-वि विचित्त ४  
 गय-घाएहिं भीमें भग सव्व दुप्पवण-पणोल्लिय-तरुवर व्व  
 तो जय-सिरि-गहणुक्कंडुलेण हक्कारिउ दोणु जुहिड्डिलेण  
 पुणु पंचहिं विद्धु सिलीमुहेहिं सोणासें सत्तहिं फणि-मुहेहिं  
 थिर-थोर-पलंव-महा-भुएण सर-सहसु विसज्जिउ तव-सुएण

घत्ता

मुक्कु तुरंतेण किवि-कंतेण धाइउ दुप्परियल्लउ ।  
 राएं थंभिउ पवियंभिउ रणु जिह पेम्मु णवल्लउ ॥ ८

[११]

पडिलग्गु परोप्परु संपहारु रउ पसरिउ जाउ तमंधयारु  
 णउ दीसइ जलु थलु गयण-मग्गु ण धरत्थु ण सिविउवर-वलग्गु  
 णारोहु ण रहिउ ण आसवारु अप्पएण पराएण णउ वियारु  
 तो लइयउ कंचण-दीवियाउ सिहि-जाला-मालालीवियाउ ४  
 वहु-गंध-तेल्ल-पव्वालियाउ रहे रहे दह दह पज्जालियाउ  
 चउ चउ चतुरंगए सत्त सत्त वर-जामिणि वासर-सोह पत्त  
 सण्णाहेहिं मणि-रयणुज्जलेहिं मुत्ताहल-मालेहिं णिम्मलेहिं  
 पहरण-आहरण-सियंवरेहिं गय-दंतिहिं छत्तेहिं चामरेहिं ८

घत्ता

तिमिरु अणंतउ उवसंतउ रणु पडिवण्णु असुंदरु ।

जाउ भिडंतहं सामंतहं दीवीवालु पुरंदरु ॥

९

[१२]

तहिं कालें तं वलु अज्जुणेण

सउवलु सहएव-सहोयरेण

गुरु-णंदणु भीमहो णंदणेण

मद्दाहिउ मच्छ-णराहिवेण

विससेणु जण्णसेणें सरेण

तम-पडलु व णं णहे दिणयरेण

गंगेय-विमदणु किवहु कुब्हु

सच्चइ-भूरिहिं संगामु जाउ

पडिवारि सोणिय-सरि पयट्ट

हक्कारिउ गुरु धट्टज्जुणेण

वाहिय कालायस-संदणेण

कियवम्मु जुहिड्डिल-पत्थिवेण

चंपाहिउ णउलहो भायरेण

दुज्जोहणु वरिउ विओयरेण

+++++

पडिविंझें दूसासणु णिरुद्धु

पडिवारउ उड्डिउ रय-णिहाउ

पवहाविय रह गय तुरय थट्ट

४

८

घत्ता

ताम धणुद्धरु रणे दुद्धरु वाहोवाहिय-संदणु ।

पवर रहत्थहो तहो पत्थहो भिडिउ जडासुर-णंदणु ॥

१०

[१३]

स-रहसेण पघोसिय-कलयलेण

सेयासें रोसवसंगएण

वाणासणु वाणहिं णवहिं छिण्णु

धउ एक्कें चउ-वि महा-तुरंग

रहु मेल्लेवि धाइउ जाउहाणु

तो पत्थें खंडिउ मंडलग्गु

जं भग्गु णिसायरु अज्जुणेण

पंचहिं सरवरेहिं सिलासिएहिं

पंचासेहिं विद्धु अलंवलेण

रयणियरु समाहउ सर-सएण

तिहिं सारहि वच्छत्थले विभिण्णु

विहिं चक्करक्ख विहिं वे रहंग

असिवर-फर-रयण पउंजमाणु

हय-वम्म-रयणु णासणह लग्गु

तं विद्धु दोणु धट्टज्जुणेण

चामीयर-पुंख-विहूसिएहिं

४

८

घत्ता

मच्छर-भरिएण आयरिएण पंचवीस सर पेसिय ।  
धम्म-विवज्जिय गुण-वज्जिय णं कु-सीस परिसेसिय ॥

९

[१४]

तिहि-मि धणु धट्टज्जुणहो भग्गु सुकलत्तु जेम करे अवरु लग्गु  
वाणेण मरण-करणेण जाम किर विंधइ कण्णे छिण्णु ताम  
किउ वारह खंडइं आसुएहिं पंचहिं पंचहिं गुरु गुरु-सुएहिं  
विणिभिण्णु णवहिं मद्दाहिवेण वीसहिं सइं कुरुव-णराहिवेण  
तिहिं दूसासेणेण धणुद्धरेण पंचहिं सउवलेण व दुद्धरेण  
ते सव्वायामे धणु-गुणेण तिहिं तिहिं णिसिद्ध धट्टज्जुणेण  
एत्तहे वि सउणि णउलहो पलित्तु वच्छत्थले कण्णिय-सरु णिहित्तु  
विहवलेण विमुक्क पिसक्क सट्ठि दोहाइय मामहो चाव-लट्ठि

४

८

घत्ता

अवरें वाणेण भिडमाणेण रणे आयामिउ सउवलु ।  
कहवि ण मारिउ ओसारिउ सूएण वण-विहलंघलु ॥

९

[१५]

तो भिडिय परोप्परु अमरिसेण महि-कारणे कुरुवइ-भीमसेण  
सर पंच मुक्क दुज्जोहणेण णव भीमें रिउ-मइ-मोहणेण  
छत्तीसेहिं कुरुव-णराहिवेण छच्चावइं छिण्णइं पत्थिवेण  
वर गय पट्टविय विओयरेण वंचिज्जइ कुरु-परमेसरण  
तो आसत्थामहो दुक्कएण सो छिण्णु पलंव-महाभुएण  
वहु थूणा-कण्णहिं गुरु-सुएण +++++++++++  
भड-भीयर-समर-कियायरेण सउ वाणहं मुक्कणिसायरेण  
दोणायणु रुहिरारुणिय-गत्तु मुच्छाविउ चेयण कहव पत्तु

४

८

घत्ता

पहउ पिसक्केण लल्लक्केण संसय-भावहो दुक्कउ ।  
कह-वि पयत्तेण णिउ जत्तेण मुच्छाविहलु घुडुक्कउ ॥

९

[१६]

सुरधणु-धीरइं धणुवरइं लेवि  
पत्थेण मुक्क सर पंचवीस  
तो भोजक-वंसाहिवेण विद्धु  
कवरेण करिसिय-कम्मएण  
पंचहिं पर देहावरणु भिण्णु  
विहलेण-वि काया-भंतिएण  
तहिं वीसहिं विद्धु अजायसत्तु  
उद्धाइउ सत्ति-सणाहु णाहु

कियवम्म-जुहिट्टिल भिडिय वे-वि  
णं भीम भुवंगम भुअण-भीस  
धणु छिंदेवि सत्तहिं पडिणिसिद्धु  
धणु दसहिं वियारिउ तव-सुएण ४  
उरे अवेरेहिं पवर-सरेहिं भिण्णु  
धणु अवरु लेवि जउ-वंसिएण  
धुरि दसहिं खुरुप्पेहिं छिण्णु छत्तु  
कियवम्महो हउ दाहिणउ वाहु ८

घत्ता

तेणवि तज्जिउ किउ कज्जिउ वइहत्थिए सर-जालेण ।  
णट्ठु स-संदणु तव-णंदणु गंथु जेम वहु-कालेण ॥ ९

[१७]

जं णरवइ संसय-भावे छुद्धु  
णारायहिं णवहिं थणंतराले  
तेण-वि तेहत्तरि-मग्गणेहिं  
विणिवारिउ सारहि णिहय वाह  
मुच्छाविउ दाविउ दप्प-साडु  
तो रणु पडिलग्गु स-संदणाहं  
वित्थारिय-जगे-जस-मंडवेण  
हय विहिं पंचासिहिं रवि-सुएण

तं चंपाहिवहो विराडु कुद्धु  
विणिभिण्णु भयंकरे समर-काले  
धय-चामर-छत्त-वलग्गणेहिं  
उरे भिण्णु वियारिय वाम-वाह ४  
णिय भिच्चहिं ओसारिउ विराडु  
सहएव-दिवायर-णंदणाहं  
सर वीस विसज्जिय पंडवेण  
सत्तरिहिं विद्धु णउलाणुएण ८

घत्ता

छिण्णु वरत्थेण रहु पत्थेण विप्फुरंतु सय-चंदउ ।  
किउ अवलेवेण सहएवेण करे स-खग्गु वसुणंदउ ॥ ९



[१८]

वसुणंदउ भग्गु स-मंडलग्गु	पुणु चक्कु भयंकरु करे वलग्गु	
तमि छिण्णु गयासणि मुक्क तेण	परिसेसिय असइ व सुपुरिसेण	
पट्टविय सट्टि(सत्ति?) सहसत्ति आय	सा रवि-सुएण किय विण्णि भाय	
सहएउ भग्गु थिउ जण्णसेणु	णं पवर करेणुहे वर-करेणु	४
वट्टंतए तहिं संगाम-काले	विससेणु परिट्टिउ अंतराले	
पंचालहो पंचहिं कवउ छिण्णु	णाराएं एक्कें हियउ भिण्णु	
ओसारिउ ताव सिहांड पत्तु	णव सर विमुक्क किउ कहिं-मि जंतु	
हउ आसत्थामहो माउलेण	पाऊण-सएं अण्णाउलेण	८

घत्ता

तेण वि ताडिउ तहो पाडिउ	किवहो धरंत-धरंताहो ।	
हत्ये ण तिट्टइ खणे रिट्टइ	सव्वहो धणु-गुणवंतहो ॥	९

[१९]

सहसत्ति सत्ति पेसिय किवेण	जिय पंचहिं पंचालाहिवेण	
पडिविंधु ताम स-सरासणेण	तिहिं हउ णिलाडे दूसासणेण	
तेण-वि सोलहेहिं सिलीमुहेहिं	जुवराउ णिवारिउ अहिमुहेहिं	
कउरवेण वियारिय चउ तुरंग	जत्तारु-वि हउ पाडिय रहंग	४
पायत्थ पधाइउ चंडवेउ	पलयेक्क-चक्क-लल्लक्क-तेउ	
रणु एम परोप्परु विहि-मि जाम	सिरि-संभव-भूरि भिडंति ताम	
सर पंच विसज्जिय माहवेण	दस भूरि भूरि कियाहवेण	
जायवेण स-धणु तणु-ताणु छिण्णु	तेण-वि तिहिं सच्चइ हियइ भिण्णु	८

घत्ता

सत्तिए भिंदेवि सिरु छिंदेवि	रहहो पलोट्टिउ पाएण ।	
खयरवि-तेएण सइणेएण	गिरिहिं व दुमु दुव्वाएण ॥	९

[२०]

जं भूरि कयंतहो वयणे छुद्धु  
 अवरोप्परु दस दस सर विमुक्क  
 जम-भउंह-भंगुब्भीसणइं  
 चंपाहिउ पंचहिं पंडिणिसिद्धु  
 भीसावणु हा-हे-सट्टु जाउ  
 धट्टज्जुण-सच्चइ हणहुं वे-वि  
 दसहिं दसहिं सहासिहिं रह-गयाइं  
 पट्टविउ सउणि दुज्जोहएण

तं रवि-सुएण सच्चइ णिरुद्धु  
 उरगमणहं णं उरगमण दुक्क  
 विहिं विण्णि-वि हयइं सरासणइं  
 विससेणु पडीवउ दसहिं विद्धु  
 वोल्लाविउ कण्णे कुरुव-राउ  
 जं भग्गहुं मेइणि सयल लेवि  
 अण्णु-वि लक्खेण महाहयाइं  
 सिणि-णंदणु वेढिउ णंदणेण

४

८

घत्ता

तो कुरु-णाहेण असगाहेण वुत्तु एम णिय-सारहि ।  
 जायउ जेततेहे लहु तेत्तेहे रहु महु केरउ सारहि ॥

९

[२१]

रहु वाहिउ सच्चइ दसहिं विद्धु  
 पुणु पंच सयइं परिपेसियाइं  
 अवरेण सरासणु सरेण भिण्णु  
 तो णरु णिरुद्धु सुवलंगएण  
 वीसहिं णरेण गंधार-णाहु  
 दूसासणु तिहिं तिहिं उलुअ-णामु  
 तिहिं तिहिं असेस णरवइ णरेण  
 छहिं वाणहिं दोणहो सहं गुणेण

तेण-वि वाणउइहिं पंडिणिसिद्धु  
 रह-उवगरणइं णीसेसियाइं  
 कियवम्म-रहे कुरुवइ चडिण्णु  
 हउ दहिं पीडिउ वउ सर-सएण  
 छहिं दूसहु दुप्पहु तिहिं सुवाहु  
 पंचहिं विणिवारिउ सउणि मामु  
 सउवलु पणहु सुय-रहवरेण  
 धणु छिण्णु ताव धट्टज्जुणेण

४

८

घत्ता

गसिउ स-वाहणु कुरु-साहणु जण्णसेण्ण-सिणि-जाएहिं ।  
 णं विसमाणु जक्खाणु दुद्दमग्गि-दुव्वाएहिं ॥

९

[२२]

तो कण्ण-दोण दुज्जोहणेण	गरहिय असमत्ताओहणेण	
जइ तुम्हहिं रणु आढत्तु आसि	ता हउं ण होंतु सव्वाहिलासि	
वरे एवमि एवमि दिण्ण पाण	भूयह-मि ण लज्जहं भज्जमाण	
तहिं काले णियत्तिय-संदणेहिं	विससेण-दोण-रवि-णंदणेहिं	४
सइणेयहो लाइय थरहरंत	दस दस वच्छत्थले वच्छदंत	
सउवलेण पंच कउरवेण सत्त	अवरेहिं दुइ दुइ काल-पत्त	
सिणि-णंदणु सव्वेहिं पीडणिसिद्धु	धट्टज्जुण कण्णे दसहिं विद्धु	
धउ धणुवरु सारहि वर-तुरंग	विणिवाइय अवर-वि किय सहंग	८
	घत्ता	
वाण विहलंघलु पंडव-वलु	भग्गु भिडंतेहिं पंडवेहिं ।	
महिहे समग्गइं फर-कर-खग्गइं	घिवेवि सयं भुव-दंडेहिं ॥	९

इय रिद्धणेमिचरिए धवलइयासिय-सयंभुएव-कए  
सत्तरिमो सग्गो ॥

## इकहत्तरिमो संधि

भगए रह-गय-वाहणे पंडव-साहणे णर-णारायण-मुक्कउ ।  
 लोल-ललाविय-जीहहो सीहु व सीहहो कण्णहो भिडिउ घुडुक्कउ ॥ १

[१]

भणइ अणीए भग्गे तव-णंदणु	अज्जुण वाहि वाहि लहु संदणु	
पिययण पलयमाण गय-सारहि	कुरुवइ अंगराय विणिवारहि	
कहइ अणंतु ण अवसरु अण्णहो	वासवपुत्त-जायव करे कण्णहो	
ताम समत्थु-वि णरु ण पहुच्चइ	आयहो समरि घुडुक्कउ मुच्चइ	४
मायविउ बहु-मायहिं जुज्झइ	सव्व-कुसलु सव्वत्थइं वुज्झइ	
महुसूयण-उवएसं आएं	तो पड्डविउ जुहिड्डिल-राएं	
लइ धणु चक्कु सूलु गय-खंडउ	पंडव-लोकहो होहि तरंडउ	
जंपइ जाउहाणु मुहु जोएवि	अच्छु णाह णिच्चिंतउ होएवि	८

घत्ता

हउं समरंगणे मुक्कउ	जमु जिह दुक्कउं	कुरु-समसुत्ती दावमि ।
संसय-भावे वलग्गी	महि आवग्गी	कल्लए पइं भुंजावमि ॥

[२]

गज्जिऊण एवं तमीयरो	भूरी-भाव-भूभाय-भीयरो	
धूमकेउ धूमयर-सत्थहो	काल-महाकालग्गि-दूसहो	
अक्क-चक्क-लल्लक्क-लोकणो	सव्वगासि-वडवा-मुहाणणो	
पलय-काल-पडिरूव-भीसणो	महण-पत्त-मयरहर-णीसणो	४
चलण-लीढ-अट्टय-वसुंधरो	उत्तमंग-उद्धंपियंवरो	
धाइओ भडो भीम-णंदणो	कड्डिओ पिसायहिं स-संदणो	
णक्ख-चम्म-ओणद्ध-अवयवो	अद्ध-चक्क-चिक्कार-भइरवो	
णेमि-वलय-जव-जिय-विहंगमो	भूरि-भार-भारिय-भुअंगमो	८

(विलासिणी छंद)

घत्ता

णर-णारायण-रायहिं पेसिउ आएहिं पर-वले भिडिउ घुडुक्कउ ।  
णं हरि-हर-वंभाणेहिं तिहि-मि पहाणेहिं मंदरु सायरे मुक्कउ ॥ ९

[३]

गिरि-फुडण तडि-पडण-	पडिरवेण किलिगिलइ	
रमछमइ णहु छिवइ	महि कमइ रिउ ललइ	
घणघणइ पहरणइं	अवरह इ वले मिलइं	
अयरिसउ तणु करेवि	धय-पडेहिं पडिणिलइं	४
मण-पवण-चल-गमणु	खयर-वहे रयणियरु	
परिभमइ जउ जउ जे	तउ तउ जे रय-णियरु	
रह-दलइं गय-दलइं	भड लुणइ हय हणइ	
जउ जउ जे तउ तउ जे	घवघवइ रुहिर-णइ	८
जउ जउ जे गयरुअइं	तउ तउ जे पइसरइ	
जउ जउ जे वस वहइ	तउ तउ जे रउकरइ	
जउ जउ जे पउ धिवइ	तउ तउ जे रसरसइ	
जउ जउ जे रसरसइ	तउ तउ जे अहितसइ	१२
तउ तउ जे विसु मुअइ	जउ जउ जे जगु सुवइ	
जउ जउ जे रणे भमइ	तउ तउ जे दिसि भमइ	
जउ जउ जे दिसि भमइ	तउ तउ जे णहु णमइ	
	(सव्व-लहु छंद)	

घत्ता

वलइ गिलंतु घुडुक्कउ असणि व मुक्कउ धरिउ ण सक्किउ अण्णे ।  
कायर मंभीसंतें थाहि भणंतें सरहिं पडिच्छिउ कण्णे ॥ १६

[४]

तो दुज्जोहणेण स-सरासणु	वाहि वाहि पेसिउ दूसासणु
चंपाहिवहो करहि परिरक्खणु	हिंडइ जाउहाणु अवलक्खणु
णवर दिवायर-दूसह-तेयहो	कहि-मि पभाउ करेसइ आयहो

ताम जडासुर-सुएण समक्खे	कुरुव-राउ वोल्लाविउ रक्खे	४
वणे णिवसंतु अतुलु माहप्पे	जणणु महारउ आयहो वप्पे	
घाइउ जेण तेण रणे मुच्चमि	हउं जे एक्कु तिहुअणहो पहुच्चमि	
हियवोवरि कर-पल्लव ढोएवि	अच्छहि णाह णिहालउ होएवि	
कुरु-परमेसरेण मोक्कल्लिउ	जाहि जाहि लहु हत्थुत्थल्लिउ	८

घत्ता

भीम जडासुर-णंदण वाहिय-संदण दिण तूर किय कलयल ।	
पंडव-कउरव-किंकर भुअण-भयंकर भिडिय घुडुक्कालंवल ॥	९

[५]

वे-वि णिसायर	समर-कियायर	
वे-वि रणुद्धय	गिद्ध-महद्धय	
विण्णि-वि वियवर	रहिय-वरंवर	
दुइ-वि भयावह	पइसाविय-रह	४
दुइ-वि महोयर	रिउ-जम-गोयर	
दुइ-वि धणुद्धर	सुरह-मि दुद्धर	
वे-वि स-विक्कम	सक्क-परक्कम	
दुइ-वि स-मच्छर	तोसिय-अच्छर	८
दुइ-वि दुराणण	जिह पंचाणण	
दुइ-वि वलुद्धर	जिह सुर-सिंधुर	
दुइ-वि स-मलहर	जिह णव जलहर	
तो लल्लक्केहिं	दसहिं पिसक्केहिं	१२
किउ हय-संदणु	भीमहो णंदणु	
सो-वि पहरिसिउ	धणु जिह वरिसिउ	
वि-रहु अलंवलु	किउ विहलंघलु	

घत्ता

वज्ज-दंड-सम-सारेहिं	मुट्ठि-पहारेहिं	हणेवि परोप्परु पीसिउ ।
मंदर-खीर-समुद्धं	विहि-मि रउद्धं	णाइं विमट्ठु पदीसिउ ॥

[६]

दिव्वाउहेहिं	वण-हुयवहेहिं	
सिल-पायवेहिं	घण-वायवेहिं	
कुलिसाचलेहिं	हरि-मयगलेहिं	
असुरामरेहिं	गरुडोरगेहिं	४
अवरेहिं तेहिं	+++++	
पहरंति दोहिं	पच्छण्ण होहिं	
मायहिं रमंति	णहयले भमंति	
चलणेहिं तुरंति	वयणेहिं फुरंति	८
णयणेहिं डहंति	सिक्किणि लिहंति	
तो दिढ-भुएण	भीमहो सुएण	
कड्ढेवि किवाणु	सिहि-सिह-समाणु	
सिरु छिण्णु तासु	रयणीयरासु	१२
	घत्ता	

लेवि धित्तु हइडिंवे जम-पडिंविंवे रहवरे कउरव-रायहो ।  
लइ लइ दुण्णय-दुम-फलु चक्खउ कुरु-वलु रस-विसेसु को आयहो ॥१३

[७]

दुक्खवेवि खिवेवि सीसारविंदु	पच्चारेवि खेरिवि कुरु-णरिंदु	
रयणीयरु भीयरु सुट्टु जाउ	रहु पेळ्ळिउ मेळ्ळिउ सीह-णाउ	
अरुणच्छु दलु लहु लोहियासु	थोरट्टि-गंठि णिप्परिस-पासु	
संहारण-तारण-सम-किरीडु	दुज्जोहण-साहण-पाण-पीडु	४
भू-भाय-भयावह-भूरिभाउ	वारहय-रयणि-परिमाण-चाउ	
धूमप्पह-कंस-मयंग-ताणु	सय-साम-तुरंगम-जुत्त-जाणु	
सोणिय-पुडिंंग-चित्तलिय-चिंधु	णं णिम्मज्जायउ पलय-सिंधु	
परिभमइ भमाडइ वइरि-सेण्णु	मं भज्जहो वलहो वलंतु कण्णु	८

घत्ता

धाइउ रयणियरु णरिंदहो करि व करिंदहो जाउ रउहु रणंगणु ।  
पेलावेळि करंतहं सुरहं णियंतहं झुल्लइ णाइं णंहगणु ॥ ९

[८]

तो कणियार-कुसुम-दल-वण्णं लयउ परमु दिव्वाउहु कण्णं  
रयउ घुडुक्कएण मायावउ साहणु हणु हणु सहुदामउ  
तरु-गिरि-सिल-पाहणहिं हत्थउ वारुण-वायव-अगोयत्थउ  
दिस-पमाणु सायर-गंभीरउ विसहर-विसमु धराधर-धीरउ ४  
हय-वाइत्त-पवड्ढिय-कलयलु तं णिएवि आसंकिउ कुरु-वलु  
अंगु राउ पर एक्कु ण कंपिउ णिसियर-णियरु खुरुप्पेहिं कप्पिउ  
सहुं सीसक्केहिं सीसइं छिण्णइं स-कवंधइं तणु-ताणइं भिण्णइं  
आसवार स-तुरंग समाहय सरह रहिय सारोह समागय ८

घत्ता

माया-वलु जगडाविउ रणे विहडाविउ सरेहिं दिवायर-पुत्तं ।  
लक्खण-लक्ख-विणासेहिं दोस-सहासेहिं कुकइ कव्वु जिह धुत्तं ॥ ९

[९]

उवदुक्कएण मग्गण-गण धित्त घुडुक्कएण  
कण्णहो अणिट्ट उरु भिंदेवि पुणु महियले पइट्ट  
तेण-वि णिसिद्धु दोसायरु दसहिं सरेहिं विद्धु  
थरहरिय-गत्तु कह कह-वि हु धरणीयलु ण पत्तु ४  
भीमुब्भवेण सहसारु चक्कु मुक्कउ जवेण  
रवि-सुएण छिण्णु उवविसणु णाइं रणे सिरिहे दिण्णु  
गय भीयरेण लल्लक्क मुक्क रयणीयरेण  
कलहोय-वण्ण संचारिम णावइ णाग-कण्ण ८  
स-वि अदिहि देति विणिवारिय असइ व पासु एंति



घत्ता

तो उप्पएवि स-संदणु भीमहो गंदणु वरसिउ विविहेहिं घाएहिं ।  
णं परिवड्ढिय-मलहरु जुय-खय-जलहरु धारा-णियरु णिवाएहिं ॥ १०

[१०]

तओ सूर-पुत्तेण वाणेहिं भिण्णो	हया आहया संदणो झत्ति छिण्णो	
विणासं णिया जाउहाणी कुमाया	समुट्ठाविया अंगवंगेहिं घाया	
हिडिंवा-सुएणं पि से दिव्व-अत्थं	कयं वच्छदंतेहिं सव्वं णिरत्थं	
खणे अण्ण मायावलेवेण भीसें	खणे वीस चालीस पंचास सीसें	४
खणे विज्जुला-लोल-लोलंत-जीहो	खणे कुंजरो तक्खणे होइ सीहो	
खणे पास-पासे खणे दूर-दूरे	खणे भूमि-भाए खणे ठाइ सूरे	
खणेंगुट्टमेत्तो खणे सेलु तुंगो	खणद्धे विरूवो खणद्धे अणंगो	
खणे वाह-पट्टे खणे हत्थि-खंधे	खणे छत्त-दंडे खणे चारु-चिंधे	८

घत्ता

दुच्छिउ दिण्ण-दिउत्तें भीमहो पुत्तें थाहि थाहि लइ पहरणु ।  
सामिहे जं ण धरिज्जइ अवसरे दिज्जइ सीसें एत्तिउ कारणु ॥ ९

[११]

एम भणेवि वरिसिउ सय-वारउ	णं जलहरु मुवंतु जल-धारउ	
दिणमणि-णंदणेण सर पेसिय	पडिभड-कवड-माय णीसेसिय	
विप्फुरियाहवेण अरुणक्खे	अवर माय उप्पाइय कक्खे	
जाउ महागिरि गिरि परिवारिउ	वज्ज-सरेहिं रवि-सुएण वियारिउ	४
जाउ गइंदु मइदें तासिउ	जाउ भाणु सुब्भाणे णासिउ	
जाउ जलणु जलहरेण कलंकिउ	जाउ मेहु दुव्वाएं वंकिउ	
जाउ जलहि मंदरेण विरोलिउ	एम घुडुक्कउ आहिंदोलिउ	
णाणाउहु णाणाविह-वाहणु	णिय-रहे चडिउ अणिट्टिय-साहणु	८

घत्ता

तो पंचग्गि-समाणेहिं पंचहिं वाणेहिं कण्णहो छिण्णु सरासणु ।  
तेण-वि तहो अगोयहिं सरहिं अणेयहिं चउदिसु दिण्णु हुवासणु ॥ ९

[१२]

तो पलित्त साहणेण	लोहिय-प्पसाहणेण	
भीमसेण-णंदणेण	काललोह-संदणेण	
धूमवण्ण-विग्गहेण	लोयणग्गि-दूसहेण	
कालरूव-भीसणेण	मेह-णाय-णीसणेण	४
भूरि-भाव-भावणेण	दिब्ब-माय-दावणेण	
विप्फुरंत-कुंडलेण	ढक्कियक्क-मंडलेण	
दुद्धरासणी विमुक्क	विज्जुलावली व दुक्क	
अट्ट चक्क सार-भूव	देवय व्व दिण्ण-धूव	८
जोयणाइं दो कराल	एक्क-जोयणं विसाल	
तं णिएवि धायरट्ट	पुट्टि दिंत के-वि णट्ट	
तो दिवायरंगएण	दिब्ब-मच्छरंगएण	
सज्जे भीम-णंदणासु	लेवि मुक्क मंड तासु	१२

घत्ता

स-धउ स-छत्तु स-चामरु स-धुरि स-हयवरु रहु संचूरेवि मुक्कउ ।  
 करणु देवि तहो थाणहो अंतरे वाणहो गउ केत्तहे-वि घुडुक्कउ ॥१३

[१३]

णं अयरिसणु हूउ परमप्पउ	पडिवउ जाउहाणु किउ अप्पउ	
रोक्कइ वलइ धाइ वहु-वेसेहिं	सरह-सीह-सहूल-विसेसहिं	
मक्कड-महिस-मेस-मायंगेहिं	करह-कोल-खर-रिच्छ-भुवंगेहिं	
वसह-तुरंग-रोज्झ-रुरु-चमरेहिं	मंकुण-दंस-मसय-दुब्भंमरेहिं	४
सारमेय-गोमाउ-विरालेहिं	भल्लुय-भूय-पेय-वेयालिहिं	
डाइणि-जोइणि-गह-चामुंडेहिं	वायस-घोर-गिद्ध-भेरुंडेहिं	
तहिं अवसरे थिएण आसण्णे	विजय-सरासणु कड्डिउ कण्णे	
दस सय संख सरासण पेसिय	माया-रूव-रिद्धि णीसेसिय	८

घत्ता

सरहिं णिरंतर पूरिउ कह व ण चूरिउ णिसियरु माया-पाणें ।  
अंतर-थाणें पइसइ कह व ण दीसइ णिकलु जिह विणु जाणें ॥ ९

[१४]

ताम वग-णंदणो वइरि संसग्गिणा	इत्ति संदीविओ परम-कोवग्गिणा	
भणइ दुज्जोहणु देहि आएसयं	जा हिडिंवा-सुअं करमि णीसेसयं	
एक्कचक्काहिवो जेण विणिवाइओ	से सरीरुब्भवो एस संभाइओ	
भणइ कुरु-परिविढो जाहिं जाहिद्धुअं	णेहि जम-सासणं पंडुणंदण-सुअं	४
हरिसिओ रक्खसो वाहिओ संदणो	अमर-वर-कामिणी-लोयणाणंदणो	
सरहसुद्धाइया दो-वि जायं रणं	सुरवहू-जयसिरी-पाणिगह-कारणं	
पहय पडु-पडह दडि-संख-कोलाहलं	विवुह-वहु-अंगणा-गीय-जय-मंगलं	
वच्छदंतासणी-भिण्ण-गयणंगणं	एवमारंभियं तेहिं समरंगणं	८

घत्ता

घायालिंगण-सारउ कइयवगारउ करण-बंध-सय-भरियउ ।  
मुच्छण-वेयण-भावेहिं विविहालावेहिं सुरयहो रणु अणुहरियउ ॥ ९

[१५]

तो ओणिदए णिद्दा-भुत्तइं	पंडव-कुरुवाणीयइं सुत्तइं	
णिसियर वावरंति विण्णि-वि जण	विण्णि-वि लोहियक्ख-रत्ताणण	
विण्णि-वि भीम-वगासुर-णंदण	विण्णि-वि काललोहमय-संदण	
विण्णि-वि गिद्ध-चिंध दप्पुद्धर	वे-वि मयंध कुद्ध णं सिंधुर	४
विण्णि-वि घोर रूव धूमप्पह	विण्णि-वि रिक्खचम्म सज्जिय-रह	
विण्णि-वि सायमुहेहि तुरंगेहिं	विण्णि-वि हत्थि-चम्म-फरुसंगेहिं	
विण्णि-वि भूसिय कंसिय-कवएहिं	विण्णि-वि धणुअवरेहि वज्जमएहिं	
विण्णि-वि सिल-धोयहि णाराएहिं	विण्णि-वि खर-वाणेहिं साहाएहिं	८

घत्ता

णिएवि वगासुर-णंदणु किय कडवंदणु कुरुवइ-दिहि-संपुण्णउ ।  
जउण-विओयर-जायहो रज्जु ण-रायहो पंडव-वल्गु आदण्णउ ॥ ९

[१६]

वोल्लाविउ ताम भीमो अणंतेण भो भो पधाव प्पधाव प्पयत्तेण  
तुह णंदणो घाइओ जाउहाणेण तं सुणेवि कोवग्गि-जज्जल्लमाणेण  
मायरिस-पुत्तेण वड्ढिय-पयावेण आयड्ढियायत्त-सोवण्ण-चावेण  
खर-वाहणा रक्खसा थरहरंतेहिं हय पंच-पंचेहि दूवच्छदंतेहिं ४  
थक्को त्ति आलाउहो तेण कुद्धेण भीमस्स छिण्णु धणु गिद्ध-चिंधेण  
तेण-वि तहो घाइया लउडि-दंडेहिं णं मत्त तंवेरमा उद्ध-सुंडेहिं  
चुण्णं गयाओ गयाओ-वि घाएहिं भग्गा महालाण-थंभ व्व णाएहिं  
वोल्लाविओ ताम पत्थो उविंदेण तुह भायरो मारिओ रक्खसिंदेण ८

घत्ता

भीम-अलाउह-संगरि हरि-वयणंतारि अज्जुणु जिह जमु दुक्कउ ।  
भडु एत्तहिं वि स-मच्छरु णाइं सणिच्छरु कण्णहो वलिउ घुडुक्कउ ॥ ९

[१७]

खउ करंतु दुज्जोहण-सेण्णहो सच्चइ-जमल पधाइय कण्णहो  
सोमय-सिंजयाहं रक्खस-वल्गु णरु णरवइहि पवड्ढिय-कलयल्लु  
तो हल्लोहल्लिहूउ जणदणु वुत्तु हिडिंवासुंदरि-णंदणु  
धाउ धाउ हउ जणणु तुहारउ दुज्जउ जाउहाणु मायारउ ४  
सरहसु भइमसेणि हरि-वयणं धाइउ धूमकेउ णं गयणं  
विण्णि-वि भिडिय जाउ कडवंदणु हउ परिहेण विओयर-णंदणु  
णिवीडिउ कंपमाणु महि-मंडले चेषण लहेवि लउडि किय करयले  
दिण्णु घाउ संचूरिउ रहवरु स-धउ स-च्छत्तु स-सूयउ स-चामरु ८

घत्ता

णहे उप्पएवि पहरिसिउं रुहिरु पदरिसिउ वग-सुउ सज्झस-मुक्कउ ।  
थिउ अलि-सामल-देहहो मेहु व मेहहो उप्परि तहो-वि घुडुक्कउ ॥ ९

[१८]

तो तारा-मंडल-ढुक्कएण	णासिय रिउ-माय घुडुक्कएण	
दरिसाविउ किउ कडवंदणेण	पाहाण-वरिसु वग-णंदणेण	
समरंगणे कोव-वसंगएण	तमि-सरिहिं छिण्णु भीमंगएण	
पुणु जुज्झिय सव्व-महाउहेहिं	पुणु वर-तुरएहिं पुणु कररुहेहिं	४
पुणु करण-विसेसेहिं दूसहेहिं	पुणु कंठग्गह-केसग्गहेहिं	
लद्धावसरेण अलाउहासु	असि दुहिय लेवि सिरु छिण्णु तासु	
सवडंमुहु दुज्जोहणहो घित्तु	अण्णु-वि तिहिं रुहिरंजलिहिं सित्तु	
फलु एउ एहु रसु दुण्णयाहं	दक्खवइ सव्व-वंधव-सयाहं	८

धत्ता

पेक्खेवि पंडव-किंकरु	भिडिउ भयंकरु	रह-गय-तुरय-वरेण्णइं ।	
कंठ-परिड्डिय-जीयइं	पाणहं भीयइं	णट्ठइं कउरव-सेण्णइं ॥	९

[१९]

रवि-सुएण ताम जिउ पंड-वल्नु	मंदरेण महिउ णं उवहि-जल्नु	
पंचाल मच्छ कइकय पवर	सोमय सिंजय पंडव अवर	
ते दसहिं दसहिं मग्गणहिं हय	णं घण-धारें हय वसह-गय	
पर थक्कु घुडुक्कउ एक्कु जणु	गज्जंतु णाइं णहे पलय-घणु	४
अवरोप्परु छइउ णिरंतरहं	वइहत्थिय-वच्छदंत-सरहं	
कण्णियहिं वराह-कण्णा-सयहिं	णालीयहिं चामीयरमयहिं	
तावणिहिं तुरंग चउक्कु हउ	पुणु अंतर-ठाणहो भइमि गउ	
दस दिसु केत्तहिं-वि ण दीसियउ	कउरवेहिं कण्णु आकोसियउ	८

घत्ता

णउ जाणहं कह होसइ	काइं करेसइ	णिसियरु अमरिस-कुद्धउ ।	
जीविउ दुक्करु दीसइ	कहो किर सीसइ	कुरुवइ संसय-छुद्धउ ॥	९

[२०]

कुरु-परमेसरेण आदण्णं	सयल दिसा-णिवंधु किउ कण्णं
लोयण-गोयरु वाणेहिं छाइउ	घोरु तमंधयारु उप्पाइउ

तो विष्णाण-करण-गुण-जुत्तें  
 अंवरु अरुणु करेप्पिणु मुक्कउ  
 हा हे सदु महा-भयगारउ  
 तिहि-मि के-वि ण परम्मुहिभूय  
 कहिं-मि सिवउ विमुक्क-फेक्कारउ  
 कहि-मि पणच्चियाइं हय-खंधइं

विरइय माय हिडिंवा-पुत्तें  
 विज्जुल-वहलुज्जलिय-जलणुक्कउ ४  
 मुक्काउह तरु-गिरि-अंगारउ  
 वलेवि परिट्टिय जिह जम-दूय  
 हुयवहु चित्त-णयण-पब्भारउ  
 णं सीसेहिं रिणु देवि कवंधइं ८

घत्ता

एम स-चिंधु स-वाहणु कउरव-साहणु चूरिउ सिल-पाणेहिं ।  
 दिणमणि-सुएण घुडुक्कउ सज्झस-मुक्कउ जिणेवि ण सक्किउ वाणेहिं ॥ ९

[२१]

णिवडंति फुरंतइं संमुहाइं  
 वोल्लंति परोप्परु कुरुप्पहाणु  
 कल-किंकिणि-माला-मुहलियंग  
 अण्णहिं रहे चडिउ पयंग-जाउ  
 भो भाणव जइ तुह अत्थि सत्ति  
 जा रक्खिय कारणे अज्जुणासु  
 पट्टविय तेण हउ जाउहाणु  
 आगासहो पीडिउ पसारियंगु

गयणहो णक्खत्त-समाउहाइं  
 सुरवर पवहंति ण जाउहाणु  
 हय कण्णहो केरा वर तुरंग  
 जणु जूरिउ चूरिउ अंगराउ ४  
 तो मेल्लेवि वासवयत्त सत्ति  
 सा करउ हिडिंवा-सुय-विणासु  
 वड्ढंतु-वि गिरिवर-परिपमाणु  
 अत्थमिउ णाइं वीयउ पयंगु ८

घत्ता

तेण सयं भू-पत्तें भीमहो पुत्तें अक्खोहणि संचूरिय ।  
 पंडु-सुयहुं भउ लाइउ पर-वलु खाइउ खगहं मणोरह पूरिय ॥ ९

इय रिट्टणेमिचरिए धवलइयासिय-सयंभुएव-कए ।  
 घुडुक्कावह[-णामो इमो] इकहत्तरिमो सग्गो ॥

## बाहत्तरिमो संधि

विणिवाइए भीमहो णंदणे पंडु-सेण्णु थिउ दुम्मणउं ।  
पेक्खंतहो कउरव-लोयहो कण्हें किउ वद्धावणउं ॥ १

[१]

सुर-समर-विढत्त-महागुणेण	वोल्लविउ माहउ फग्गुणेण	
सुर-गिरि-चंक्रमणे समुद्-खोहे	दिवसयराणुग्गमे जम-विरोहे	
भू-भाय-कंपे णव-गह-णिवाए	सुय-सोयाऊरिए धम्म-जाए	
संतोसु तुज्झु कज्जेण केण	किउ वद्धावणउं महंतु जेण	४
तो कहिउ णरहो णारायणेण	आणंदिउ आएं कारणेण	
ण घुडुक्कउ मुउ मुउ अंगराउ	विणु सत्तिए णिव्विसु अहि व जाउ	
सिणि-णंदणु पभणइ देव देव	अज्जुणहो ण उप्परि मुक्क केवं	
सच्चइहे कहिज्जइ महुमहेण	मइं मोहिउ कण्णु ण घित्त तेण	८

घत्ता

एक्काहणि वासव-दिण्णय जइ सा कह-वि समल्लियइ ।  
तो मारइ णरेण मरंतेण अम्हहं एक्कु-वि ण-वि जियइ ॥ ९

[२]

दइवोवहेण वियत्तणेण	अविमुक्क णरहो हियत्तणेण	
माहवहं विहि-मि चवइ एवं जाम	दोणहो धाइय सामंत ताम	
सिवि-सोमय-सिंजय-कासि-राय	पंचाल-मच्छ-कच्छय-सहाय	
तो जमल-जुहिड्डिल-भीमसेण	वोल्लाविय कण्हें स-हरिसेण	४
जिह भंडणु तिह खउ खत्तियाहं	रोवेसहु कारणे केत्तियाहं	
पढमुत्तरु मुउ रक्खंतु सेउ	अहिमण्णु घुडुक्कउ पुणु अजेउ	
को जाणइ अज्जु-वि विजउ काहं	अवलंवेवि धीरम भिडहु ताहं	
ववसाइहें सोक्खइं जेम होति	स-मणोरहं तुम्हहं मिलिउ कोति	८

घत्ता

धणु देंतउं को-वि ण विद्धउ को पहरंतउ णउ मरइ ।  
 धणु देइ रणंगणे पहरइ णीसावण्णु वे-वि करइ ॥ ९

[३]

तो सोयर-सुय-उक्कंठुलेण णारायणु वुत्तु जुहिडिलेण  
 परमत्थु भडारा कहिउ एहु महु आयहो उप्परि गरुअ-णेहु  
 किउ अलयालंवल-मद्दणेण महु पेसणु भीमहो णंदणेण  
 परिवद्धइ तेण महंतु दुक्खु वज्जमउ ण को-वि ण को-वि रुक्खु ४  
 सिरि-रामालिंगिय-विग्गहेण तव-तणउ णिवारिउ महुमहेण  
 कायर-पुरिसहं अवसरु ण होइ रोवंतु ण पावइ पिहिवि कोइ  
 गुरु पेक्खु पेक्खु किह वलइ खाइ हरिणउलइं हरिणाहिवइ णांइ  
 तो धाइय सरहसु पंडु-पुत्त णं सीह विउज्झाविय पसुत्त ८

घत्ता

गय गयहं तुरंग तुरंगमहं रह रहवरहं समावडिय ।  
 भीमज्जुण-जमल-जुहिडिल पंच-वि दोणहो अब्भिडिय ॥ ९

[४]

दडि-गोमुह-डंवर-पडह देवि भिडिय कुरु-पंडव-वलइं वे-वि  
 पहरंति परोप्परु सुहड के-वि णखत्त-पहइं पहरणइं लेवि  
 उण्णिदए णिदए घुम्ममाण णिवडंति क्किवाण-णिहम्ममाण  
 सुरधणु-पयंड-गंडीव-हत्थु खणु एक्कु णिवज्झहु भणइ पत्थु ४  
 मं पहरहो स-तिमिरे संपहारे णउ दीसइ किंपि तमंधयारे  
 रय-रुहिर-तरंगिणि-भग्ग-मग्गे जुज्झेसहो ससहरे णहे वलग्गे  
 विविहाउह-मंडिय-मंडवेहिं पडिवण्णु वयणु कुरु-पंडवेहिं  
 परिपुज्जिउ अज्जुणु सुत्त ते-वि रह-सिविय-तुरंगेहिं आरुहेवि ८



घत्ता

समरंगण-वहु-अवरुंडिउ अण्णेहिं धुणेवि विसाणइं ।  
सुहु सुत्त के-वि सिरि देप्पिणु करि-कुंभइं उवहाणइं ॥

९

[५]

के-वि करिवर-कुंभेहिं सघणेहिं थिय लगेवि णं कामिणि-थणेहिं  
पसमिउ कुरु-पंडव-संपहारु पवियंभिउ घोरु तमंधयारु  
परिपूरेवि सयल दियंतरालु णं वलइ गिलेवि सुहु सुत्तु कालु  
ससि अरुणु परिद्धिउ ताम गयणे णं आमिस-गासु कियंत-वयणे ४  
थोवंतरे थिउ ससि-चिंधु धवलु णं गहयल-सरे पप्फुल्ल-कमलु  
णं पुव्व-दिसावहु-सिय-कवोलु तो वसुह-वरंगण-गहण-लोलु  
दुज्जोहणु पभणइ ताय ताय तुह अवसरु मारहि पंडु-जाय  
कइयहं वि महारउ ण किउ कज्जु वइरिहिं जे समिच्छहि देवि रज्जु ८

घत्ता

तो वुच्चइ दोणायरिण मं तुहुं कुरुवइ एम भणे ।  
को पंडव जोहेवि सक्कइ देव अदेव वि जाहं रणे ॥

९

[६]

हउं जिणेवि ण सक्कमि पंडु-जाय णिय-सत्तिए जुज्झमि कुरुव-राय  
सइं पहरहि जइ साहीण-हत्थ किं दोणु पडिच्छइ पंच पत्थ  
एक्केण-वि पत्थे करेवि वप्पु दरिसाविउ तह तह लोह-दप्पु ४  
रक्खस-वहे गोत्तहो अंतराले भययत्त-जयदह-समर-काले  
जुज्झावहि एवहिं णिय-सहाय दूसासण-सउवल-अंगराय  
वेयारिउ जेहिं अणेय वार विस-जउहर-जूयइं किय-णिवार  
जइ कुरुव णिहम्मइ एक्कु जीवु तो होज्ज ण होज्ज व जंवुदीउ  
तुहुं घइं मारावेवि सयण साव गइ कवण लहेसहि पिसुण-भाव ८

८

घत्ता

मइं अज्जु कल्ले सामंतेहिं तइय-कण्ण-दूसासणेहिं ।

मरिएवउ दिवसे चउत्थए सउणि-सल्ल-दुज्जोहणेहिं ॥

९

[७]

सव्वसाइ-विजय-उक्कंठुलेण  
 सयमेव सहिज्जउ जासु विद्धु  
 तो दूरत्थेण-वि रवि-रहेण  
 जामिणि-अवसाणे विलीणु चंदु  
 दाडि-काहल-संख-मुइंग देवि  
 वायरणहं मिहुणहं अणुहरंति  
 जिह ताइं तेम गुण-विद्धि णेंति  
 जिह ताइं तेम णं कंपिराइं  
 बहु-एक-दु-वयण-पयंपिराइं  
 तो विमलइं थियइं दियंतराइं

भुंजेवउ रज्जु जुहिट्टिलेण  
 दुज्जोहण एहु परमत्थु सिद्धु  
 णवणीय-पिंडु जिह हुयवहेण  
 गउ गिलेवि माणु णक्खत्त-विंदु  
 सु-विउद्धइं कुद्धइं वलइं वे-वि  
 जिह ताइं तेम सर संभरंति  
 जिह ताइं तेम कहु दिहि ण देति  
 जिह ताइं तेम किरियावराइं  
 जिह ताइं तेम पडिवावराइं  
 ++++++

४

८

घत्ता

उययइरि-सिहरे रवि उग्गउ दीसइ पंडव-कुरु-णरेहिं ।

मा मुज्झहो केत्तिउ जुज्झहो णाइं णिवारिय णिय-करेहिं ॥

११

[८]

रवि-उग्गमे भिडियइं वलइं वे-वि  
 रह रहहं महाधय धयवडाहं  
 रउ पुणु वि समुट्टिउ तेत्थु काले  
 जइ धावहो अणियहो अणितउ देवि  
 अण्णेत्तहे उट्टिउ पहरणग्गि  
 मं मुज्झहो जुज्झहो सामि-कज्जे  
 जं रण-मुहे जय-सिरि पासु एइ  
 ससि-फलिहे लिहिज्जइ णियय-णामु

गय गयहं तुरंगहं तुरय देवि  
 रण-रस-रहसुब्भड भड भडाहं  
 थिउ णाइं णिवारिउ अंतराले  
 तो गिलामि पंडु-कुरु-वलइं वे-वि  
 णं विहि-मि अणीयहं करइ लग्गि  
 पाइक्कहं संपय एत्तिय ज्जे  
 सुर-वहुय मरंतहं सवसु देइ  
 पहरिज्जइ केम ण जाम थामु

४

८

घत्ता

अण्णेत्तहे वहइ रणंगणे

रुहिरहो णइ भीसावणिय ।

ललललइ लोल लालाउलिय

जीह णाइं कालहो तणिय ॥

९

[९]

तहिं तेहए दूसहे दुण्णिवारे

कुरु-पंडव-साहण-संपहारे

हरि-भीमहिं पेरिउ सव्वसाइ

दुम-दूसलएवहं वड्ढि णाइं

किं अच्छहि वड्ढिय-विक्रमाइं

विणिभिंदइहि वूहइं गिरि-समाइं

उदीविउ पुणु गंडीवधारि

भुक्खिय-कयंत-वयणाणुकारि

४

लक्खिज्जइ णउ वि रयंत-थाणु

णउ दिट्ठि-मुट्ठि-संधाणु वाणु

णिवडंति समच्छर गय-तुरंग

सामंत महा-सर-पूरियंग

विणिभिण्णइं जूहइं अज्जुणेण

णं अवगुण-सयइं महागुणेण

आवइइ फुइइ भमइ सेणु

णं उवहि-सलिलु मंदर-णिसणु

८

घत्ता

परिसक्कइ वइरि वियंभइ

सधणु धणंजउ जहिं जे जहिं ।

लक्खिज्जइ समर-महोवहि

रुंड-णिरंतरु तहिं जे तहिं ॥

९

[१०]

एत्तहे रणु कुरुव-धणंजयाहं

एत्तहे सुर-सोमय-सिंजयाहं

एत्तहे-वि विओयर-रविसुयाहं

दुज्जोहण-णउलहं सोणुयाहं

एत्तहे वि दोणु दूसहु पराहं

दिवसयरु व गिंभे महीहराहं

जोयणहं ण तीरइ भड-सएहिं

पंचालेहिं मच्छेहिं कइकएहिं

४

तो तवणीय-तणु-ताण-गत्त

हय दोवइ-तायहो तिण्णि पुत्त

तिहिं भल्लिहिं सीसइं तोडियाइं

कमलइं व मराले मोडियाइं

तो धाइय दुमय-विराड वे-वि

कोवंडइं भू-भंगुरइं लेवि

समकंडिउ खंडिउ छत्त-दंडु

तणु-ताणु ताहं किउ खंडु खंडु

८

घत्ता

विहिं भल्लिहिं विहि-मि णारिंदहं

छिण्णइं सिरइं स-कुंडलइं ।

विहिं विहि-मि विसहर-फुट्टेहिं

णाइं णिरुद्धइं सयदलइं ॥

९

[११]

धड्ज्जुणु भीमें वुत्तु एम	हय जण्णसेणि तुहुं जियहि केम	
पुत्तहो पुत्तत्तणु एत्तिउं जे	जं वइरि णिहम्मइ वइरि-पुंजे	
उच्छोहिउ तेण वि पंडु-पुत्तु	किं णिहए घुड्कए जियहि जुत्तु	
हउं दोणहो तुहुं कण्णहो पयट्ठु	तं णिसुणेवि मारुइ रणे वियट्ठु	४
गउ तेत्तहे जेत्तहे अंगराउ	विसमाहउ विहि-मि महंतु जाउ	
तिहिं सरेहिं थणंतरे भिण्णु कण्णु	विहलंघलु कह-वि ण महि पवण्णु	
सर-जुज्झु फिट्ठु गय-जुज्झु लग्गु	रह-कुव्वरु एक्केक्कहो जे भग्गु	
रविसुय-भुय-जुयल-गलत्थिएहिं	पावणि णिसिद्धु वइहत्थिएहिं	८
घत्ता		

उरे घित्त सत्ति जत्तारहो	णिहय तुरंगम वि-रहु किउ ।	
उट्ठेवि णह-लंघण-करणेण	णउल-महारहे भीमु थिउ ॥	९

[१२]

रहु ढोइउ भीमहो अवरु जाम	दुज्जोहणु णउलहो भिडिउ ताम	
पंडवेण णिवारिउ सरवरेहिं	उण्हालउ णं णव-जलहरेहिं	
सहएवं दूसासणु णिसिद्धु	तहो सारहि कंठ-पएसे विद्धु	
सिरु खुडिउ ण जाणिउ कउरवेण	हय खंचिय जंत महा-जवेण	४
पडिवारउ भिडइ ण भिडइ जाम	दोणज्जुण-रणु पडिवाण्णु ताम	
रह-मंडल-मग्गेहिं संचरंति	दिव्वत्थेहिं विण्णि-वि वावरंति	
जं कुरु समरंगणे धिवइ हत्थु	तं तेण जे पडिवाउ हवइ पत्थु	
दुद्धम-दणु-देह-विदारणाइं	णिट्ठवियइं सव्वइं पहरणाइं	८
हम्मंतु वि हरिसिउ वद्ध-णेहु	जगे धण्णउ हउं जसु सीसु एहु	
घत्ता		

धड्ज्जुणु रहवरु वाहेवि	भिडिउ ताम दूसासणहो ।	
पज्जालिय-जाला-मालहो	जलहरु णाइं हुवासणहो ॥	१०

[१३]

दूसासणु दुमय-सुएण भग्गु	कियवम्मु णवर पहरणहं लग्गु	
एत्तहे आढत्ताओहणेण	वुच्चइ सच्चइ दुज्जोहणेण	
डज्जउ धिगत्थु एहु खत्त-धम्मु	सहुं पइ-मि करेवउ फूर-कम्मु	
होंतउ आसि महु परम-मित्तु	पहरेवउ एवहिं मइं णिरुत्तु	४
सिणि-णंदणु पभणइ वद्ध-रोसु	खत्तियहं रणंगणे ऋवणु दोसु	
छुडु साउहु संमुहु थाउ को-वि	हम्मइ गुरु-पुत्तु सहोयरो-वि	
अवरोप्परु ए आलाव जाम	राहेय-भीम पडिलग्ग ताम	
किउ मारुइ वि-रहु वियत्तणेण	तव-णंदणु भणइ हियत्तणेण	८
लहु धावहु धाइउ भीमसेणु	चंपाहिउ दीसइ भीम-सेणु	
सामंत पधाइय भग्गु कण्णु	दोणायरिएण-वि पंडु-सेणु	

घत्ता

सय पंच हयइं पंचालहं	सट्ठि सयइं पुणु सिंजयहं ।	
दस दंति-सहासइं मारेवि	धाइउ भीम-धणंजयहं ॥	११

[१४]

तो जमल करेप्पिणु चक्क-रक्ख	तोसावेवि किण्णर-सिद्ध-जक्ख	
धड्ज्जुणु दोणहो समुहु दुक्कु	णं गहु णिय-थाणंतरहो चुक्कु	
णं धाइउ केसरि कुंजरासु	णं विज्जु-पुंजु धरणीहरासु	
णं विणया-णंदणु विसहरासु	णं गहकल्लोलु दिवायरासु	४
पच्चारिउ दुमयहो णंदणेण	कहिं जाहि थाहि सहुं संदणेण	
हउं पलय-कालु उप्पण्णु तुज्झु	जिह हउ जणेरु तिह देहि जुज्झु	
तो एंतु पीडिच्छिउ दियवरेण	सुरसरि-पवाहु णं सायरेण	
परिभमिय रहेहिं हेमुज्जलेहिं	अब्भंतर-वाहिर-मंडलेहिं	८

घत्ता

वसुदाणु ताण थिउ अंतरे	तासु वि तोडिउ सिर-कमलु ।	
पहरंतहं गुरुण णिहम्मइ	मणे आसंकिउ पंडु-वलु ॥	९

[१५]

अंगिरस-सरासणु करे करेवि  
 पंचालु महारहु रणे विहत्तु  
 स-धयगु स-चामरु छिण्णु चाउ  
 करे स-सरु सरासणु अवरु लेवि  
 तं धणु हउ वेहाविद्धरण  
 जं जं धट्टज्जुणु धरइ धम्मु  
 आसंक्रिय पंडव एहु अवज्जु  
 हउ आसत्थामुल्लवहु एम

वर वच्छदंत सर वीस लेवि  
 स-तुरंगु स-सारहि सायवत्तु  
 किउ दुमयहो णंदणु हय-पयाउ  
 गुरु विद्धु थणंतरे आहसेवि  
 दोहाइउ कलस-महाधरण  
 तं तं छिंदइ गुरु लहेवि जम्मु  
 हरि कहइ करहो उवएसु मज्जु  
 णिय-चावलट्टि परिहरइ जेम

४

८

घत्ता

जं वोळ्ळिउ पंकयणाहेण दोणायरिय-विणासयरु ।  
 पडिवण्णु सव्वु तं सव्वेहिं एक्कु मुएप्पिणु णवर णरु ॥

९

[१६]

मालव-परमेसरु इंदधम्मु  
 सो भीमें भीम-परक्कमेण  
 हउ आसत्थामु धरत्ति पत्तु  
 थिउ उम्मणु दुम्मणु कलसकेउ  
 मुच्छा-विहलंगलु महि पवण्णु  
 पत्तियइ ण कासु-वि णाम-भंतु  
 किं सच्चउ आसत्थामु णत्थि  
 महुमहेण वि दिज्जइ कण्ण-जाउ

तहो तणउं महा-करि कूर-कम्मु  
 धुम-केसर-केसरि-विक्रमेण  
 जाणइ महु णंदणु रणे समत्तु  
 धणु छिंदइउ पंडव-पलय-केउ  
 कह कह-वि समुट्टिउ लद्ध-सण्णु  
 तवणंदणु पुच्छिउ सच्चवंतु  
 पहु पभणइ घाइउ णरु ण हत्थि  
 महिहरेण णरिंदहं कवणु पाउ

४

८

घत्ता

तो अलियालाव-पहावेण गुरु-वहकरणुक्कंवलइं ।  
 रहु भरिउ जुहिट्टिल-केरउ महिहे चउदह अंगुलइं ॥

९

[१७]

तो धाइय वाणासणइं लेवि  
 संजमियाणिज्जिय जमल-तोणु

पारावयास-सोणास वे-वि  
 पवियंभइ रुंभइ पुरउ दोणु

## रिद्धणेभिचरिउ

९०

वहु-रण-भर-धुर-उद्धरण-खंधु  
गय मुक्क सिहांडिहे भायरेण  
कइकेयण-सालु वसुंधरत्थु  
णिय-रह-धुर-तुंडेहिं पाउ देवि  
किवि-कंतें पारावय-णिहंग  
वसुणंदउ सर-लक्खेण भग्गु

रहु चूरिउ करेवि रहंग-बंधु  
स-वि छिण्ण खुरुप्पें दियवरेण  
धड्डज्जुणु दुक्कु फरासि-हत्थु  
पेक्खंतहं सेण्णहं भिडिय वे-वि  
सत्तिए भिंदेवि पाडिय तुरंग  
वइहत्थिय-सहसें मंडलग्गु

४

८

घत्ता

सरु अवरु लेवि किरि मारइ

ता सुहडहं कडवंदणेण ।

अद्ध-वहे जे किउ दस-खंडइं

दसहिं सरेहिं सिणि-णंदणेण ॥

९

[१८]

किव-कण्णेहिं तो सच्चइ णिसिद्धु  
एत्तहे-वि मुवंतें सर-सयाइं  
णरवइहिं लक्खु कलसद्धएण  
गयणंगणि हक्कारंति देव  
संधारहि गुरु केत्तिय विरोहि  
रहु ढोइउ ताम विओयरेण  
धणु अवरु लेवि वहु-अमरिसेण  
पंडवेहिं पसंसिउ जण्णसेणि

धड्डज्जुणु दोणें पत्तु विद्धु  
खत्तियहं वीस सहसइं हयाइं  
अक्खोहणि णिहय सवाय तेण  
गइ कवण लहेसहि हणेवि देव  
वंभुत्तरे सग्गि सुरिंदु होहि  
वाहिउ पंचालि-सहोयरेण  
विणिहय वसाइ सग सूरसेण(?)  
पइं मुएवि अवरु को जस-णिसेणि

४

८

घत्ता

उरु भिंदहि लहु सिरु छिंदहि

कुद्धउ भीमसेणु भणइ ।

पुत्तेण वि तेण किं जाएण

जो ण-वि जणण-वइरु हणइ ॥

९

[१९]

तो कीयाकुल-कडवंदणेण  
अहो वंभण सलहिय-खत्त-धम्म  
पंडवहं हरेवि महि कुरुहुं देवि  
जसु कारणे रणे पहरणहं लग्गु  
हणु हणु जइ पच्चुज्जिएवि एइ

अक्कोसिउ गुरु हरि-णंदणेण  
कहिं सुद्धि लहेसहि पाव-कम्म  
वहु जीव-सहासहं सिरइं लेवि  
सो आसत्थामु वलग्गु सग्गु  
हणु हणु जइ जीविउ जमु ण णेइ

४

हणु हणु अजरामरु जइ सरीरु	हणु हणु परलोयहो जइ ण भीरु	
सुय-सोय-परव्वसु भग्ग-घोणु	णिय जोगब्भासे पइड्डु दोणु	
वोळ्ळाविय कउरव करहु जुज्झु	छंडियइं वरत्थइं कहिउ गुज्झु	८

घत्ता

उक्खंति-कालु महु वट्टइ	एवहिं आयाउ धुउ मरणु ।	
जो सव्वहं पासिउ वड्डुमउ	सो देवाहिदेउ सरणु ॥	९

[२०]

जो तिहुवण-मत्थए किय-णिवासु	परिगलइ पाउ णामेण जासु	
जसु आण-वडीवा सयल देव	जसु तिण्णि-वि लोय करंति सेव	
जो थुइहिं थुणिज्जइं सयल काल	णमिएहिं णमिज्जइ णाम माल	
ण मइज्जइ जो पंचिंदिएहिं	वंदिज्जइ सुरवइ-वंदिएहिं	४
भाविज्जइ जो वहु-भावएहिं	ण विमुच्चइ सोक्खेहिं थाइएहिं	
परिचिंतिउ सो देवाहिदेउ	उक्कत्ति करेवि गउ भूमि देउ	
तेयमउ सिहि व जज्जल्लमाणु	वंभुत्तर-सग्ग-वलग्गमाणु	
लक्खिज्जइ तवसुय-संजएहिं	किव-पंकयणाह-धणंजएहिं	८

घत्ता

तहिं अवसरे दुमयहो पुत्तेण	णरहो धरंत-धरंताहो ।	
सिरु छिण्णु सयं-भूव-खग्गेण	दोणहो जीविय-चत्ताहो ॥	९

इय रिट्ठणेमिचरिए धवलइयासिय-सयंभुएव-कए ।

[णामेणं दोणवहो] बाहत्तरिमो इमो सग्गो ॥



## तेहत्तरिमो संधि

दोण-दिवायरे अत्थमिए थिउ जगु जे सव्वु अंधारउं ।  
पंडव-वले वद्धावणउं दुज्जोहण-वले कूवारउ ॥

१

[१]

कउरव-साहणु सुण्णु तेण तेण चित्तें  
सोह ण पावइ तेण तेण चित्तें  
गुरु-परिवज्जिउ तेण तेण चित्तें  
गह-कुलु णावइ तेण तेण चित्तें ॥ (जंभेद्विया)

गंगेय-गुरुज्झिउ कुरुव-वलु	णं णयण-विवज्जिउ मुह-कमलु	
णं कामिणि-जोव्वणु पडिय-थणु	णं चंदाइच्च-चत्तु गयणु	४
दुज्जोहणु मुक्क-कंठु रडिउ	हा अज्जु भाणु गयणहो पडिउ	
हा अज्जु निरंजणु जरेण मुउ	*****	
हा अज्जु पुरंदरु दुक्खियउ	हा अज्जु पयावइ भुक्खियउ	
हा अज्जु महा-समुदु सुसिउ	हा वज्जमओ विक्खंभु घुणिउ	८
हा अज्जु मेरु थाणहो चलिउ	हा अज्जु पिसायहिं जमुच्छलिउ	
हा कुम्म-कडाहु अज्जु फुडिउ	हा अज्जु कयंतहो सिरु खुडिउ	

घत्ता

अज्जु दिसा-वहु दुम्मणिय महि वि(हव?)रणंगणु सुण्णउं ।  
दुज्जोहणेण रुवंतएण कुरु-सेण्णु असेसु-वि रण्णउं ॥

११

[२]

कुरुहुं अमंगलु तेण० पभणइ संजउ तेण० ।  
जाहं विरुद्धउ तेण० स-धणु धणंजउ तेण ०॥  
वेयारिओ सि तुहुं तिहिं खलेहिं रविसुय-दूसासण-सउवलेहिं  
विणिवारिउ ण किउ महु त्णउ गंगेयहो ण हु विउरहो तणउं

तहो कम्महो केरउ लद्धु फलु	चूरविउ सयलु-वि कुरुव-वलु	४
गुरु-बंधव-सयणहं करेवि खउ	कहि केतहे होसइ थत्तियउ	
अच्छेवउ णरए अहोमुहेण	सुपसारिय पाय पओरुहेण	
दुक्खइं विसमइं विसहंतएण	वस-वीसद्धु सलिलु पियंतएण	
वइतरणि-तरंगिणि-उत्तरणे	हुयवह-सीयले असिपत्त-वणे	८
तिल-कुसुम-समाणइं जहिं घरइं	असुहइं गिरि-मेरु-महत्तरइं	

घत्ता

तुहुं वेयारिउ वसुमइए	तव-तणयहो दिण्णु ण अद्धउं ।	
णल-णहुसहं वलि-रामहं	भणु आयए कवणु ण खद्धउ ॥	९

[३]

तो खलियत्थइं तेण०	सज्झस-वीयइं तेण० ।	
भग्गइं सब्बइं तेण०	कुरुवाणीयइं तेण० ॥	
धट्टज्जुण-सच्चइ-चप्पियइं	तवणंदण-जमल-झडप्पियइं	
मारुय-गय-घायहिं चूरियइं	वासवि-पिसक्क-परिपूरियइं	
णट्टइं दुज्जोहण-साहणइं	कुरु-कर-परपेसिय-वाहणइं	४
तहिं अवसरे आउ अणंत-वलु	मं भज्जहो मंभीसंतु वलु	
कम-कम-कंपाविय-धरणियलु	स-सरासणु फेरिउ सर-णियलु	
गुरु-णंदणु संदणु धरेवि थिउ	मुउ कवणु केण कुरु-भंगु किउ	
किय दोण-दिवायरु अत्थमिउ	किय सुसिउ सिंधु गिरि विक्कमिउ	८
कुरुवाहिउ पभणइ ण किय किउं	हउं कहेवि ण सक्कमि कहउं किउं	

घत्ता

अक्खिउ गउत्तम-णंदणेण	णिसुणंतहो णरवर-विंदहं ।	
एक्कें वम्हत्थेण हय	वेहत्थिहिं सहसु णरिंदहं ॥	११

[४]

हरि-उवइट्टेहिं तेण०	पंडव-जेट्टेहिं तेण० ।	
धणु छंडाविउ तेण०	गुरु माराविउ तेण० ॥	

## रिद्धणेमिचरिउ

१४

सुय-सोयाऊरिय-विग्गहहो  
सर-सायर-सलिल-णिमग्गाहो  
भड-णिवहहो विणिवारंताहो  
धट्टज्जुणेण सिरु पाडियउ  
णिसुणेवि जणेर-सग्गारुहणु  
रस-रसणु महीहर-हल्लवणु  
वोल्लाविउ कुरुव-णराहिवइ  
धट्टज्जुण-जीविउ अवहरमि

दोणहो परिचत्त-परिग्गहहो  
वंभोत्तरे सग्गे वलग्गाहो  
अज्जुणहो धरंत-धरंताहो  
ताल-तरु णाइं फलु साडियउ  
किउ गुरुसुएण सायर-खुहणु  
णक्खत्त-पडणु गह-कंपवणु  
पंडवहं पगासमि पलय-गइ  
जं सुएण करेवउ तं करमि

४

८

घत्ता

जइ ण-वि मारमि पंडु-सुय सिवि-सोमय-सिंजय-मच्छा ।  
तो अणसणु पेक्खंतु महु विणिण व सहसच्छ-तियच्छा ॥

९

[५]

कहिं तव-णंदणु तेण० कहिं दामोयरु तेण० ।

कहिं कइकेयणु तेण० कहि-मि विओयरु तेण० ॥

कहिं जमल सुहड सिहांडि-पवर  
सयल-वि मरंति महु समर-मुहे  
जिह पण्णय गरुड-समागमणे  
तव-सुएण ताम गंडीव-धरु  
अहो अज्जुण अक्खु केवं वलिउ  
णिसुणिज्जइ पर-वलु दुव्विसहु  
पहरणइं फुरंति जलण-सिहइं  
धय फरहरंति हिंसंति हय

कहिं जण्णसेणिण सच्चइ अवर  
जिह करि केसरि-वयणंवुरुहे  
जिह सलह पईव-समावडणे  
वोल्लाविउ खंडव-पलयकरु  
पडिवारउ पर-वलु संगिलिउ  
रसमसइ रउहु तूर-णिवहु  
तारायण-चंद-सूर-णहइं  
रह थरहरंति गज्जंति गय

४

८

घत्ता

केण णियत्तिउ कुरुव-वलु रण-भरहो खंधु को देसइ ।  
जायव-पंडव-भडहिं सहं कहु कवणु जोहु जुज्जेसइ ॥

१०

[६]

कहइ धणंजउ तेण० तहो तव-तोयहो तेण०।

आयण्णंतहो तेण० पंडव-लोयहो तेण०।।

ओहु पत्थिव-पर-वल-पलयकरु

अवहत्थिय-मरण-ब्भय-पसरु

सोवण्ण-सीह-लंगूल-धउ

जसु सोएं सग्गहो दोणु गउ

क्किव-भायणेउ क्किवि-काय-करु

जाएण जेण क्किउ तूर-रउ

जसु आसत्थामु णामु ठविउ

पंचाल-सेण्णु जें णिड्ढविउ

णारायणु पहरणु जसु वियइ

समरंगणे आयहो को जियइ

णउ हउं णवि तुहुं णउ महुमहणु

णउ भीमु ण जमलहं एक्कु जणु

ण सिहंदि पंडि धड्ढज्जणु-वि

ण-वि सोमय सिंजय कइकय-वि

जं जाणहो तं तुम्हइं करहो

लहु इड्ढ-देवहो संभरहो

घत्ता

पंडव-पक्खिउ परम-गुरु

गउ धणु-विण्णाणहो पारउ ।

तं मारेविणु समर-मुहे

तउ तव-सुय कहिं उत्तारउ ॥

[७]

अलिउ चवावि तेण० कवड-सणाहेण तेण०।

तुहुं वेयारिउ तेण० पंकय-णाहेण तेण०।।

कुल-जायहं सच्चु पसाहणउं

सग्गापवग्ग-सुह-साहणउं

विहलियहं विढत्तउं देंताहं

पहरंतहं सच्चु चवंताहं

जं होइ होउ तं खत्तियहं

सासयइं सरीरइं केत्तियहं

सच्चेण वसुंधर देइ फलु

सच्चेण मेह मेळ्ळंति जलु

सच्चेण वहंति महा-सरिउ

सच्चेण समुद्द-पसरु धरिउ

सच्चेण सुरहि परिमल-सहिउ

सच्चवइ पहंजणु ओसहिउ

सच्चेण गयणे उग्गमइ रवि

सच्चेण फलंति महा-दुम-वि

जलु थलु गयणयलु अणिट्ठियउ

तइलोक्कु-वि सच्चें परिट्ठियउ

घत्ता

जइ परिपालिउ सच्चु पइं तो किं महि-मंडलु फुट्टइ ।  
अण्णु चउद्दह अंगुलइं रहु हेट्टामुहउ पयट्टइं ॥

९

[८]

जल-लव-लोलहो तेण० रज्जहो कारणे तेण०।

सच्चु ण रक्खिउ तेण० पइं गुरु-मारणे तेण०॥

रज्जेण एण वसुहाहिवइ	वोलाविय वारह चक्कवइ	
चउद्दह कुलकर चउवीस जिण	गय जाहं सुहे वि एक्कइ वि दिण(?)	
णव वासुएव वलएव णव	सोलहं णाराय पहाण-भव	
वत्तीस पुरंदर ते-वि मय	ण वसुंधर काहं-वि समउं गय	४
परिहवेवि सच्चु गुरु विद्दवेवि	वहु वंधव सयण अहिद्दवेवि	
गइ कवण लहेसहि कवणु सुहु	दुव्विसहु सहेव्वउ परम-दुहु	
जहिं सत्त णरय अण्णण्ण-विह	तो भीमुं पलित्तु दवग्गि जिह	
को अवसरु धम्म-कहाणाहो	ओलंभउ देवए राणाहो	८

घत्ता

आएं मइं धट्टज्जुणेण केसवेण णिहउ कलसद्धउ ।

जं णर-णंदणु विद्दविउ पावेण तेण सो खद्धउ ॥

९

[९]

णरेण सरोसेण तेण० वुत्तु विओयरु तेण० ।

अज्जहो लग्गेवि तेण० तुहुं ण सहोयरु तेण० ॥

ण जुहिट्टिल-रायहो भिच्चु हउं	हरि लेहि सुहित्तणु अप्पणउं	
धट्टज्जुण सालउ तुहुं-वि णवि	णिउ खयहो जेण आयरिय-रवि	
तो दुमयहो णंदणु परिकुविउ	सवडम्मुहु मुक्कु णाइं उयउ	
परमत्थु पत्थ एत्तिउ कहमि	दोमइ-कएण सयलु-वि सहमि	४
देव-वि अदेव महु कुद्धाहो	को चुक्कइ जमहो विरुद्धाहो	
पंचालेहिं कवणु ण उवगरिउ	एक्कु-वि ण हियत्तणु संभरिउ	
गंगेउ सिहांडि ण दोणु मइं	विणिवाइउ गरुवउ कवणु पइं	

जइ कह व जणेर-वइरु हयउ

तो सो तुहुं हत्थहो किं गयउ

८

घत्ता

रइय-वूह किय-वाल-वह

तवउं धरणहं आढत्तउ ।

कवउ दिण्णु दुज्जोहणहो

तें णिहएं को अवरत्तउ ॥

९

[१०]

सुय-वह-कुविण तेण०

पइं स-कसायहो तेण०।

किं सिरु तोडिउ तेण०

सिंधव-रायहो तेण०॥

अहिखेउ जं जि किउ अज्जुणहो

सच्चइ विरुद्धु धट्टज्जुणहो

दोमइ-कएण केत्तिउ सहहिं

करे पहरणु किं ण समुव्वहहि

कहिं जाहि पाव अण्णहिं दविउ

गुरु-णिंदउ गुरु गुरु-विद्वविउ

वीभच्छहो जइ दुगुंछु करहि

महु अगए तो एवहिं मरहि

सोणावइत्ति पलित्तु मणे

णं लग्गु धग त्ति दवग्गि वणे

पइं घइं वारंतहो केसवहो

किं खुडिउ ण सिरु भूरीसवहो

सर-वर-संथारे णिविट्ठाहो

णं तवसिहि झाणे परिट्ठाहो

लइ पहरणु पहरहु वे-वि जण

पेक्खंतु जुहिड्डिल-महुमहण

४

८

घत्ता

जाम भिडंति भिडंति ण-वि

तावं धरिय वे-वि गोविंदें ।

ओसारिय जम-वइसवण

पइसरेवि मज्झे णं इंदें ॥

९

[११]

भणइ जुहिड्डिलु तेण० समर-समत्थहो तेण०।

होंतु मणोरह तेण०

एवहिं पत्थहो तेण०॥

अवहेरि हणेवए जेण किय

जय-सिरि दुज्जणहं समल्लविय

दुज्जोहणु भुंजउ सयल महि

वारवइ देव तुहुं पइसरहि

हउं णउलु भीमु सहएउ गउ

स-जडासुरु जहिं किम्मरी हउ

परिविड्डिउ अमरिसु अज्जुणहो

ण-वि को-वि दोसु धट्टज्जुणहो

जसु केरउ जणणु वि सुज्जविउ

णिय कवएं कुरुवइ जुज्जविउ

४

## रिद्धणेमिचरिउ

परिरक्ख करेवि जयदहहो  
दुक्कम्महं दुच्चरियहं भरिउ

थिउ सज्जउ महु जीवग्गहहो  
माराविउ मइं दोणायरिउ

घत्ता

गुणु छिंदावेवि समर-मुहे  
तेण णएण जुहिद्धिलहो

विद्वविउ सुहदहे तोउ ।  
महि रुच्चइ होउ म होउ ॥

८

[१२]

ताम विओयरु अमरिस-कुद्धउ  
गज्जइ जुयंत-मयरहरु जिह  
मा जाहि अजाय-सत्तु-वणहो  
वारवइ म पइसउ महुमहणु  
किं णरेण काइं णर-णंदणेण  
वासर-पंचमए पंडु-अवहि  
तो दिण्ण तूर किय-कलयलइं  
रउ उट्टिउ कहि-मि ण माइयउ  
रुहिर-णइ जाय पहरण-वसेण

णं पंचाणु आमिस-लुद्धउ  
हउं वइरिहिं भंजमि माण-सिह  
वसुमइ म होउ दुज्जोहणहो  
कलि-केलिउ पेक्खउ अमर-गणु  
हउं जुज्झमि सहं गुरु-णंदणेण  
भुंजावमि णीसावण्ण-महि  
पडिलग्गइं पंडव-कुरु-वलइं  
रण-रक्खसु णं उद्धाइयउ  
णं जीह ललाविय वइवसेण

४

८

घत्ता

पंडव-कउरव-साहणइं  
णहे पेक्खंतहं सुरवरहं

असि-कणय-कुंत-कोयंडेहिं ।  
पहरंति सयं भुव-दंडेहिं ॥

१०

इय रिद्धणेमिचरिए धवलइयासिय-सयंभुएव-कए  
तेहत्तरिमो सग्गो ॥

## चउहत्तरिमो संधि

रण-रहसुदामे आसत्थामे ताव कयत्थिउ पंडु-वलु ।  
मंदर-तड-ताडिउ दिसहिं भमाडिउ दीसइ णं खीरोय-जलु ॥ १

[१]

[दुवई]

हय-गय-पाय-घाय-धुअ-धवल-धूलि-धूसर-सरीरइं ।

पहु-सम्माण-दाण-रिण-रण-भर-धुर-धरणेक्क-धीरइं ॥

भिडियइं वलइं वे-वि तुरमाणइं	अहिणवब्भ-डंवर-संथाणइं	
अलमल-मय-मयगल-गल-वोलइं	जलहि-जलइं व लोल-कल्लोलइं	
रहवर-भड-भारिय-भुवणिंदइं	परिओसाविय-सुरवर-विंदइं	४
तुरिय-तुरंगम-रंगणसीलइं	पेसिय-पवर-पहरणुप्पीलइं	
किय-कलयलइं समाहय-तूरइं	सूर-कंत-कंती-जिय-सूरइं	
खग-लयालिं गिय-भड-रुक्खइं	गरुय-घाय-उप्पाइय-दुक्खइं	
मंस-रासि-मेलाविय-गिद्धइं	रत्त-तरंगिणि-लंघिय-चिंधइं	८
पहरण-जलण-झुलुक्किय-गत्तइं	चामर-पवणुडुविय-छत्तइं	

घत्ता

जूरविय सुरंगणे तहिं समरंगणे रइय महा-सर-मंडवहं ।

णारायणु णामे आसत्थामे पेसिउ पहरणु पंडवहं ॥ १०

[२]

[दुवई]

पलय-पयंग-पवण-पज्जालिय-जलण-जलंत भीसणं ।

खुहिय-महासमुद्द-सुरदुंदुहि-णव-घण-घोस-णीसणं ॥

छेउ ण लल्लभइं जालामालहं	पावरणुत्तमंग-महिपालहं
सव्वावय-रहहं कणयंगहं	गुरु दलवट्टिउ पवर-तुरंगहं



रिद्धणे मिचरिउ

१००

कवयइं भिण्णइं णरवर-विंदहं पक्खर-भिसिया वे-वि गइंदहं ४  
 आहरणइं आउहइं विचित्तइं छत्त-धय-चामरइं पलित्तइं  
 जलु थलु णहयलु जलइ जलंतें डामरु णं आढत्तु कयंतें  
 जिह जिह हणइ व साहणु पंडउ तिह तिह जलइ सव्वु णं खंडउ  
 तं णिएवि दोणायणि-पहरणु अवरु अजुज्झमाणु कइकेयणु ८  
 भणइ अजायसत्तु किं अच्छहो सोमय-सिंजय-कइकय-मच्छहो  
 पाण लएविणु कहि-मि पणासहो मइं पइसेवउ मज्झे हुवासहो

घत्ता

पवणंगय-जमलेहिं अवसर-धवलेहिं तिहिं वुड्डेवउ वइरि-वले ।  
 अज्जुण-णारायण-रहिएहिं परि परिगहिएहिं णं दुव्वाएहिं उवहि-जले ॥११

[३]

[दुवई]

तो णारायणेण वोल्लाविय तवसुय-जमल-विओयरा ।

छंडहु पहरणाइं परिहरहु महारह-तुरय-कुंजरा ॥

आयहो कोवि जियंतु ण चुक्कइ पंडव-जायव-वलइं झुलुक्कइ  
 किं णारायणत्थु णउ वुज्झहो तक्खिवि कुल-परिवाडि म झुज्झहो  
 भीमज्जुणहो धिवेवि असमत्थइं विण्णि-वि वे गय गंडीव-हत्थइं ४  
 जमलहो कोत-किवाणइं घित्तहो जय-जयकारु करहु सामंतहो  
 उवसम-भावहो जे ण पयट्टइ णं तो पसमइ उहय विहट्टइं  
 ताम पलित्तु सुहड-चूडामणि मं भज्जहो मंभीसइ पावणि  
 जीविउ जाम ताम लइ जुज्झहो छंडेवि पहरणाइं कहिं सुज्झहो ८  
 करि किरिडी जहिं स-सरु सरासणु मंभीसहो किं करइ हुवासणु

घत्ता

धणु धिवेवि पहत्थें वुच्चइ पत्थें हउं समत्थु सव्वहो जणहो ।  
 पर एक्कहो संकमि भिडेवि ण सक्कमि समरंगणे णारायणहो ॥ १०

[४]

[दुवई]

ससण-तणुब्भवेण वोल्लिज्जइ जो असमत्थु अच्छइ ।

सो छंडउ ण एक्कु हउं छंडमि जइ-वि सयइं अणत्थइं ॥

णर णारायणेण किं एक्के	भिडमि अज्जु धुउ सहु तइलोकें	
पियमि समुट्ठु मेरु संचालमि	फुरिय-फणामणि-मणि उद्दालमि	
धरमि सुरिंदु धणउ विब्भाडमि	चंदाइच्च तलप्पए पाडमि	४
दइउ अदइउ करमि महि दारमि	कालु कयंतु मित्तु जसु मारमि	
कर-चरणेहिं दरमलमि हुआसणु	तइयए दिवसे हणमि दूसासणु	
मरइ चउत्थए रइ-आओहणु	महु गय-घाय-दलितु दुज्जोहणु	
पंचव(?) संसय-भाव-वलगी	महि तव-सुयहो देमि आवगी	८
अहव य तेण काइं जे होसइ	दुक्करु पहरणगि मइं सोसइ	

घत्ता

तावंवुहि वड्डउ सुरगिरि जड्डउ णहु विसालु दुव्विसहु रवि ।

महु भुव-दंडेहिं सुरकरि-कर-चंडेहिं आयामिज्जइ जाम ण-वि ॥ १०

[५]

[दुवई]

किं सच्चइ-सिंहंडि-धट्टज्जुण-जमल-णरिंद-पत्थहिं ।

हउं णारायणत्थु विणिवारमि पहरण-पउर-हत्थहिं ॥

जीविउ जाम ताम णु मंडमि	णउ गोविंद गयासणि छंडमि	
छंडमि जइ जर-मरणु ण दुक्कमि	छंडमि जइ जम-लेखउ चुक्कमि	
छंडमि जइ ण वाहि पवियंभइ	छंडमि जइ देवत्तणु लब्भइ	४
छंडमि जइ तिहुअण-सिरिम्मइ	छंडमि जइ दुग्गइहे ण गम्मइ	
छंडमि जीव-लोउ जइ णिच्चलु	छंडमि सयल काल जइ मंगलु	
छंडमि जइ ण विओउ पहावइ	छंडमि जइ दालिट्टु ण आवइ	
छंडमि जइ ण रज्जु पल्लइइ	छंडमि जइ ण सरीरु वियइइ	८
अच्छेवि जइ पुणु पुणु वि मरिज्जइ	तो वरि वइरि-पुंजे पहरिज्जइ	

जीवंतहं जय-लच्छि विढप्पइ मुयहं सुरंगण कज्जु समप्पइ

घत्ता

एत्तिउ उग्गाहेवि रहवरु वाहेवि पेक्खंतहो गरुडासणहो ।  
पइसरिउ विओयरु लउडि-भयंकरु रवि जिह मज्जे हुवासणहो ॥ ११

[६]

[दुवई]

सव्वेहिं पहरणाइं परिचत्तइं पहरइं पवण-णंदणो ।

छाइउ गुरु-सुएण सत्तच्चि-मुहेहिं सरेहिं संदणो ॥

लइउ विओयरु सिहिमुह-वाणेहिं	जोइंगणेहिं गिरि व फुरमाणेहिं	
रवि-किरणेहिं व विद्धु महा-घणु	दुणिरिक्खु रिक्खाहिवु गह-गणु	
उट्टिउ एकु जालु पंडव-वले	हा हे सहु पवट्टिउ णहयले	४
वारुण-सर णिरत्थ गय पत्थहो	स-वल्गु पणहु जुहिट्टिलु तेत्तहो	
एक्कु भीमु थिउ गुरु-सुय-पहरणे	णं दाहुत्तरु सोणु हुवासणे	
कालकंज-महु-सुर-विणिवायण	धाइय विणि-वि णर-णारायण	
मुक्कासण मुक्काउह दुक्किय	तेण महाणलेण ण झुलुक्किय	८
कड्डिउ हरि-सुउ हरियइं अत्थइं	रिउ-सर-जालइं कियइं णिरत्थइं	

घत्ता

महुमह-विण्णाणे एण विहाणे उवसम-भावहो जलणु गउ ।

परिचत्ताओहणु थिउ दुज्जोहणु पंडव-लोयहो जाउ जउ ॥ १०

[७]

[दुवई]

वलियइं साहणाइं सेणावइ वलिउ समत्थु पत्थिवो ।

पडिवउ मेळ्ळि मेळ्ळि दोणायणि पभणइ कुरु-णराहिवो ॥

तो विरइय-कर-मउलि-पणामें	वुच्चइ कुरुवइ आसत्थामें	
णारायणु णारायण-वारिउ	जइ पडिवारउ रणे संचारिउ	
तो मइं मारइ तेण ण मेळ्ळमि	अवरहिं पहरणेहिं पडिपेळ्ळमि	४
कहिं महु जाइ भीमु जीवंतउ	कुरुव-णरिंद होहि निच्चिंतउ	

४

दिवसे चउत्थए रिउ-अक्खोहणि हणमि जइ-वि परिरक्खइ दिणमणि  
 एम भणेवि भिडिउ पडिवारउ णं वियरणहं लग्गु अंगारउ  
 पंडु-पुत्तु णाराएहिं छाइउ तो सरहसु धट्टज्जुणु धाइउ ८  
 विद्धु वीस वाणेहिं गुरु-णंदणु तेण-वि कह-वि ण पाडिउ संदणु

घत्ता

हउ दोमइ-भायएं सर-संघाएं गुरु-सुउ गयण-वलगाएण ।  
 तेण-वि तहु ताडिउ रणे धणु पाडिउ णाई ति-वाएं लग्गाएण ॥ १०

[८]

[दुवई]

तो धट्टज्जुणेण धणु अवरु लएप्पिणु कणय-मंडिया ।

मुक्क वराह-कण्ण तेहत्तरि कंवुय-लट्ठि खंडिया ॥

अवरु सरासणु आसत्थामें लयउ णाई रामायणे रामें  
 दुमय-सुयहो धणु पाडिउ वीयउ णं णिय-गिंभे कंठ-ठिउ जीयउ  
 लइय सत्ति सहस त्ति विसज्जिय खंडइं सत्त करेवि विहंजिय ४  
 णाम-पगइ जिह सत्त-विहत्तिहिं चउहिं तुरंगम धय धणुरत्तिहिं  
 सच्चइ ताम परिट्टिउ अंतरे छाइउ सरेहिं परोप्परु संगरे  
 सरहस वावरंति सम-कंधय सीह-सीह-लंगूल-महाधय  
 विण्णि-वि कणयालंकिय-संदण विण्णि-वि दोण-धणंजय-णंदण ८  
 गुरु-सुउ सिणि-सुएण पच्चारिउ कहिं महु जाहि रणेणोसारिउ

घत्ता

हउं वुच्चमि खत्तिउ पग्गए सोत्तिउ वंभणु आसत्थामु तुहुं ।

पर-भोयणे जेहउ दुक्करु तेहउ एवहिं रण-मुहे होहि महु ॥ १०

[९]

[दुवई]

तो गुरु-णंदणेण वोल्लिज्जइ हउं सच्चउ जे सोत्तिउ ।

उप्पहो वंभहत्त-कत्तारहो तुहु किर केवं खत्तिउ ॥

रिद्धणेमिचरिउ

१०४

णिंदिउ पत्थु जेण गुरु-घायउ	सो पाविट्ठु केम सम्माइउ	
जइ तं तुहं रक्खणहं समच्छहिं	तो सर-वर-रिंछोलि पयच्छहि	
एम भणेवि वंभत्थु विसज्जिउ	जायवेण विहिं हणेवि परज्जिउ	४
अट्ठवीस गुरु-पुत्ते पेसिय	कह-वि तुरय चउसट्ठि णीसेसिय	
वाण-सएण छिण्ण जुजुहाणे	धणु णिट्ठविउ दोणि-अहिहाणे	
कप्पिउ कवउ उरंतरे दारिउ	णिय-सूएण कहि-मि ओसारिउ	
दुमय-सुओ वि पहर-विहलंघलु	धय-णिसण्णु थिउ पत्तु ण महीयलु	८
ताम भीमु वेढिउ सामंतेहिं	हण हण सट्ठु रउट्ठु करंतेहिं	

घत्ता

रह-तुरय-गइदेहिं णरवर-विदेहिं साहारणेहिं स-पहरणेहिं ।  
वेढिज्जइ पावणि णं णहे दिणमणि विज्जुज्जलिहिं महा-घणेहिं ॥ १०

[१०]

[दुवई]

ताव सुवण्ण-सीह-लंगूल-धयालंकरिय-संदणो ।

सच्चइ-दुम्मय-पुत्त ओसारेवि धाइउ दोण-णंदणो ॥

चंद-विंव-फलहंकिय-णामहं	जाउ जुज्झु भीमासत्थामहं	
विण्णि-वि वावरंति सम-घाएहिं	छाइउ एकमेक्कु णाराएहिं	
वाईसर-सएण छहिं दोणे	णिय-रहवर-भर-भारिय-दोणे	४
पंडवेण धणु छिण्णु खुरुप्पे	अवर लेवि विणिवारिउ विप्पे	
दसहिं भीम-णामंकिय-वाणेहिं	गुरु-सुउ कह व ण मुक्कउ पाणेहिं	
चेयण लहेवि सएण विओयरु	भिण्णु थणंतरे पाडिउ रहवरु	
अवरु लेवि अवरसु गवेसिय	तिहिं तिहिं पर पिसक्क णीसेसिय	८
एम भयंकरु जाउ रणंगणु	सुरेहिं णियंतेहिं णमइ णहंगणु	

घत्ता

पसरिय-धणु-विज्जहं कोत्ति-किविज्जहं पंडु-दोण-णंदणहं जिह ।  
भीमासत्थामहं रामण-रामहं दुक्करु रणु पडिलगु तिह ॥ १०

[११]

[दुवई]

ताव णरिंद पंच पेक्खंतहो भीमहो भिडिय दोगिहे ।

पंच महा-सुरिंद णं णिवडिय सग्गहो मणुय-जोणिहे ॥

इंदकेउ-जुयराउ सुअरिसणु	पउरउ विद्धखत्तु स-सरासणु	
पंच-वि रण-रस-रहसुदामहो	भिडिय गंपि रणे आसत्थामहो	
तेण-वि तिहिं तिहिं सरेहिं विहंजिय	सीसइं वाहु-दंड परिपुंजिय	४
विद्धु भीमु सारहि मुच्छाइउ	पुण-वि तुरंग कहि-मि रहु पाविउ	
पूरिउ संखु जिणेवि आओहणु	गुरु-सुएण तोसविउ सुजोहणु	
सहु साहणेण णट्टु धट्टज्जुणु	मं भज्जहु मंभीसइ अज्जुणु	८

घत्ता

रहवरेण वहंतें	पासे अणंतें	करे गंडीवें होंतएण ।	
भूअहमि ण लज्जहो	किह रणे भज्जहो	पत्थें मइं जीवंतएण ॥	९

[१२]

[दुवई]

गुरु-सुय थाहि थाहि जिह सिर भुय खंडिय काल-पत्तहं ।

पउरव-इंदकेउ-जुयराय-सुयरिसण-विद्धखत्तहं ॥

हउं तुहुं विण्णि-वि विज्जा-भायर	हउं तुहुं विण्णि-वि खत्तिय-दियवर	
हउं तुहुं विण्णि-वि समर-समत्था	हउं तुहुं विण्णि-वि चाव-विहत्था	
हउं तुहुं विण्णि-वि अणिहय-संदण	हउं तुहुं विण्णि-वि दोगहो णंदण	४
हउं तुहुं विण्णि-वि वड्ढिय-विक्रम	हउं तुहुं विण्णि-वि सक्क-परक्कम	
हउं तुहुं विण्णि-वि कोति-किवी-सुय	हउं तुहुं विण्णि-वि जय-सिरि-कंखुय	
हउं तुहुं विण्णि-वि अत्थइं वुज्झहुं	हउं तुहुं विण्णि-वि रणउहि जुज्झहुं	
हउं तुहुं विण्णि-वि तोसिय-सुरवर	धम्मपुत्त-दुज्जोहण-किंकर	८
हउं तुहुं विण्णि-वि पवल-वलुद्धुय	कइ-केसरि-लंगूल-महाधय	

घत्ता

तहो एम चवंतहो दोवइ-कंतहो सर सय सहस लक्ख सिजिरु ।  
आसत्थामें सब्वायामें अत्थु विसज्जिउ वंभु सरु ॥ १०

[१३]

[दुवई]

तेण महाउहेण सिजियासुग सय दस सहस गण्णहिं ।

अण्णहिं सब्बसाइ महि अण्णहिं छाइउ गयणु अण्णहिं ॥

घोरु तमंधयारु अण्णेत्तहे	फेक्कारंतु सिवउ अण्णेत्तहे	
अण्णेत्तहे वुक्कण-गणु वुक्कइ	अण्णेत्तहे जोइणि-गणु दुक्कइ	
अण्णेत्तहे अण्णइं लल्लक्कइं	अण्णेत्तहे जलंति दिसि-चक्कइं	४
अण्णेत्तहे जलु जलइ सजलयरु	अण्णेत्तहे झामलउ दिवायरु	
अण्णेत्तहे थिमिथिमिउ पहंजणु	अण्णेत्तहे जुज्झइ सयलु-वि जणु	
वट्टइ पलय-कालु पडिवण्णउ	पंडव-लोउ सयलु आदण्णउ	
किर मुउ अज्जुणु जलण-महाउहे	दिण्णइं तूरइं कुरु-सेण्णाउहे	८
तो करे धणु विप्फारिवि पत्थें	वंभ-सराउहु वंभ-सरत्थें	
किउ गिरत्थु दुम्मिउ गुरु-णंदणु	कज्जु ण सारइ एक्कु-वि पहरणु	

घत्ता

पेक्खेवि असरालइं णर सर-जालइं णं कुल-गिरि कुलिसाहिहउ ।  
णिंदंतु सरासणु धिवेवि हुवासणु णासेवि गुरु-सुउ कहि-मि गउ ॥११

[१४]

[दुवई]

कुरुव-णराहिवो-वि णिय-हियए विसूरइ तित्थु अंतरे ।

खुहिय समुद्द घोस गइ वाणि समुट्ठिय दिव्व अंवरे ॥

अहो गुरु-णंदणु काइं ण वुज्झहि	णर-णारायणेण सहं जुज्झहि	
जेहिं आसि अण्णहिं जम्मंतरे	घोरु वीरु मयणाय-महीहरे	
सट्ठि सहास सट्ठि सय वरिसहं	दूसहं विसम-परीसह-दरिसहं	४
करेवि णियाण-वंधु तउ विण्णउं	सव्व-सह रणु होउ अतिण्णउं	

तेण तवेण वे-वि रणे दुज्जय  
जाहं वज्ज-संथाण-सरीरइं  
दइउ सहेज्जउ जाहं परिट्ठिउ  
दइउ जे जिणइ जाहं पर-चक्कइं

को जोहइ गोविंद धणंजय  
दुब्भेयइं दुदमइं दुरीरइं  
भुय-वलु पवलु ण केण-वि णिट्ठिउ ८  
जउहर-जूव-फलइं परिपक्कइं

घत्ता

पंडवहं अणिट्ठइं तुम्हहं मिट्ठइं तउ सेविज्जंताइं ।  
एवहिं दुवियइहं कउरव-संढहं विसिभूयइं पच्चंताइं ॥ १०

[१५]

[दुवई]

एम भणेवि णिहुय दिव्वक्खर वाणि परिट्ठियंवेरे ।

अमर-करं वियाइं सुर-कुसुमइं पडियइं पत्थ-रहवेरे ॥

तो पण्णारहमउ गंउ वासरु

अत्थ-महागिरि दुक्कु दिवायरु

धाइउ तिमिर-णियरु आगासहो

गयइं वलइं णिय-णिय-आवासहो

कुरुव-णराहिवेण सह मंडिय

दोणायरिय-मरण-कह छंडिय ४

रवि-सुउ वोल्लाविउ अणुराएं

महि महु पइं होतेण सहाएं

गुरु-गंगेयहिं देवि ण सक्किय

ण जिउ धणंजउ इयर ण वंकिय

सारहि-पंडु-पुत्तु लइ खंडउ

कउरव-ल्यहुं होहि तरंडउ

भारु भारु जं दिण्णु सुवण्णहो

थिउ अद्दासणे महु सुपसण्णहो ८

जं किउ चंपापुर-परमेसरु

तहो सव्वहो इहु वट्टइ अवसरु

घत्ता

परिहविय पुरंदरु होहि धुरंधरु खंधु समोड्ढहि रण-भरहो ।

पडिवक्ख-दुलंघउ हउं अवठंघउ तुज्झु सइं भुअ-पंजरहो ॥ १०

इय रिट्ठणेमिचरिए धवलइयासिय-सयंभुएव-कए

चउहत्तरिमो सग्गो ॥



## पंचहत्तरिमो संधि

रण-धुर धवलु मुएवि  
तुहुं सेणावइ होहि

भरु ण चडाविउ अण्णहो ।  
वद्धु पट्टु रणे कण्णहो ॥

१

[१]

परिरक्खिय पंडव महुमहेण  
पंचाह कणय-कलसद्धएण  
णिब्भित्ते सामिय-वच्छलेण  
कउ जीविउ सोमय-सिंजयाहं  
चंपाहिउ पभणइ देव देव  
जिह मारमि पंच-मि पंडु-पुत्त  
तो सयल-वसुंधर-रोहणेण  
कउसेएं उंवर-वीदु छण्णु  
दहि-दुव्व-महोसहि-दप्पणेहिं

वासर वीसद्ध पियामहेण  
एवहिं पइं अमारिस-कुद्धएण  
अवसरे अ-णियच्छिय-पच्छलेण  
जय(कउ?) तवसुव-भीम-धणंजयाहं  
हउं सयल-काल वोळंतु एवं  
हरिहर-वंभाणेहिं जइ वि गुत्त  
परितुट्टे तें दुज्जोहणेण  
वइसारेवि तहिं अहिसित्तु कण्णु  
चामीयर-सिंगामज्जेणेहिं

४

घत्ता

सव्वेहि-मि किउ अहिसेउ  
विसय महारिसि जेवं

जय-सिरि-वहु परिणेज्जहि ।  
तिह तुहुं वइरि जिणेज्जहि ॥

१०

[२]

कइ-कहय-वंदि-वर-चारणाहं  
धण-हीणहं दीणहं दुक्खियाहं  
अ-पमाणइं दाणइं तुरिउ देवि  
सण्णज्झइ सरहसु अंगराउ  
वाइत्तइं हयइं भयंकराइं  
पणवेक्क-पाणि-णंदीमुहाइं  
ढङ्गिय-ढक्कारव-ढक्काराइं  
कल-काहल-कंवुय-खंखुणाइं

णड-णच्चण-गायण-वायणाहं  
पह-भमियहं णिसियहं भूक्खियाहं  
कह कह व किलेसहिं रयणि णेवि  
समरुज्जमु सव्वहो वलहो जाउ  
वहु डमरुय-डिंडिम-डंवराइं  
दीड-ददुर-दुंदुहि-गोमुहाइं  
वर-झल्लरि-सल्लरि-झिक्काराइं  
णद्धसुर-सुसर-तंती-घणाइं

८

घत्ता

चउविह-तूरइं देवि  
दीसइ णाइं कयंतु

थिउ रहे अमरिस-कुद्धउ ।  
छुडु जे छुडु सुएवि बुद्धउ ॥

९

[३]

अण्णेत्तहे णिग्गय वर-तुरंग  
अण्णेत्तहे मयगल सवल-वण्ण  
अण्णेत्तहे कंचण-रह-णिहाय  
अण्णेत्तहे भड पहरण-विहत्थ  
मेलावेवि चउविह-वल-समूह  
सइं वयणे परिट्टिउ अंगराउ  
विहिं पासेहिं किव किववम्म वे-वि  
थिउ सउणि ससंदणु लोयणेहिं

णं खय-मयरहर महा-तरंग  
णं सजल जलय णहयले णिसण्ण  
णं वहु मिलेवि कणयइरि आय  
णं कूर महागह उडुगणत्थ ४  
गिरि-गरुयउ विरइउ मयर-वूहु  
अब्भंतरे सरहसु कुरुव-राउ  
सिरे सिहरे समच्छरु दोणि दो-वि  
परिगरिय गीव कुरु-साहणेहिं ८

घत्ता

मयर-वूहु रएवि  
णं खय-काले समुट्टु

चंपाहिवइ पयट्टइ ।  
णिम्मज्जायउ वट्टइ ॥

९

[४]

तं णिएवि जुहिट्टित्तु भणइ एम  
आएसु दिण्णु तो अज्जुणेण  
दाहिणए सिंगे सयमेव थाइ  
सहएव-णउल पुट्टिहिं ठवेवि  
कुरुखेतु गयइं किय कलयलाइं  
णं मिलियइं वेण्णि णहंगणाइं  
गज्जिय-गयण व घण-डंवराइं  
धणु-सुरधणु-मंडलि-मंडियाइं

करि वूहु धणंजय जिणहि जेम  
किउ अद्धयंदु धट्टज्जुणेण  
वामउ पवणंगउ वलउ णाइं  
वासव-सुय-तव-सुय मज्जे वे-वि ४  
भिडियइं पंडव-कउरव-वलाइं  
फुरियाउह-गय-तारायणाइं  
असि-विज्जुज्जलिय-दियंतराइं  
रह-रवि-रहवर-परिचड्डियाइं ८

८

घत्ता

णहयल-समइं वलाइं मणिगण-कर-किरणायर ।  
तवसुय-रूवइं वे-वि णं थिय चंद-दिवायर ॥

९

[५]

तो समालग्गमुगं महा-भंडणं हत्थ-पायंग-गीवा-सिर-क्खंडणं  
णीसरंतंत-अंतावली-चप्पणं मत्त-मायंग-कुंभत्थलुक्कप्पणं  
दुक्क-पाइक्क-संजाय-संघट्टणं लग्ग-माणिक-सण्णाह-णिव्वट्टणं  
मंति-सेणाणि-सामंत-दुक्खावणं हट्टु-विच्छट्टु-रुंडिट्टि-दक्खावणं ४  
भंभ-भंभीस-भेरी-णिणायाउलं चक्क-कुंतासि-वाणासणी-संकुलं  
जोइणी-डाइणी-भूय-भेसावणं कंक-भल्लुक्क-जंवुक्क-पुक्कावणं  
हत्थि-मत्थिक्क-थंभोह-छिप्पावणं कित्ति-चिक्खिल्ल-दिक्खुज्जलिय-पावणं  
तं खणद्धेण जायं मही-मंडलं हार-केऊर-कंठी-कलावुज्जलं ८

घत्ता

तहिं तेहए संगामे भीमु भमंतु ण थक्कइ ।  
णाइं खीर-समुद्धो मज्झे मंदरु णं परिसक्कइ ॥

९

[६]

तो अज्जुणु वलिउ धणुद्धराहं संसत्तग-गण-जालंधराहं  
णारायण-पत्थहं मेहलाहं मुरलासय-केरल-कोहलाहं  
पंचालहं सोमय-सिंजयाहं एत्तहे-वि कण्णु रणे दुज्जयाहं  
एत्तहे-वि जुहिट्टिल-कुरुवराय पहरंत परोप्परु विरह जाय ४  
सच्चइ वियंध-किंकर-सहाउ धाइउ जहिं कइकेउ दिण्ण-घाउ  
एत्तहे वि पहाण-णराहिवेहिं गय-लक्खेहिं केहि-मि पत्थिवेहिं  
पइसरइ भीमु कउरव-समुद्धे वाहण-पहरण-जलयर-रउद्धे  
दरिसंति परोप्परु समर-जुत्ति पडिलग्ग विओयर-खेमधुत्ति ८

८

घत्ता

मत्त गइंदारूढ तवसुय-कुरुवइ-किंकर ।  
थिय विहिं गिरि-सिहरेहिं विणिण-वि णावइ जलहर ॥ ९

[७]

तहिं भीमु थणंतरे तोमरेहिं विणिभिण्णु भुवंगम-भीयरेहिं  
एक्केण समीरण-सुएण विद्धु कुरुवाहिवेण सट्ठिहिं णिसिद्धु  
सर-लक्खें रोस-वसंगएण णासाविउ करि व वणंगएण  
कह कह-वि वलेप्पिणु अंकुसेण आभिद्धु विओयरु अमरिसेण ४  
णं थिय विहिं सइलहिं विणिण रुक्ख सम-दिण्ण-घाय सम-जणिय-दुक्ख  
तोसाविय-जम-वइसमण-इंद वइसारिय विसम महागइंद  
थिय पायहिं भीमें लउडि लइय कालायस-घडिय सुवण्ण-खइय  
इयरेण वि स-फर किवाण-लट्ठि पवि-पुत्तहो वाहिय घाय-सट्ठि ८

घत्ता

गयए गयंत-अंतकरिए हणेवि हिडिंवा-णाहे ।  
स-फरु स-खग्गु णरिंदु चूरिउ सहु सण्णाहे ॥ ९

[८]

जं णिहउ रणंगणे खेमधुत्ति सण्णाहु करेप्पिणु परम-गुत्ति  
गुरु-सुउ धाइउ ता वद्ध-कोहु विणिवद्ध-तोणु पेसिय-सरोहु  
हउ एक्कावणवइहिं पंडु-पुत्तु दिणमणि व स-किरणु थिउ मुहुत्तु  
पुणु विहि-मि सहासु सहासु मुक्कु घण-डंवरु णाई णवल्लु दुक्कु ४  
मायरिसहो णंदणु तेत्थु काले तोमरेण भिण्णु समुहंतराले  
भालालिणिडाल-णिडालणामे गुरु-सुउ तिहिं ताडिउ तिहिं जि थामे  
थिय विणिण-वि गिरि व तिएक्कसिंग हय पडह-संख-काहल-मुयंग  
दुज्जणेहिं वि साहुक्कारु दिण्णु अवरोप्परु वाणेहिं पुणु विभिण्णु ८

घत्ता

वि-क्वय वि-धणु वि-चिंधा रह-सिहरेहिं वइसारिय ।  
सूएहिं णिय-णिय-सेण्ण पहर-विहुर पइसारिय ॥

९

[९]

एत्तहे वि वे वि थिय लद्ध-सण्ण  
सर-जालेहिं जाउ तमंधयारु  
एक्केण वि एक्कहो सुहु ण दिण्णु  
एक्केण वि एक्कहो ण किउ भंगु  
सच्चेहिं पधाइय तिण्णि ताव  
णं तिहिं कुंजरेहिं मइंदु रुद्धु  
एक्कल्लउ खिवइ खुरुप्प-पंति  
तिहिं तिण्णि-वि चावइं ताडियाइं

एत्तहे वि भिडिय रणे णउल-कण्ण  
एक्कहे वि ण फिट्ठइ पुरिसयारु  
+++++  
जोइज्जइ रणु जिह पुव्व-रंगु  
विंदाणुविंद-कइकय स-चाव  
णाराएहिं संसय-भावे छुद्धु  
दस वीस तीस णं वावरंति  
भुय खंडिय सीसइं पाडियाइं

८

घत्ता

कवल गिलेप्पिणु तिण्णि णं मुहु करयले धोवइ ।  
भुक्खिउ णाइं कयंतु पडिवउ पासइं जोयइ ॥

९

[१०]

तहिं अवसरे गुरु-सुउ रहे वलग्गु  
कहिं भीमु स मइं मगंतु जुज्झु  
संसत्तग-वल्गु किय खयहो गेमि  
तं णिसुणेवि महसूयणेण वुत्तु  
तो आसत्थामे ण किउ खेउ  
वे तुम्हेहिं हउं एक्कल्लउ ज्जे  
कइकेयणु पभणइ एउ वुज्झु  
जइ दोणायरियहो तणउ पुत्तु

जिह पलय-मेहु गज्जणहं लग्गु  
णरु कहइ भडारा कहमि तुज्झु  
किय गुरु-णंदणहो झडक्क देमि  
लइ जाहुं तेत्थु जहिं दोण-पुत्तु  
वोल्लाविउ पत्थु स-वासुएउ  
लइ तिण्णि-वि भुंजहुं समरहो ज्जे  
सो धण्णउ जो तउ देइ जुज्झु  
तो सरवर-धोरणि धरि णिरुत्तु

४

८

घत्ता

भणइ जणदणु ताव खंडव-डामरगारा ।  
वज्जाउह-सम-सार को सर धरइ तुहारा ॥ ९

[११]

जं पभणितं एव जणदणेण तं सडिहिं हउ गुरु-णंदणेण  
तिहिं णरु णरेण पहरंतएण किउ धणु ति-खंड भल्ल-त्तएण  
स-सरासणु वामउ करेवि हत्थु तिहिं हरि हउ दसहिं सरेहिं पत्थु  
पुणु लक्खे लक्ख-सएण विद्धु रहु रहिउ रहंगु तुरंग चिंधु ४  
सीसक्कु भीम-सण्णाहु गत्तु सिय-चामर-जुयलु सियायवत्तु  
कर-चरणे धणु गुणु जाणु छिण्णु तं विहि-मि आसि तव-चरणु चिण्णु  
दरिसावइ णरु णारायणासु उच्चरिउ पेक्खु दोणायणासु  
किह पहरइ अम्हहं समउं दुट्ठु तो एम भणेवि विभत्थु रुट्ठु ८

घत्ता

तिहिं तिहिं सर एक्केक्कु हणेवि तिगतह धावइ ।  
भज्जेवि रवि-किरणहं घणहं महाघणु णावइ ॥ ९

[१२]

एक्कलउ पर-वलु वावरंतु णं विज्जु-पुंजु दीसइ फुरंतु  
गंडीउ भमंतउ करे अथक्कु लक्खिज्जइ णाई अलाय-चक्कु  
पसरंति पिसक्कइं पारियंग वंमीयहो णाई महा-भुयंग  
हय-गय-रहवर-णरवर दु-खंड सहं सरेहिं समाउहु वाहु-दंड ४  
विद्धंसइ रिउ-साहणइं जाम सरवरेहिं पिहिउ गुरु-सुएण ताम  
तहो वलिउ समच्छरु सव्वसाइ वक्कणेण सणिच्छरु ठियउ णाई  
समुहंतरे आसत्थामु विद्धु दप्पुब्भडु तो-वि ण पडिणिसिद्धु  
परिपेसिउ पहरणु सव्वधारु तं णरेण णिवारिउ दुण्णिवारु ८

घत्ता

ताम महाघण-घोसइं	दिब्ब-वाणि णहे घोसइ ।	
जेत्तहे पंकय-णाहु	तेत्तहे वसुमइ होसइ ॥	९

[१३]

तं दोणिहिं करेवि णिरत्थु अत्थु	संसत्तग-साहणे भिडिउ पत्थु	
सर-जालइं दिसहिं पउंजिआइं	सीसक्कइं कवयइं पुंजियाइं	
धय-छत्तइं चिंधइं चामराइं	कुस-कंचुय-पावरण-वराइं	
पल्लाणइं चउरि-सिआसणाइं	गुरु-पक्खर-भिसिय-कूसणाइं	४
आहरणइं वाहण-पहरणाइं	परिहरेवि पणट्टइ साहणाइं	
तहिं अवसरे पंचहिं सायएहिं	किवि-सुएण विद्धु अइ आइएहिं	
ते खंडिय खंडव-डामरेहिं	पंचिदिय जिह तित्थंकरेहिं	
णारायणु पभणइ विंधि विंधि	ओसहेहिं वाहि जिह तिह ण सिद्धि	८

घत्ता

हरि-आएसु लहेवि	गुरु-सुउ भणेवि ण मारिउ ।	
पत्थं आसत्थामु	पुट्टि दिंतु ओसारिउ ॥	९

[१४]

णर-सर वंचंतु दलंतु खोणि	वले कण्णहो गंपि पइट्टु दोणि	
कइकेयणो-वि रणे वावरंतु	संसत्तग-साहणे पइसरंतु	
वोल्लाविउ वलेवि जणदणेण	कंसासुर-णरसुर-मदणेण	
अहो अज्जुण पच्छए दुद्धरेहिं	जुज्झेसहुं सहुं जालंधरेहिं	४
विणिवायहि ओए-वि तिण्णि ताव	जरसंधहो वंधव खुद्द-भाव	
तियसह-मि रणंगणे दुण्णिवार	उग्गाउह दंडय दंड-धार	
तो तालुयवम्म-पुरंजएण	रहु वाहिउ तुरिउ धणंजएण	
सो पंचहि पंचहिं सरेहिं विद्धु	तेण-वि एक्केक्कउ तिहिं णिसिद्धु	८

घत्ता

छिण्णइं सिर-कमलइं वाहु-दंड रणे खंडिय ।  
वसुमइ तामरसेहिं णाइं स-णालेहिं मंडिय ॥

९

[१५]

तो सहं साहणेण पइड्डु पंडि	चंपाहिव वलि पयडंतु खंडि	
चूण्णंतु दुरय-टंकण-कुणिंद	जउहेय-खुद्द-मालव णरिंद	
गंधार-मद्द-मागह-कुणीर	सग-सूरसेण-खस-टक्क-कीर	
तो मेरु समप्पह-संदणेण	वोळ्ळाविउ दोणहो णंदणेण	४
गंगा-सुय-गुरु-गोविंद-सरिस	क्किव-कण्ण-किरिडी पयाव-दरिस	
णिरवज्ज-वज्ज-संघणण-देह	सुलंब-बाहु पर-वल-णिसेह	
मइं मेळेवि मल्ल ण को-वि तुज्जु	रहु वाहि वाहि लहु देहि जुज्जु	
तो दाहिण-महुरा-पत्थिवेण	धउ पाडिउ मलय-णराहिवेण	८

घत्ता

तेण वि तहो धउ छिण्णु णवहिं थणंतरे ताडिउ ।  
चउहिं चयारि तुरंग रहु अवरेक्कें पाडिउ ॥

९

[१६]

चउसड्ढि धुरंधर जे वहंति	ते अट्ट महारह समउं जंति	
णारायहं तीरिय-तोमराहं	कण्णिय-खुरूप-मुहहं सराहं	
दिवसद्धहो अद्धद्धेण मुक्क	गुरु-सुय-भर-पंजरे खयहो दुक्क	
पंडिएण विसज्जिउ वायवत्थु	तं वि-रहु करेवि तमि किउ णिरत्थु	४
आरूद्धु महागए णरवरिंदु	अइरावइ णं थिउ सुरवरिंदु	
लहु महुरापुर-परमेसरेण	गुरु-तणउ समाहउ तोमरेण	
तेण-वि तहो सोलह दिण्ण घाय	करु एक्कें चउहिं करिंद-पाय	
तिहिं भड-सिरु विहिं वे भुय विहत्त	छहिं छज्जण किंकर धरणि पत्त	८

८



घत्ता

कुंडल-मंडिय-गंडु पहु-मुहु महिहे सुहावइ ।  
विहिं णक्खत्तहं मज्झे चंद-विंवु थिउ णावइ ॥ ९

[१७]

जं णिहउ पंडि गुरु-णंदणेण तं वंकिउ मुहु सक्कंदणेण  
थिउ भग्ग-मडप्फरु अमर-सत्थु णारायणु वि-मणु वि-वण्णु पत्थु  
विद्दाणउ पंडव-लोउ जाउ सो ण-वि भडु जेण ण किउ विसाउ  
एत्तहे वि रणंगणे णिक्खिवेण भुव जोइय कुरुव-णराहिवेण ४  
हउं धण्णउ जसु णिब्भिच्चु एहु जं णिहउ वज्ज-संघणण-देहु  
अक्खोहणि-साहणु समर-कुंडु गंगेय-दोण-सम-वल-पयंडु  
वाइत्तइं वले देवावियाइं किउ कलयलु चेलइं भामियाइं  
पोमाइउ दोणायरिय-पुत्तु तुहुं भुवणे एक्कु भुय-वल-पहुत्तु ८

घत्ता

विविहेहिं आहरणेहिं मणि-चामीयर-खंडेहिं ।  
पुज्जिउ आसत्थामु तेण सयं भुव-दंडेहिं ॥ ९

इय रिद्धणेमिचरिए धवलइयासिय-सयंभुएव-कए ।  
पंडिवहो णामेणं पंचहतरिमो इमो सग्गो ॥

•

## छहत्तरिमो संधि

फुरियाउह-विज्जु      गय-घड-घण-मालावरिउ ।  
 कुरु-गिरि-सिहरेहिं      पंडव-पाउसु उत्थरिउ ॥      १

[१]

भिडियइं विण्णि-वि वलइं महा-रणे      भीसण-वण्ण वसुंधरि-कारणे  
 वेण्णि-वि अवसइं अमरिस-कुद्धइं      अमर-वरंगण-जयसिरि-लुद्धइं  
 वेण्णि-वि रय-णिहाय-धूसरियइं      पहु-सम्माण-दाण-वहु-भरियइं  
 वेण्णि-वि वावरंति विविहत्थेहिं      साहुक्कारियाइं सुर-सत्थेहिं      ४  
 णिग्गय णइ सोणिय-पब्भारें      किंपि ण सुम्मइ हणहणकारें  
 तूर-णिणाएं गज्जइ अंवरु      णं पडिवण्णउ महाघण-डंवरु  
 पेल्लवेल्लि जाय मायंगहं      गुड-फुड-फिडि-फेडिविय तुरंगहं  
 धुर-मुह मुरिय रहहं पडिलग्गहं      खण-खण सद्दु समुद्धिउ खग्गहं      ८

घत्ता

जुज्झंति वलाइं      उहय मडप्फर-सारइं ।  
 णं वर-मिहुणाइं      अंध-दविड-कण्णाडइं ॥      ९

[२]

ताम कण्णु रणे रहवर-वाहणे      णिवडिउ सोमय-सिंजय-साहणे  
 णिहयइं पंच-सयइं पंचालहं      षण्णारह रहियहं रह-पालहं  
 णिय-वल्हु पडिवडंतु पेक्खेविणु      धाइय पंडव तूरइं देविणु  
 वेढ्ढिउ अंगराउ चउ-पासेहिं      रहवर-गयवर-तुरय-सहासेहिं      ४  
 एक्कु अणंतेहिं जिणेवि ण तीरइ      भुव-भुवंग-सण्णिह-सर सीरइ  
 सीसइं तामरसाइं व तोडइ      गयवर गिरि-संघाइं व फोडइ  
 रह गंधव्व-पुराइं व पाडइ      भड कुडुंग-झाडाइं व झाडइ  
 णरवइ णिरवसेस संताविय      णिय-णिय-वाहणेहिं ल्हिक्काविय      ८

घत्ता

रवि -किरण-करालइं सहेवि ण सक्रिय कण्ण-सर ।  
सहुं मदि-सुएहिं भीमु पधाइउ एक्कु पर ॥

९

[३]

पेळ्ळिउ तिहि-मि तेहिं चंपाहिउ	मणे आरोसिउ कुरुव-णराहिउ	
लहु-आएसु दिण्णु सामंतहं	गय-साहणियहं विक्रमवंतहं	
विरसिय-काहल-संख-मुयंगहं	अंग-वंग-कंवोय-कलिंगहं	
मेहल-तामलित्त-जोहेयहं	सग-पमुहहं अवरह-मि अणेयहं	४
धट्टज्जुणेण सव्व ते धरिया	एक्केक्को णव-दह सर भरिया	
सच्चइ भिडिउ ताम रणे वंगहो	पाडिय पाय मत्त-मायंगहो	
विद्धु सरेण सो-वि वच्छत्थले	णिवाडिउ थरहरंतु महि-मंडले	
अट्टहिं णउलु विद्धु तो अंगं	तेण वि छिण्ण तिउण-सर-भंगं	८

घत्ता

सगइंदु णरिंदु तिहिं तोमरेहिं समाहयउ ।  
सगिरिंदु मइंदु दीसइ णं महियलु गयउ ॥

९

[४]

जीविउ लेवि विहि-मि गंगहं	धाइय जमल मत्त-मायंगहं	
णं जमदूव पिहिवि-परिपालहं	णं वे पवण महाघण-जालहं	
हणइ णउलु धायहिं भंकुडियहं	असणि-कियंत-कोंत-अंकुडियहं	
सो तहिं वंधवेहिं करि गणिएहिं	अवरेहि-मि पुव्वागम-भणिएहिं	४
करि विहणंति पुच्छ-कर-चरणेहिं	बंध-विसाण-जुवल-वावरणेहिं	
सहएवु वि आहणइ किवाने	विज्जु-पुंजु णं फुरण-पमाणे	
विहि-मि महा-गय-चक्रिय खंडिय	तेण पंडतेहिं वसुमइ मंडिय	
णं जलहर पाडिय उप्पाएहिं	णं पायव पुंजिय दुव्वाएहिं	८

८

घत्ता

गय-घड-अवसेस जमलहं पहर-भयंकरहं ।  
गय णव-वहु णाइं णासइ दुप्पइ-देवरहं ॥

९

[५]

अट्ट हत्थि सहएवहो धाइय  
एम महागय-साहणु मारेवि  
वामए करयले करेवि सरासणु  
तिहिं तोमरेहिं थणंतरे ताडिउ  
भिडिय परोप्परु पुणु करवालेहिं  
छिण्णइं खगइं लइयइं चावइं  
सर चउसट्ठि मुक्क जुयराएं  
दूसासणेण सरोहु विसज्जिउ

अट्ट वि अट्टेहिं वाणेहिं धाइय  
कण्णहो थिय धण-गुणु विप्फारेवि  
णउलाणुवहो भिडिउ दूसासणु  
तेण-वि तहो सरेण धणु पाडिउ  
णं वे घणावहिं विज्जुल-मालेहिं  
जिह कुकलत्तइं वंक-सहावइं  
भिण्ण खणंतरे णउलहो भाएं  
तमि तिहिं तिहिं एक्केकु परज्जिउ

४

८

घत्ता

दूसासणु भिण्णु भीमहो कए वि ण मारियउ ।  
रह-सिहरे णिवण्णु णिय-सूएं ओसारियउ ॥

९

[६]

जं जुवराउ रणंगणे मुच्छिउ  
वुच्चइ पंडवेण कुरु-पत्थहं  
थाहि थाहि कहिं जाहि रणंगणे  
पभणइ कण्ण तुज्झु ण वियट्ठमि  
भीमु-वि गज्जिउ भुय-वल-दप्पिउ  
एम भणेवि तेहत्तरि मगण  
वीस चउक मुक्क मद्देएं  
चिंधउ आयवत्तु विहिं ताडिउ

तं रवि-तणएं णउलु पाडिच्छिउ  
सव्वहं तुहुं कत्तारु अणत्थहं  
पेक्खउ देवलोउ गयणंगणे  
अंतरत्थु देहें असिट्ठमि(?)  
णवर सरासण-कोडिउ चप्पिउ  
पेल्लिय रह उवगरणोलगण  
छिण्ण दिवायर-सुएण सवेएं  
अट्टावीसहिं धणुवरु पाडिउ

४

८

घत्ता

तहिं तेहए काले णउलु सउण्णउं एक्कु जणु ।  
करे लग्गइ जासु णिण्डिउ णिण्डिउ अवरु धणु ॥

९

[७]

धणुवरेण अवरेण महारहि  
तिक्ख-खुरुप्पेहिं हणेवि सरासणु  
अवरु लेवि धणु सीरिउ पंचहिं  
कम्मय-कोडि-वि णासिय अण्णे  
मद्दिय-णंदणेण ते खंडिय  
पुणु गयणयलु पिसक्केहिं छाइउ  
पुणु रहि वरइं(?) करेवि पइड्डा  
जलु थलु णहयलु वलइ दियंतरु

वीसहिं भिण्णु कण्णु तिहिं सारहि  
तिहिं सरेहिं पुणु पिहिउ णहंगणु  
पंडवेण पडिवारउ सत्तहिं  
अवरु लेवि धणु छाइउ कण्णे  
रण-महि णाइं भुवंगेहिं मंडिय  
दइवें अहि-भवणु व उप्पाइउ  
एक्कु खणद्धुण केण वि दिट्ठा  
सयलु वि दीसइ वाण-णिरंतरु

४

८

घत्ता

छंडिउ णिय जुज्झु खंडिउ रहु ओसारि किय ।  
कुरु-पंडव-सव्व णिहुय-णिहाला होवि थिय ॥

९

[८]

छाइय विहि-मि परोप्परु वाणेहिं  
चंदाइच्च घणेहिं जिह झंपिय  
चावलाट्ठि रवि-तणए ताडिय  
मद्दि-सुएण लयउ सयचंदउ  
दाहिण-करेण क्वाणु भयंकरु  
घित्त सत्ति सहसत्ति परज्जिय  
णउलें गरुय-गयासणि मुक्की  
छिण्णु खुरुप्पें कोंतु समंडिउ

विसहर-रवियर-परिहरमाणेहिं  
एक्केक्कमहो तो-वि णउ कंपिय  
सारहि णिहय तुरंगम पाडिय  
वामयरेण महा-वसुणंदउ  
किउ चंपाहिवेण सय-सक्करु  
असइ व गय सम्माण-विवज्जिय  
गिरिहे णाइं सउदामणि दुक्की  
ताम तिहिं थूणाकण्णेहिं खंडिउ

४

८

घत्ता

पुणु पंडु-सुएण कण्णहो परिहु विसज्जियउ ।  
णं अहिणव-मेहु विंझहो उवरि पगज्जियउ ॥ ९

[९]

खंडिउ परिहु खुरेण णहंगणे आउलु णउलु जाउ समरंगणे  
कोड्ह लेवि सरासण-कोडिउ कट्टिउ रवि-सुएण उम्मोडिउ  
धणु-मंडलिहे मज्जे मुहु भावइ चंद-विंवु इंदाउहे णावइ  
एवंहिं पंडु-पुत्तु लइ गज्जहि जाहि ण मारमि रणु पडिवज्जहि ४  
वड्डे समउं विरोहु ण किज्जइ जिव-वहु जिव-परिहउ पाविज्जइ  
कुंति-वयणु संभरेवि ण घाइउ गउ तव-त्तणयहो पासु पराइउ  
कण्णु वि भिडिउ महाभड-विंदहं चेडय-कइकय-कासि-णरिंदहं  
केरल-चोल-पंडि-पंचालहं सोमय-सिंजयाइ-महिपालहं ८

घत्ता

एक्क-रहु सरेहिं हणइ अणंतइ पर-वलइं ।  
णं पियइ णिदाहे रवि-किरणेहिं सव्वइं जलइं ॥ ९

[१०]

ताव जुजुच्छु हरीरिय-संदणु धायरट्टमुवरुद्धी णंदणु(?)  
सउणि-सुयहो उत्थरिउ उलूयहो समर-सएहिं कयत्थीहूयहो  
सरवर-सयइं कियइं अ-पयावइं ++++++  
हय तुरंग जत्तारु वियारिउ कवउ पुट्टि देंतु ओसारिउ ४  
भिडिय ताव विप्फारिय-धम्महो सउवलु णउल-पुत्तु सुयधम्महो  
विहि-मि सरासणाइं णिट्टवियइं विहि-मि वराउहाइं पट्टवियइं  
विण्णि-वि वि-रह हूव समरंगणे वे-वि पसंसिय सुरेहिं णहंगणे

घत्ता

छिण्णाउह वे-वि कड्डिय णिय-णिय-वारएहिं ।  
णं मत्त-गइंद ओसारिय णाराएहिं ॥ ८

[११]

तहिं अवसरे वियसिय-मुह-पोमहं	धाइउ सउणि-मामु सुय-सोमहं	
छाइउ एकमेक्कु णाराएहिं	खंडिय सउवलेण खुर-घाएहिं	
छिण्णु सरासणु रहु विद्धंसिउ	कउरव-लोएं णामु पसंसिउ	
ताम धणंजय-सुएण पयंडे	भीम-भुवंग-भोग-भुय-दंडे	४
विज्जु-सम-प्पहु णिय-णामंकिउ	दंतवालु कलहोयासंकिउ	
अहिणव-वग्घ-चम्म-परिवारउ	कड्डिउ मंडलगु सिय-धारउ	
चउवीसेहिं वर-मंडल-मग्गेहिं	गुरु -सिक्खिहिं अवेरेहि-मि अणग्गेहिं	
छिण्ण सिलीमुह तेण वि खंडिउ	अद्धु लग्गु करे णाई तरंडउ	८

घत्ता

असि-खंड-सणाहु	गउ उप्पएवि पंच पयइं ।	
सारहि स-तुरंगु	धणु गुणु छत्तु चिंधु हयइं ॥	९

[१२]

पुणु पल्लट्टु पडीवउ तेत्तहे	रहु सुयवित्तिहे केरउ जेत्तहे	
सउणि वि गउ पर-वलहो समच्छरु	किव-धट्टज्जुण भिंडिय परोप्परु	
सरेहिं विद्धु तव-सुय-सेणावइ	पउ-वि ण चलइ सिलामउ णावइ	
सुरवर-णियरु णहंगणे घोसइ	णउ जाणहुं किह एवंहिं होसइ	४
दोणायरिय-दुक्खु सुमरंतउ	दियवइ धरिउ केण पहरंतउ	
जलु थलु णहयलु सरेहिं भरेसइ	दुक्करु जण्णसेणि जीवेसइ	
ताम किवेण पिसक्केहिं चूरिउ	को उवाउ णर-सालु विसूरिउ	
सारहि भणइ ण रणे पइसारमि	जइ णासहि तो रहु ओसारमि	८

घत्ता

तो दूमय-सुएण	वुच्चइ हउं आसंकियउ ।	
लइ णिय-वलु जाहुं	एहु मइं ण जिणेवि सक्कियउ ॥	९

[१३]

रहु ओसारिउ तो जत्तारें	गउ धड्डज्जुणु एण पयारें	
पेक्खेवि भज्जमाणु तं संदणु	पच्छइ धाइउ गउतम-णंदणु	
तहिं अवसरे जिह गुरुसुय-पंडिहिं	जाउ जुज्जु कियवम्म-सिंहडिहिं	
पिहिउ परोप्परु सरवर-जालेहिं	अमर तिडिक्किय जाला-मालेहिं	४
वीस चउक्क मुक्क पुणु भाएं	णव-वि सिलीमुह दुमयहो तोएं	
जायवेण धणु-दंडु स-जीयउ	छिण्णु भिण्णु गंडयले पडीवउ	
मुच्छा-विहलु समाउलिहूएं	कहि-मि समोसारिउ णिय-सूएं	
पइसइ भदिओ वि पंडव-वले	करि-मयरु व मयरहर-महाजले	८

घत्ता

जालंधर-सेणु	ताम णिरुद्धु कइद्धएण ।	
णं वणे गय-जूहु	सीहें वेहाविद्धएण ॥	९

[१४]

एक्क-रहहो गंडीव-विहत्थहो	णव सामंत पधाइय पत्थहो	
सउसुइ-सत्तुसेणु सत्तुंजउ	मित्तदेउ देवाह-मि दुज्जउ	
मित्तधम्मु धम्मालंकरियउ	मित्तसेणु सेणु व ओयरियउ	
चंदसेणु चंदुज्जल-वयणउ	सत्तुकामु कायउ जलणयणउ	४
णवमउ तहिं णामेण सुसम्मउ	धाइय सव्व करेप्पिणु सम्मउ	
सव्वेहिं सव्वसाइ सम-कंडिउ	णं चंदण-तरु सप्पेहिं मांडिउ	
तेण-वि पंचहिं सउसुइ धाइउ	अट्टहिं चंदसेणु विणिवाइउ	
वीसहिं सत्तुंजउ परिपूरिउ	सत्तहिं सत्तुकामु मुसुमूरिउ	८

घत्ता

अवसेसा पंच	पंच-सरेहिं पंचेडिय ।	
गय कर विहुणंत	करि जिह सीह-चवेडिय ॥	९



[१५]

सच्चसेणु तहिं वलिउ समच्छरु	थरहरंत-परिपेसिय-तोमरु	
भिंदेवि वाम वाह गोविंदहो	सरु सिरे कह-व ण लग्गु फणिंदहो	
भणइ धणंजउ पेक्खु जणदण	छिज्जमाण मइं पंच वि संदण	
एम भणेवि इंदत्थु विसज्जिउ	तेण-वि एतें सेण्णु परज्जिउ	४
तक्खणे सव्वसेणु दोहाइउ	मित्तधम्म-सारहि विणिवाइउ	
मित्तधम्म-सिरु खुडिउ खणंतरे	णं चिउ अवरु धारु इत्थंतरे(?)	
कदम-खुप्पमाणु समुट्ठिउ	कडि-पमाणु रुहिरोहु परिट्ठिउ	

घत्ता

जलु थलु वलु सव्वु	अज्जुण-वाणेहिं पीडियउ ।	
लक्खिज्जइ घोरु	णाइं कयंतें कीडियउ ॥	७

[१६]

तहिं अवसरे पारद्धाओहण	धाइय धम्म-पुत्त-दुज्जोहण	
वे-वि परोप्परु अमारिस-कुद्धा	णाइं मइंद महामिस-लुद्धा	
वेण्णि-वि सरहस भिडिय महारणे	खेरि वहंति वसुंधर-कारणे	
वेण्णि-वि सूय करेरिय-संदण	वे-वि पंडु-धयरट्ठहुं णंदण	४
वे-वि कुंति-गंधारि-थणंधय	वेण्णि-वि चंद-फणिंद-महाधय	
वे-वि सियायवत्त सिय-चामर	वेण्णि-वि परिओसिय-सव्वामर	
भणइ अजायसत्तु कुरु-राणा	पंच-वि गाम ण देहि अयाणा	
बंधव सयण सव्व माराविय	दूसासण-क्किव-कण्णेहिं गाविय	८

घत्ता

दुज्जोहण थाहि	सरु विस-जउहर-जूवाइं ।	
महु संति कराइं	तुज्झु कयंतें हूआइं ॥	९

[१७]

दुव्वयणावसाणे सकसाएं	णवहिं सरेहिं विद्धु कुरु-राएं	
तेरह तव-सुएण परिपेसिय	चउहिं चयारि वाह परिसेसिय	
पंचमेण सारहि-सिरु पाडिउ	ताल-तरुवरहो णाईं फलु साडिउ	
छट्टेणासुगेण वर-चिंधउं	खंडिउ कणय-भुयंग-समिद्धउं	४
सत्तमेण धणुवरु विद्धंसिउ	आयवत्तु अट्टमेण विणासिउ	
अवरोहिं सरेहिं विद्धु वच्छत्थले	करणु करेवि परिट्टिउ महियले	
कुरुव-णराहिव कह-व ण मारिउ	कण्ण-कलिंग-किवेहिं परिवारिउ	
रवि अत्थमिउ जाउ जउ तिमिरहो	कुरु-पंडव गय णिय-णिय सिमिरहो	८
	घत्ता	

अत्थाणे णिविद्ध तवसुय-दुज्जोहणेहिं किय ।

णं इंद-पडिंद चवणे सइं भूमियले थिय ॥ ९

इय रिट्टणेमिचरिए धवलइयासिय-सयंभुएव-कए  
छहत्तरिमो सग्गो ॥

## सत्तहत्तरिमो संधि

राहेयहो पट्टे णिवद्धए महि-कारणे रणे पारद्धए ।  
धुर-धरण-कियंकिय-खंधइ कुरु-पंडु-वलाइं सण्णद्धइं ॥ १

[१]

पोमाइउ दुज्जोहणेण णरु एक-रहु जे पर-वल-पलयकरु  
एक्कएण जे खंडउ चारियउ सुर-सेण्णु सव्वु ओसारियउ  
एक्केण जे तीस कोडि अवय विणिवाइय रणे णिवाय-कवय  
एक्केण जे तालुयवम्म जिय एक्केण जे कालकंज वहिय ४  
एक्केण जे हउं मेल्लावियउ गंधव्व-लोउ भेल्लावियउ  
एक्केण जे धणु परियत्तियउं कुरु-साहणु सरेहिं विहत्तियउं  
एक्केण जे जालंधर-सयइं णारायण-गण-पमुहइं हयइं ८  
एक्केण जे भंजिय कुरुव-वलु सइं खुडिउ जयद्दह-सिर-कमलु

घत्ता

समरंगणे णीसामण्णेण दुज्जोहणु पभणिउ कण्णेण ।  
णारायणु जासु सहेज्जउ पर-वलइं स जिणइ धणंजउ ॥ ९

[२]

तो जामिणि जाम-विणिग्गमणे दिवसाणणे दिवसयरुग्गमणे  
रण-रसियइं पसरिय-कलयलइं सण्णद्धइं कुरु-पंडव-वलइं  
सरहसइं समुब्भिय-धयवडइं वहु-मंडण-मंडिय-गय-घडइं  
सोवण्णावयव-महारहइं गय-मय-चिक्खिल्ल-पवट्ट-हयइं ४  
हय-फेण-तरंगिणि-दुत्तरइं तूराव-भरिय-दियंतरइं  
जयसिरि-कर-गहणुत्तावलइं कुरुखेत्तु गयइं विणिग्ग-वि वलइं  
तव-तणएं वूहइं विरइयइं णं णव-जलहर-जालइं थियइं  
वोल्लाविउ कुरुवें रवि-तणउ तुहुं एक्कु मित्तु महु अप्पणउं ८

घत्ता

वेयारिउ गुरु-गंगेएहिं

भिच्चेहिं अवरेहि-मि अणेएहिं ।

णासइ व धरणि परिसक्किय

महि केण-वि देवि ण सक्किय ॥

९

[३]

तो अक्खइ कुरु परमेसरहो

भाणुब्भउ भाणुमईसरहो

जं वीसकम्म-उप्पाइयउ

सक्कहो करे कह-व पराइयउ

पुणु परसुराम-घरे अच्छियउ

पुणु महु घरे पइसि णियच्छियउ

तं कालवट्टु अविणट्टु रणे

चंपाहिउ हउं दुव्विसहु रणे

४

रहु दिव्वु तुरंगम णिप्पसर

तोणीरे अणिट्टय सप्प-सर

जइ सारहि सल्लु समावडइ

तो पंडव-साहणु पांडवडइ

परिओसिउ कुरुव-णराहिवइ

वोल्लाविउ तो मद्दाहिवइ

अहो धीर वीर सुंडीर-तणु

धयरट्ट-सरिसु तुहं एक्कु जणु

८

घत्ता

जइ वसुमइ देण समिच्छहि

तो रण-भरु अज्जु पांडिच्छहि ।

तावणिहे तव-तणु-तेयहो

सारत्थु करहि राहेयहो ॥

९

[४]

जिह सारहि अरुणु दिवायरहो

जिह मायलि सुर-परमेसरहो

जिह दारुइ देवइ-णंदणहो

तिह तुहं रवि-सुयहो स-संदणहो

तो करेवि साहत(?) भिउडि वलिउ

णं घिएण हुवासणु पज्जलिउ

दुज्जोहण वोल्लहि णवर तुहं

महि-मंडले अण्णहो कासु मुहु

४

को कण्णु कवणु किर चारहाडि

वलु कवणु वित्ति का आरहाडि

अहिमाणु कवणु किर कवणु कुलु

महु पासिउ किं सो रणे अतुलु

महु पासिउ किं छलु रवि-सुयहो

सारत्थु करमि हउं जेण तहो

गउ एम भणेवि णिय-आसवहु

थिउ चरण धरेप्पिणु कुरुव-पहु

८

घत्ता

तुहं महुसूयणहो-वि वड्डुउ

हउं तेण परिट्टिउ अड्डुउ ।

धुउ कण्णहो पत्थु ण पुज्जइ

पइं सूए महि धुउ भुज्जइ ॥

९

[५]

अकुलीणउ जइ चंपाहिवइ  
जइ अंग-राउ णउ वड्डिमउ  
पहु-अवसरे तिण-समु गणइ सिरु  
तुहुं पंडु-पुत्तु लइ सयल महि  
ता तेण-वि उत्तरु दिण्णु तहो  
ण समिच्छमि वसुमइ-वइसणउं  
धणु-कोडिए भीमु णिवारियउ  
एवड्डु महाणुभाउ कवणु

तो अत्थइं रामु ण अल्लियइ  
तो महु अद्धासणे चडइ कउ  
गंगेएं दिण्णु कुमंति चिरु  
कुरु-पंडव-पेसणु कारवहि  
हउं किंकरु कुरुव-गराहिवहो  
णउ छत्तइं चामर वासणउं  
जम-जेड्डु जिणेवि ण मारियउ  
जइं घइं तुहुं वीयउ धुर-धरणु

४

८

घत्ता

तं णिसुणेवि अणिहय-मल्लेण  
जइ करहि महारउं वुत्तउं

दुज्जोहणु पभणियउ सल्लेण ।  
तो सारहि होमि णिरुत्तउं ॥

९

[६]

पणवंतहो कुरुव-गराहिवहो  
परिओसु पवड्डिउ कुरु-णिवहे  
करि-कक्ख-महद्धउ उब्भियउ  
रवि-णंदणु रहिय वलावरियउ  
तो पभणइ कुरुव-गराहिवइ  
हणु पंडव महसूयणेण सहुं  
गउ रवि-सुउ उप्परि अज्जुणहो  
रहु सारहि सारहि पइं भणमि

कह कह-व वयणु पडिवण्णु तहो  
हय हंस-सम-प्पह जुत्त रहे  
मदाहिउ धुरहे परिट्टियउ  
रहु चलिउ सव्व-पहरण-भरियउ  
जय णंद वद्ध चंपाहिवइ  
तिह करि जिह वसुमइ होइ महु  
णं दुसहु माहु णव-फग्गुणहो  
कुंती-सुव जाम सव्व हणमि

४

८

घत्ता

अहो तावणि अमरिस-कुद्धउ  
गज्जहि अणाय-परमत्थउ

णं वेसरि आमिस-लुद्धउ ।  
को पंडव जिणेवि समत्थउ ॥

९

[७]

गज्जिज्जइ ताम-मेत्त वियणे	ण णिहालहि पंडव जाम रणे	
जइयहुं धण-कंचण-जण-पउरे	पिडु मंडिउ दुमयहो तणए पुरे	
तइयहुं तुहुं णरेण णिवारियउ	हउं भीमें कहव ण मारियउ	
जइयहुं गंधव्वेहिं णाहु णिउ	तइयहुं पइं को ववसाउ किउ	४
जइयहुं विराडपुरे लयउ धणु	कुढे लग्गु धणंजउ एकु जणु	
तइयहुं कुरु-वलइं कियाउलइं	सीहेण व भग्गइं गयउलइं	
जइयहुं गंगेउ दोणु पहरु	तइयहुं तुहुं कण्ण कत्थ गयउ	
असि-पह-परिहविय-सयद्दहहो	जइयहुं सिरु खुडिउ जयद्दहहो	८

घत्ता

तइयहुं तहिं रणे एकल्लउ	णरु णाइं कयंतु णवल्लउ ।	
कुरु-वलइं खंतु परिसक्किउ	पइं धरणहं तो-वि ण सक्कियउ ॥	९

[८]

आरुद्धु कण्णु मद्देसरहो	वलु णिंदहि कुरु-परमेसरहो	
ण णिएवउ जाहं कयावि मुहु	उव्वहहि पक्खु तहो तणउ तुहुं	
जइयहुं दोमइ-केस-ग्गहणु	तइयहुं किउ कवणु परिग्गहणु	
पंडव चयारि दूसल-धवहो	गय भज्जेवि एकहो सिंधवहो	४
धणु-कोडिए पेत्थिय वेण्णि मइं	तहिं काले काइं णउ दिट्ठ पइं	
जइयहुं विणिवाइउ रयणियरु	तइयहुं कहिं गउ गंडीव-धरु	
एवहिं धुउ जममुहे पइसरइ	परिरक्खु तियक्खु जइ वि करइ	
जिम महि भुंजाविउ कुरुव-पहु	जिम गसिउ हुवासणु दुव्विसहु	

घत्ता

जिम महु पयाउ ओहट्टियउ	जिम अज्जुण-दुमु दलवट्टियउ ।	
जिम जस-कुसुमइं विखिण्णाइं	जिम अंगइं धरणिहे दिण्णाइं ॥	९

[९]

उप्पाय जाय तहिं ताम तहो  
धूमंति रणण दिसा-मुहइं  
वालहिं फुल्लंति तुरंगमहं  
महि कंपइ दिणमणि थरहरइ  
गंगेय-दोण तो दिट्ठ रणे  
णं चंदाइच्च राहु-झडिय  
रवि-सुएण ण जोइय णविय थुय  
अण्णु वि जो को-वि दोहु करइ

हड्डइं पडंति गयणंगणहो  
कुरु-वले वलंति पवलाउहइं  
अ-सिवइं सुम्मंति विहंगमहं  
चंपाहिउ पर-वले पइसरइ  
सीहाहय णं मायंग वणे  
णं इंद-पडिंद वे-वि पडिय  
किय सामिय-दोहा होवि मुय  
सो सव्वु महाहवे महु मरइ

४

८

घत्ता

जं दिंतउ दीणाणाहहं

दियवर-मागह-भुय-भूसणहं ।

तं तेत्तिउ तहो धणु पावइ

जो णर-णारायण दावइ ॥

९

[१०]

जो णर-णारायण दक्खवइ  
सउ दासिहिं सउ वर-कामिणिहिं  
उत्तमहं तुरंगहं पंच सय  
दस हत्थि चउदह पत्तणइं  
तो भणइ सल्लु अहो आहिरहि  
जइ अत्थि को वि तउ वंधु-जणु  
पाहाण णिवंधेवि णियय-गले  
दीसेसइ सइं जे धणंजयहो

तहो देमि अज्जु मद्दाहिवइ  
चउ चउ सय गोवइ-णंदिणिहिं  
अट्ठ रह दासहं अट्ठ सय  
अवरइ-मि रयण-मणि-कंचणइं  
किं दविणु अपत्तेहिं विक्खिरहि  
तो किं ण णिवारइ दिंतु धणु  
उत्तरेवि समिच्छहि उवहि-जले  
कइ विप्फुरंतु उप्परि धयहो

४

८

घत्ता

महसूयणु जासु सहेज्जउ

सहुं सुरेहिं पुरंदरु विज्जउ ।

तुहुं कण्ण जइ वि अइ भल्लउ

ण पहुच्चहि तहो एकल्लउ ॥

९

[११]

भाणुब्भउ पभणइ सल्ल सुणे	तुहुं फग्गुण-माहव-मघव थुणे	
महु घइं पुणु तिण्णि-वि गण्णु णवि	जइ एक्कीहोति सुरासुर-वि	
हउं तो-वि समत्थु सव्व-जयहो	पुणु किं एक्कहो धणंजयहो	
संजमिण भणइ गंभीर-सरु	आरोडहि तुहु गंडीव-धरु	४
विसु गिलहिं भुवंगम दरमलहि	आलिंगहि जलणु वज्जु दलहि	
जं अंतरु मसय-महाकरिहिं	जं अंतरु जं वुय-केसरिहिं	
जं अंतरु खगवइ-वुक्कणहं	जं अंतरु रवि-जोइंगणहं	
जं अंतरु जगे अवगुण-गुणहं	तं अंतरु रणे कण्णज्जुणहं	८

घत्ता

जा जाहि सल्ल जइ भीयउ	हउं अच्छमि पहरण-वीयउ ।	
सो मणुसु गणिज्जइ भल्लउ	जो वहुय हणइ एक्कल्लउ ॥	९

[१२]

रे रे कुदेस-संभव विसल्ल	संगाम-हरिण णासण-कुसल्ल	
उप्पण्णु पाव जहिं वसइ तुहुं	तहो जाणमि दिट्ठु ण कहमि मुहु	
महिलउ हरंति अणियच्छियउ	सरु वीरु ण लब्भइ पत्थियउ	
असउच्चय-संगउ जेत्यु जणु	मच्छइउ अकारणे कुविय-मणु	४
णीलज्जुण-अज्जु पीय-सरउ	गोमंस-भक्खि गोधम्म-रउ	
वहु-विसम-सहाउ अणप्पणउ	जहिं तुहुं तहिं वंधु कहो तणउ	
गंधारहं मदहं सिंधवहं	दय-भूरे(?) -सोरड्ढुभवहं	
खल खुद पिसुण एत्तिउ भणमि	णर-सउरि हणेप्पिणु पइं हणमि	८

घत्ता

सिरु महियले रुंडु महारहे	लाएप्पिणु जीविउ जम-पहे ।	
रुहिरामिस-कदम-लेवउ	तुहुं भूयहं वलि घत्तेवउ ॥	९

[१३]

मदाहिउ पभणइ दोसु कउ	करि णिंद ण तूसमि मित्त तउ
जइं तूसमि तो णारायणहो	वंभाणहो अहव तिलोयणहो



## रिद्धगेमिचरिउ

१३२

दुज्जोहण-केरउ कज्जु महु  
तुहुं कहि-मि कण्णु आयासे हुउ  
कत्थइ महिलउ जुप्पंति हले  
कत्थइ माउल वंधुव्वरिय  
कत्थइ जेट्टाणिहे पइ-पलए  
कत्थइ विसिरहो पुज्ज चडइ  
कत्थइ पाहुणहं घराइयहं  
कत्थइ गोमंसु भक्खु णरहं

को वोल्लइ तुम्हारिसेहिं सहुं  
कुल-धम्मु ण देसाचारु सुउ  
कत्थइ अणिअच्छिय ण्हंति जले  
परिणिज्जइ भइणि सहोयरिय  
धिप्पइ देवरेण पोत्ति गलए  
कत्थइ देवउले कविल पडइ  
चंडील भरंति तलाइयहं  
कम्मइं करंति घरे दियवरहं

घत्ता

कुलधम्मोहिं देसाचारेहिं अण्णेहि-मि विविह-पयारेहिं ।  
जगु जीवउ को-वि ण समप्पइ वरि एवंहिं रणु आढप्पइ ॥

११

[१४]

तो पंडव-वूहइं वहु-विहइं  
पेक्खेप्पिणु मयगल-जलय-पह  
पेक्खेप्पिणु तुरय तरंग-सम  
णिसुणेप्पिणु तूरइं भीसणइं  
रवि-णंदणेण सुर-गिरि-अचलु  
दाहिणए पक्खे थिय तिण्णि णिव  
संसत्तग वामए पक्खे थिय  
पच्छए दूसासणु दुव्विसहु

पेक्खेप्पिणु गिरिवर-संणिहइं  
गंधव्व-णयर-सम-सार-रह  
सामंत सव्व संगाम-खम  
सुर-दुंदुहि दारुण भीसणइं  
किउ वारुह-पत्तु वूहु पवलु  
मागह-णरिंद-कियवम्म-किव  
वे सउवल वूह-पक्खे थिय  
थिउ तासु-वि पच्छए कुरुव-पहु

४

८

घत्ता

पुणु आसत्थामु महावलु मुहे कण्णु पवड्ढिय-कलयलु ।  
तहो वूहहो छेउ ण णावइ पंडवेहिं दिट्ठु गिरि णावइ ॥

९

[१५]

तो अज्जुणु तव-सुएण भणिउ  
हरि-सालउ जइ हउं जेट्ठु तउ  
लज्जावहि जिह णवि अप्पणउं

जइ पंडु-णराहिवेण जणिउ  
तो तिह करि लब्भइ जेण जउ  
लक्खिज्जइ वूहु वइरि-त्तणउ

तं वयणु सुणेवि गंडीव-धरु	मं भीहि जुहिड्डिल भणइ णरु	४
किं करइ कण्णु किं कुरुव-वलु	वंदि-गहे गो-गहे दिडु वलु	
एहु भग्गु वि कण्णहो खुडिउ सिरु	महु एक्कु-वि एक्कहो ण थिउ थिरु	
जइयहुं ओवडिउ जयदहहो	तइयहु-मि ल्हसिउ एक्कहो णरहो	
एवहि-मि णराहिव सो ज्जे हउं	किं एक्कं फोडमि वूह-सउ	८

घत्ता

कइकेयणु पहरु जयकारेवि	रहे चडिउ चाउ विप्फारेवि ।	
गिरि-सिहरे पवड्डिय-मलहरु	थिरु स-धणु णाई णव-जलहरु ॥	९

[१६]

जयसिरि-वहु-गहणुकुंडुलहो	वयणुगाय वाय जुहिड्डिलहो	
तुहुं अज्जुण कण्णहो हउं किवहो	पवणंगउ कुरुव-णराहिवहो	
धट्टज्जुणु कियवम्महो भिडिउ	अवरहो अवरु-वि समावडिउ	
तो कहइ सल्लु रवि-णंदणहो	एहु दीसइ चिंधु जणदणहो	४
कइकेयणु एउ धणंजयहो	लइ देहि दाणु सव्वहो जयहो	
रहु पेक्खु पेक्खु कह चक्कमइ	णं मंदरु सायरे परिभमइ	
जइ णिहउ किरीडि कण्ह-सहिउ	तो तुहुं जे राउ मइं परिगहिउ	
दुणिमित्तइं णवर ण रहु चलइ	णित्तेय तुरय मुत्ता(?) वलइ	८

घत्ता

संगामु भयंकरु होसइ	सोणिय-समुदु उट्टेसइ ।	
धय वायसु चंचु भरेसइ	सहुं सुरेसहिं सइंभु णिएसइ ॥	९

इय रिट्टणेमिचरिए धवलइयासिय-सयंभुएव-कए

सत्तहत्तरिमो सग्गो ॥

## अट्टहत्तरिमो संधि

कण्णज्जुण अग्गए देवि रणे णरवर-पेसिय-वाहणइं ।

अभिट्ठइं दिणमणि-उग्गमणे कुरुवइ-तवसुय-साहणइं ॥

१

[१]

भिडियइं वलइं वे-वि वल-सारइं  
वहल-धूलि-धूसरिय-सरीरइं  
काहल-कुल-कोलाहल-करणइं  
अवहत्थिय-णिय-पुत्त-कलत्तइं  
दंति-दंत-गिहसुट्ठिय-जालइं  
रह-रहंग-चिक्कार-रउद्दइं  
पहरण-पहर-वियारिय गत्तइं  
असिवर-विज्जुज्जोइय-गत्तइं  
संताविय-वसंग-पडिचक्कइं

उट्ठिय दारुण हणहणकारइं  
दर-विट्ठविय-धराधर-धीरइं  
पहु-सम्माण-दाण-संभरणइं  
णिब्भर-रणसिरि-रामासत्तइं  
हरि-खर-खुर-खोणिय-पायालइं  
चामर-मारुय-सुसिय-समुद्दइं  
रत्त-तरंगिणि-रेल्लिय-छत्तइं  
विरइय-सर-मंडव-सर-सयणइं  
दुद्दम-दुव्विसहइं दुल्लखइं

४

८

घत्ता

धयरट्ठ-पंडुसुय-साहणइं

एम परोप्परु भिडियाइं ।

णं विहि-वसेण णह-महियलइं

विण्णि-वि एक्कहिं घडियाइं ॥

१०

[२]

ताम तुरय-तंवेरम-वाहणे  
हणइ हणेरु भीरु मंभीसइ  
सव्व-दिसेहिं सव्व-मायंगेहिं  
रिउ पेक्खंति महासर-जालइं  
पभणइ कण्णु पेक्खु मदाहिव  
रुद्धु धणंजउ एकु अणंतेहिं  
तो तावणि वि वुत्तु जतारें  
पवणु ण केण-वि पोट्टले वज्जइ

भिडिउ पत्थु संसत्तग-साहणे  
सव्वसाइ सव्वत्तहे दीसइ  
सव्व-रहेहिं सव्वहि-मि तुरंगेहिं  
णं उर-जंगम-कुलइं करालइं  
जालंधर-णारायण-पत्थिव  
णं दिणमणि घणेहिं वरिसंतेहिं  
णरु ण धरिज्जइ खंधावारें  
चित्तभाणु इंधणेहिं ण डज्जइ

४

८

घत्ता

ण मरइ मयरहरु तिसाइउ णइव पयावइ भुक्खियउ ।  
अप्पहु ण सक्कु णिद्धणु धणउ णउ परमप्पउ दुक्खियउ ॥

९

[३]

तो कसाउ वट्टिउ रवि-णंदणे  
सच्चसेणु रहचक्कहो रक्खणु  
पुट्टिपालु विससेणु थवेप्पिणु  
धाइउ अंगराउ पंचालहं  
वेइव-सोमय-सिंजय-मच्छहं  
पंचवीस पंचाल वियारिय  
जाइं जाइं णिय-णाम-पगासइं  
भाणु स-चित्तभाणु विणिवाइउ  
सेणाविंदु णरिंदु पिसक्केहिं

जोत्तिय हंस-वण्ण-हय संदणे  
थिउ णहसेणु अण्णत्तहे रक्खणु  
सल्लु महारह-धुरहे धरेप्पिणु  
कइकय-करुस-कासि-महिपालहं  
एवावरह-मि कर-परिहच्छहं  
सत्तरि सत्त भद्द-करि मारिय  
णिहयइं चेइहिं सयइं सहासइं  
वीरु स-वीरसेणु-वि णिवाइउ  
पंच-वि एम पहय एक्केक्केहिं

४

८

घत्ता

तहिं अवसरे धाइउ पवण-सुउ  
उज्झिय-करु पेळ्ळिय-पवर-तरु

वाहिय-रहु धुवंत-धउ ।  
णाइं गइंदहो मत्त-गउ ॥

९

[४]

ताम सुसेणें समरे सुधीमहो  
अवरु लेवि तेण-वि तहो पाडिउ  
तेहत्तरिहिं कण्णु विणिवारिउ  
तिहिं तिहिं किव-कियवम्म परज्जिय  
दूसासण तिहिं भल्लिहिं भेसिउ  
चंपाहिवेण छिण्णु असिधारउ  
णउलु सुसेणें पंचहिं तच्छिउ  
विहि-मि परोप्परु छिण्णइं चावइं

छिण्णु सरेण सरासणु भीमहो  
पाडिवउ दसहिं थणंतरे ताडिउ  
दसहिं सुभाणुवंतु ओसारिउ  
छहिं छहिं सउवल ओए विणिज्जिय  
अवरु सुसेणहो उप्परि पेसिउ  
तेहत्तरिहिं कण्णु पाडिवारउ  
वीसहिं मद्दि-सुएण पाडिच्छिउ  
विणिण-वि थिय सरीर-अपयावइं

४

८

घत्ता

विससेणु ताम सिणि-णंदणेण छिण्ण-महाउहु वि-रहु किउ ।  
वच्छत्थले चम्म-रयणु भरेवि खग-हत्यु जमु जेम थिउ ॥ ९

[५]

सिणि-णंदणेण घिवेप्पिणु कंडइं असिवर-फरइं कियइं वे-खंडइं  
दूसासणेण लेवि ओसारिउ सब्बेहिं अंगराउ परिवारिउ  
जायवेण विणिवारिउ संदणु हउ णिडाले तिहिं दिणयर-णंदणु  
अण्णहे रहे आरुहेवि पधाइउ धट्टज्जुणेण दसहिं पच्छाइउ ४  
दुमय-दुहिय-दोमइ-दायाएं पहउ पंचहत्तरि णाराएं  
पवण-सुएण लइउ सउ सड्डिहिं णउलेण तीसहिं सरवर-लड्डिहिं  
सत्तहिं माहवेण पडिवारउ अड्डहिं पहरइ पंडव-धारउ  
कण्णे मगण तिउण विसज्जिय दसहिं दसहिं ते सब्ब परज्जिय ८

घत्ता

छिण्णइं सिरइं सकुंडलइं लुयइं सरीरइं स-कवयइं ।  
जत्तारिहिं रहु रहवरेहिं रहियइं तिण्णि सयइं हयइं ॥ ९

[६]

कोत्तिहिं वाल-भावे उप्पण्णहो धाइउ धम्म-पुत्तु तहो कण्णहो  
वेण्णि-वि रण-पंकय-फुल्लंधुय वेण्णि-वि पंडु-पुत्त-जेट्टाणुय  
विण्णि-वि समर-सएहिं विणिवारिय विण्णि-वि विहिं वलेहिं परिवारिय  
विण्णि-वि रहवरेहिं सोवण्णेहिं विण्णि-वि हएहिं हंस-छवि-वण्णेहिं ४  
विण्णि-वि कणय-किणांकिय-चावेहिं विण्णि-वि सरेहिं समुज्जल-भावेहिं  
विण्णि-वि चिंधेहिं वण्ण-विचित्तेहिं विण्णि-वि वज्जंतेहिं वाइत्तेहिं  
तो तव-णंदणेण पच्चारिउ लद्धु मित्त कहिं जाहि अमारिउ  
फेडमि समर-सद्ध इह थक्कहिं पहरु पहरु तिह जिह रणे सक्कहि ८

घत्ता

पच्चारेवि एम जुहिठिलेण णहु सर-जालें छाइयउ ।  
 णाय-उलु णवल्लउ लोहमउ दइवेणं उप्पाइयउ ॥ ९

[७]

तं सर-जालु हणेवि सर-जालें दसहिं विद्धु चंपापुरि-पालें  
 तव-सुएण णाराउ विसज्जिउ तेण थणंतरे कण्णु विहज्जिउ  
 घुम्ममाणु ओणल्लु स-वेयणु कह-वि कह-वि पच्चागय-चेयणु  
 करयले कालवट्ठु विप्फारेवि धाइउ धम्म-पुत्तु हक्कारेवि ४  
 पहिलउं चंदकेउ दोहाइउ वीयउ दंडधारु विणिवाइउ  
 वेण्णि-वि चक्क-रक्ख तव-तोयहो णिहया णियंतहो पंडव-लोयहो  
 तीसहिं तव-सुएण चंपाहिउ तेणवइहिं सरेहिं मद्दाहिउ  
 तिहिं तिहिं चक्ख-रक्ख विणिवारिय तेण-वि सट्ठि वाण संचारिय ८

घत्ता

धणु छिण्णु छिण्णु देहावरणु विप्फुरंतु वहु-मणि-गणेण ।  
 णं णहु इंदाउह-मंडियउ णिवडिउ सहु तारायणेण ॥ ९

[८]

पाडिए कवय-चावे स-कसाएं आयामेप्पिणु पंडव-राएं  
 सत्ति विमुक्क झत्ति राहेयहो णं अडयण विड-भड-संकेयहो  
 तेल्ल-धोय-घंटावलि-मंडिय सत्तहिं सायएहिं स विखंडिय  
 तो सर मुक्क चयारि णरिंदें वाहु पसारिय णं गोविंदें ४  
 रवि-तणएं तुरमाण तुरंगम छिण्ण-पक्ख किय णां विहंगम  
 णट्ठु जुहिठिलु सहु णिय-सेण्णें पच्छए रहवरु वाहिउ कण्णें  
 जइ सच्चमउ राउ तो जुज्झहि थाहि थाहि कहिं जायवि सुज्झहि  
 भीमु णउलु तुहुं तिण्णि-वि भग्गा संढ होवि सुहडत्तणे लग्गा ८  
 अच्छइ एक्कु पत्थु मारेवउ हरिणु जेवं सहएवु धरेवउ

घत्ता

तो मारुइ अमरिस-कुइय-मणु  
पंचाणणु जेवं पंच-णहहो

उगय-गरुय-गयाउहउ ।  
धाइउ कण्णहो संमुहउ ॥

९

[९]

ताम सल्लु वोल्लाविउ कण्णे  
जहिं गज्जइ गंडीव-धणुग्गुणु  
मद्दाहिवइ कहइ किह वाहमि  
सीह-महाधउ वाहिय-संदणु  
पहु-परिहव-पड-पक्खालण-मणु  
कोवें अंतगु हुयवहु तेएं  
भणमि सउरि जाणमि वलवंतउ  
कीय-कुल-कयंतु कुरु-केसरि

वाहि वाहि रहु दाहिण-कण्णे  
जहिं संसत्तग-साहणे अज्जुणु  
अग्गए पत्तु विओयरु चाहमि  
किय-गय-घड-भड-थड-कडवंदणु ४  
णिय-सुय-वह-कसाय-फुरियाणणु  
सूरु पयावें खगवइ वेएं  
णिसियर-णियरु जासु अत्थंतउ  
वाहि वाहि रहु भीमहो उप्परि ८

घत्ता

जुज्जेवउ एण समाणु तुह  
किए पाराउट्टए पवण-सुए

सल्लु णिरारिउ आवडइ ।  
णरु अप्पणु जे समावडइ ॥

९

[१०]

तो जत्तारेणं वाहिय-रहवरु  
एकंतरिय वे-वि कोंती-सुय  
वेण्णि-वि स-सर-सरासण-पहरण  
वेण्णि-वि पर-वल-पवल-वलुद्धय  
वेण्णि-वि कंचण-कवयालंकिय  
वेण्णि-वि सल्ल-विसोय-पुरीसर  
वेण्णि-वि कुरुवइ-तवसुय-किंकर  
वेण्णि-वि समर-सएहिं अभग्गा

तावणि पावणि भिडिय परोप्परु  
वेण्णि-वि परिह-पलंव-महाभुय  
वेण्णि-वि दुद्दम-दणु-दप्प-हरण  
वेण्णि-वि करिवर-कर कहरिद्धय ४  
वेण्णि-वि घण-घण-घाय-किणंकिय  
वेण्णि-वि चंपापुर-परमेसर  
वेण्णि-वि सरहस सउरि-विओयर  
वेण्णि-वि विज्जु-पुंज सम-भग्गा ८

घत्ता

णिय-णिय-पहरेवउं परिहरेवि पेक्खा थिय कुरु-पंडव ।  
सर-णियरंतर-जूरंतएहिं पर सुर वहुएहिं दिट्ट णिव ॥ ९

[११]

विहि-मि परोप्परु ताडिउ वाणेहिं णवहिं णवहिं वाणेहिं अप्पमाणेहिं  
पवण-पुत्तु हउ थूणाकण्णे पडिवउ छिण्णु सरासणु कण्णे  
अवरु लेवि धणु रक्खस-काएं उरयडे भिण्णु कण्णु णाराएं  
मुच्छाविउ ओसारिउ सूएं दुज्जोहणेण विलक्खीहूएं ४  
पेसिय दस कुमार एक्कोयर थाहि थाहि कहिं जाहि विओयर  
वेढिउ सव्वेहिं णीसावण्णेहिं पंचासहिं रहेहिं सोवण्णेहिं  
तेण-वि पंचहिं पंच वियारिय पंच भग्ग कह कह-वि ण मारिय  
धाइउ चंपाहिउ पडिवारउ राइहिं थियउ णाइं अंगारउ ८

घत्ता

रणे रहवर-सिहरे परिट्टियहो वग-हिडिंव-जमगोयरहो ।  
तंवेरमु जिह तंवेरमहो रवि-सुउ भिडिउ विओयरहो ॥ ९

[१२]

तो समरंगणे णीसावण्णे पवण-पुत्तु वोल्लाविउ कण्णे  
मरु मरु पहरु कयंतें चोइय तिह जिह पंच कुमार विओइय  
वियडु विभच्छु सुवच्छु सुभव्वउ अवरु सुमुक्कहु कुरु-कुल-पव्वउ  
एम् भणेवि सिलासिय भासर णव राहेएं मुक्क महासर ४  
भीमें सत्त दसारुण-तोएं थरहरंत गय गयणाहोएं  
पडिय णिरत्थ णिहालिय सल्लें छिण्णु सरासणु अवरें सल्लें  
भीमें परिहु भमाडेवि घत्तिउ णिउ सय-सक्करु करेवि णिहंतितु(?)  
अवरु भर-क्खमु धणु विप्फारेवि छाइउ सरेहिं कण्णु पच्चारेवि ८



घत्ता

तुहुं मूलु अणत्थहं सव्वह-मि जउहर-जूय-कयग्गहहं ।  
 वर-वसण-विराड-घरासम दाहिण-उत्तर-गोग्गहहं ॥ ९

[१३]

जिह गुणु छिण्णु सुहदा-तोयहो जिम महु णंदणु णिउ जम-लोयहो  
 थाहि थाहि तिह एम भणेप्पिणु विद्धु थणंतरे थाणु रएप्पिणु  
 भिण्णु देहु सहं देहावरणे कह-व ण जीविउ णिउ जमकरणे ४  
 पंचवीस सर पेसिय कण्णे खंडिउ रहवरु थूणाकण्णे  
 पवण-पुत्तु उप्पएवि गयाउहु धाइउ रणे राहेयहो संमुहु  
 लउडि-पहारे किउ कडवंदणु चुक्कउ तुरउ ण धुरउ स-संदणु  
 णासवारु णारोहु ण किंकरु णायवत्तु ण धयग्गु ण चामरु  
 सव्वइं धूलिकोइ रणे तूवरु चूरिउ सउरि-महारह-कूवरु ८

घत्ता

गय-घाएहिं भीमें चूरियइं तीस सयाइं तुरंगमहं ।  
 सोवण्णमयहं सउ संदणहं सत्त सयइं तंवेरमहं ॥ ९

[१४]

कह-मि ण पइसइ रह-गय-वाहणु वम्मु व अग्गि-तत्तु कुरु-साहणु  
 सुवल-सुएण ताम असिहत्थहं पेसिय तिण्णि सहासइं अत्थहं  
 पंच सयइं रहवरहं स-रहियहं सव्वाओग-सव्व-वल-सहियहं ४  
 एक्के भीमें कोवाऊरिय सव्व गयासणि-घाएहिं चूरिय  
 तावं परोप्परु सर-संछण्णहं जाउ महाहउ तवसुय-कण्णहं  
 सरहस वावरंति णाराएहिं णं वे दिणयर-कर-संधाएहिं  
 सारहि जम-पुरवरे पइसारिउ स-रहिउ जाणवत्तु ओसारिउ  
 कड्डिउ कह-मि तुरंगेहिं रहवरु धाइउ ताम तुरंतु विओयरु ८

घत्ता

दुक्कंतहं तावणि-पावणिहिं सच्चइ सच्चाहिट्टियउ ।  
 णं विहि-मि राहु-अंगराहं अंतरे धूमकेउ ठियउ ॥ ९

[१५]

जाउ महंतु महाहउ ताह-मि जो ण हूउ णउ होसइ काह-मि  
 किंपि ण दीसइ सरवर-जालें जगु कंपाविउ णं दुक्कालें  
 जलु थलु णहु पेळंतु पधाइउ सलह-विंदु जिह कहि-मि ण माइउ  
 ताम पर्यंगु दुक्कु मज्झण्णहो तिण्णि सुसम्मे उरयाडि कण्णहो ४  
 लाइय थरहरंत णव पत्थहो एक्कु भल्लु वाणरहो धयत्थहो  
 तूरइं देवि करेप्पिणु कलयलु धाइउ सव्वु अखत्तें पर-वलु  
 केसउ केसहिं धरेवि णिरुद्धउ रहे वलग्गु णरु संसए छुद्धउ

घत्ता

तो कह व कह व वइहत्थिएहिं तालुयवम्म-खयंकरेण ।  
 ओसारेवि वलु मेहउलु जिह करेहिं कढोर-दिवायरेण ॥ ८

[१६]

दुद्धम-दाणविंद-विणिवायणु वोल्लाविउ णरेण णारायणु  
 जो णायणेहिं वंधु दरिसाविउ सो मइं रह-णिवंधु विहडाविउ  
 पूरिउ पंचयण्णु तो देवे तट्ट पणट्ट वइरि विणु खेवे  
 पाय-णिवंधु करेविणु वद्धा णाग-पास-पासेहिं ओवद्धा ४  
 एक्कु-वि पउ ण देवि णारायणु सुक्कें खीलिय जेवं महाघणु  
 ताव तिगत्ताहिवेणोसासिय गारुडेण अत्थेण विणासिय  
 णं घण-बंधहो घण णीसारिय भीम भुअंग सव्व ओसारिय  
 अवरे णरु णरेण घुम्माविउ कह व कह व रह-सिहरु ण पाविउ ८

घत्ता

तो चेयण लहेवि धणंजएण पउरंदरिहिं महाउहेहिं ।  
 भिज्जंतु असेसु वि वइरि-वलु असरणु णट्टु दिसामुहेहिं ॥ ९

[१७]

के-वि पणट्ट के-वि विणिवाइय	दस सहास तहिं अवेरे घाइय	
हंस-समप्पह पाडिय हयवर	सुरवर-पुर-पासाय व रहवर	
कुलगिरि-सिंग-तुंग तंवेरम	णर-णरिंद णक्खत्त-गहोवम	
कुंडल-मंडिएहिं गंडयलेहिं	घोलिर-हारि-हार-वच्छयलेहिं	४
भुय-दंडेहि केउरालिद्धेहिं	चामर-पुंडरीय-धय-चिंधेहिं	
सिविया-जाण-जाण-जंपाणेहिं	कवियंकुस-माणिक-पल्लाणेहिं	
दढ-पाउडय-विविक्ख-सवंधेहिं	पक्खर-गेज्जा-पुरजणि-वंधेहिं	
भिसिया-घंटा-किंकिणि-जालेहिं	मुहवड-वइजयंति-उडु-मालेहिं	८
घत्ता		
उवगरणेहिं ओएहिं अवरहि-मि	पेक्खंतहो आहंडलहो ।	
किउ णाइं णवल्लउ पावरणु	णरेण सयं भू-मंडलहो ॥	९

इय रिद्धणेमिचरिए धवलइयासिय-सयंभुएव-कए  
अट्टहत्तरिमो सग्गो ॥

## ऊणासीइमो संधि

णर-णाराय-कडंतरिउ      णिएवि सुसम्म-महारह-वाहणु ।  
तूरइं देवि स-कलयलइं      धाइउ पत्थहो कउरव-साहणु ॥      १

[१]

जं रह-गय-तुरय-महावरेणु	विद्विउ तिगतहो तणउ सेणु	
तं रण-रस-रहस-समुब्भडाहं	खर-पवणुप्पेल्लिय-धयवडाहं	
सोवण्ण-रहंग-मणोरमाहं	गंधव्व-महापुर-विब्भमाहं	
दस सहस पथाइय रहवराहं	सय तीस पसत्थहं किंकराहं	४
कियवम्म कणु किउ सउणि-मामु	दुज्जोहणु भुवणुच्छलिय-णामु	
गुरु-णंदणु सहं दूसासणेण	णं पवणु समाणु हुवासणेण	
एक्कल्लउ अज्जुणु रिउ अणेय	भग्गा-वि समागय अप्पमेय	
लंघिज्जइ तो-वि ण कुरु-णरेहिं	परिचिंतिउ केहि-मि कायरेहिं	८

घत्ता

णरु णारायणु तुरय रहु	सरु गंडीउ कइंद-महद्धउ ।	
आइय सव्वइं जम-मुहइं	दुक्करु चुक्कइ को-वि अखद्धउ ॥	९

[२]

एत्तहे-वि रइय-सर-मंडवेहिं	परिवारिउ पंडउ पंडवेहिं	
पंचालेहिं मच्छेहिं कइकएहिं	जायव-सिणि-सोमय-सिंजएहिं	
सिवकासिहिं करुसिहिं चेइवेहिं	ओएहिं अवरेहि-मि पत्थिवेहिं	
णर-णियर-करेरिय-वाहणाइं	पडिलगइं विण्णि-वि साहणाइं	४
ओवाहिय-रहवर-रहवराइं	उद्धाइय-गयवर-गयवराइं	
भड भडहं तुरंग तुरंगमाहं	महि भरिय मंस-वस-कद्दमाहं	
सोणियइं वहंति अणिट्टियाइं	सिर-मेत्तइं जाम परिट्टियाइं	
पहरण-डरेण रणे दुण्णिरिक्खे	णं णासेवि थिउ रवि अंतरिक्खे	८

घत्ता

रहिर-महा-णइ अंतरिउ पर-वलु णिएवि समुक्खय-कंडउ।  
को-वि तरंतु तरंतु गउ धम्म-रयणु करे करेवि तरंडउ ॥ ९

[३]

तहिं पंडव-कउरव-रणे रउदे महि लंधेवि थिए सोणिय-समुदे  
मुहु वंधेवि भीम-धणंजयाहं किउ धाइउ सोमय-सिंजयाहं  
छिंदंतु रहंगइं रहवराहं पज्जत्तइं गत्तइं गयवराहं ४  
सावरणइं हयइं उर-त्थलाइं सामंतहं सिरइं स-कुंडलाइं ४  
धाइउ सिहांडि मंभीस दिंतु पर-वलहे पिसक्केहिं पाण लंतु  
णिक्खिवेण किवेण णव सरेहिं विद्धु तेण-वि सो सत्तहिं पडिणिसिद्धु  
आरुट्टेण गउतम-णंदणेण धय-दंडु छिण्णु सहं संदणेण  
स-तुरंगु स-सारहि धणु-वि भग्गु तो स-फरु सिहंडे लइउ खग्गु ८

घत्ता

किवेण क्खिवाणु विच्छिण्णु दुज्जोहण-णयणाणंदे ।  
ण उप्पाय-काले णहहो णिवाडिउ विज्जु-पुंजु सहं चंदे ॥ ९

[४]

तो गउतम-णंदण-गहण-हेउ णामेण णराहिउ चित्तकेउ  
थिउ पुरउ सिहांडिहे विहुर-काले किउ ताडिउ णवहिं थणंतराले  
तो आसत्थामहो माउलेण वाणासणु छिण्णु अणाउलेण ४  
विणिवाइउ सारहि भिउडि-भीसु अवरेण खुरुप्पे खुडिउ सीसु ४  
हक्कारिउ तो धट्टज्जुणेण कियवम्मं सो-वि वलत्तणेण  
तो भिडिय परोप्परु सव्व-संध पंचाणण पंच व वसह स-खंध  
विप्फारिय-धणुह णिवद्ध-तोण णिम्मह पच्चाहणिच्चोणवोण(?)  
एक्कु वि एक्कहो जीविउ ण लेइ एक्कु-वि एक्कहो जिणणहं ण देइ ८

घत्ता

जायउ दुमयहो णंदणेण कह व कह व रणे किउ विवरेरउ ।  
सारहि घायउ भग्गु रहु णाइं मणोरहु कुरुवइ-केरउ ॥ ९

[५]

अण्णेत्तहे मुक्क-महासुयाहं  
 हउ तेहत्तरिहिं जुहिड्डिलेण  
 सिरि-तणएं वत्तीसहिं सरेहिं  
 सुयवम्मं तिहिं कुलिसोवमेहिं  
 गुरु-सुएण-वि सत्तहिं पहु णिसिद्धु  
 विहिं विहिं अवसेस किय वि-चाव  
 तहिं अंतरे पभणइ धम्म-पुत्तु  
 एक्कु-वि उवयारु-वि पइं ण णाउ

घत्ता

मइं तव-सुएण विरुद्धएण  
 अज्जु व कल्ले व दिवहडए

रणु वडइ गुरुसुय-तवसुयाहं  
 सत्तरिहिं पिसक्केहिं सयवलेण  
 पडिवेसें सत्तहिं तोमरेहिं  
 सुर्याकत्ती पंचहिं अहि-समेहिं ४  
 सच्चइ पंचहिं पंचेहिं विद्धु  
 णीसंदण णिद्धय णिप्पयाव  
 वंभणहो खत्तियत्तणु अजुत्तु  
 लइ विहिं तिहिं दिवसहिं हउं जे राउ ८

तुहं किउ विण्णि-वि किवं जीवेसहो ।  
 णिक्खउ रवि पिहिवि पेक्खेसहो ॥ ९

[६]

तो एम भणेवि ओसरिउ राउ  
 आभिद्धु भीमु तो कुरु-णराहं  
 एत्तहे-वि महंताओहणेण  
 चउ-भल्लेहिं तुरय-चउक्कु भिण्णु  
 णउलेण एक्कवीसहिं णिसिद्धु  
 धयरट्ट-सुएण वरासणाइं  
 पडिवाराहय तिहिं तिहिं सरेहिं  
 अवरइं जम-मुह व भयंकराइं

घत्ता

भिडिय जमल दुज्जोहणहो  
 धारा-णियर-णिरंतरेहिं

णिहुवउ जे परिट्टिउ दोण-जाउ  
 एत्तहे-वि पत्थु जालंधराहं  
 हउ णवहिं णउलु दुज्जोहणेण  
 सहएव-महद्धउ खुरेण छिण्णु ४  
 सहएवं पंचहिं सरेहिं विद्धु  
 जमलहं पाडियइं सरासणाइं  
 पुणु पंचहिं पंचहिं तोमरेहिं  
 उद्धाइय धरेहिं धणुद्धराइं ८

छाइउ सरेहिं पराणिउ आवइ ।  
 विहिं जलहरेहिं गिरि णावइ ॥ ९

[७]

तो विण्णि-वि कुरु-परमेसरेण  
 तहिं अवसरे वाहिय-संदणेण  
 सिल-धोय-धार-कलहोय-भीस  
 कुरुवेण-वि पेसिय पंचसट्ठि  
 पण्णारह अवरें धणुवरेण  
 तणु-ताणु स-तणु ताडेवि पिसकें  
 मुच्छाविउ कुरुवइ लद्ध-सण्णु  
 पडिवारउ दसहिं णिडाले विद्धु

ओसारिय सरवर-पंजरेण  
 हक्कारिउ दुम्मयहो गंदणेण  
 गारायण विसज्जिय पंचवीस  
 पंचालहो पाडिय चाव-लट्ठि ४  
 पेसिय मायंदें पुरेसरेण  
 कह कह-वि ण कुम्म-कडाहे थकें  
 दोहाइय-धणु लय पुणु-वि अण्णु  
 मुह-कमलु णां थिउ अलि-समिद्धु ८

घत्ता

अवरु सरासणु करे करेवि  
 सब्बइं पीडेवि वि-रहु किउ

सारहि चिंधु तुरंग महाधणु ।  
 कट्ठेवि कुरुवेहिं णिउ दुज्जोहणु ॥ ९

[८]

जं कुरुव-णराहिउ वि-रहु जाउ  
 सामंत-विहंगम रुलुघुलंत  
 पंचालेहिं वेढिउ मुएवि खत्तु  
 अट्ठाहिय अट्ठहिं तोमरेहिं  
 चित्ताउहु सुवण्णु मइंदकेउ  
 अट्ठमउ णराहिउ रोयमाणु  
 देवावि विचित्तु विचित्तकेउ  
 ओए-वि अवर-वि चंपाहिवेण

तं समुहु समुट्ठिउ अंगराउ  
 थिय कण्ण-महादुमे वीसमंत  
 णं जगु जे गिलंतु कयंतु पत्तु  
 णं खद्धासीविस-विसहरेहिं ४  
 जउ सुक्कु सक्कु सट्ठूलकेउ  
 वेइय-वह कें वुज्झिउ पमाणु  
 भद्दाउहु रोयणु सीहकेउ  
 विणिवाइय रणउहे णिक्खिवेण ८

घत्ता

हय-गय-रहंग चूरंतु रणे  
 कण्णु वियंभिउ कवणु जिह

धरेवि ण सक्किउ पंडव-लोएं ।  
 विसम-महासणि सर-संजोएं ॥ ९

[९]

जिह रवि-सुउ सोमय-सिंजयाहं	तिह भीमु वियब्भ-महागयाहं	
णिय सुय-वह-वड्ढिय-वेयणेण	वोल्लाविउ हरि कइ-केयणेण	
लइ जाहु देव जहिं अंग-राउ	मारेवउ मइं णंदण-सहाउ	
गय विण्णि-वि तहिं दुक्कंति जाम	संसत्तग पच्छले लग्ग ताम	४
तिहिं सएहिं मत्त-तंवेरमाहं	सहसहिं चउदहहं तुरंगमाहं	
विहिं लक्खेहिं पवर-धणुद्धराहं	णरु वलिउ तहि-मि जालंधराहं	
सरवरेहिं विणासिय दस सहास	णिय-वलहो करेवि जय जीवियास	
कंवोय-णराहिय-णामधेउ	णं णहे उद्धाइउ धूमकेउ	८

घत्ता

सो धावंतु धणंजएण	तिहिं तिक्खेहिं सरेहिं समाहयउ ।	
एक्कें पाडिउ सिर-कमलु	अवरेहिं छिण्ण वे वाहउ ॥	९

[१०]

णिय पय-पेक्खण-पक्खुहिय-खोणि	पडिलग्गु कीरिडिहे ताम दोणि	
णाराएहिं णर-णारायणाहं	धय विद्ध णियंतहं सुरवराहं	
सम्मोहहो गउ गंडीवधारि	दोणायणि जमरूवाणुकारि	
विणिवारिउ किं अम्हारिसेण	महुसूयणु पभणइ अमरिसेण	४
कहिं तुहुं ण धणंजउ किण्ण पाण	किं करे गंडीउ ण किण्ण वाण	
किण्ण-वि भुव ण-वि रहु णवि य वाह	किं अण्णे केण-वि विद्ध राह	
किं अण्णे खंडवे जलणु दिण्णु	किं अण्णे सुर-वलु सरेहिं भिण्णु	

घत्ता

अण्णे तालुयवम्म जिय	गो-गहे धणु परियत्तिउ अण्णे ।	
ल्हसिउ जेण गुरु-णंदणहो	मंछुडु तुहुं मारेवउ कण्णे ॥	८



[११]

णारायण-वयणेहिं चित्तु देवि  
धणु एक्कें एक्कें गुणु विहत्तु  
अवरेण सरेण रहंगु भग्गु  
अवरेण सत्ति अवरेण कुंतु  
पंचहिं मुच्छाविउ दोण-पुत्तु  
संसत्तग-वले पडिलग्गु पत्थु  
दुज्जोहणु वियसिय-कमल-णेत्तु  
वोल्लाविय रविसुय-पमुह राय

घत्ता

जिम मित्तहो जिम सामियहो  
सीसें एत्तिउ कज्जु पर

सिल-धोय चउदहं वाण लेवि  
अवरेक्कें पाडिउ आयवत्तु  
अवरेण लउडि अवरेण खग्गु  
अवरेण तिसूलु ति-भाय होंतु  
ओसारिउ सूएं मग्गें हुंतु  
कुरु-सेण्णे विओयरु लउडि-हत्थु  
ओसारेवि परिड्डिउ कोस-मेत्तु  
परिरक्खहु कुल-परिवाडि आय

४

८

सरणाइयहो कज्जे दिव दिज्जइ ।  
खंधारूदु अण्णु किं किज्जइ ॥

९

[१२]

तो चेयण लहेवि स-संदणेण  
जं करमि पेक्खु तं कुरुव-राय  
दक्खवमि जाम जम-णयर-वारु  
एक्कु-वि गुरु वइरु महंतु अज्जु  
संपज्जइ जुहिड्डिलु वलहो दुक्कु  
णं गरुडु भुवंगम-कुलइं खाइ  
पेक्खेप्पिणु णिय-वल्लु भीयमाणु  
जिय-परेण विणासिय-खंडवेण

घत्ता

भाइहे एक्कु-वि पासे ण-वि  
एवंहिं तिह करि महुमहण

वोल्लिज्जइ दोणहो पंदणेण  
मारेवा मइं दोमइहे भाय  
परिहरमि ताम णउ संपहारु  
अण्णु-वि गरुयारउ सामि-कज्जु  
णं मंदरु सायरे सुरेहिं मुक्कु  
गय-जूहइं जोहइ सीहु णाइ  
किवि-णंदणु वाणेहिं खीयमाणु  
वोल्लाविउ माहउ पंडवेण

४

८

दिवसु ति-भाय-सेसु लइ वइइ ।  
जिम महु रवि-सुउ रणे आवइइ ॥

९

[१३]

रण-रामा-रमणुकंडुलासु	गय विण्णि-वि पासु जुहिडिलासु	
णारायणु पभणइ सव्वसाइ	कमे कण्णहो एक्कु-वि भडु ण थाइ	
पर दीसइ पावणि गयइं देंतु	गय-घाएहिं गयवर खयहो णेंतु	
अण्णेत्तहे चूरइ वलइं दोणि	अण्णेत्तहे धाइउ जण्णसेणि	४
राहेएं एंतउ पडिणिसिद्धु	सो दुमय-सुएण सएण विद्धु	
रवि-तणएं धणु तणु तासु छिण्णु	पडिवारउ णवहिं सरेहिं भिण्णु	
अवरेण भर-क्खम कम्मएण	सत्तरिहिं जण्णसेणहो सुएण	
भाणवेण णिहम्मइ किर सरेण	णिउ सत्त-खंड हरि-भायरेण	८

घत्ता

सच्चइ कण्णहो विहि-मि रणु	जाउ णियंतहो सुरवर-विंदहो ।	
ताम दोणि धट्टज्जुणहो	धाइउ जेम गइंदु गइंदहो ॥	९

[१४]

पासाय-समप्पह-संदणेण	वोल्लाविउ दोणहो णंदणेण	
अरे गुरुवह-कारा थाहि थाहि	कहिं मइ जीवंते जीवंतु जाहि	
तो मणे आसंकिउ जण्णसेणि	णिय-वइरु हणेसइ णवर दोणि	
चिंतंतु परोप्परु भिडिय केवं	गज्जंत मत्त मायंग जेवं	४
पंचालें ताडिउ तोमरेण	गुरु-सुएण महासर-पंजरेण	
धणु परिहु सत्ति तिह ताडियाइं	अ-कियत्थइं हत्थहो पाडियाइं	
रहु सारहि तुरय-चउक्कु छत्तु	धणु असिवरु फरु अवरेहिं विहत्तु	
पुणु भिण्णु णिरंतर-तोमरेहिं	णं सरय-महाघणु रवियरेहिं	८

घत्ता

चिंत्तिउ दोणहो णंदणेण	ण मरइ इह पहरणेहिं रणंगणे ।	
करमि णवल्ली धूलडिय	सुर-वि जेम णियंति णहंगणे ॥	९

[१५]

गुरु-पुत्तु वहंतु महंतु सल्लु  
उच्चाइउ वाहेहिं रणे अराइ  
सिरि-रामालिंगिय-विग्गहेण  
अच्छोडइ वसुहावले जाम  
सक्कंदण-णंदण धाहि धाहि  
तो अज्जुण-वाणेहिं भिण्णु साउ  
तहो धाइउ तो गंडीव-धारि

पडिलग्गु णिजुज्जें जेम मल्लु  
दसकंधरेण कइलासु णाईं  
णं महिहरु सुरवर-महिहरेण  
दरिसावइ णरहो मुरारि ताम  
धट्टज्जुणु हउ हय वाहि वाहि  
आरूढु महारहे लइउ चाउ  
सर थरहरंत लाइय चयारि

४

घत्ता

पत्थे अमरिस-कुद्धएण चामर चावइं छत्त धयग्गइं ।  
गुरु-सुउ सारहि रहु तुरय सव्वइं कियइं मडप्पर-भग्गइं ॥

८

[१६]

तहिं काले पणच्चिय-तंडवेहिं  
पप्फुल्लिय-जंपण-कंजएण  
लइ जाहुं जणदण तं पएसु  
दासारुहु दावइ पेक्खु पत्थ  
णर-णाहहो धाइय वद्ध-कोह  
परिवेढिउ सव्वेहिं धम्म-पुत्तु  
पेक्खंतहं सोमय-सिंजयाहं  
घुसलेप्पिणु तवसुय-सेण्ण-सिंधु

जय-तूरइं दिण्णइं पंडवेहिं  
वोल्लाविउ सउरि धणंजएण  
संसत्तग-वल्गु जहिं किंपि सेसु  
दुज्जोहण-पमुह महा-रहत्थ  
णं गिरि-वेयड्ढहो घण-घणोह  
सच्चइ सिहांडि जमलेहिं गुत्तु  
सिवकासि-करूसहं कइकयाहं  
राहेएं रोहिउ राय-चिंधु

४

८

घत्ता

सउणि-दोणि-दूसासणेहिं किव-किववम्म-कण्ण-कुरुणाहेहिं ।  
पीडिज्जंतउ पेक्खु वल्गु जेम वालु वालग्गह-गाहेहिं ॥

९

[१७]

दरिसावइ जायउ पेक्खु पत्थ  
परिहरु तव-तणयहो तणिय आस

का वट्टइ पंडु-वलहो अवत्थ  
जसु भिडिय णरिंदहं दस सहास

परिसंख ण जाणमि किंकराहं	सय पंच सुवण्णहं रहवराहं	
पंचास सहस तंवेरमाहं	पण्णारह सहस तुरंगमाहं	४
धणु-वाण-भयंकरु रणे सुधीमु	तिहिं अक्खोहणिहिं विरुद्धु भीमु	
धट्टज्जुणु दूसासणेण भग्गु	रवि-सुउ सिहांडि-अणुपहेण लग्गु	
विससेणेणं णउलहो मलिउ माणु	वलु सयलु-वि दीसइ भज्जमाणु	
हय-चिंधु णिराउहु गलिय-गत्तु	कह कह व ण मरणावत्थ पत्तु	८
घत्ता		

पेक्खु अवत्थ जुहिट्टिलहो	लयउ णिरंतरु कण्णहो कंडेहिं ।	
गउ सिमिरहो सबडम्महउ	सर कड्ढंतु सइं भुव-दंडेहिं ॥	९

इय रिट्ठणेमिचरिए धवलइयासिय-सयंभुएव-कए  
ऊणासीइमो सग्गो ॥

## असीइमो संधि

मलिय-मरट्टहो रिउ-घाय-जाय-विच्छायहो ।  
 णर-णारायण गय पास जुहिट्टिल-रायहो ॥ १

[१]

हरि दरिसावइ पेक्खु धणंजय सुरवइ-वइरि-पुराण-पुरंजय  
 पेक्खु भीमु गय-घाएहिं घाइउ रह-रहंग रहि एकहिं लाइउ  
 पेक्खु महागय महिहिं पउंजिय णं उप्पाए महाघण पुंजिय  
 पेक्खु जेम उडुंत विहंगम रंगाविय रण-रंगे तुरंगम ४  
 पेक्खु केम वड्ढिय-अवलेवहो णासइ सउवल-सुउ सहएवहो  
 किव-कियवम्म पेक्खु पडिलगा उत्तमोज्ज-जुहमण्णहिं भग्गा  
 छत्तें पंडुरेण चंपावइ उययसेल्लु छण-चंदें णावइ  
 वड्ड-वार पइं पत्थ णिहालइ णं कियंतु भोयणु पडिवालइ ८

घत्ता

सउणि वारेवि सच्छंदु भमइ रणे सच्चइ ।  
 जिय-दुज्जोहणु उवविजय भीमु किह णच्चइ ॥ ९

[२]

पेक्खु कण्णु किह कहि-मि ण माइउ धम्म-सुआणुपहेण पधाइउ  
 मद्दाहिवेण ण वाहिउ रहवरु जाउ जाउ एहु जीवइ दुक्करु  
 जाउ जाउ सव्वंगिउ विद्धउ जाउ जाउ दोहाइउ पिद्धउ  
 जाउ जाउ समरंगणे संकिउ तउ वाणासणि सहेवि ण सक्किउ ४  
 वाहि वाहि रहु जेतहि अज्जुणु जहिं हरि हर-गल-गवालणज्जुणु  
 जहिं कलहोय-कइद्धउ धुव्वइ जहिं गंडीव-धणुह-गुणु सुव्वइ  
 वरिसइ रवि-सुउ किर सर-जालेहिं तावणि-रूवु पंडु-पंचालेहिं  
 कासि-करूस-कइकय-सामंतेहिं सोमय-सिंजय-वलेहिं अणंतेहिं ८

घत्ता

अमरिस-कुद्धएण भग्गु वत्थु भावेण विसज्जिउ ।  
पंडव-साहणु जुज्झंतउ तेण परज्जिउ ॥

९

[३]

पेक्खु पेक्खु किह किय-विवेरेरा	सत्तारह रह कइकय-केरा	
अंगराय-णाराय णिघिद्धा	गंपिणु भीमहो सरणु पइद्धा	
एत्तहे पावणि घणु जिह गज्जइ	एत्तहे पंडव-साहणु भज्जइ	
एत्तहे कुरुव-वरूहिणी धावइ	एत्तहे तव-सुय-वत्त ण णावइ	४
एत्तहे संसत्तग रणे दुज्जय	जं जाणहि तं करहि धणंजय	
चिंताभारु एम जं धित्तउ	तं णरु सोय-समाउल-चित्तउ	
गउ तेत्तहे जेत्तहे एक्कोयरु	हत्थि-हडउ विद्वइ विओयरु	
अहो विस-विसम-मोय-पसमावण	जउहर-जलण-जाल-विहडावण	८
अहो किम्मीर-कुरुव-करि-घायण	वग-हिडिंउ-कीया-विणिवायण	

घत्ता

पंडव-णाहहो लइ एक्क-वि वत्त ण वुज्झमि ।  
जाहि गवेसहि हउं भीम रणंगणे जुज्झमि ॥

१०

[४]

पभणइ पवण-पुत्तु स-विसेसउ	जाहि धणंजय तुहुं जे गवेसउ	
मइं चूरेवि गय-घडउ सइच्छए	मरइ णरिंदु रूवेसहुं पच्छए	
महु संगामहो अवसरु वट्टइ	जुज्झमाणु को सिमिरु पयट्टइ	
कुरुवहं संति समुट्टइ कलयलु	अणु-वि अणुपहे लगाइ कुरु-वलु	४
तो सरोसु पभणइ दामोयरु	जाहुं पत्थ वावरउ विओयरु	
को वीहइ दुज्जण-जंपणयहो	पेक्खहुं वयण-कम्मलु तव-तणयहो	
पच्छए चंपाहिउ आरोडहि	सिरु स-किरीडु स-कुंडलु तोडहि	
एवं चवंत पत्त पहु-मंदिरु	सज्जण-जण-मण-णयणाणंदिरु	८

घत्ता

दिद्ध जुहिड्डिलु	हरि-विजएहिं सामल-देहेहिं ।	
कंचण-गिरिवरु	मेहागमे णं विहिं मेहेहिं ॥	९

[५]

णर-णारायण णिएवि जुहिड्डिलु	तुद्ध सुद्ध णिय-रद्धकंदुलु	
मंछुडु णिहउ दिवायर-णंदणु	आइउ पत्थु तेण स-जणदणु	
साहु साहु तोसिय-पवरामर	पंडव-संड-खंडववण-डामर	
साहु साहु हरि गिरि-सिर-धारा	कह-वि जियंतें दिद्ध भडारा	४
कहि कहि कण्णु केम विणिवाइउ	जेण महारउ रहु दोहाइउ	
जेण तुरंग भग्ग रहु खंडिउ	सूउ स-चक्करक्खु मुउ छंडिउ	
जो सुसेण-विससेणहिं रक्खिउ	पंडव-कलह-केलि कुरु-पक्खिउ	
जो अणुदिणु अप्पाणु पसंसइ	अज्जुणु हणमि पइज्ज पगासइ	८

घत्ता

तेरह वरिसइं	जसु भइयए णिद ण आविय ।	
तहो राहेयहो	किह थरहरंत सर लाइय ॥	९

[६]

जसु भएण वणंतरे मुत्ता	पंडव जेण संढ-तिल वुत्ता	
जेण कवड-दुंदुहि पाडाविय	दोमइ दासि भणेवि कड्ढाविय	
जेण पुत्तु कुरु-जंगल-मच्छहो	धणु लेवाविउ पट्टणे मच्छहो	
जसु देव-वि अदेव रणे रुद्धहो	तहो सिरु पाडिउ किह पइं दुद्धहो	४
भणइ धणंजउ रह-गय-वाहणे	अच्छिउ हउं रमंतु रिउ-वाहणे	
जहिं तिगत-संसत्तग-लक्खइं	जहिं जालंधर-वलइं असंखइं	
जहिं णारायण-गण आपमाणा	जाहिं हिरण्णपुर-वासिय राणा	
कुंकुण-तामलित्त जहिं पच्छल	कीर कुणिंद णीर सम्मेहल	८

घत्ता

वलइं अणंतइं महु एकहो रणे आभिद्वइं ।  
 कियइं मइंदेण करि-कुल इव भग्ग-मरद्वइं॥ ९

[७]

मइं सर-सीरिय पवर तुरंगम भग्ग रसंत मत्त तंवेरम  
 छिण्णइं चिंधइं चामर-छत्तइं पंच सयइं रहवरहं विहत्तइं  
 ताम दिवायर-रह-सम-संदणु स-सर-सरासणु कुरु-गुरु-णंदणु  
 रह पंचास तुहारा चूरेवि दुज्जोहणहो मणोरह पूरेवि ४  
 सरहसु महु सवडम्महु धाइउ णं गयवरु गयवरहं पराइउ  
 अट्ट महारह पहरण-भरिया णं गिरिवर-तरु-णियर वावरिया  
 जे जुज्झंति पउहर णं देतिहिं अट्टहिं अट्टेहिं पर-वल देतिहिं  
 ते उड्डाइय सव्व रणंगणे णं दुव्वाएं घण गयणंगणे ८

घत्ता

सरेहिं भरेप्पिणु संदेह-भावे पइसारिउ ।  
 उवहि व रामेण कह कह व दोणि ओसारिउ ॥ ९

[८]

ताम विओयेरेण मय-भेभल भग्ग गयासणि-घाएहिं मयगल  
 पच्छए ओसारिउ दुज्जोहणु सिणि-णंदणेण सउणि कलि-रोहणु  
 सत्त सयइं चूरेवि चंपावइ महु थाणंतरु जाम ण पावइ  
 तो उच्छलिय वत्त चउ-पासहो भज्जेवि गउ णरिंदु आवासहो ४  
 किउ रणे रवि-सुएण तणु-सेसउ तेण णाह हउं आउ गवेसउ  
 भणइ अजायसत्तु किह धीरेहिं णर-गंडीव-वाण-तोणीरेहिं  
 अज्जुणु किण्ण णाउ किउ अण्णहो भज्जइ जेण मडप्फरु कण्णहो  
 किं णक्खत्तणेमि सेयासहो जुज्झइ भीमु वे-वि किह णासहो ८  
 कवण तउ ण सामग्गि धणंजय किं धणु किं ण वाण रणे दुज्जय



घत्ता

किं ण महारहु कं ण विहय किं ण महद्धउ ।  
किं ण जणदणु जं रवि-सुएण उद्धद्धउ ॥ ९

[९]

किं ण वाहु किं तुहुं ण धणंजउ किमु वा संग-संगु सयरज्जउ  
किं ण कणिट्ठु हिडिंवा-कंतहो किं ण-वि भइणिवइउ अणंतहो  
किं ण पंडु-कुंतिहे उप्पणउ किं ण पुरंदरु तउ सुउ पसणणउ  
किं ण दोणु गुरु सीसु ण सच्चइ जेम कण्णु जम-णयरु ण वच्चइ ४  
राह ण विद्ध भमंति णहंगणे दोमइ लइय ण मंड रणंगणे  
सुरह णियंतहं दद्धु ण खंडउ मेह ण भग्ग ण किउ सर-मंडउ  
णिहय णिवाय-कवय ण महाहवे लग्गु ण कुरुव-णरिंद-पराहवे  
धणु ण णियत्तिउ जिउ ण पियामहु णउ भयवत्तु ण वहिउ जयद्दहु ८

घत्ता

जइ आसंकिउ तहो तोसिय-कुरुव-णरिंदहो ।  
तो सइं जुज्झइ गंडीउ देहि गोविंदहो ॥ ९

[१०]

कड्डिउ मंडलग्गु तो पत्थे पुच्छिउ महुमहेण परमत्थे  
कहे कहो-वि कोसु किं खंडउ कहो जलणिहि-जले तुट्ठु तरंडउ  
किं महु किं णिययहो किं रायहो णरेण वुत्तु सिरु पाडमि आयहो  
जो पइं मइं गंडीउ विकत्थइ सो विणासु अप्पाणहो पत्थइ ४  
मं धरि सधर-धराधर-धारा पुज्जउ अज्ज पइज्ज भडारा  
भणइ जणदणु गुरु ण वि हम्मइ एण कसाएं णरयहो गम्मइ  
कवणु धम्मु किर आमिस-भक्खणे कवणु असच्चु पाणि-परिरक्खणे  
कवण पइज्ज वंधु-विद्धंसणे कवण भडत्तणु णियय-पसंसणे ८

घत्ता

गउ रिसि णरयहो चोरि णिहि सत्थु दावंतउ ।  
मउ परिरक्खणे पहिउ-वि देवत्तणु पत्तउ ॥ ९

[११]

खंडव-डह-डामरु आहासइ तिह करि जिह पइज्ज णउ णासइ  
जो गंडीउ परहो देवावइ सो विणासु महु पासहो पावइ  
अच्छउ एण कसाएं लइयउ मोह-महा-तम-जालें छइयउ  
पइं वुज्झाविउ देवइ-णंदण जं पभणहि तं करमि जणदण ४  
तुहुं गुरु माय-वप्पु तुहुं सामिउ तुहुं सुहि विहुर-तरंगिणि-गामिउ  
भणइ मुरारि पइज्ज ण जुज्जइ जइ जेद्वहो जेद्वत्तणु भज्जइ  
वरि मरियउं ण वुत्तु अहिखित्तउ तं भणु जेण होइ अवचित्तउ  
पंकयणाह-णाह-उवएसें धम्म-पुत्तु रोसविउ विसेसें ८

घत्ता

अम्हेहिं सव्वेहिं एक्केक्कउ रणे विणिवाइउ ।  
अक्खु जुहिड्डिल पइं कवणु णराहिउ घाइउ ॥ ९

[१२]

कोतेण वोल्लइ महु परमत्थें लालिउ पालिउ जेण सहत्थें  
सउरि ण वोल्लइ पाण-सहेज्जउ जासु पसाएं हउ रणे दुज्जउ  
भीमु ण वोल्लइ विक्रमवंतउ अच्छइ अज्जु-वि जो पहरंतउ  
रक्खिउ जेण जलंतए जउहरे णिहउ हिडिंबु हिडिंब-वणंतरे ४  
भग्गु किमीरु जडासुरु कीयउ जेण कयंत-णिहेलणु णीयउ  
पइं पत्थिवेण कवणु किउ सुंदरु मंडिउ कवड-जूउ दउरोयरु  
पइं पत्थिवेण वसुंधरि हारिय दोमइ जणहे मज्झे वित्थारिय  
पइं पत्थिवेण किलेस-णिरंतरे तेरह वरिसइं वसिय वणंतरे ८

घत्ता

एम भणेप्पिणु थिउ पुणु-वि क्वाण-भयंकरु ।  
दिद्धु अणंतेण णं विज्जु-लग्गु णव-जलहरु ॥ ९

[१३]

पुच्छइ गिरि-गोवद्धण-धारउ कहो किउ असि वि-कोसु पडिवारउ  
गगर-गिरेण कहिज्जइ पत्थे छिंदमि णियय-सीसु सइं हत्थे  
धरिउ धणंजउ जायव-णाहें थोरासण-थेरासण-हत्थे  
अज्जुणु माण-गइंदारूढा अप्पावह करंति जे मूढा ४  
ते णर होति णिगोयण-भायण किज्जइ तेण पाणि अप्पायण  
आउ हणंतहं आउ णिहम्मइ वड्डारंतहं मोक्खहो गम्मइ  
करि पणिवाउ जुहिंठिल-रायहो मुच्चहि जेण णिवद्ध-कसायहो  
तो पर्यंवरुहइं तव-तोयहो णमियइं णरेण णियंतहो लोयहो ८

घत्ता

मउडु मणोहरु पयवरणहं चंदण-धवलहं ।  
मज्झे परिट्ठिउ णं कणय-कलसु विहिं कमलहं ॥ ९

[१४]

ण खमइ धम्म-पुत्तु अहिखित्तउ वच्छ वच्छ लइ अत्थु सइत्तउ  
तुहु जुयराउ विओयरु राणउ होउ सव्व-साहणहं पहाणउ  
हउं पुणु मुयहं मज्झे ण जियंतहं मुहइं णिहालमि किह सामंतहं  
जमल णिएज्जहि जामि तवोवणु करमि काय-वाया-मण-गोवणु ४  
इंदिय दममि महव्वय पालमि सिद्धि-वरंगण-घण-थण लालमि  
एम भणेवि किर जाइ तवोवणु करयले लग्गु ताम महूसूयणु  
कह व कह व णर-णाहु खमाविउ अज्जुणु चरणंवरुह धराविउ  
पगुण-गुणग्गिम-गणणा-गोयरु रुण्ण परोप्परु धरेवि सहोयरु ८

घत्ता

तेरह वरिसइं जो करुणु महारसु धरियउ ।  
णयण-पवाहें एवंहिं सो णीसरियउ ॥ ९

[१५]

रुण्ण वे-वि कइ-केयण-राणा आहव-कणएं दुज्झर-माणा  
रुण्ण वे-वि स-जउहर-जूयइं दुक्खइं जाइं आसि अणुहूयइं  
रुण्ण विचित्तइं विहियाहम्मइं कियइं जाइं घरे मच्छहो कम्मइं  
रुण्ण मइंतावतुत्तर-दुक्खें(?) रुण्णइं हएण पियामह-रुक्खें ४  
रुण्ण सुहद्दाणंदण-सोएं रुण्ण हिडिंवा-सुयहो विओएं  
रुण्ण विराड-दुमय-सिर-छेएं रुण्णायरिय-पंडि-उव्वेएं  
रुण्णा ताव जाव अविसायहो णिग्गय कह-वि वाय मुहे रायहो  
पंद वद्ध जय जीव धणंजय महु महि देहि सुरारि-पुरंजय ८

घत्ता

एम विसज्जिउ गउ देवयत्त-रहे चडियउ ।  
दीसइ कण्णहो णं विज्जु-पुंजु सिरे पडियउ ॥ ९

[१६]

वोल्लाविउ अज्जुणेण जणदणु तिह करि जिह हम्मइ रवि-णंदणु  
जंपइ जायव-णाहु तुहारी एह जे महु वि चिंत वड्ढारी  
दुज्जउ कण्णु होइ समरंगणे तुज्झु मल्लु पुणु को-वि ण तिहुअणे  
एम पसंस करेवि सेयासहो पुणु वोल्लाविउ गुरु कुरु-वंसहो ४  
णरेण णरिंद जइ-वि अहिक्खित्तउ तो-वि तिह करे जिह जाइ सइत्तउ  
तो हक्कारिउ पंडव-णाहें परिवड्ढिय-महंत-उच्छाहें  
अवरंडिउ परिचुंविउ मत्थए हणु रवि-णंदणु तवणे अणत्थए  
होहि किरीडि-मालि अजरामरु णामु पसज्जिउ खंडव-डामरु ८

घत्ता

जाहि जणदण पत्थहो परिरक्ख करेवी ।  
पइं सु-पसण्णएण मइं पिहिवि सइं भुंजेवी ॥

९

इय रिद्धणेमिचरिए धवलइयासिय-सयंभुएव-कए  
असीइमो सगो ॥

## इकासीइमो संधि

खंडव-डामरेण वुच्चइ णरेण परिहविउ जेण परमेसरु ।  
महुमह मरइ महु सो सुएण सहं परिरक्खइ जइ वि पुरंदरु ॥ १

[१]

गुणु छिण्णु जेण महु णंदणहो धउ पाडिउ पत्थिव-संदणहो  
पेक्खंतहो कियवम्महो किवहो सिर-कमलु खुडमि चंपाहिवहो  
अह जइ ण णेमि जम-सासणहो तो उप्परि चडमि हुवासणहो  
कल्लए समक्खु सव्वहुं जणहुं णर-णरवइ-संति-पुरोयणहुं ४  
तवसुयहो समप्पमि वइसणउं भुंजउ कुरु-जंगलु अप्पणउं  
गउ एम भणेवि आरुहिउ रहे परिओसिय सुरवर सयल णहे  
तो उट्ठिउ वाउ पदक्खिणउ णं कण्णज्जुण रण-सक्खिणउ  
पासेइउ तो गंडीव-धरु ण उ जाणहुं होसइ कवणु डरु ८

घत्ता

वुत्तु जणदणेण रिउमदणेण को मल्लु पत्थ तउ तिहुयणे ।  
वीयराउ तहो तावहिं जिवहो करि तो वि पयत्तु रणंगणे ॥ ९

[२]

पहरंतइं ताव स-वाहणाइं दिट्ठइं कुरु-पंडव-साहणाइं  
घाइय वाइत्त-वि तलपयइं धुर-धवल-धूरि-धूसर-धयइं  
धय-माला-किय-घण-डंवरइं असि-जलण-जाल-जलियंवरइं  
तरवारि-वारि-वारिय-हयइं सरथो रथेभ-थंभिय-गयइं ४  
संदण-संदाणिय-संदणइं एक्केक्कइं किय-कडवंदणइं  
संचूरिय-चामर-चिंधाइं सोणिय-वाहिणि-वहंत-पहाइं  
खुप्पंत-पत्ति-हय-गय-रहइं कललंत-भूय-डाइणि-सयइं  
णं दिण्णइं जमेण वे-वि पयइं ++++++

८

घत्ता

पंडव-कुरुव-वलइं किय-कलयलइं दिट्टइ णरेण पहरंतइं ।  
सुट्टु छुहाइयए णिव्वाइए णं जममुहे कवलु धिवंतइं ॥ ९

[३]

तहो मज्झे दिट्टु आओहणहो	सच्चइ भिडंतु दुज्जोहणहो	
कियवम्मे णउल्लु पडिफुल्लिउ	विससेणु सयाणीयहो वलिउ	
सहएवहो सउणि समावडिउ	धट्टज्जुणु कण्णहो अब्भिडिउ	
किउ अकिउ सिहंदिहे उत्थरिउ	सुअसवेण दोण-णंदणु धरिउ	४
जुहमण्णुहो चित्तसेणु भिडिउ	दूसासणु भीमहो कमे पडिउ	
सव्वुत्तम उत्तमोज्जु उइउ	णं कालु सुसेणहो वि कुइउ	
तो दक्खवंतु दामोयरहो	गउ अज्जुणु पासु विओयरहो	
पाहुणउ कियंतहो मित्तु जिह	भंजंतु णरिंदहं माण-सिह	८

घत्ता

कणय-कइद्धएण घडियद्धएण णिहयइं दस-सयइं तुरंगहं ।  
चउ सय रहवरहं सहं हयवरहं सय सत्त मत्त-मायंगहं ॥ ९

[४]

तो णिहय-णिसायर-गोयरेण	णिय-सारहि वुत्तु विओयरेण	
तवतणयावास-पयत्ति-हरु	कहि काइं चिरावइ भाइ णरु	
सु विसूरइ हियउ महु-त्तणउ	परियाणमि ण परु ण अप्पणउ	
घरे जाउ जुहिंङ्गिलु वणिय-तणु	वीसमउ किरिडि स-महुमहणु	४
हउं एक्कु पहुच्चमि पर-वलहो	गिरि मंदरु जिह जलणिहि-जलहो	
संचूरमि सेण्णइं जेत्तियइं	रहु जोयहि अत्थइं कित्तियइं	
अक्खइ विसोउ वर-लद्धाइं	सटूल-चम्म-ओणद्धाइं	
वर-कम्मकार-परिमज्जियाइं	कलहोय-महारस-रंजियाइं	८

घत्ता

णिसियर-मारणइं भय-कारणइं हरिहर-कमलासण-दत्तइं ।  
अत्थि महाउहइं जिह गहमहइं सोणिय-वस-मासासत्तइं ॥ ९

[५]

सिल-सियहं सुवण्ण-पुंखधरहं  
 पारायहं दुइ दस कण्णियहं  
 परिपुच्छिउ पुणु-वि विओयरेण  
 णासंति कासु कुरु-साहणाइं  
 सव्वुप्परि काइं परिप्फुरइ  
 धुरि कहइ णिसायर-डामरहो  
 महुमह-मुह-कुहराऊरियहो

रहे सट्ठि सहास महा-सरहं  
 परिसंख ण अवरहं वण्णियहं  
 रणु वहिरिउ कहि कहो मलहरेण  
 ओहत्थइं चूरिय-वाहणाइं  
 णं सुर-विंवु किरणइं करइ  
 एहु सदु सुणिज्जइ जलहरहो  
 अण्णु-वि सेण्णहो संचूरियहो

४

घत्ता

कणय-कइद्धउ मणि-मउड-गउ विप्फुरइ जासु दिहि देंतउ ।  
 सिहि-सिह-ससकरु गंडीवधरु एहु दीसइ अज्जुणु एंतउ ॥ ८

[६]

तं णिसुणेवि रहसुच्छलियउ  
 णर णंद वद्ध जिउ जाव धर  
 णक्खत्तइं वसुह-वि दिसि विदिसि  
 पइं होतें णंदइ पंडु-कुलु  
 पइं होतें होसइ भू-भयहो  
 पइं होतें सउरि सणेहमउ  
 पइं होतें कोतिहे परम दिहि  
 पइं होतें उण्णइ सुहियणहो

आणंदु पणच्चिउ पवण-सुउ  
 गिरि-चंद-दिवायर-मयरहर  
 जायइ गयणंगणु दिवसु णिसि  
 पइं होतें आहवे हउं अतुलु  
 आवगी वसुमइ तव-सुयहो  
 पंचाल सुहदुअ अइयवउ  
 पइं होतें जमलहं जमल-णिहि  
 पइं होतें खउ रवि-णंदणहो

४

८

घत्ता

तुहुं जस-महुयरउ अयरामरउ णिय-पगइए पंडुर-गत्तउ ।  
 अच्छउ जग-कमले दिस-वलय-दले सुर-गिरि-मयरहं(?) दासत्तउ ॥९

[७]

तो भणइ भीमु परितुडु हउं  
 रह तीस वीस साओग गय

लइ गाम चउदह दासि सउ  
 चालीस महाजाणेय हय



## रिद्धणे मिचरिउ

१६४

तहिं काले किरीडि परावरिउ	अवरोप्परु दिट्ठु वणावरिउ	
पोमाइउ पवण-सुएण णरु	वलु सयलु पधाइउ ताव परु	४
परिवेढिउ गय-गंडीवधर	णं मेहें हिमयर-अहिमयर	
अज्जुणेण णिवारिउ सप्फुरेहिं	वइहत्थिय-वच्छदंत-खुरेहिं	
णाराएहिं तीरिय-तोमरेहिं	णालिय-वाराह-कण्ण-सरेहिं	
थिर-थूणाकण्णहिं कण्णिएहिं	अवरेहिं सिलीमुह वण्णिएहिं	८

घत्ता

कंपिउ कुरु-वलु	जिह उवहि-जलु	केत्थु वि साहारु ण वंधइ ।	
दुग्घर-वासु जिह	कुरु-णाहु तिह	रणु तुट्ठु तुट्ठु पडिसंधइ ॥	९

[८]

भीमेण-वि भीम-परक्कमेण	दस णाय-सहस वल-विक्रमेण	
किउ स-सर-सरासणु भुय-जुयलु	कप्परिउ खुरुप्पेहिं कुरुव-वलु	
हय पंच सहास तुरंगमाहं	तट्ठुगुण-मत्त-तंवेरमाहं	
दुइ लक्ख पयत्थहं किंकराहं	सउ कणयालंकिय-रहवराहं	४
परिसक्कइ मारुइ जहिं जे जहिं	रुहिर-णइ पयट्ठइ तहिं जे तहिं	
तो पडियारुद्धाओहणेण	पट्ठविउ सउणि दुज्जोहणेण	
सउ भाइहिं धाइउ संमुहउ	णं मत्त-गइंदहो मत्त-गउ	
पावणिहे थणंतरे भरिय सर	भिंदेवि तणु-ताणु पइइ धर	८

घत्ता

भीमें पाणहरु	पट्ठविउ सरु	किउ सत्त-खंडु गंधारें ।	
कोति-सुयहो तणउं	वाणासणउं	पाडिउ अवरेण कुमारें ॥	९

[९]

धणु अवरु लएवि धणुद्धरेण	सर सोलह मुक्क विओयरेण	
वाणासणु एक्कें दुइहिं धउ	पंचहिं सउवलु वच्छयले हउ	
जत्तारु चउहिं हय चउहिं हय	एवं तहो सोलह वाण गय	
सहस त्ति सत्ति मणे अट्ठविय	स हिडिंवा-कंतहो पट्ठविय	४

उज्जल लेवि दाहिण-करेण	परिपेसिय तहो जे विओयरेण	
वम्मीभुय भिंदेवि भूमि गय	सउवलेण लइज्जइ चाव-लय	
रहु भीमें चूरिउ सउणि हउ	कंपंतु महीयले मुच्छ-गउ	
विस-जउहर-जूवइं सरेवि मणे	णउ खुडिउ सीसु तं चोज्जु जणे	८

घत्ता

दुम्मण-दुम्मणेण	दुज्जोहणेण	तहिं अवसरे रहु संचारिउ ।	
तुच्छे दुराउलहो	जणे आउलहो	णिय गंधु णाइं ओसारिउ ॥	९

[१०]

जं सउणि मामु भीमेण जिउ	तं कुरु-जणु कण्णहो मूले थिउ	
तारायणु लंछण-ससहरहो	णं सुरवर-णियरु पुरंदरहो	
धीरवेवि वहूहिं णिरहिवाडिउ	पंचालहं अंगराउ भिडिउ	
सिणि-सुएण विद्धु पंचहिं सरेहिं	सहएवं सत्तिहिं तोमरेहिं	४
धड्ज्जणेण सत्तिहिं णिहउ	अणुवेण पंचवीसहिं विहिउ	
णउलेण सएण समावाडिउ	पवणंगएण पंचहिं धरिउ	
पंचालि-सुएहिं पंचहिं जणेहिं	उरे ताडिउ पंचहिं मग्गणेहिं	
तेण-वि तें सहं ए सव्व जिय	वि-तुरंग वि-सारहि वि-रह किय	८

घत्ता

देवेहिं दिण्णु	तउ रवि-सुयहो जउ	थिउ पंडु-सेण्णु विच्छायउ ।	
तुडइं कुरु-वलइं	किय-कलयलइं	कण्णमउ सव्वु जगु जायउ ॥	९

[११]

तो दुद्धम-दाणव-विंद-दमणु	गोविंदु महा-खगिंद-दमणु	
दक्खवइ भुवंगम-भीम-भुउ	अहो अज्जुणु एहु सो सूर-सुउ	
सेयायवत्तु करि-कक्ख-धउ	हर-हास-हंस-संकास-हउ	
अंवुज्जल-विज्जुल-पुंज-पहु	वर-वग्घ-चम्म-ओणद्ध-रहु	४
विस-जउहर-जूय-कय-ग्गहहं	वण-वसण-णिरिक्खण-गो-ग्गहहं	
अवराहहं सव्वहं मूल-दलु	लहु आयहो पाडहि सिर-कमलु	

## रिद्धणेमिचरिउ

१६६

करि पंडव-जायव-जणहो दिहि	कउरवहं पवद्धउ सोय-विहि	
संतण-विचित्तवीरिय-वमहिं (?)	तव-णंदणु भुंजउ णियय महि	८
घत्ता		
एण जियंतेण	दीसंतएण	अ-सुहच्छी महु वड्डारी ।
हणु हणु आहयणे	जं महु-वि मणे	जं फिड्डइ चिंत तुहारी ॥
[१२]		

दुड्डेण एण वहु णिड्डविय	जम-णयरु णराहिव पड्डविय	
वहु सोमय-सिंजय बहुय-जण	वहु कासि-करुस-सयमच्छ-गण	
पंचाल-भद्-चेइवइ-पहु	सिवि-जायव-कइकय-पमुह वहु	
चूरियइं स-धयहं स-चामरहं	वीसद्धइं वारह रहवरहं	४
पइं मइ-मि ण मारइ जाम रणे	लहु ताम धणंजय वइरि हणे	
एत्तहे वि पत्थु पडिवक्खवइ	दुज्जोहण-कण्णहुं दक्खवइ	
तुहुं सयल कालु गज्जंतु तिह	स-जणदणु अज्जुणु हणमि जिह	
दीसंति वि ओए ते वीर-वर	गंडीव-धारि-सारंग-धर	८
घत्ता		

वाणर-गरुडद्धय	कंचण-कवय	वाहिय-रह पूरिय-जलयर ।
हणु हणु वे-वि	जण णर-महुमहण	महु देहि पिहिवि सयरायर ॥
[१३]		

तं णिसुणेवि अंगराउ चवइ	कहो संकहि कुरुव णराहिवइ	
भुव जाम जाम धणु जाम सर	पावंति ताम कउ कण्ह णर	
एक्कल्लउ हउं विण्णि-वि धरमि	जिम्ब मारमि जिम्ब अज्जु मरमि	
तो महु जे भडत्तणु णिव्वडइ	ण किरीडि कुलीणहं आवडइ	४
तो भणइ सल्लु कहिं तणउ जउ	पर पेक्खमि मरणावत्थ तउ	
किवं धरिउ धणंजउ एक्कु जणु	अण्णु-वि पुणु जमलउ महुमहणु	
एक्कु-वि वहिरइ गंडीव-धणु	अण्णु-वि गज्जइ सारंगु पुणु	
एक्कु-वि रणे संख-सहु अहिउ	अण्णु-वि पुणु पंचयण्ण-सहिउ	८

घत्ता

एक्कु सुघोस-रहे गिरि-मेरु-पहे अवरेक्कु अवरे रहे चडियउ ।  
 एक्कु कयंत-समु अवरेक्कु जमु को जियइ विहि-मि कमे पडियउ ॥ ९

[१४]

तो तावणि-तवण-तणउ हसिउ	मद्दाहिव मंछुडु उल्हसिउ	
किं वण्णहि तेण स-सउरि णरु	किं मइं ण दिट्ठु गंडीव-धरु	
मायंदहे दोमइ-पाणि-गहे	खंडव-खए तालुयवम्म-वहे	
दुज्जोहण-बंधणे धण-हरणे	भयवत्त-जयदह-वावरणे	४
जाणमि जिह जायविंदु वलिउ	जें णिट्ठुरु रिट्ठ-कंतु वलिउ	
जमलज्जुण पाडिय गिरि धरिउ	अहि दमिउ कंसु उवसंघरिउ	
जइ ओए वे-वि मइं णिट्ठविय	तो वसुमइ णिप्पंडविय किय	
अहवइ समत्तु जइ अणिय-वहे	तो णामुं चडावमि ससि-फलहे	८

घत्ता

किव-दुज्जोहणहो वेढहो हणहो रहु धरहो तुरंगम खेयहो ।  
 हउं पच्छए भिडमि जें सिरु खुडमि सउं केसवेण कोतेयहो ॥ ९

[१५]

कुरुवइ-कियवम्म-किवायरिय	गुरुणंदण-सउणि समुत्थरिय	
एक्कल्लउ अज्जुणु रिउ वहुय	गह मिलेवि णाइं एकत्थु हुय	
णं सीहहो धाइय मत्त गय	ते तिहिं तिहिं वाणेहिं णरेण हय	
आयरिय-सुएण सएण धउ	तिहिं णरु णारायणु दसहिं हउ	४
पंडवेहिं पिसक्केहिं परिपिहिउ	दोसायणि जण्णसेणि णिहिउ	
वाणासणु वाणेहिं किउ दु-दलु	जत्तारहो तोडिउ सिर-कमलु	
किउ खेल्लिउ कुरुवइ वि-रहु किउ	सउवलु किय-बंधु कलिंगु जिउ	
वलु सयलु-वि सरेहिं कडंतरिउ	णीसीहहो करि-कुलु ओसरिउ	८

घत्ता

भंजेवि अलमलइं सव्वइं वलइं पुणु अज्जुणु भिडिउ तिगत्तहं ।  
 रयणिए जिणेवि गह अवहरेवि पह मयत्तंछणु जिह णक्खत्तहं ॥ ९

[१६]

संसत्तग-सत्तु-वलइं खणेवि सत्तारह सयइं गयहं हणेवि  
 रह णउवि खुरुप्पे कप्परेवि अ पमाण तुरंगम जज्जरेवि  
 गउ अज्जुणु पासु सहोयरहो सो वइअरु कहिउ विओयरहो  
 जिह धम्म-पुत्तु रवि-सुएण जिउ जिह छिण्णु महद्धउ वि-रहु किउ ४  
 जिह रणु णल्लियइ णराहिवइ वहु-मच्छरु पवण-पुत्तु चवइ  
 एक्केक्के एक्केक्कहो जणहो पइं कण्णहो मइं दूसासणहो  
 अब्भिडेवि करेवउ चूरणउं फेडेवउ णाह-विसूरणउं

घत्ता

कड्डिउ जेण चिरु तहो खुडमि सिरु पंचालि-वाल वंधावमि ।  
 पेक्खंतहो जणहो महसूयणहो पहु पिहिवि सयं भुंजावमि ॥ ७

इय रिद्धणेमिचरिए धवलइयासिय-सयंभुएव-कए  
 इक्कासीइमो सगो ॥

## बयासीइमो संधि

कण्णहो वीभच्छु पेक्खंतहो गरुडासणहो ।  
जिह गयहो गइंदु भिडिउ भीमु दूसासणहो ॥

१

[१]

वारुणे आसासण्णए केसरे	एक्क-पहर-सेसिथिए वासरे	
भणइ विओयरु देव जणदण	णर-मुर-कंस-केसि-महु-मदण	
पेक्खु महामइ दुम्मइ कुद्धउ	कुरुव-कुरंग-कुलामिस-लुद्धउ	
जउहरे जलणु जेण देवाविउ	जेण दुरोयर-राउ रमाविउ	४
किउ दोमइहे जेण केस-गहु	अद्धु ण दिण्णु समत्थिउ विग्गहु	
सो पइसरइ जइ-वि रवि-मंडलु	जइ-वि अज्जु रक्खइ आखंडलु	
जमु वइसणु पवणु जोण्हायरु	मरइ तो-वि दुज्जोहण-भायरु	
जइ पडिवण्णउं णउ पडिपालमि	तो ण णियत्तमि पहु ण णिहालमि	८

घत्ता

जइ दिवसु भमंतु	ण खुडिउ सिरु दूसासणहो	
तो पंकयणाह	उप्परि चडमि हुआसणहो ॥	९

[२]

तुहु मि सहोयरु समरे भिडिज्जहो	तावणि-सिर-तामरसु खुडिज्जहो	
जेण कुमारहो धणु-गुणु छिण्णउ	जेण घुडुक्कउ सत्तिए भिण्णउ	
तुहुं हउं जेण-वि रोवाविय	जेण सुहद हिडिंवि रुवाविय(?)	
सो जइ जीविउ अज्जु रणुज्जय	तो पइं काइ-मि ण किउ धणंजय	४
राह ण विद्ध ण खंडउ चारिउ	तालुयवम्म-विंदु ण वियारिउ	
कुरुउ ण रक्खिउ धणु ण णियत्तिउ	सिरु भयवत्तहो खुडेवि ण घत्तिउ	
ण सुआउहु ण सुदक्खिणु घाइउ	णउ अणुविंदु विंदु विणिवाइउ	
विद्धखत्तु विद्विउ ण वासवि	कण्णे जियंतं जियंतं असेस-वि	८

घत्ता

किय णरेण पइज्ज  
तो होसइ भीम

जइ ण णिहउ चंपाहिवइ ।  
महु-वि अज्जु तउ तणिय गइ ॥

९

[३]

एवं भणेवि णरु धाइउ कण्णहो  
जहिं तूरइं समुद-घण-घोसइं  
जहिं पहरणइं सिला-सिय-धारइं  
जहिं णरवइ कड्ढिएहिं किवानेहिं  
संदणेहिं सोवण्णेहिं चक्केहिं  
जहिं अविरलइं महा-धय-छत्तइं  
तहिं रहु वाहिउ पावणि-सूएं  
अहो किव-कण्ण-कलिंग-सुसेणहो

वलिउ भीमु दूसासण-सेण्णहो  
जहिं कुरु-किंकर-सयइं सरोसइं  
सिह-फुलिंग-रवि-किरणागारइं  
जहिं हय मणि-खइयहिं पल्लाणेहिं  
जहिं गइंद वज्जंतेहिं ढक्केहिं  
जहिं णवंति चामरइं चलंतइं  
वलु अवलोइउ णं जम-दूएं  
आसत्थाम-सउणि-विससेणहो

४

८

घत्ता

पच्चारिय सव्व  
महु कोव-हुवासें

जो सक्कइ सो उत्थरउ ।  
लहु दूसासणु पइसरउ ॥

९

[४]

लेहु लेहु आहणहु भणंतेहिं  
छाइउ पहरणेहिं अपमाणेहिं  
छिंदइ ताइं भीमु विहिं हत्थेहिं  
के-वि पाइक्क पिसक्केहिं वारिय  
झंप देवि गयणंगणे होंती  
वीस-तीस-पंचास-विहत्तेहिं  
पडिवउ करणु देवि कु-वि मारइ  
चूरिय दस सहास मायंगहं

वेढिउ कुरु-साहणेहिं अणंतेहिं  
विज्जुल-माला-फुरण-समाणेहिं  
णं जेमइ कयंतु विहिं हत्थेहिं  
के-वि गयासणि-घाएहिं चूरिय  
काह-मि कह-मि करइ समसुत्ती  
पडिवउ रहे आरुहइ णियत्तेहिं  
खगवइ जिह भुवंग संघारइ  
दस जे महाजाणेय-तुरंगहं

४

८

घत्ता

थिय कुरुव णिरास  
वलु दिण्णउं तुज्झु

को-वि ण भीमहो अब्भिडइ ।  
करि कयंत जं आवडइ ॥

९

[५]

कउरव चिंतावंति ण विओयरु  
 एउ अमाणुस-कम्मु ण अण्णहो  
 जं अवसेसु सेण्णु उच्चरियउं  
 पावणि पत्थ-पुट्टि परिपूरइ  
 ता रवि-सुयहो सल्लु दरिसावइ  
 जिह खय-कालु कालु ण पडिच्छइ  
 एहु सो मोट्टियारु कलियारउ  
 णरवइ णिरवसेस परिसेसइ

घत्ता

जिह सक्कहु तेवं  
 छह-घडियहं मज्झे

जिम जमु जिम कु-वि जमहो सहोयरु  
 णासेवि सरणु सच्च गय कण्णहो  
 णर-णाराएहिं तमि-जज्जरियउं  
 जो जो दुक्कइ तं तं चूरइ ४  
 एहु णरु एहु णारायणु आवइ  
 किय पइज्ज पइं हणेवि समिच्छइ  
 वग-हिंडिव-किम्मीर-वियारउ  
 अवुहु व दूसासणु जे गवेसइ ८

[६]

पभणइ अंगराउ मद्दाहिव  
 तिह हउं हणमि असेसइं वूहइं  
 लइय छत्तु ताम भीमज्जुण  
 तहिं रहु वाहि वाहि सुरसुंदर  
 तो जत्तारं चोइउ संदणु  
 जं ण-वि हुवउ ण होइ ण होसइ  
 डहइ दवग्गि व तरु-गिव-कक्खइं  
 सीह-किसोरु व करि संतावइ

घत्ता

जणमेजउ भग्गु  
 सिरु खुडेवि स-वाहु

पंडवेहिं परज्जिय पत्थिव  
 हय-गय-रह-वर-रहिय-समूहइं  
 जहिं सच्चइ-सिहांडि-धट्टज्जुण  
 रणु णियंतु जम-धणय-पुरंदर ४  
 किउ रवि-सुएण घोरु कडमद्दणु  
 रवि व महण्णव-सलिलइं सोसइ  
 गरुडु व गसइ भुवंगम-लक्खइं  
 वइवस-महिसु व हय विहडावइ ८

[७]

खुडिउ सीसु जं मालव-णाहहो  
 सच्चइ स-धणु स-संदणु धाइउ

सच्चइ रण-मुहे वि-रहु किउ ।  
 इंदधम्मु जम-णयरु णिउ ॥ ९

तं फलु दक्खवंतु अवराहहो  
 विससेणहो लहु भायरु घाइउ



## रिद्धणेमिचरिउ

१७२

कण्णं कण्णण किर भिज्जइ  
अवरेहिं तिहिं तावणि रणे ताडिय  
धट्टज्जुण-णंदणु विणिवाइउ  
पंडव-जणु असेसु डोल्लाविउ  
धाउ धाउ धव देहि धणंजय  
णावेवि सुर-वर-धणु सिय-सेवहो

सो-वि ति-खंडु सिंहडें किज्जइ  
तेण-वि चाव-लट्टि तहो पाडिय  
सरु सुअसोम-थणंतरे लाइउ  
णरु णारायणेण वोल्लाविउ  
णं तो मारिय सोमय-सिंजय  
धाइउ सव्वसाइ राहेयहो

४

८

घत्ता

जिह मत्त-गइंद

कहि-मि लवंत(?) -समावडिय ।

कण्णज्जुण वे-वि

सुरहं णियंतहं अब्भिडिय ॥

९

[८]

गय दिवसहो सवाए हरंतए  
भिडिय लिहंत परोप्परु वाणेहिं  
जाउ महंतु महाहउ पत्थहुं  
लद्धवरहं णिवद्ध-तोणीरहं  
कुरुव-णरिंद-जुहिडिल-सत्तहं  
दिण्ण-धणहं विहलभुद्धरणहं  
पूरिउ अंतरिक्खु णाराएहिं  
तेहिं भिडंतेहिं भिण्ण भुवंगम

सुद्ध रउदे मुहुत्ते वहंतए  
छाइउ णहु गिव्वाण-विमाणेहिं  
कालवट्ट-गंडीव-विहत्थहुं  
कंचण-कवयावरिय-सरीरहं  
सेयासहं सिय-चामर-छत्तहं  
मित्त-हियहं परिरक्खिय-सरणहं  
णावइ णाय-णिहेलणु णाएहिं  
धर थरहरिय स-थावर-जंगम

४

८

घत्ता

रवि-पंडु-सुयाहं

णिएवि णिरंतरु वावरणु ।

इंदहो आभिट्टु

रावण-रामहं तणउं रणु ॥

९

[९]

तहिं अवसरे आयामिय-भा  
धट्टज्जुणु सिहींड जणमेजउ  
पंच-वि भिडिय दिवायर-पुत्तहो  
पंच-वि पंचहिं सरेहिं परज्जिय

मज्जे परिट्टिय पंच महारह  
उत्तमोज्जु जुहमण्णु रणुज्जउ  
विसय-मणहो णं अत्त-णियत्तहो  
तिहिं तिहिं किय रहचक्क-विवज्जिय

४

सविस-विसम-विसहर-लल्लकेहिं	हउ सिहांड वारहेहिं पिसकेहिं	
तिहिं जुहमण्णु थणंतरे ताडिउ	उत्तमोज्जु छहिं कह-वि ण पाडिउ	
जाय णिरत्थ णिरुज्जम-चित्ता	भग्ग-रहित्त णां णाइत्ता	
सिणि-णंदणेण धरिय साओहण	किव-किववम्म-कण्ण-दुज्जोहण	८

घत्ता

वल-विक्रमवंत	वड्ढिय कोह-हुवासणहो ।	
गउ तेत्तहे भीमु	जेत्तहे रहु दूसासणहो ॥	९

[१०]

दिट्ठु विओयरेण दूसासणु	णं णहणंघण-घणेहिं हुआसणु	
णं विणया-णंदणेण भुअंगमु	+++++	
णं छण-गहवइ गहकल्लोलें	णं महि-वलउ जुयक्खय-कालें	
णं तंवेरमु सीह-किसोरें	रहवरु वाहि वाहि लइ ओरें	४
जं विसु दिण्णु चिण्णु तं भंडणु	जं जउहरु तं गोत्तहो खंडणु	
कवड दुरोयर जे संचारिय	ते गंगेय-दोण वइसारिय	
दोवइ-केस सिलीमुह हूआ	वसण-किलेस जाय जम-दूआ	
पंच गाम जे कक्खहं छुद्धा	पंच-वि लोयपाल जिवं कुद्धा	८

घत्ता

दूसासण थाहि	हउं सो भीमु समावडिउ ।	
कुलगिरि-सिहराहं	उप्परि वज्ज-दंडु पडिउ ॥	९

[११]

तो कुरु-णंदणेण वोल्लविउ	तुहुं जे भीमु भणु कांइ ण पाविउ	
तुहुं जे भीमु विस-घाणिए धारिउ	तुहुं जे भीमु गंगहे पइसारिउ	
तुहुं जे भीमु णासेवि गउ जउहरे	तुहुं जे भीमु णिम्महु दउरोयरे	
तुहुं जे भीमु पंचालि-पराहवे	तुहुं जे भीमु हउं मारमि आहवे	४
हउं दूसासणु मूलु अणत्थहं	कालु कयंत-मित्तु तउ पत्थहं	
दोमइ दासि संढ-तिल पंडव	सीहहो भग्ग सोंड वेयंड व	

कहिं णासहु महु कमवहे पाडिय  
को सहएउ णउलु को अज्जुणु

सयल-वि करमि सिलीमुह-झाडिय  
को तुहुं कवणु राउ को तहो गुणु

घत्ता

रणंगणहो मज्जे  
कुरु-केसरि-विंदे

तं वोल्लिज्जइ जं सरइ ।  
पंडव-हरिणु किं पइसरइ ॥

९

[१२]

धाइउ तो स-कसाउ विओयरु  
अज्जु महा पइज्ज परिपुज्जउ  
सिद्धु कज्जु लइ अच्छइ थोडउं  
वाण-पंति वच्छत्थलु भिंदउ  
आमिसु णेंतु विहंगम उप्परि  
डहउ हड्ड-विछड्डु हुवासणु  
तो पंडवेण पिसक्केहिं छाइउ  
किव-कियवम्म-कलिंगहं अक्खहि

णच्चइ थियउ दूरु दामोयरु  
धम्म-पुत्तु कुरु-जंगलु भुंजउ  
वद्धउ जण्णसेणि आमोडउं  
असिवरु णिसिय-धारु सिरु छिंदउ  
सेणिउ पियउ हिंडिंवा-सुंदरि  
किर चिंतवइ एम गरुडासणु  
कहिं दूसासणु जाहि अघाइउ  
जिवं दुज्जोहणु जिवं तुहुं रक्खहि

४

८

घत्ता

दरिसावमि अज्जु  
रण-देवय-मूले

सव्वहं दुण्णय-दुमय-फलु ।  
थवमि तुहारउ सिर-कमलु ॥

९

[१३]

कहि कहि धायरद्ध परमत्थें  
तो जुयराउ वुत्तु जुयराएं  
एहु जे पंडव-परिहवगारउ  
एहु जे मयगय-गलगल-थक्कणु  
एहु जे कामिणि-घण-थण-चड्डणु  
एहु जे कंचण-वलयालंकिउ  
एहु जे दिण्ण-दाणु सुह-लक्खणु  
एहु जे सुरवर-करि-कर-दीहरु

कड्डिय जण्णसेणि कें हत्थें  
दोवइ करेणायड्डिय आएं  
एहु जे विहल-जण्णभुद्धारउ  
एहु जे अलमल-पर-वल-पेळ्ळणु  
एहु जे दुम्मुह-मुह-ओमड्डणु  
एहु जे णरवर-घाय-किणंकिउ  
एहु जे सरणाइगय-परिरक्खणु  
एहु जे पंच-फणामणि विसहरु

४

८

घत्ता

विसु दिण्णउं जेण जेण दुरोयरु घिविय चिरु ।  
सो इहु करु भीम जेण खुडेव्वउं तुज्ज सिरु ॥ ९

[१४]

एम चवंत भिडिय समरंगणे अमर णिहाला थिय गयणंगणे  
थरहरंति रहवेण रहंगहं फुडुहरंति णासउड तुरंगहं  
तूरइं हयइं विहि-मि दुक्कंतहं चावइं करयरंति कड्ढंतहं  
सर-सहसइं वियंति संधंतहं गुणु छणछणछणंति विंधंतहं ४  
छत्तइं कडयडंति छिज्जंतहं कवयइं खयहो जंति भिज्जंतहं  
चिंधइं फरहरंति दुव्वाएं छाइउ णहु णाराय-णिहाएं  
अवरोहिं रण महि-मंडलु मंडिउ सेस भडेहिं पहेरेवउं छंडिउ

घत्ता

पर एत्तिउ दोसु रणु पेक्खंतहं पत्थिवहं ।  
जं अणिमिस-दिट्ठि देवे ण किय णराहिवहं ॥ ८

[१५]

ताम विओयरेण सर-ताडिउ खंडइं विण्णि करेवि धणु पाडिउ  
दु-गुणु ति-गुणु चउ-गुणु गुणु ताडिउ दिण्णउ मग्गणाहं दुइ कोडिउ  
एवंहिं णिट्ठियत्थु रणे भग्गउ किह जीवमि दूसासणे लग्गउ  
तो वरि करमि एत्थु सण्णासणु एम भणेवि जं पडिउ सरासणु ४  
खुडिउ खुरेण सीसु जत्तारहो णं फलु तल-तरुवरहो असारहो  
छिण्णु महद्धउ खंडिउ संदणु उरे वारहहिं विद्धु कुरु-णंदणु  
तेण वि अवर पवरु धणु लेप्पिणु अवरु महारहु अहिमुहु देप्पिणु  
भिण्णु विओयरु णवहिं पिसक्केहिं पुणु तीसहिं भुवंग-लल्लक्केहिं ८

घत्ता

छहिं सारहि विद्धु सत्तहिं विद्धु हिडिंव-वरु ।  
सइं पावइ दुक्खु जो दूसासणे लग्गु णरु ॥ ९

[१६]

तो सहसत्ति सत्ति उप्पाडेवि  
 मेल्लिय लउडि हिडिंवा-कतें  
 णं सउदामिणि मेहहो होंती  
 तिह स-तुरंगु स-चिंधु स-चामरु  
 धायरद्धु घुम्माविउ घाएं  
 पंडु-सुएण-वि तहो करवालें  
 पाडिउ कउरव-जणहो णियंतहो  
 तो भुव वे-वि भीम-उप्पाडिय  
 रेहहिं णह-सुमणस णहे लग्गा  
 अवरु को-वि जो पर-तिय गंजइ  
 कुरु-वल्तु णद्धु मुएवि आओहणु

भीम-भुयंग-भुएहिं भमाडेवि  
 जीह ललाविय णाइं कयंतें  
 धाइय महिहर-सिहरु दलंती  
 भीम-गयए संचूरिउ रहवरु  
 कड्डिउ मंडलगु स-कसाएं  
 सिरु स-वाहु कमलु व सहुं णालें  
 पंडव-लोयहो तूरइं दिंतहो  
 पंचवीस जोयण ओरालिय  
 णं तरु-साह दुवाएहिं भग्गा  
 सो दूसासणु जिम फलु भुंजइ  
 पहउ करेण सक्खि दुज्जोहणु

४

८

घत्ता

रक्खसु जिह भीमु  
 संइ भुय-जुयलेण

सीसु लेवि दूसासणहो ।  
 दरिसावइ गरुडासणहो ॥

१२

इय रिद्धणेमिचरिए धवलइयासिय-सयंभुएव-कए  
 बयासीइमो सग्गो ॥

## तेयासीइमो संधि

दूसासणे णिहए भीमहो विजए जगे दिण्ण जसोह-पहेणहो ।  
तिणसमु गणेवि रिउ तं कण्ण-किउ आभिड्डु पत्थु विससेणहो ॥ १

[१]

पर-वलइं पणच्चिय तंडवेहिं	जय-तूरइं दिण्णइं पंडवेहिं	
पंचालिहे चिहुर-णिवंधु जाउ	गउ परम-विसायहो कुरुव-राउ	
हा भायरु महु सिरे पडिउ वज्जु	वद्धाविय किं गंधारि अज्जु	
धयरड्डहो जोइउ वयणु केम	थिय णिहुय णराहिव संढ जेम	४
आसंकिउ णियय-मणेण कण्णु	मुह-कमलु परिड्डिउ मसि-सवण्णु	
अम्हारिसाह-मि एहिय अवत्थ	भीमज्जुण जगु जगडण समत्थ	
वोल्लाविउ सल्ले तहिं जि काले	दुज्जोहणु णिवाडिउ मोह-जाले	
तिह करि जिह पंडव खयहो जंति	णिय-वंधव-सयणहं होइ संति	८

घत्ता

परिचिंतिउ मणेण रवि-णंदणेण	कहिं तणिय संति कुरु-सत्थहो ।	
भीमहो भीमत्थाणु गय(?)	गंडीवु जाम करे पत्थहो ॥	९

[२]

तहिं तेहए अवसरे ण किउ खेउ	वोल्लाविउ भीमें वासुएउ	
रिणु फिट्ठु भडारा एक्क पवरु	अच्छइ दुज्जोहणु पासे अवरु	
फेडेवउ तमि तहो तणए अंगे	कल्लए दरिसाविए मउड-भंगे	
वड्डंतए तहिं तेहए पमाणे	पाइक्कए सयले पलायमाणे	४
जुहमण्णु पधाइउ मग-लग्गु	सामरिसु स-पहरणु रह-वलग्गु	
पर-कुंजर-जूहहो जिह करेणु	जहिं कण्णहो भायरु चित्तसेणु	
ते दुक्क परोप्परु घाय देंत	णिय-णिय-पहु-णामगहणु लेंत	
जुहमण्णे सत्त सरेहिं विड्डु	रवि-सुएण-वि सो विहिं परिणिसिद्धु	८

घत्ता

पंडव-किंकरेण छिंदेवि सरेण सिरु पाडिउ फलु जिह णीमहो ।  
ताम समावडियरणे अब्भिडिय धयरड्ड-पुत्त दस भीमहो ॥ ९

[३]

दुज्जोहण-भायर दस कुमार	जलसंधण-गहणं-दंडधार	
णीसंगिय-लोलुय-सव्वसंध	छ-वि केसरि-विक्रम वसह-खंध	
छ-वि सव्वाहरण-विहूसियंग	छ-वि सेय-महारह सिय-तुरंग	
दुइ सुरवर-करि-कर-वाहु-दंड	पासाउह-कवय-महापयंड	४
दुइ अवर सुवच्चस-व्वाउवेय	दस भायर गंधारेय एय	
णं सग्गहो णिवाडिय सुर-कुमार	स-सरासण सरेहिं कियंधयार	
दस लोयवाल णं कहो-वि कुद्ध	णं सीहें दस-वि गयंद रुद्ध	
भीमेण भुअंगम-भीयेरेहिं	दस दसहिं वियारिय सरवरेहिं	८

घत्ता

तोडेवि दक्खवइ पडिवउ खिवइ रह-सिहरे पवड्ढिय-दुक्खहो ।  
लइ सीसुप्पलइं आयइं फलइं दुज्जोहण-दुण्णय-रुक्खहो ॥ ९

[४]

पेक्खेप्पिणु भीसणु पवण-जाउ	आसंकिउ णिय-मणि अंगराउ	
लक्खिज्जइ भीमहो चरिउ घोरु	पवियंभिउ णं केसरि-किसोरु	
पोच्छाहिउ(?) सल्लें सू-पुत्तु	चंपाहिउ तउ संकेवि ण जुत्तु	
भायर-वह-भय-भग्गाणुराउ	पइं संथविएवउ कुरुव-राउ	४
हउं णिरिणु णराहिव-गउरवाहं	तुहुं एक्कु धुरंधरु कउरवाहं	
भिडु पत्थहो पंडव खयहो णेहि	कुरु-णाहहो वसुमइ जेण देहि	
जइ जीवहि तो जय-लच्छि होइ	अह मरहि णं सुर-वहु धरइ कोइ	
दुज्जोहण दोण-सुयहो समक्खु	णिय-पुत्तु भिडंतउ पेक्खु पेक्खु	८

घत्ता

तहिं अवसरे समरु तोसिय अमरु किउ भीमसेण-विससेणेहिं ।  
पाएहिं पयरुहेहिं पक्खाउहेहिं णं पहउ परोप्परु सेण्णेहिं ॥ ९

[५]

वटंतए तेहए समर-काले  
 रहु वाहिउ णउले कुद्धएण  
 कण्णियहिं पडिच्छिउ कण्ण-पुत्तु  
 अवरणेण सरासणु किउ दु-खंडु  
 तो दिणयर-णंदण-णंदणेण  
 सर-सप्पेहिं खाविय वर-तुरंग  
 रहु मुएवि स-चम्मु स-मंडलगु  
 पर-पक्खिय-गय-पयरक्खणु

विससेण-भीमसेणंतराले  
 रण-रामालिंगण-लुद्धएण  
 धउ छिण्णु खुरुप्पे थरहरंतु  
 अवरणेण विहंजिउ छत्त-दंडु  
 धणु अवरु लेवि रिउ-मद्दणेण  
 कलहोय-जाल-मालालि-अंग  
 सहएव-जेड्डु पहरणहं लग्गु  
 हय ताम जाम दुइ सहस पुण्णु

४

८

घत्ता

असिवर-पहरणहो एकहो जणहो बहु रह करि जोह तुरंगम ।  
 के-वि मुय के-वि पणय के-वि कहि-मि गय णं गरुडहो भएण भुवंगम ॥९

[६]

संचूरिउ किंकर-णर-णिहाउ  
 मदी-सुउ अट्टारहहिं विद्धु  
 परिपिहिउ जेण सर-मंडवेण  
 विससेणे खंडिउ चम्म-रयणु  
 छहिं असिवरु तिहिं वच्छयलु भिण्णु  
 गउ भज्जेवि भीमहो रहे वलग्गु  
 अहो अज्जुणु खंडव-डहण वीर  
 ओहु वइरिउ अच्छइ कण्ण-पुत्तु

तं रविसुय-सुयहो कसाउ जाउ  
 पडिवारउ बहु-वाणेहिं णिसिद्धु  
 सो छिण्णु किवाणे पंडवेण  
 णं पाडिउ रण-रक्खसहो वयणु  
 विहलंघलु स-कवय-वलय-खिण्णु  
 उद्धाणणु पुक्कारणहं लग्गु  
 सुरवर-सर-सय-सीरिय-सरीर  
 जिह सक्कहि तिह मारहि णिरुत्तु

४

८

घत्ता

वप्पे जसु तणेण पिसुणत्तणेण गुणु छिण्णु आसि तव तोयहो ।  
 हउ-मि हयासु किउ हणु जेण जिउ पेक्खंतहो कउरव-लोयहो ॥ ९

[७]

तं णिसुणेवि परम-परोवयारि  
 सुर-कुंडल-मंडिय-गंडवासु

धीरंतु पत्तु गंडीव-धारि  
 चूडामणि-किरण-करालियासु



## रिद्धणे मिचरिउ

१८०

मुहमारुय-पूरिय-देवयत्तु	छण-चंद-रुंद-धवलायवत्तु	
वाहिय-रहु जमलीकिय-अणंतु	सेयासु कइद्धउ कुरुव-कंतु	४
पेक्खेप्पिणु णउल्लु समाहयासु	गउ कोवहो तालुयवम्म-णासु	
विससेणहो धाइउ सब्बसाइ	मुक्कंसु गयहो गइंदु णाई	
परिवारिउ दोमइ-णंदणेहिं	सिणि-दुमयंगरुह-जणदणेहिं	
जउ-जमल-भीम-जणमेजएहिं	मच्छाहिव-सोमय-सिंजएहिं	८

घत्ता

जाउ महंतु रणु	परिकुविय-मणु	जिह केसरि मत्त-गइंदहं।	
सउणिय-किंकरेहिं	पहरण-करेहिं	दुज्जोहणु भीडिउ कुणिंदहं ॥	९

[८]

पहिलारउ तहिं घाइउ किवेण	वीयउ कियवम्म-णराहिवेण	
तइयउ गुरु-सुएण धणुद्धरेण	सयमेव चउत्थउ कुरुवरेण	
पंचमउ वियारिउ सउवलेण	अवरेहिं अवरु जिउ वलु वलेण	
विणिवाइय सब्ब कुणिंद तेहिं	कुरुवाहिव-पमुहेहिं कउरवेहिं	४
अण्णेत्तहे किय-कडमदूणेण	सउहत्थेहिं णउल्लहो णंदणेण	
वइसारिउ महियले मग्गणेहिं	णं घणउल्लु पवणालग्गणेहिं	
अण्णेत्तहे सच्चइ सच्चवंतु	परिसक्खइ पर-वले जह कयंतु	
अण्णेत्तहे कुरुहुं-वि खुद तोय	णं भिडिय गइंदहं सीह-पोय	८

घत्ता

तेण भयावहेहिं	वाहिय-रहेहिं	जय-विजय-विवद्धिय-कोहेहिं ।	
किव-कियवम्म जिय	रणे वि-रह किय	अवमाण-वाण-संदोहेहिं ॥	९

[९]

जें मुक्का सुअवइ-खंडिएहिं	ते गउतम-णंदण-भदिएहिं	
विणिहय कालायस-सरवरेहिं	दिवसयर-किरण णं जलहरेहिं	
विजयेण वि हय हय जायवासु	जायवेण वि पाडिउ सीसु तासु	
मणि-कुंडल-मंडिय-मउड-धारि	सुर-गिरि-वर-सिहर-महाणुकारि	४

दियवरेण-वि छिज्जइ जयहो सीसु दडोड्ड-समुब्भइ भिउडि-भीसु  
 तहिं काले रणंगणे दुज्जएण वोल्लाविउ कण्णु धणंजएण  
 खल खुद्द पिसुण हय दुड्ड-भाव अहिमण्णहो जिह गुणु छिण्णु पाव  
 परिरक्खहि तिह अप्पणउ पुत्तु विससेणु हणेवउ मइं गिरुत्तु ८

घत्ता

जं केस-ग्गहणु किउ गो-ग्गहणु सत्तिए विणिभिण्णु घुडुक्कउ ।  
 णं फलु दक्खवइ सोणिउ धिवइ जमकाउ करोडिहि दुक्कउ ॥ ९

[१०]

तो पढम-पत्थु पत्थहो पलित्तु णं चित्तभाणु धिय-घडए सित्तु  
 णिहुयारउ अच्छहि दुब्बियड्ड वोल्लंतु पलज्जहि किं ण संढ  
 कड्डिज्जइ दोमइ दासि जेम पिय-परिहउ सुपुरिसु सहइ केम  
 उत्थरेवि ण सक्किउ तहिं जे काले एवंहिं गज्जिएण कियंत-काले ४  
 किय णउल-विओयर सावलेव धणु-कोडिए रल्लिय रोड जेवं  
 सहएउ समुक्खय-मंडलागु समरंगणे मइं सह एउ भग्गु  
 दुल्लेउ अलेउ अजायसत्तु कह कह व ण णिहणावत्थ पत्तु  
 रहु खंडिउ साउहु सायवत्तु गउ णिय घरु ल्हसिविय दीण-सत्तु ८

घत्ता

तुम्हेहिं संढ-तिल महुमहु-महिल अवरेहि-मि हासउ दिज्जइ ।  
 महु पेक्खंतहो रिउ खंतहो विससेणु केण जोहिज्जइ ॥ ९

[११]

दुद्धरिसहुं धुणिय-धणु-गुणाहं आलाव जाय कण्णुज्जलाहं  
 विससेणु ताम सहं रहवरेण उच्छेहोहामिय-महिहरेण  
 चल-चक्कवाल-चालिय-धरेण पहरण-गण-भरियब्भंतरेण  
 तोरविय-तुरंगम-पडिछडेण दुप्पवण-पणोल्लिय-धयवडेण ४  
 धय-मालालिंणिय-णहयलेण वित्थाराऊरिय-महियलेण  
 पारसव-पुंज-परिपिंजरेण धवलायवत्त-जिय-ससहरेण

## रिद्धणेमिचरिउ

१८२

रहवरेण तेण थिउ अंतराले

कहिं गम्मइ दुम्मय समर-काले

तुहं अज्जुणु हउं सो कण्ण-पुत्तु

आरोडिउ पइं केसरि पसत्तु

घत्ता

थाहि थाहि समरे

गंडीव-धरे

जालंधरेहिं हेवाइउ ।

एम चवंतएण

वंधंतएण(?)

सर-सएण धणंजउ छाइउ ॥

९

[१२]

पडिवारउ दसहिं महासरेहिं

भूय-मूले खड्दु णं विसहरेहिं

चामीयर-वाणर-रूव-विद्धु

धउ तिहिं वारह कण्णेहिं विद्धु

धणु एक्कें विहिं वे रहवरंग

छहिं सारहि चउहिं चउ तुरंग

तिहिं भीमु णउलु सत्तहिं सरेहिं

धट्टज्जुणु अट्टहिं तोमरेहिं

४

वारहहिं जणदणु तिहिं सिंहंडि

पंचहिं पंचहिं पंचालि दंडि

पेक्खंतहो कण्णहो पंडवेण

विससेणु पिहिउ सर-मंडवेण

धउ धणुवरु सरवर-वरिसु छिण्णु

जत्तारु तुरंग-चउक्कु भिण्णु

सण्णाहु वियारिउ वणिउ अंगु

स-किरीडि स-कुंडलु उत्तमंगु

८

घत्ता

खुडिउ धणंजएण

रणे दुज्जएण

परिओसु देंतु आखंडले ।

णाइं महारहहो

णिवाडिउ णहहो

रवि-विंवु सयं भू-मंडले ॥

९

इय रिद्धणेमिचरिए धवलइयासिय-सयंभुएव-कए

तेयासीइमो सगो ॥

## चउरासीइमो संधि

विससेणे समत्तए

कण्णज्जुण भिडिय परोप्परु

करिवर-कर कइंद-धय ।

णाइं णिरंकुस मत्त गय ॥

१

[१]

मंदर-सिहर-समप्पह-संदण

कालवट्ट-गंडीव-धणुधर

पंडुर-पंडरीय सिय-चामर

विज्जु-पुंज-घण-पुंज-समप्पहं

कास-कुसुम-संकास तुरंगम

रहवर-चक्क-घोर-चूरिय-फणि

तोसिय दससयंसु-सक्कंदण

तूरइं अप्फालियइं पगामइं

भिडिय पयंग-पुरंदर-णंदण

पढम-चउत्थ-पत्थ रणे दुद्धर

पक्खवाय-वे-भाय-कियायर

सुरवर-सुंदर अजय महप्पहं

+++++

मउड-मउहोहामिय-दियमणि

धीरिय-धायरट्ट-तवणंदण

दुंदुहि-गोमुह-डंवर-णामइं

४

८

घत्ता

ओयइं अवरइ-मि रणंगणे

जल-थल-णहयल वंभंड णइं

देवावियइं पभूयाइं ।

णं सयखंडीहूयाइं ॥

९

[२]

गोवद्ध-गोहंगुली-ताण-हत्थेहिं

पच्छाइयं अंवरं वाण-लक्खेहिं

णाराय-णालीय-वाराह-कण्णेहिं

वे-भाय जायं जयं पक्ख-वाणेहिं

सव्वेहिं वेयड्ड-सेणी-णिवासेहिं

कण्णाविदंगोहिं उब्भिट्ट तक्खेहिं

दुदाणवाइच्च-आइच्च-भिच्चेहिं

आभिट्टमाणेहिं राहेय-पत्थेहिं

साणा-सिअग्गेहिं सोवण्ण-पुंखेहिं

अण्णणवेहिं अण्णण्ण-वण्णेहिं

+++++

सव्वंसहा-सिंधु-सेलंवरसेहिं

वेयाल-भूयग्गही-जक्ख-रक्खेहिं

कालि-महकालि-दुग्गा-दइच्चेहिं

४

घत्ता

तिहुयणहो मज्झे सिद्धारेण  
णिय-णिय-वाहणेहिं चडेप्पिणु

जे जे उत्तम वेस किय ।  
ते ते पत्थहो पासे थिय ॥

८

[३]

अहम-वण्ण चामीयर-वण्णहो  
विजउ पत्थु पंडव परिओसिय  
भिडिय वे-वि रणु जाउ भयंकरु  
णं विस-गब्धिणि-भीम-भुवंगहं  
णं गोवइहिं विसम-मय-सिंगहं  
णं णव-घणहं घोर-णिघोसहं  
सारहि संचरंति मग्गमं  
तोसिय पंडव कुरुव-विमदें  
रह-णरवर-गय फोडेवि घाएहिं

सयल-वि पासे परिद्धिय कण्णहो  
कण्णहो कुरुवेहिं संति पघोसिय  
णं गह-घट्टणे गहहं परोप्परु  
णं गज्जंतहं मत्त-मायंगहं  
णं केसरिहिं णहर-पडिलगहं  
णं सरहहं सरहस-सरोसहं  
रह समंति रह-मंडल-मग्गं  
किंपि ण सुव्वइ छण-छण-सदें  
विण्णि-वि पोमाइय विहिं राएहिं

४

८

घत्ता

कण्णजुण्ण-वाण-णिवाएहिं  
ओसरियइं सुरवर सयल णहे

भिण्णइं विण्णि-वि साहणइं ।  
वण-वियणाउर-वाणाइं ॥

९

[४]

भिण्णइं वाणेहिं सुरवर-सेण्णइं  
वार वार दिण्णइं वाइत्तइं  
वार वार परिवड्ढिय-कलयलु  
वार वार सर-जज्जरियावणि  
वार वार कुरु-पंडव-सेण्णइं  
वार वार रवि रहवरु खंचइ  
वार वार उट्टइ कडमद्दणु  
वार वार णाराय-सहोसेहिं

णट्टइं णहयले मणे आदण्णइं  
मंदिर-सयइं ससायरे धित्तइं  
वार वार छाइज्जइ णहयलु  
वार वार भिज्जंति महाफणि  
पुलउ वहंति होति मसिवण्णइं  
वार वार देवरिसि पणच्चइ  
वार वार किलिकिलइ जणद्दणु  
रुहिरइं उच्छलंति चउ-पासेहिं

४

८

वार वार भिण्णइं धय-छत्तइं

पज्झरंति कण्णज्जुण गज्जइं

घत्ता

रणे कालवट्ट-गंडीवहं

मंडलि दिंतहं सर-सयइं ।

णं चंद-सूर परिपेसहं

किरणइं वाहिरे णिग्गयइं ॥

१०

[५]

कुंडल-जुवलालंकिय-कण्णे

णिय-सारहि वोल्लाविउ कण्णे

जइ हउं मरमि किरीडीहे हत्थे

तो तुहुं काइं करहि परमत्थे

वुच्चइ अंगराउ जत्तारे

जइ मुउ कह-वि खुरुप्प-पहारे

तो सिणि-णयणाणंदुप्पायण

मारमि विण्णि-वि णर-णारायण

४

वसुह समप्पमि कुरुव-णरिंदहो

पंडव जंतु णयरु गोविंदहो

कालिय-कंस-केसि-वल-मद्दणु

वोल्लाविउ अज्जुणेण जणद्दणु

जइ हउं णिहउ वियत्तण-चावे

तो तुहुं काइं करहि सब्भावें

परमासीस दिण्ण सुर-मदे

णंद वद्ध जय जय जय सदे

८

घत्ता

अजरामरु होहि धणंजय

महु जीविण-वि जियहि फुडु ।

कहु कण्णु जाइ सहं सल्लेण

मइं पहरंतउ पेक्खु छुडु ॥

९

[६]

एम चवंत कुंति-कुल-दीवा

कण्णज्जुण अब्भिट्ट पडीवा

अंतरु कहि-मि ण दीसइ वाणहं

जाउ विवाउ गयणे गिव्वाणहं

कउरव-पक्खिएहिं आइट्टउ

जोइसु जोइस-चक्के गविट्टउ

चंद-सूर-तारा-वलु जेत्तहे

वद्धावणउं रणंगणे तेत्तहे

४

पंडव-पक्खिएहिं किउ कलयलु

तुम्हहं कह उप्पण्णउं केवलु

तारा-चंद वलइं जइ वासरे

कहिं गय तो पहरहए अवसरे

जइ आइच्चहो वलु अत्थंतहो

तो णंदणहो समरे पहरंतहो

काइं अकारणे करहो पसंसउ

जेत्थु कण्णु जउ तेत्थु ण संसउ

८

घत्ता

एत्थंतरे आसत्थमेण

लहेवि सारु आओहणहो ।

करि अज्जु-वि संधि पयत्तेण

दिण्ण बुद्धि दुज्जोहणहो ॥

९

[७]

पुणु पुणु दोण-पुत्तु आहासइ

अज्जु-वि कुरुवइ कज्जु ण णासइ

अज्जु-वि ते तुरंग ते गयवर

अज्जु-वि आण-पडिच्छा णरवर

अज्जु-वि णउ मुच्चहि पाइक्केहिं

अज्जु-वि सयल णराहिव-चक्केहिं

अज्जु-वि कामिणि-सत्थु स-णेउरु

अज्जु-वि अच्छर-सम अंतेउरु

४

अज्जु-वि सायवत्तु सीहासणु

अज्जु-वि णिरुवमु चामर-वासणु

अज्जु-वि रसमसंति वाइत्तइं

अज्जु-वि वीरहं धीरइं चित्तइं

अज्जु-वि तुहुं जे राउ कुरु-लोयहो

देहि धरित्ति-अद्धु तव-तोयहो

सिरि ताडिउ णरिंदु णं वज्जे

बंधव-विरहिण्ण किं रज्जे

८

घत्ता

पहरंतु वे-वि समरंगणे

जिणउ पत्थु जिह आहिरहि ।

आवणीहोउ विहाणए

जिवं महु जिवं तव-सुयहो महि ॥

९

[८]

तो कण्णज्जुण्णेहिं फुरमाणेहिं

विद्धु परोप्परु तिहिं तिहिं वाणेहिं

पुणु सत्तहिं सत्तहिं णाराएहिं

छंडिउ रणु कुरु-पंडव-राएहिं

पेक्खा सव्व जाय तहिं अवसरे

सुर आसण्ण परिट्टिय अंतरे

खंडव-डामरेण धणु-हत्थे

सरु अगेउ विसज्जिउ पत्थे

४

धाइउ जाला-माल-भयंकरु

रह-धय-चामर-छत्त-खयंकरु

वारुणत्थु रवि-सुएण विसज्जिउ

वायवेण तं सरेण परज्जिउ

पुणु पडिवारउ लइउ णवल्लेहिं

तीरिय-तोमर-कण्णिय-भल्लेहिं

वच्छदंत-वइहत्थिय-खुंदेहिं

अवरेहि-मि अच्छंत-रउदेहिं

८

घत्ता

वाणासणि कहि-मि ण माइय

छाइउ सहं णहयलेण रवि ।

जिह दुम्मइ कुल-वहु कण्णहो

वाणासणि रण-मुहे लग्ग ण-वि ॥ ९

९

[९]

तहिं अवसरे परिवद्धिय-गउरव	तूरइं हयइं पणच्चिय कउरव	
ल्हसिउ वइरि पइं जिउ आओहणु	पहरु पहरु पभणइ दुज्जोहणु	
तो रवि-णंदणेण सर पेसिय	णरेण-वि गिरवसेस णीसेसिय	
करु करेण अप्फालइ पावणि	अज्ज-वि जियइ धणंजय तावणि	४
पहरु पहरु केत्तिउ पडिवालहि	हरि विद्वाणउ किण्ण णिहालहि	
विस-जउ-जलण-जूय-केस-गह	वण-विहि-दाहिण-उत्तर-गो-गह	
दिण्ण ण पंचगाम तं संभरु	णं तो आयहो थामहो ओसरु	
हउं पंडवहं मणोरह पूरमि	कण्ण-गयासणि घाएं चूरमि	८

घत्ता

एवहि-मि करमि एकंतरु	पेक्खंतहो सव्वहो जणहो ।	
दुज्जोहण-मउडु मलेप्पिणु	देमि रज्जु तव-णंदणहो ॥	९

[१०]

जिह हय राह सयंवर-मंडवे	चारिउ चित्तभाणु जिह खंडवे	
जिह जिय तालुयवम्म धणुद्धर	जिह विद्विय सयल जालंधर	
जिह सियवत्त-जयद्दह-अंतरे	चूरिय भूमिपाल वहु संगरे	
तिह वावरु एवंहिं जे धणंजय	मं उपेक्खहि सोमय-सिंजय	४
कइकय-कासिराय-मच्छाहिव	अवर-वि कण्ण सराहय पत्थिव	
हणु हणु महुमाहवेण-वि वुच्चइ	अज्जुणु वइरि जियंतु ण मुच्चइ	
देहावरणु स-देहउ भिंदहि	जाम ण हणइ ताम सिरु छिंदहि	
हरि उदेसिएण लहु-हत्थें	आसुग-सहसु विसज्जिउ पत्थें	८

घत्ता

रणे चंपापुर-परमेसरु	दीसइ सव्व-सरावरिउ ।	
णं असुर-मंति अत्थंतउ	दिणयर-किरणेहिं पइसरिउ ॥	९



[११]

भग्गवत्थु रवि-सुएण विसज्जिउ	तेण सिलीमुह-जालु परज्जिउ	
सत्त सरइं संतावइ तावणि	तिण्णि-वि णर-णारायण-पावणि	
विलिहिय तिहिं तिहिं सरेहिं थणंतरे	कुविउ किरीडि मालि तहिं अवसरे	
दसहिं पिसक्केहिं णिहउ सहावइ	खुडिउ सीसु तालहो फलु णावइ	४
सल्लु चउहिं कण्णु तिहिं ताडिउ	धउ अवरेण कह-वि णउ पाडिउ	
छाइउ अंगराउ पडिवारउ	णं दुक्कमेहिं दुक्कियगारउ	
णर-कर-पेसिएण वंभत्थे	स-उरगु जगु जगडणहं समत्थे	
दस-गुण-सहसुप्पाइउ वाणहं	विप्फुरंत-णक्खत्त-समाणहं	८

घत्ता

चउ-सयइं मत्त-मायंगहं	दस सहस पवर-तुरंगमहं ।	
रह अट्टसट्ठि सय जोहहं	किय आहार विहंगमहं ॥	९

[१२]

जिह णरेण सामंत महिंजय	तिह रवि-सुएण णिहय वहु सिंजय	
वहु पंचाल मच्छ वहु सोमय	कासि-करुस-चेइव वहु कइकय	
कालवट्ट-वल्लरिय वियंभिय	णरवर-मुक्क सरासण थंभिय	
गुणु गज्जंतु छिण्णु गंडीवहो	पच्छइं कासु जाइ धणु जीवहो	४
वइहत्थिय-सएण हउ अज्जुणु	सट्ठिहिं सिल-धोएहिं अणज्जुणु	
जावरु लेवि सरासणु सज्जिउ	जिणेवि समत्थु महत्थु विसज्जिउ	
तेण-वि एतें णहयलु छाइउ	कण्णहो हत्थ-ताणु दोहाइउ	
पहर-विदुक्खिय कुरुव रणंगणे	पक्खि-वि संचरंति ण णहंगणे	८

घत्ता

वारहहिं दसहिं पुणु सत्तहिं	संसय-भावि चडावियउ ।	
वहु मग्गण धणु ण पहुच्चइ	तेण णाइं चिंतावियउ ॥	९

[१३]

तिहिं कण्णेण धणंजउ ताडिउ	पंचहिं हरि-सण्णाहु विहाडिउ	
तो णरेण अवेहिं पिसक्केहिं	जलण-जाल-माला-लल्लक्केहिं	
मोहिउ सयलु सेण्णु गय कउरव	सर-मोक्खेण थक्क-णिय-गउरव	
पेक्खंतहं सुर-किण्णर-जक्खहं	घाइय विण्णि सहस पयरक्खहं	४
पर उव्वरिउ दिवायर-णंदणु	स-धणु स-वाणु स-तोणु स-संदणु	
चेयण लहेवि अणेय-पमाणेहिं	विद्धु किरीडि थणंतरे वाणेहिं	
एम परोप्परु समरु पढुक्कउ	सर-जालोलिहिं सव्वु झुलुक्किउ	
दिसउ वलंति णहंगणु तप्पइ	गिरि कणंति महि-मंडलु कंपइ	८

घत्ता

पर सव्वहो जणहो णियंतहो	णयणइं थियइं परिट्टियइं ।	
सय वार वार मेळंतयहं	देवहं कुसुमइं णिट्टियइं ॥	९

[१४]

ताम फणिंद-फुरंत-फणावलि	आइय चंडवेय-अद्दावलि	
वेण्णि-वि वाणमएहिं सरीरेहिं	थिप्पइ सरेवि कण्ण-तोणीरेहिं	
तेण-वि लइय अणेय भुवंगम	जाणिय महुमहेण उरजंगम	
णिय-सम्भाउ कहिज्जइ मंडवे	जे पणट्ट डज्जंतए खंडवे	४
तो पच्छण्ण होवि अणुवंधे	आइय पुव्व-वइर-संवंधे	
हणु हणु करि दु-खंड अण्णणेहिं	अद्धयंद-खुर-थूणाकण्णेहिं	
जाम ण पइसरंति पइसरणेहिं	रह-गुड-पक्खर-देहावरणेहिं	
जाव जणदणु अक्खइ पत्थहो	ताम पधाइय रवि-सुय-हत्थहो	८

घत्ता

महि कंपिय गयणु पलित्तउ	धूमावलिय दिसामुहइं ।	
किय विण्णि-वि वे-खंडइं	णउ भुयंग पर-आउहइं ॥	९

[१५]

गय पडिवारा समरे अणिद्धिय	चंपापालहो पुरउ परिद्धिय	
अम्हइं चंडवेय-अद्दावलि	णं तो पेक्खु फुरंत फणावलि	
दुद्धर दुण्णिवार अपरज्जिय	पइं अप्पाणमाणेण विसज्जिय	
पभणइ सल्लु णवल्लइं अत्थइं	मेल्लि मेल्लि रिउ जिणेवि समत्थइं	४
राहा-णंदणेण तो वुच्चइ	गयउ केम पडिवारउ मुच्चइ	
जं होसइ तं होउ हणंतहो	सविसइं पहरणाइं ण मुयंतहो	
मणु जूराविउ कउरव-रायहो	मंछुडु मुहे अलच्छि विय आयहो	
तेण ण मेल्लइ उरगमणत्थइं	पंडव-जायव जिणेवि समत्थइं	८

घत्ता

रणे अभउ दिण्णु गंगेएण	दोणें अत्थइं छंडियइं ।	
ण विमुक्कइ चंपा-णाहेण	तिहि-मि कुलइं उवखंडियइं ॥	९

[१६]

तक्खय-तणउ ताव तहिं अवसरे	पभणइ मेल्लि मेल्लि तहिं संगरे	
हउं सुर-समर-सएहिं असिद्धउ	आससेण-णामेण पसिद्धउ	
खंडवे दड्ढएण महु मायारि	घत्तिय सिहि-जालोलिहिं उप्परि	
आइउ तेण वइर-संवंधे	मरइ धणंजउ महु विस-गंधे	४
जंपइ चंपापुर-परमेसरु	जइ फणिंदु तो एत्थहो ओसरु	
मं वोल्लेसइ को-वि विणाणे	जुज्झिउ कण्णु भुवंगहं पाणे	
विसहरिंदु सयमेव पधाइउ	पत्थे छहिं सरेहिं विणिवाइउ	
ताम तुरंगम मुहरंगेहिं	कह-वि कह-वि साहेवि सव्वंगेहिं	८
धरिय धणंजएण स-कसाएं	भिण्णु वियत्तणु सर-संघाएं	

घत्ता

मुच्छिज्जइ उम्मुच्छिज्जइ	वलइ विरुज्झइ अरि-गणहो ।	
किं केसरि सुट्ठु असूरउ	गज्जिउ सहइ महाघणहो ॥	९

[१७]

धाइउ तवण-तोउ सेयासहो  
 रणु रउद्दु किउ असुर-सुरेहि व  
 हयवरेहिं कलहंस-सवण्णेहिं  
 समर-सएहिं सरीरावरणहिं  
 जिह ण दिवायरु दिसि संभालइ  
 तिह महुसूयणेण स-कसाएं  
 जिह पाविट्ठु पाव-भर-भारिउ  
 वाहणु आउ सरीरु महाउहु

घत्ता

रवि-सुयहो धरंत-धरंताहो  
 णिसि-आगमे णाइं णिव्वुड्डइं

[१८]

तो सविलक्खें चंपाराएं  
 हरि पभणइ किं सेरउ अच्छहि  
 हणु हणु अज्जुणु वहु-वहु-वाणेहिं  
 हणु हणु खंडव-डामर करणेहिं  
 हुणु हणु जालंधर-विद्वणेहिं  
 तो कइकेयणेण लल्लक्केहिं  
 पुणु छहिं पुणु पडिवारउ एक्कें  
 रुहिरु पियंतु पत्तु महि-मंडलु

घत्ता

घुम्मंतु णरेण ण विद्वविउ  
 किं गुणु ण छिण्णु तउ णंदणहो

णाइं इंदु गय इंदब्भासहो  
 रहवरेहिं गंधव्वपुरेहिं व  
 चामर-छत्त-धएहिं सोवण्णेहिं  
 संचरंति अब्भतंर-करणहिं ४  
 जिह ण को-वि केत्तह- वि णिहालइ  
 वइरि वरूहु समाहउ वाएं  
 हत्थ-पमाणु धरहे पइसारिउ  
 दइवे परम्मुहे सव्वु परम्मुहु ८

चक्कइं थक्कइं धरणियले ।

रवि-ससि-विंवइं उवहि-जले ॥ ९

पाडिउ णर-किरीडु णाराएं  
 वइरि-परक्कम किं ण णियच्छहि  
 सत्तुत्तर-सय-धम्मत्थाणेहिं  
 हणु हणु कालकंज-कप्परणेहिं ४  
 हणु हणु विद्धखत्त-णिव्वहणेहिं  
 विद्धु वियत्तणु दसहिं पिसक्केहिं  
 देहावरणु भिण्णु अवरेक्कें  
 रवि-सुउ तेण जाउ विहलंघलु ८

धुणिउ अणंतें कर-जुयलु ।

जेण ण पाडहि सिर-कमलु ॥ ९

[१९]

तो तेण तरुणि-तरणुववण्णें  
णउइहिं णरु णरेण अपमाणेहिं  
वण-वियणाउरु रुहिर-जलोल्लिउ  
कड्डइ चक्कु ण सुमरइ पहरणु  
भारु भारु जो दिण्णु सुवण्णहो  
जइ णिक्खत्तउ धम्मु सहेज्जउ

हरि वारहहिं विद्धु कण्णें  
पुणु सएहिं पुणु अट्टाणउइहिं  
णं अकाले कंकेल्लि पफुल्लिउ  
णिंदइ धम्मु ण धम्मं कारणु  
सो गउ कासु वि पच्छए अण्णहो  
तो किं मइं रणे जिणइ धणंजउ

४

घत्ता

रुहु कड्ढि कण्ण जइ सक्कहि  
उप्पज्जइ णेहु सहावेण

वोल्लावइ गंडीव-धरु ।

जइ-वि ण जाणइ भाइ णरु ॥

७

[२०]

णिएवि अजुज्झमाणु पिह-णंदणु  
हणु हणु कवणु खत्तु सहं आएं  
जेण कुमारहो गुणु दोहाइउ  
तहो अवराह-दुमहो फलु दावहि  
तो छव्वाण-पमाणें वाणें  
जइ तुहुं सरु गंडीवु सरासणु  
धम्म-पुत्तु जइ धम्म-वियाणउ  
एम भणेवि विसज्जिउ पत्थें

तो पभणइ सामरिसु जणदणु  
जसु उप्परि अक्खत्ति किय राएं  
जेण घुडुक्कउ सत्तिए घाइउ  
छिंदि छिंदि सिरु काइं चिरावहि  
विद्धु धणंजएण तुरमाणें  
जइ हउं अज्जुणु हरि गरुडासणु  
तो सिरु लेज्जहि पत्त-पमाणउ  
पाडिउ उत्तमंगु दिव्वत्थें

४

८

घत्ता

तहिं काले कवंधु सइत्तउं  
सिरु सामिहे महि णिव-भाइहे

रुहिर-पवाहें चच्चियउं ।

देप्पिणु णाइं पणच्चियउं ॥

९

[२१]

णिवाडिउ अंगराउ महि-मंडले  
वहिरिउ भुवणु संख-णिग्घोसें

दिण्णइं जय-तूरइं पंडव-वले  
णच्चिउ भीमसेणु परिओसें

कहइ जणदणु पंडव-सेणहो	तिहिं भयवत्त-जयदह-कणहं	
जं उव्वरिउ रणंगणे दुज्जउ	तं अजरामरु होउ धणंजउ	४
कउरव तट्ट तणट्टउ-हत्थ	णं कुलगिरि कुलिसाहय-मत्थ	
भग्ग महा-विसाण णं वारण	णं उक्खणिय-णक्ख पंचाणण	
णं उप्पाडिय-दाढ भुअंगम	छिण्ण-पक्ख णं पवर विहंगम	
सूडिय-साह-णिवह णं पायव	णं दिणमणि वहु-घण-भग्गायव	८

यत्ता

भज्जंतए कउरव-साहणे	आयामिय-आओहणेण ।	
धणु लेवि सयं भुव-दंडेण	आयासणीउ(?) दुज्जोहणेण ॥	९

इय रिट्टणेमिचरिए धवलइयासिय-सयंभुएव-कए  
कण्णवहम्मि(?) चउरासीइमो सग्गो ॥

## पंचासीइमो संधि

पाराउड्डए कुरुव-वले अहिमाण-गइंदारोहणु ।  
तिण-समु मण्णेवि पंडु-वलु पर थक्कु एक्कु दुज्जोहणु ॥ १

[१]

तं वद्धावणउं विओयरहो जउ पत्थहो दिहि दामोयरहो  
वसुहंतराल-गय-संदणहो सिर-छेउ दिवायर-णंदणहो  
णर-सर-परिचुंविय वाहणहो पेक्खेवि अवत्थ णिय-साहणहो  
मं भज्जहो पभणइ कुरुव-पहु मरणेण विढप्पइ अमर-पहु ४  
जीवंतहं जय-सिरि संभवइ को मइं थिए तुम्हहं अहिहवइ  
तं णिसुणेवि रोस-वसंगयइं दस-गुणियइं पंचवीस सयइं  
पायालहं पुरउ परिट्टियइं गय-घाएहिं भीमहो णिट्टियइं  
धट्टज्जुण-सरेहिं समाहयइं तट्टइं णट्टइं पिट्टइं मयइं ८

घत्ता

वुच्चइ कुरुव-णराहिवेण सिहि-गल-गवलालि अणज्जुणु ।  
रहु जत्तार महु-त्तणउं तहिं वाहि वाहि जहिं अज्जुणु ॥ ९

[२]

रहु सणिउ सणिउ सूएण णिउ णाराएहिं णरवर-णियरु जिउ  
वलु सीरिउ सोमय-सिंजयहं सामीरणि-सउरि-धणंजयहं  
ताडिय तिहिं तिहिं तोमरेहिं धय पंचाल-मच्छ ओसरेवि गय  
जो दुक्कइ तहो तहो देइ झड रह दलइ विहंजइ हत्थि-हड ४  
अण्णेत्तहे सउणि समावडिउ सिणि-णंदणु जमलहं अब्भिडिउ  
सो तेहि-मि जिणेवि ण सक्कियउ जगडंतु वलइं परिसक्कियउ  
तहिं अवसरे सल्लु झुलुक्कियउ परिगलिय-पयाउ एवारियउ  
जज्जरिय-महारहु वणिय-हयउ वि-सरासणु णर-सर-छिण्ण-धउ  
परमेसर दइउ ताहं वलिउ वलु तेण तुहारउ णिदलिउ ८

घत्ता

मरइ दोणु धट्टज्जुणहो

गंगेउ सिहंडिहे हत्थे ।

जइ ण दइउ तो समर-मुहे

किं कण्णु णिहम्मइ पत्थे ॥

९

[३]

दुज्जोहण पेक्खु पेक्खु वलइं

वण-वियणाउर विहलंघलइं

दुज्जोहण पेक्खु पेक्खु तुरय

णं धाउ-धराधर धरणि-गय

दुज्जोहण पेक्खु हत्थि पडिय

णं जलहर पलय-पवण-झडिय

दुज्जोहण पेक्खु णिरुद्ध-पह

गंधव्व-पुरोवम छिण्ण रह

४

दुज्जोहण पेक्खु सभुय विसह

महियले लोलंत भुवंग जिह

दुज्जोहण पेक्खु पलोट्ट धय

णं रण-सिरि वेणि णिवद्ध सय

दुज्जोहण पेक्खु सुहड-सिरइं

दट्टोड्डइं भिउडि-पगासिरइं

दुज्जोहण पेक्खु पडंतु रवि

लइ एवंहिं जुज्झावसरु ण-वि

८

घत्ता

तो सिमिरहो पल्लड्डु पहु

दिण-मणि अत्थंतु सुहावइ ।

ण्हाएवि पच्छिम-मयरहरे

जलु पुत्तहो देंतउ णावइ ॥

९

[४]

गउ कुरुव-णराहिउ णिय-घरहो

पंचाणणु णं गिरि-कंदरहो

दिट्टइं सुर-कुसुमालंकियइं

कण्णज्जुण-रह परिसक्कियइं

लक्खिज्जइ अंगराउ पडिउ

णं वीयउ दिणमणि आवडिउ

णं दिवहो पाकसासणु चडिउ

णं केण-वि कणय-पुंजु ठविउ

४

गुण संभरंतु कुरुवइ रुवइ

पहु वाह-सणाह धाह मुवइ

अहो परम मित्त परमाहिरहि

पइं विणु सुण्णीथिय सयल महि

पइं विणु को पहरइ णरेण सहं

पइं विणु विच्छायउ वयणु महु

पइं विणु वट्टइ टल्लट्टलउं

पइं विणु दलु जल-लव-चंचलउं

८



घत्ता

तो पभणइ मदाहिवइ

परए समप्पइ कुरुव-वल्

[५]

दिवि दिवि जुज्जंतु ण थक्कहि ।

पुणु रुवहि राय जिम सक्कहि ॥

९

गरहंतु एम तं कुरुव-पहु

जे पडिय मज्झे आओहणहो

णइ-णंदण-पमुह धरित्ति-सिय

भययत्त-विहव्वल-वरुण-सुय

अट्टट्ट सुदक्खिण अ-सिर किय

सल-आरिससिंगि अहिद्विय

भूरीसव-दूसल-दइय हय

ओए-वि अवर-वि सामंत-सय

घत्ता

थोव-तुरंगमु थोव-गउ

थिउ कुरुवइ-कुलु सयलु

[६]

थोव-रहु थोव-सामंतउ ।

जिह मिग सिव विहंग तरु चत्तउ(?) ॥

९

एत्तहे-वि कइद्धय-गरुडधय

उवसोह देंत थिय पंडु-वले

हरि पभणइ जमल-विओयरहं

सरसट्टु णिट्टु णिय-धणु-गुणहं

स-करुसय-सोमय-सिंजयहं

परिरक्खहु तुम्हइं वावरणु

संतोसु करेवउ तव-सुयहो

गय विण्णि-वि पासु जुहिड्डिलहो

हय-तूर स-कलयल लद्ध-जय

णं चंद-दिवायर गयण-यले

कोंतासि-गयासणि-गोयरहं

सच्चइ-सिंहंडि-धट्टज्जुणहं

पंचालहं मच्छहं कइकयहं

हउं अज्जुणु जाम जाहुं भवणु

सिर-छेउ णिहालउ रवि-सुयहो

वसुमुइ-समागमुक्कंटुलहो

४

८

घत्ता

भणइ जणदणु पणय-सिरु किं णरवइ गलिय-पयावउ ।  
घाइउ कण्णु धणंजएण तउ आयउ हउं वद्धावउ ॥ ९

[७]

पणवेप्पिणु जय-जय-भायणेहिं वोल्लिज्जइ णर-णारायणेहिं  
जय णंद वद्ध वद्धावणउं कुरु-जंगलु भुंजहि अप्पणउं  
लइ जाहुं जुहिंइलु पेक्खु रणु जहिं तावणि तोमर-तत्त-तणु  
तव-णंदणु पभणइ पणय-सिरु मयरहर-गहिर-रव-गहिर-गिरु ४  
महसूयण जाहं पसण्णु तुहुं ते अवसें णर पेक्खंति सुहु  
जहिं तुहुं तहिं सब्बइं मंगलइं जहिं तुहुं तहिं वसुमइ-मंडलइं  
जहिं तुहुं तहिं दिहि कल्लाणु जउ जहिं तुहुं तहिं अवसें कुरुहुं खउ  
मंतोसहि-पगुणीकिय-भुएण संणाहु लइज्जइ तव-सुएण ८

घत्ता

जुत्त तुरंगम चडिउ रहे गउ णरवइ थोवाणियउ ।  
चालिउ णर-णारायणेहिं णं मेरु महीहरु वीयउ ॥ ९

[८]

जय कारिउ णरवइ णरवइहिं सिवि-सोमय-सिंजय-सच्चइहिं  
पंचालेहिं मच्छेहिं जायवेहिं अवरेहिं अणणय-अवयवेहिं  
दक्खविउ कण्णु तव-णंदणहो णं सूरेहिं वित्तु सकंदणहो  
पाडिय-कवंधु उच्छलिय-सिरु णीसारिउ णां तूसेवि रुहिरु ४  
जोइज्जइ कांइ वियत्तणहो जो गउ अवसाणु भडत्तणहो  
जसु सिरि ण सरीरहो ओसरइ मुह-कमलु कमल-कमला धरइ  
धणु जेण दिण्णु ओलगणहं ण धरिय णिय-पाण-वि मग्गणहं  
सिरु सामिहे देहु वसुंधरहो पूरंतु मणोरह हय हरिहो ८

घत्ता

एम भणेवि षं रुहिरु थिउ  
हियए विसूरइ कुरुव-पहु

गय पंडव णिय-णिय-वासहो ।  
महु एक्कु-वि ण हुउ णिरासहो ॥

९

[९]

ण धरद्धु समप्पिउ पंडवहं  
सउ पुत्तहं सउ जे सहोयरहं  
चूराविय सयल-वि मइं जे रणे  
गंगेउ सिहांडिहे मरइ जहिं  
तो पगुण-गुण-गणलंकरिउ  
णउ अज्जु-वि मइयवट्टु भमइ  
अज्जु-वि महि-अद्धु समल्लवइ  
अज्जु-वि मद्दाहिउ तुह तणउ

आणिउ विणासु पर वंधवहं  
ण पमाणु तुरंगम-किंकरहं  
ण परिट्टिय सुंदर बुद्धि मणे  
जीवेवए अम्हहं कवणु तहिं  
सब्भावें भणइ किवायरिउ  
तउ अज्जु-वि धम्म-पुत्तु खमइ  
अज्जु-वि सो तुहुं जि णराहिवइ  
कियवम्मु सउणि हउं गुरु-तणउ

४

८

घत्ता

अज्जु-वि तुज्जु जे वइसणउं  
अद्धोवद्धिए रज्जु करे

सामंत-वि ते-वि तुहारा ।  
जो मुवउ सो मुवउ भडारा ॥

९

[१०]

तो पभणइ कुरुव-णराहिवइ  
तं पइं सिक्खविउ कज्जे थियए  
विसु दिण्णु रइय जउ-मंडविय  
पंचालिहे किउ केस-गहणु  
खेत्तु-वि ण दिण्णु मगंताहं  
अज्जु-वि दोमइ थंडिले सुवइ  
धट्टज्जुण-वासुएव-ससउ  
ते विण्णि-वि संधि करंति किह

जं माय-वप्प-गुरु सिक्खवइ  
किव णवर ण लग्गइ महु हियए  
कवडक्खेहिं वसुमइ छंडविय  
वण-वसणु कराविउ गो-गहणु  
लज्जिज्जइ संधि करंताहं  
अज्जु-वि सुहद् धाहेहिं रुवइ  
अच्छंति कसाय-सोय-वसउ  
महु भीमु पलिप्पइ जलणु जिह

४

८

दिवे दिवे चिंतवइ विणासु मणे

लइ जं होसइ तं होउ रणे

घत्ता

देंतु आसि जो पेसणइं

गंगेय-दोण-किव-कण्णहं ।

सो दुज्जोहणु अज्जु हउं

उवसेव करमि किह अण्णहं ॥ ९

[११]

संतणु विचित्तवीरिय-अवहि

परिपालिय जेण-वि सयल महि

सो केम सेव अण्णहो करमि

भुव जाम ताम करि वावरमि

गुरु-पियर-पियामह खयहो गय

सामंत सहोयर पुत्त-सय

अंगइं ढिल्लारीहुआइं

संसार-सुहइं अणुभूयाइं

४

अ-पमाणइं दाणइं दिण्णाइं

जस-कुसुमइं जगे विक्खिण्णाइं

वर-वइरि-कुलइं संतावियइं

वहु-सयणइं उण्णइ पावियइं

गुरु वंदिय देवय-पुज्ज किय

महि पंडुसुयहं ण समल्लविय

वे वाहउ हियवउं होउ छुडु

महु एवंहिं मरणु जे रज्जु फुडु

८

घत्ता

तो पोमाइउ णरवइहिं

सच्चउ धयरट्टहो पुत्तु ।

पोत्तउ गंगा-णंदणहो

दुज्जोहणु होहि णिरुत्तु ॥

९

[१२]

दुरुज्झिय-संपय-धणिय-धणु

जं कुरुव-राउ थिय मरण-मणु

तं सव्वेहिं समरारंभु किउ

जोयणइं विण्णि सण्णहेवि णिउ

वइरिहिं हक्कारा पट्टवेवि

पुट्टिहिं हिमवंतु परिट्टवेवि

सरसइय डेर(?)रइयाओहणहो

किवि विण्णवंति दुज्जोहणहो

४

सेणावइ कुरुवइ को-वि करे

जो खंधु समोड्डइ समर-भरे

जो कंवुव-कंतु वग्घ-वयणु

जो वसह-खंधु दीहर-णयणु

जो गरुड-परक्कमु पवणजउ

जो दुंदुहि-सायर-मेह-रउ

जो दस-सय-कुंतल-विहर-धरु

जो सधर-धराधर-धीर-धरु

८

घत्ता

केसरि-विक्रमु विज्जु-वल् सुर-करि-कक्ख-सहत्थु ।  
तं सेणावइ करहि तुहुं जो पंडव जिणेवि समत्थु ॥ ९

[१३]

तो पर-वल-सलिलुड्डोहणेण गुरु-पुत्तु वुत्तु दुज्जोहणेण  
तुहुं अम्हहं दोणायरिय-समु वड्डारउ वुद्धिए कज्ज-खमु  
संगामुव्वरियए णर-णिवहे सेणावइ किज्जइ कवणु कहे  
दोणायणि अक्खइ पत्थिवहो करि पट्ट-बंधु मद्दाहिवहो ४  
सो पंडव जिणेवि समत्थु रणे परिओसिउ कुरुव-णरिंदु मणे  
गउ सल्लहो पासु गइंद-गइ वसु-हत्थु कयंजलि विण्णवइ  
देहि खंधु चहुट्टए समर-भरे सेणावइ होहि पसाउ करे  
तो मद्दाहिवेण समच्छियउ रण-भरु णिय-सिरि णं पडिच्छियउ ८

घत्ता

कल्लए पंच-वि पंडु-सुय णिट्ठवमि करेप्पिणु जुज्जु ।  
वसुमइ छत्तइं वइसणउं दुज्जोहण अप्पमि तुज्जु ॥ ९

[१४]

महि परए पेक्खु णिप्पंडविय वारमइ दसारुह-छंडविय  
ण णरिंदु ण भीमु ण महुमहणु ण धणंजउ जमलहो णेक्कु जणु  
ण धरित्ति ण छत्तु ण वइसणउं पर होसइ सायरे पइसणउं  
परिओसु पव्वाइउ पत्थिवहो विणिविद्धु पट्टु मद्दाहिवहो ४  
जिह दोणहो जिह णइ-णंदणहो जिह कण्णहो किय-कडमदणहो  
तिह णंद वद्ध जिय-पंडु-वल् उज्जालि महारउ मुह-कमलु  
तो कहिउ चरेहिं दामोयरहो रणे पट्टु वद्धु मदेसरहो  
णारायणु समरुक्कंठुलहो गउ सरहसु पासु जुहिड्डिलहो ८

घत्ता

कल्लए कुरुव-णराहिवहो तव-णंदण भीमु हणेसइ ।  
 भंजेवि विओयरु गयासणिए णिय-पाएहिं मउडु मलेसइ ॥ ९

[१५]

गय-दिणे दूसासणु णिड्डविउ जम-णयरु स-भायरु पट्टविउ  
 भययत्त-जयद्ध सूर-सुय ते तिण्णि-वि पत्थहो हत्थि मुय  
 गंगेउ सिंहंडें जज्जरिउ धट्टज्जुणेण दोणायरिउ  
 सव्वहं सर-सीरिय-खत्तियहं परिसंख करेसहो केत्तियहं ४  
 जमलेहि-मि जमलीहूयएहिं असि-कुंत-वराउह करे किएहिं  
 जरसिंधु हणेवउ समरे मइं मारेवउ तव-सुय सल्लु पइं  
 जं वोळ्ळिउ तेत्थु जणदणेण तं इच्छिउ पंडुहे णंदणेण  
 गउ णियय-णिहेलणु महुमहणु पाडिवालउ दिणमणि-उग्गमणु ८

घत्ता

तूरइं देवि भयंकरइं कलयल-रउ करेवि महंतउ ।  
 वलु णीसरिउ जुहिड्डिलहो णं जगु जे सइं भुंजंतउ ॥ ९

इय रिट्टणेमिचरिए धवलइयासिय-सयंभुएव-कए  
 संधि पंचासीइहे कण्णवहो समत्तो ॥

## छायासीडमो संधि

सल्लहो वद्धए पट्टए      सल्लइं हियए ण फिड्डइ ।  
पंडव-कुरुव-वलाइं      विण्णि-वि रणे आभिड्डइं ॥      १

[१]

रण-रस-रोमंचिय-पसाहणु	तिगुहु(?) पधाइउ पंडव-साहणु	
दिण्ण-तूरु परिवड्डिय-कलयलु	णर-सामंतहं पहरण-कलयलु	
रहवर-गयवर-पहर-भयंकरु	विविहासियायवत्तु सिय-चामरु	
देहावरणावरिय-सरीरउ	सायर-गहिरु महीहर-धीरउ	४
तो मद्दाहिव-सउणि-सुसम्मैहिं	कुरुव-णराहिव-क्वि-कियवम्मैहिं	
भय-संताव-दुक्ख-उप्पायणु	सव्व-भट्टु विरइउ आरायणु	
वामे पासे णिम्मियउ तिगतउ	दाहिणेण हद्दिउ(?)वलवंतउ	
पुट्टिहिं दोणि मज्झे दुज्जोहणु	करोवि वूहु मंडिउ आओहणु	८

घत्ता

सल्ल जुहिड्डिल वे-वि      सेयायव सेय-महाधय ।  
भिडिय परोप्परु णाइं      जूहाहिव मत्त-महागय ॥      ९

[२]

अट्टारहमए दिवसे विउद्धए	वे-वि वलइं रणे अमरिस-कुद्धए	
कह व कह व पडिवालिय-सूरइं	रण-रसियइं देवाविय-तूरइं	
किय-कलयलइं समुब्भिय-चिंधइं	भिडियइं उहय-वलग्गिम-खंधइं	
धाइय मत्त-गयंद गयंदहं	णं णव-जलहर जलहर-विंदहं	४
धाइय रहवर रह-संघायहं	णं स-पायगिरि गिरिहिं स-पायहं	
धाइय पवर तुरंगं तुरंगहं	णं मयरहर-तरंगं तरंगहं	
सामंतहं सामंत पधाइय	सरवर-णियर परोप्परु लाइय	
एम रउदें णिम्मज्जायहं	विसम-जुज्झु वीहि-मि संजायहं	८

घत्ता

एक-दु-वहु-वयणइं धाउ-णिरायण-करणइं ।  
 संधिय-सर-णियरइं वलइं णाइं वायरणइं ॥ ९

[३]

तहिं अवसरे पंडवहं स-वूहहं कोडि-भडाहं सहास-वरूहहं  
 तिण्णि सहास मत्त-मायंगहं दस सहस उव्वरिय-तुरंगहं  
 कुरु-वले कोडिउ तिण्णि मणूसहं विण्णि लक्ख हयवरहं स-भूसहं  
 सहसेयारह रहहं रउइहं दस सहास मय-मत्त-गइंदह ४  
 एम चउव्विह किय परिमाणहं पंडव-कुरुव-वलहं भिडमाणहं  
 किं पि ण सुम्मइ धण-गुण-सदें काहल-संख-मउंद-णिण्णदें  
 मयगल-गल-गल्लरि-उगारेहिं रहवर-पवर-चक्क-चिकारेहिं  
 हय-हिंसण णर-णरवइ-हक्केहिं ओएहिं अवरोहि-मि लल्लुकेहिं ८

घत्ता

कलयलु पूरइ कण्ण रण-रण दिट्ठि ण पसरइ ।  
 रुहिरे ण जाणहं जाइ तो-वि को-वि भडु पहरइ ॥ ९

[४]

कहि-मि कहि-मि उच्छलिय-महारउ विहि-मि वलहं णं दुक्कु णिवारउ  
 ण किउ वयणु णं उप्परि धावइ पत्त-विहुरु गउ भज्जेवि णावइ  
 भडहं परोप्परु पडिलगंतहं असि-वरोह-हम्मंत-हणंतहं  
 जाय-घाय-संघाय गइंदहं णं उप्पण्ण खयाल गिरिंदहं ४  
 रुहिरुइं णिग्गयाइं उग्गालेहिं णं सलिलइं पासाय-पणालेहिं  
 रेल्लउ महि-रेल्लंतु पधावइ दइवें रण-रसु पीलिउ णावइ  
 तहिं तेहए संगामे भयंकरे हड्ड-रुंड-विच्छड्ड-णिरंतरे  
 स-धणु धणंजउ भिडिउ तिगतहं णं केसरि करिवरहं पमत्तहं ८



घत्ता

धाइउ पंडव-णाहु	मदाहिव-विक्रम-सारह ।	
किवहो विओयरु दुक्कु	जमल वे-वि गंधारह ॥	९

[५]

धट्टज्जुण-सिहंडि रहसुट्टिय	धम्म-पुत्त परिगरेवि परिट्टिय	
भीमज्जुणेहिं संख आऊरिय	मदि-सुएहिं गंधार पचूरिय	
ताम तिण्णि सुय कण्णहो केरा	धाइय जेड्ड मज्झ लहुयारा	
चित्तसेणु सेणामुहु सारउ	सच्चसेणु सच्च-वय-धारउ	४
अवरु सुसेणु सुसेण-समप्पह	तेय स-वाह वाह-वाहिय-रह	
तिण्णि-वि भिडिय रणंगणे णउलहो	आसीविस-विसहर णं णउलहो	
मुट्टि-देसे धणु खंडिउ एक्के	भल्ले भिण्णु भाले अण्णेक्के	

घत्ता

तिहिं धउ तिहिं जत्तारु	हय चउहिं लोट्टाविय ।	
णउले अंसिवर-लट्टि	जमेण जीह णं दाविय ॥	८

[६]

विंधइ चित्तसेणु सर-जाले	छिंदइ पंडु-पुत्तु करवाले	
करणु देवि रिउ रहवरे चडियउ	महिहरे विज्ज-पुंजु णं पडियउ	
धम्म-रयणु वाम-करे भमाडिउ	सिरु असिवरेण हणेप्पिणु पाडिउ	
इयर-वि अट्ट हणेविणु घाइय	तिण्णि-वि कण्ण-पुत्त विणिवाइय	४
कुरु-वाहिणि णासेवए लग्गी	दुब्बल गाइ व वाएं भग्गी	
रक्खिय कह-वि सल्ल-गोवाले	उक्खय-खग्ग-दंड-भुव-डाले	
सारहि वाहि वाहि तहिं रहवरु	जहिं सोवण्ण-महद्धए ससहरु	
जहिं चामीयर-चामर-वासणु	जहिं ससि-पंडुरु आयव-वारणु	८

घत्ता

जेण जुहिड्डिलु अज्जु  
वसुमइ णीसावण्ण

तिक्ख-खुरुप्पेहिं कप्पमि ।  
दुज्जोहणहो समप्पमि ॥

९

[७]

तो कोवग्गि-वसारुणिभूएं  
ताव राउ परिवारिउ पत्थें  
धट्टज्जुण-सिहांडि-जुजुहाणेहिं  
विहि-मि परोप्परु भारह-मल्लहं  
खय-रवि-विंव-समप्पह-वयणहं  
दुव्विस-विसहर-विस-मालावहं  
सरवर-लिहिय-पिहिय-गयणयलहं  
तूर-णिणाय-भरिय-गयणयलहं  
धयदंडुब्भिय-सीयाइंदहं

वाहिउ संदणु सल्लहो सूएं  
भीमें भीम-गयासणि-हत्थें  
अवरेहि-मि एक्केक्क-पहाणेहिं  
रणु पडिलग्गु जुहिड्डिल-सल्लहं  
जलण-जाल-मालारुण-णयणहं  
दिढ-भुयदंडायड्डिय-चावहं  
भूय-णिणाय-भरिय-गयणयलहं  
+++++  
सुरवहु-णयण-भमर-मयरंदहं

४

८

घत्ता

जाउ महाहउ घोरु  
अच्छइ सुरवर-लोउ

हण-हण-सट्टु ण थक्कइ ।  
जमु-वि ण जोएवि सक्कइ ॥

११

[८]

सल्ल-जुहिड्डिल किव-धट्टज्जुण  
भिडिय परोप्परु जाइय जुज्झइं  
मदाहिवउ हउ सहएवें  
अवरें अवरु पिसक्केहिं पूरिउ  
अवरें अवरहो छिण्णु महद्धउ  
जुज्झइं एम अणेयइं जायइं  
ताम विओयरु धाइउ सल्लहो  
लउडि-महाहउ जाउ भयंकरु

वे-वि तिगत महाहवे अज्जुण  
भग्गाउह-पडिलग्ग-णिजुज्झइं  
अवरहो अवर दुक्कु विणु खेवें  
अवरें अवरहो रहु संचूरिउ  
अवरें अवरु समरे ओट्टद्धउ  
जले जलयर-हिय-णिम्मज्जायइं  
णं एक्केक्कु कोलु एक्कल्लहो  
सिहि-जालोलि-सुलुक्किय-सुरवरु

४

८

घत्ता

विण्णि-वि जुज्झिय ताम णिवडिय जाम धरत्तिहिं ।  
दइवें मोडिय पाय णं कुरु-पंडव-कित्तिहिं ॥

९

[९]

मद्दाहिवु किवेण अपवाहिउ धम्मं जीउ जेम पडिगाहिउ  
जम-रूवाणुरूव-भू-भीमें चेषण लहेवि दुव्वोल्लिउ भीमें  
वलु वलु सल्ल सल्ल कहिं गम्मइ सीसइं देवि समर-पिडु रम्मइ  
जिम तुम्हहं पाडिय समसुत्ती जिम महि दुज्जोहणेण जे भुत्ती ४  
तहिं अवसरे धणु-कवय-सणाहें चूरिउ चेइयाणु कुरु-णाहें  
तव-तणएण वहुय णीसेसिय सल्लहो भल्ल चउदह पेसिय  
चंदसेणु सत्तरिहिं णिसिज्झइ रुदसेणु चउसट्ठिहिं भिज्झइ  
तिहिं किउ चउहिं भोउ छहिं सउवलु आसत्थामु दसहिं विहिं वयजलु ८

घत्ता

णट्ठ असेसु वि सेण्णु मग्गण-पवणुद्धूयउ ।  
जलु थलु विवरु दियंतु सव्वु जुहिट्ठिलिहूयउ ॥ ८

[१०]

तो आरइय-महासर-मंडव सल्लहो सल्लेहिं सल्लिय पंडव  
जमल सएण सएण तव-णंदणु सट्ठिहिं णरु सत्तरिहिं जणदणु  
भीमहो पंचवीस सर लाइय कइकय पंचहिं कह-वि ण घाइय  
धट्टज्जुण-सिहांड विहिं विहिं दुमय-सुया-सुय पंच-वि तिहिं तिहिं ४  
सयल-वि दसहिं दसहिं पडिवारा पीडिए धम्म-पुत्ते धणु-धारा  
सच्चइ-जमल-भीम थिय अंतरे अट्ठहिं पवण-सुएण थणंतरे  
णउलें पंचहिं सरेहिं णिसिज्झइ छहिं छहिं तिहिं सहएवें विज्झइ  
सिणि-णंदणेण तिसाट्ठिहिं वाणेहिं खंडव-डामरेण अपमाणेहिं ८

८

घत्ता

एक्कु अणंतेहिं भिण्णु सेल्ल-भल्ल-णाराएहिं ।  
तो-वि ण जिज्जइ सल्लु तवसिय जिह स-कसाएहिं ॥ ९

[११]

तो मद्दाहिवेण मदेयहो सत्तरि सरहं मुक्क अग्गेयहो  
पुणरवि परिवड्ढिय-अवलेवहो णउलहो अट्ट सत्त सहएवहो  
पंचवीस सइणेयहो उप्परि णव रायहो भीमहो तेहत्तरि  
पत्थहो तीस सड्ढि गोविंदहो सय सहास पुणु णरवर-विंदहो ४  
+++++ पंडु-सुयहं तणु ताणइं भिण्णइं  
पंचहिं पंच-वि धय दोहाइय पंचहं पंच महासर लाइय  
सयहणि तव-तणएण पउंजिय गय सहएवं समरि विसज्जिय  
णउलें सत्ति चक्कु सिणि-जाएं विद्धु विओयरेण णाराएं ८

घत्ता

मद्दाहिवेण सयाइं पंच-वि एक्कए वारए ।  
णं इंदियइं गयाइं मोक्खहो जंते भडारए ॥ ९

[१२]

अग्गए वाणहं को-वि ण थक्कइ णीसावण्णु सल्लु परिसक्कइ  
जिह जिह वलइं असेसइं चूरइ तिह तिह तव-सुउ हियए विसूरइ  
चिंतितु वड्डु वार स-कसाएं एहु फेडेवउ केण उवाएं  
तं तेहउ णिएवि आओहणु मणे परिओसहो गउ दुज्जोहणु ४  
पंच-वि पंडु-पुत्त धुउ मारइ मइं वइसणए अज्जु वइसारइ  
ताम जुहिड्डिलेण मदेसहो चक्क-रक्ख णिय वइवस-देसहो  
तो स-वाण-वाणासण-हत्थहो दोण-पुत्तु रणे धाइउ पत्थहो  
तो धड्डज्जुणु भाणुवइ-कंतहो अवरहो अवर समरे पहरंतहो ८

घत्ता

पंडव-कुरुवेहिं एव जुज्झइं कियइं पभूयइं ।  
हय-गय-सुहड-सिराइं महियले पुंजीहूयाइं ॥ ९

[१३]

ताम धणंजएण गुरु-णंदणु किउ अ-तुरंगु अ-सूउ अ-संदणु  
दोण-सुएण मुसलु परिपेसिउ जायरूवमय-पट्ट-विहूसिउ  
तमि कइओयणेण उदुक्कंतउ(?) खंडइं सत्त करेवि पमुक्कउ  
आसत्थामें परिहु विसज्जिउ पंचहिं वाणहिं सो-वि परज्जिउ ४  
एवं तिसत्ति-चक्क-गय-मग्गइं चउहिं सरेहिं चयारि-वि भग्गइं  
सरहसु धम्मु ताव थिउ अंतरे गुरु-सुउ ताडिउ तिहि-मि थणंतरे  
तेण-वि रणे सुवम्मु ओसारिउ सरहु कयंत-णयरु पइसारिउ  
रहे आरुहेवि थक्कु गुरु-णंदणु ताम णरिंदहो कुविउ जणदणु ८

घत्ता

अ-णिहम्मंतए कण्णे णरु णारायणु णिंदइ ।  
एवंहिं तव-सुय काइं सल्लहो सीसु ण छिंदइ ॥ ९

[१४]

ताव दिवायरु गउ मज्झण्णहो भणइ जुहिड्डिलु अग्गए कण्हहो  
पइं समाणु वाणासण-धारउ णरु पहरंतु दिट्ठु सय-वारउ  
दुमइहे तणए सयंवर-मंडवे सुरहं मंडु डज्झंतए खंडवे  
भड-भययत्त-जयद्ध-मारणे विससेणाहवे कण्ण-महारणे ४  
भीमु-वि दिट्ठु णिसायर-मारउ कीया-कुरुव-कुल-क्खयगारउ  
एवंहिं मइं पहरंतउ जोयहि जमलीहोहि मज्झु रहु ढोयहि  
जिवं मद्दियउ मंडु मद्देसरु जिम महु सरणु अज्जु वइसाणरु  
लहु रहु वहु-पहरणहं भरावहि करि कलयलु तूरइं देवावहि ८

घत्ता

सच्चइ दाहिण-चक्कें वामए दोण-खयंकरु ।  
पालउ पच्छलु पत्थु अग्गए थाउ विओयरु ॥ ९

[१५]

जो जेतते आइड्डु णरिंदें सो तेत्ते णियमिउ गोविंदें  
वाहिउ रहु पारद्धु रणंगणु पिहिउ पिसक्क-गणेहिं गयणंगणु  
वहिरिउ तिहुयणु तूर-णिणाएं किं पि ण दीसइ रय-संघाएं  
एत्तेहए सल्लराय साओहण एत्तेहए भिडिय भीम-दुज्जोहण ४  
एत्तेहए सच्चइ वलइं णिसिद्धइं एत्तेहए स-धणु धणंजउ विंधइ  
एत्तेहए सिहांड रणु पारंभइ एत्तेहए आसत्थामु वियंभइ  
एत्तेहए धट्टज्जुणु परिसक्कइ एत्तेहए स-कियवम्मु किउ थक्कइ  
एत्तेहए णउलु स-भायरु कुज्झइ एत्तेहए सउणि स-संदणु जुज्झइ ८

घत्ता

चामर-छत्त-सयाइं पेक्खंतहं अमरोहहं ।  
जस-खंड इव पडंति कउरव-पंडव-जोहहं ॥ ९

[१६]

तो धयरट्टेण सुधीमहो छिण्णु सरेण सरासणु भीमहो  
पाडिउ कंचण-सीहु धयग्गहो णाइं महामणि णह-सिरि-अंगहो  
सत्ति विओयरेण मेल्लिज्जइ कुरुव-णरिंदु ताम उरे भिज्जइ  
सारहि णिहउ ताम कियवम्मं रक्खिउ जीउ णाइं णिय-वम्मं ४  
मुच्छ-पराणिए कुरु-परमेसरे धाइय सल्ल-दोणि तहिं अवसरे  
णिय-णिय-जुज्झइं मुएवि स-गव्वेहिं कुरुव-राउ परिवेढिउ सव्वेहिं  
तव-तोएण ताम मदेसहो ढोइय सर वच्छयलुद्देसहो  
तेण-वि तासु एवं अवरोप्परु जाउ जुज्जु तियसह-मि भयंकरु ८

घत्ता

जमल-विओयर-पत्थ ताम परिड्डिय अंतरे ।

सव्वेहिं सल्लिउ सल्लु वाहेहिं करि व वणंतरे ॥

९

[१७]

तो मद्दाहिवेण धणु खंडिउ

अवरु लेवि तिहिं विद्धु थणंतरे

विहिं सारहि चउ रहु चउ घोडा

कुरु-णंदण-पमुहेहिं ओसारिउ

थाहि थाहि कहिं जाहि अजंगम

पडिणियत्तु अण्णहिं रहे थाएवि

विद्धु अजायसत्तु वत्तीसहिं

अवरोहिं अवर णराहिव भग्गा

तव-सुएण कुकलत्तु व छंडिउ

स-सरु सरासणु छिण्णु खणंतरे

लाइय थरहरंत सर थोडा

पुणु-वि जुहिड्डिलेण हक्कारिउ

दुम्मह दुच्चारित्त णराहम

वाणासणि वाणासणि लाएवि

सच्चइ दसहिं विओयरु तीसहिं

भीम-महल्ल-सल्ल पडिलग्गा

४

८

घत्ता

सव्वहं पीड करंतहं दुद्धम-देह-वियारा ।

एक्कहिं मिलिया णाइं विण्णि-वि वुह-अंगारा ॥

९

[१८]

तो तव-तणुरुहेण तिहिं ताडिउ

अवरें खय-सूरग्गि-समाणें

चेयण लहेवि समुड्डिउ जय-मणु

तेण-वि णवहिं विद्धु णाराएहिं

कुरुवइ-किंकरेण धणु खंडिउ

लेवि जुहिड्डिलेण रहु चूरिउ

तेण-वि सहुं भुएहिं विणिभिण्णइं

अवरोहिं सरोहिं विहि-मि वे चावइं

कह व कह व ण महारहि पाडिउ

किउ मुच्छा-विहलंघलु वाणें

सीरिउ सर-सएण तव-णंदणु

देहावरणु भिण्णु छहिं घाएहिं

अवरु चाउ चामीयर-मंडिउ

मद्दाहिवइ णिरंतरु पूरिउ

भीम-णरिंदहं कवयइं छिण्णइं

धरणि-णिवइं सुरधणु-तणु-भावइं

४

८

घत्ता

सारहि किवेण विहत्तु सल्लेहिं हय तुरंगम ।  
 पंडव थिय विच्छाया जिह फड-भग्ग भुअंगम ॥ ९

[१९]

पीडिए धम्म-पुत्ते अणुजेट्टे सउणिहे धणु पाडिउ आरुट्टे  
 सूयहो छिण्णु सीसु हय हयवर पुणु सय-संख विसज्जिय सरवर  
 जलु थलु गयणु दियंतरु झंपिउ सल्लहो कवउ खुरुप्पे कप्पिउ  
 तेण-वि सहस-धारु सय-चंदउ लइउ स-मंडलग्गु वसुणंदउ ४  
 धाइउ घाय दिंतु णित्तिसउ णउलहो खंडियाउ रह-ईसउ  
 दुम्मय-सुएहिं ताम फरु छिज्जइ भीमें असिवरु दोहाइज्जइ  
 खग्ग-खंडु फेरंतु मुहुम्महु धाइउ धम्म-सुयहो सवडम्महु  
 विसम दिट्ठि किय णवर णरिंदे आसीविसेण णां भुयइंदे ८

घत्ता

जणु पभणइ पहु को-वि जगु जे जंतु संधारहो ।  
 सल्लु ण जाणहुं केम ण हुउ पुंजु रणे छारहो ॥ ९

[२०]

विक्कम-सारें णिरुवम-विट्टे लइय सत्ति भीमज्जुण-जेट्टे  
 स-कुसुम-गंध-धूव-अहिवासिय हेमट्टुम-माणिक-विहूसिय  
 घंटा-मुहल पडायालंकिय तेल्ल-धोय-धारा णिय-वांकिय  
 मुक्क दुक्क वोक्कंति ण दिट्ठिय उरे वम्मइं भिंदंति परिट्ठिय ४  
 लक्खणु जिह सल्लिउ वच्छ-त्थले मुउ ओणल्लु सल्लु महि-मंडले  
 पंडव-वले दिण्णइं वाइत्तइं कउरव-जोहहं पडियइं चित्तइं  
 दुज्जोहणु मणेण आदण्णउ जणु पभणइ तव-णंदणु धण्णउ  
 सइं पेक्खंतहो आसत्थामहो जो उव्वरिउ सल्लु संगामहो ८



घत्ता

जइ रिसि-वयणु पमाणु पंडु पयवि तो पावइ ।  
रज्जु सइं भुज्जंतु धम्मु जे कासु ण भावइ ॥

९

इय रिद्धणेमिचरिए धवलइयासिय-सयंभुएव-कए  
छायासीइमो सग्गो ॥

## सत्तासीइमो संधि

विणिवाइए सल्ले ओहट्टइं गय-वाहणइं ।  
दिसि विदिसि गयाइं सव्वइं कउरव-साहणइं ॥ १

[१]

मद्दाहिवे मदिए रणे रउदे ओहट्टए कउरव-वल-समुद्दे  
णिय-धणु-विण्णाण-कियायरेण हक्कारिउ सल्लहो भायरेण  
वलु वलु रण-भोयणु देमि धवए कहिं जाहि जियंतें विचित्तकवए  
णाराएहिं दसहिं णरिंदु विद्धु पडिवारउ चउवीसहिं णिसिद्धु ४  
चामीयर-चंद-महद्धएण सरु पेसिउ वेहाविद्धएण  
धणु पाडिउ सारहि हउ णिडाले छहिं वाणेहिं विद्धु थणंतराले  
अवरेण सिला-सिय-धारएण भल्लेण भल्ल-भल्लारएण  
सिरु छिण्णु णियंतहं कउरवाहं वले दिण्णइं तूरइं पंडवाहं ८

घत्ता

तहिं काले मयंधु गयवइ जिह पर-गयवइहे ।  
कियवम्मु स-धम्मु भिडिउ रणंगणे सच्चइहे ॥ ९

[२]

पहाणभूय जायवा तणुप्पहा-जियायवा  
सिणिंद-भोय-वंसिया सुरासुर-प्पसंसिया  
धरा-धरिंद-धीरया महीयलेक्क-वीरया  
गह व्व कूर-भावया गिरि व्व धीर-दावया ४  
भमंत-धंत-वंतया हणंत एक्कमेक्कया  
महा-रणंगयं गया वियारिया गयंगया  
सरोह-विद्धया धया ससूयया हया हया  
विमुक्क-वाण-जालया पूरियंतरालया ८

पलंव-वाहु-दंडया	गय व्व उद्ध-सुंडया	
अ-थोव-कोव-दित्तया	सिहि व्व सप्पि-सित्तिया	
घण व्व घोर-घोसया	फणि व्व वद्ध-रोसया	११

घत्ता

कियवम्मु किवेण	पच्छाउहु ओसारियउ ।	
रहु अग्गए देवि	अप्पुणु पुणु हक्कारियउ ॥	१२

[३]

सिणि-णंदणु छहिं तोमरेहिं विद्धु	पुणु सत्तहिं पुणु अट्टहिं णिसिद्धु	
अट्टहिं आढत्तु अजायसत्तु	हय हयवर ताडिउ आयवत्तु	
तो राएं रोस-वसंगएण	कियवम्मु दसहिं किउ सर-सएण	
ओसारिय विण्णि-वि भग्गसोह	ते सल्ल-पयाणुव वद्ध-कोह	४
सण्णहेवि पधाइय पंडवाहं	णिविडावयत्त-किय-मंडवाहं	
सयसत्तु सुवण्ण-महारहाहं	गिब्वाण-महागिरि-सच्छहाहं	
दुज्जोहणु मत्त-गएण पत्तु	सिय-चामर-वासणु धवल-छत्तु	
सो भणइ म धावहु तुरिउ धाम	अवरइ-मि वलइं पावंति जाम	८

घत्ता

णिय पहुण गणेवि	हय-मुइंग-दडि-काहलइं ।	
धाइय पाइक्क जहिं	सव्वइं पंडव-वलइं ॥	९

[४]

जायवं महारणाइं	भूमि-वेर-कारणाइं	
एक्कमेक्क-मारणाइं	कुंभि-कुंभ-दारणाइं	
पत्त-रत्त-पाउसाइं	कड्डियंत-फेप्फसाइं	
घोर-घाय-घोलिराइं	छिण्ण-टंक-लोलिराइं	४
हड्ड-रुंड-दाविराइं	+++++	
सोणिओह-रप्पिराइं	अंत-माल-गुप्पिराइं	
चप्पिया मया मएहिं	भग्गया गया गएहिं	

आहया हया हएहिं  
पीडिया भडा भडेहिं  
एवं ताइं जुज्झियाइं

विद्धया धया धयेहिं  
फेडिया थडा थडेहिं  
जाम जीव-उज्झियाइं

८

घत्ता

एक्कइं दीसंति  
अवरइं णासंति

भीम-गयासणि-चूरियइं ।  
सेण्णइं णर-सर-पूरियइं ॥

११

[५]

तहिं भीमें दप्पुपेहडाहं  
तो मयगल-भुवणे कल्ल-मल्लु  
स-सरासणु स-सरु असेय-देहु  
भदेण मत्त-तंवेरेमेण  
सव्वाहरणालांकरियएण  
मय-जल-कट्टमिय-महीयलेण  
धट्टज्जुणेण तिहिं सरेहिं विद्धु  
विवरेवउ करे पहेरेहिं पयट्टु

सहसेक्कवीस चूरिय भडाहं  
ओराइउ अवरु किराय-सल्लु  
णं स-धणु स-धारा-वरिसु मेहु  
अइरावय-करव-मणोहरेण  
परिभमिर-भमर-झंकारिएण  
पंडव-वल्लु विलुलिहिं मयगलेण  
पंचहिं सरेहिं पडीवउ णिसिद्धु  
किउ कलयलु भिल्लाहिउ वियट्टु

४

८

घत्ता

कह कह-वि गइंदु  
वल-सायर-मज्झे

मदंकुसेण णियत्तियउ ।  
णं गिरि-मंदरु घत्तियउ ॥

९

[६]

ताम राय-राएण वंदिरो  
चंड-चंड-परदंड-डामरो  
काय-कंति-कसणीकयंवरो  
पाय-घाय-घाइय-रसायलो  
पाउसु व्व अणवरय-सीयरो  
चूरिया रहा मोडिया धया  
वोल्लिया भडा विहडिया घडा  
कुंजरेण उच्चाइओ रहो

मंद-भद-गय-चिंध-संधिरो  
संचलंत-चल-कण्ण-चामरो  
दंति-दंत-धवलिय-दियंतरो  
अग्गहत्थ-धुणिय-कमंडलो  
धाइउ कियंतु व्व भीयरो  
तासिया हया णासिया गया  
तहिं स-संदणो धाइओ दुमय-णंदणो(?)  
परिभमाडिओ गिरि-समप्पहो

४

८

घत्ता

उप्पएवि वलेण णह-लंघण-करणहो गुणेण ।  
किउ मंसहो पुंजु गय-घाएहिं धट्टज्जुणेण ॥ ९

[७]

सिणि-सुएण-वि सल्लहो खुडिउ सीसु दट्ठोड्डु तिसाहिउ भिउडि-भीसु  
कियवम्मु पधाइउ तेत्थु काले थिउ खेमकित्ति विहिं अंतराले  
हक्कारिउ जायउ थाहि थाहि कहिं कुरुवइ-किंकरु हणेवि जाहि  
सर-जालें घाइउ भणेवि एम णव-जलहर-विदें चंदु जेम ४  
तो सर-संधाण-कियायेण भीमाहवे भदिय-भायेण  
छहिं भल्लेहिं देहावरणु भिण्णु अवेण वइरि-सिर-कमलु छिण्णु  
कुरुवइ-किंकरेण-वि मदिएण सिणिवइ हक्कारिउ भदिएण  
तिहिं चिंधु चउत्थे धणु विहत्तु धउ पंचमेण छट्टेण छत्तु ८

घत्ता

सच्चइ स-कसाउ अवरु सरासणु करे लयउ ।  
कियवम्मु सरेहिं वि-धणु वि-सारहि वि-रहु किउ ॥ ९

[८]

कुविउ कियवम्मओ चुण्ण-किय-वम्मओ  
वइरि-सर-विद्धओ विउरयउ विद्धओ  
वि-धणु णीसंदणो घुसिण-पहरण-करो  
दिट्ठिविस-अहि-मुहो धाइओ संमुहो ४  
कण्ह-वल-भाइणा पुण्ण-वल-हाइणा  
पाडियं विससणं रुद्-गो-विससणं  
उरुवए सो हओ भग्ग-मुह-सोहओ  
किविण ओसारिओ णिप्पओसारिओ ८  
कुरु-वलं तासियं कायरं णासियं

घत्ता

पहरणइं हयाइं वर-वाहणइ-मि णिड्डियइं ।  
 कुरु-णाहहो पासे धाएवि कइ-वि सेण्णइं ठियइं ॥ १०

[९]

थिउ किउ कियवम्मु सुसम्मु सउणि सुहदरिसणु दुम्मरिसणु-वि दउणि  
 अवरो-वि को-वि सोमित्तु सत्तु सो णासेवि णासेवि पडिणियत्तु  
 तहिं अवसरे जोइय-भुय-वलेण पभणिउ दुज्जोहणु माउलेण  
 भुंजाविउ पइं अणवज्जु रज्जु एवंहिं जीविण-वि कवणु कज्जु ४  
 जिवं मुउ जिवं मारिय पंडु-जाय सब्भाउ कहिउ इहु कुरुव-राय  
 गउ एम भणेवि संगाम-कामु तिहिं तुरय-सहासेहिं सउणि मामु  
 एत्तहे-वि जयासुकुण्डुलेण पेसिउ सहएउ जुहिड्डिलेण  
 एत्तहे-वि ण काले किण्ण णाउ उव्वरिउ वइरि एत्तडउ भाउ ८

घत्ता

जयकारेवि राउ उक्खय-खग्गहं णिक्रिवहं ।  
 धाइउ सहएउ तिहि-मि सएहिं णराहिवहं ॥ ९

[१०]

कयं विहि-मि भीसणं रणं सिर-चरण-पाणि-दो-खंडणं  
 महावहल-गोंदलुदामयं सुरंगण-जयंगणं कामयं  
 महा-हलहलारवुल्लोलयं समुड्डियं हल्लहल-वोलयं  
 समुच्छलिय-धूलि-पब्भारयं णिवारिय-चक्खु-वावारयं ४  
 खणखणिय-तिक्ख-खग्गोहयं छणछणिय-सिंघ-संदोहयं  
 हणाहणि-मरंत-पाइक्कयं धुणाधुणि-पडंत-सीसक्कयं  
 लुणालुणि-त्तुलंत-अंतावलि णिसायर-पियंत-रत्तंजलि  
 वसावसण-भुत्त-वेयालयं सिवासिव-सियाल-सद्दालयं ८

घत्ता

तहिं तेहए संगामे भिडिय सउणि-सहएव किह ।  
सइं दूसेवि सच्चु थिय रउद्द गुरु-सउरि जिह ॥ ९

[११]

अण्णेत्तहे कुरुव-णराहिवेण पट्टविय रहहं सय-सत्त तेण  
वेढाविउ रण-मुहे धम्म-पुत्तु सच्चइं सिहांडि-पमुहेहिं गुत्तु  
संदाणिय संदण णिरवसेस किय मारुइ-पमुहेहिं धूलि-सेस  
अण्णेत्तहे सउणिहे किंकरेहिं विहिं लक्खेहिं खग्ग-भयंकरेहिं ४  
पायालेहिं पंडव-सेण्णु भग्गु सहएवं कट्ठेवि मंडलग्गु  
ओसारिय रोसवसारुणक्ख सउवल-पाइक्कहं वे-वि लक्ख  
दस सहस तुरंगहं ताम पत्त किय ते-वि रणंगणे वणिय-गत्त  
अण्णेत्तहे भीमें दुण्णिवार दुज्जोहण-भायर हय कुमार ८  
अण्णेत्तहे छंडेवि खत्त-धम्मु विणिवाइउ पत्थें रणे सुसम्म

घत्ता

अण्णेत्तहे सूउ सूय-चउक्कें परियरिउ ।  
सिणिसुयहो सुएण संजउ जीव-गाहि धरिउ ॥ १०

[१२]

तओ गलिय-माणं वलं कउरवाणं  
परं पहर-तट्ठं दिसोदिसि पणट्ठं  
णिवारिय-णरिंदं वियारिय-गइंदं  
विभासिय-रहोहं कडंतरिय-जोहं ४  
वणाउर-तुरंगं जुहिट्टिल-तुरंगं  
विओयर-णिसिद्धं धणंजय-पसिद्धं  
जमाउह-विहत्तं अ-दक्खविय-छत्तं  
धणुब्भिय-धयगं अणुग्गिरिय-खगं ८

सुसामिय-विहीणं	मुहंवुरुह-दीणं	
खरायव-वित्तं	वसा-रुहिर-मत्तं	
तिसा-सुसिय-गत्तं	छुहा-छमछमंतं	
गयं कहि-मि सेण्णं	मुहं तहि-मि अण्णं	१२

घत्ता

किव-गुरुसुय-भोय	तिण्णि-वि णासेवि कहि-मि गय ।	
णं मत्त-गइंद	केसरि-णहर-पहर-पहय ॥	१३

[१३]

तहिं अवसरे सउणिहे णंदणेण	सुर-णयर-समप्पह-संदणेण	
सत्तरिहिं सरेहिं सहएउ विद्धु	तेण-वि तेणवइहिं पडिणिसिद्धु	
अवरेक्के पाडिउ छत्त-दंडु	अवरेक्के धणुवरु किउ दु-खंडु	
किर कुरुव-णराहिव रणु ण भग्गु	+++++	४
णिय-सुय-विओय-विहलंघलेण	सहएउ विद्धु तिहिं सउवलेण	
धट्टज्जुणु पंचहिं छहिं सिहांडि	णण(?) थरहरंत लाइय तिकंडि	
पवणंगए दह वारह णरिंदे	सिणि-तणए सट्टि सत्तरि उविंदे	

घत्ता

सहएवें छिण्णु	सउणिहे समरे विअक्खणहो ।	
उदालिउ णाइं	दइवें धणु णिल्लक्खणहो ॥	८

[१४]

तो सउणि-मामेण	संगाम-कामेण	
णिय-सामि-सत्तेण	सेयायवत्तेण	
सिय-चामरोहेण	रह-मत्थयत्थेण	
फर-रयण-हत्थेण	कड्डिय-किवाणेण	४
आभिट्टमाणेण	+++++	
छिण्णाइं सयलाइं	रिउ-वाण-जालाइं	
तो भीम-पमुहेहिं	उत्थरेवि समुहेहिं	



पर-मंडलगाइं                      तहो दो-वि भग्गाइं  
गंधार-राएण                      वड्ढिय-कसाएण  
पडिहयउ पासेण                      मुच्छविओ तेण

८

घत्ता

तो पंडु-सुएण                      चेयण लहेवि समच्छरेण ।  
गंधारहो दिड्ढि                      घत्तिय णाइं सणिच्छरेण ॥

११

[१५]

तो सउणिय-मामें लउडि घित्त                      कुलदेवय णं चंदण-विलित्त  
स विमद्दिय मद्दिहे णंदणेण                      णं पूयण पुव्वे जणहणेण  
सहसत्ति सत्ति सउवलेण मुक्क                      तडि तडयडंति णं गिरिहे दुक्क  
सा क्रिय ति-खंड णउलोयरेण                      णं पिहिवि अद्ध-चक्केसरेण                      ४  
तो सउणिय-मामें धित्तु सल्लु                      दुब्भेल्लु भल्लु भल्लेरु भल्लु  
विणिवारिउ तमि-सर-मंडवेण                      विहिं वाहउ छिण्णउ पंडवेण  
अवरेण भुअंगम-विब्भमेण                      खय-काल-कयंत-जमोवमेण  
कालायस-खुरेण सिला-सिएण                      वलि-गंध-धूय-अहिवासिएण                      ८

घत्ता

सिरु सउणिहे छिण्णु                      तेण रणंगणु अंचियउ ।  
सिरु सामिहे देवि                      णाइं कवंधु पणच्चियउ ॥

९

[१६]

हए मद्दिपुत्तेण गंधार-राएण                      णरिंदाण भंगे असेसाण जाएण  
वले पंडु-पुत्ताण तुट्ठा-पहुट्ठाण                      धिए भंगमगुज्जेण धायरट्ठाण  
जुजुच्छू पिहा-पुत्त-जेट्ठस्स सिट्ठं                      जया तुम्ह सव्वाण वीराण इट्ठं  
तया णेमि अंतेउरं ताय-पासं                      सयं जाउ महिवट्ठु दुज्जोहणासं                      ४  
पुरं जत्थ तं हत्थिणामंतिमल्लं                      महाराय-रायाहिवाणं पहिल्लं  
पमोक्कल्लिउ तेण तं तत्थ णीयं                      रुवंतं कणंतं महासोय-लीयं  
ठियं गंपि गंधारि-पायाण मूले                      भुवंगी-समूहं व हुयामराले(?)

४

जुजुच्छू जणरेण एवं पवुत्तो	तुवं जाहि मा कुप्पिही धम्म-पुत्तो	८
ण दुज्जोहणे जीवमाणे अजुज्झं	वरं पंडवा वंधवा होंतु तुज्झं	
घत्ता		
तं वयणु सुणेवि	गउ रहक्खेण तुसंतु तहिं ।	
णच्चइ विहुणंतु	भीमु सयं भुव-जुयलु जहिं ॥	१०

इय रिट्ठणेमिचरिए धवलइयासिब-सयंभुएव-कए  
सत्तासीइमो सगो ॥

## अट्टासीइमो संधि

णिय-सेण्णु असेसु-वि खयहो गउ णिद्धंइयउ संवरइ ।  
एकल्लउ कुरुव-णराहिवइ वास-महासरे पइसरइ ॥

१

[१]

[दुवई]

बंधव-सयण-सोय-परिपूरेण ण-किय-दिसावलोयणो ।  
अट्टारह णिसाहय णिद्वालस-वस-घुम्मंत-लोयणो ॥  
कह-वि कह-वि थोवंतरे जाएवि सरवर-तीरे तेण तहिं थाएवि  
रइयंजलि-करेण उल्लाविय पंच-वि लोयवाल वोल्लाविय  
उप्परि जाम सीसु णिय-खंधहो तावं ण सरणु जामि जरसंधहो ४  
जाम सहेज्जियाउ वे वाहउ तावं धरित्तिहे हउं जे सणाहउ  
तइयउ दियहु जाम थिरु तिड्डइ कउरव-सेण्णु ताम णउ णिड्डइ  
जाम चउत्थी हत्थि महागय ताम जंति कउ वइरि अहम्मय  
मइं मारेवा पंच-वि पंडव वणे पंचाणणेण वेयंड व ८  
मं वोल्लेसइ कुरुवइ णड्डउ अच्छमि सलिलहो मज्झे पइड्डउ

घत्ता

अक्खिज्जहो वत्त महु-त्तणिय रायहो णरहो विओयरहो ।  
सुहु सुत्तउ कुरुव-णराहिवइ अच्छइ मज्झे महा-सरहो ॥ १०

[२]

[दुवई]

जइ कइयहु-मि भामि पिहि-पुत्तहं तो तुम्हइं जे सक्खिणा ।  
मंत पियामहेण जे दिण्णा होति मते सदक्खिणा ॥  
एम भणेवि पइड्डु महा-सरे परिमुक्क-मल-कमल-कमलायरे  
तहिं विहुरे-वि ण मेल्लिउ माणे जले णिवण्णु णिय-मंतह पाणे

तावं पराइय तिण्णि स-संदण	क्वि-कियवम्म-महागुरु-णंदण	४
तिहि-मि तेहिं वोल्लाविउ राणउ	वंधव-सयण-सोय-विद्दाणउ	
णाह विउज्झहि केत्तिउ सुप्पइ	जो भावइ सो रणमुहे जुप्पइ	
अम्हइं तिण्णि तुहारा किंकर	जिह पर-परहो पयावइ-हरि-हर	
पुणु पुणु आयामिय-संगामे	पहु वोल्लाविउ आसत्थामे	८
जइ पंडव ण छुद्ध जम-सासणे	तो हउं चडमि वलंते हुवासणे	

घत्ता

पहु पभणइ तुम्हिहिं सव्विहि-मि	वार-वार वेयारियउ ।	
अच्छंतु ताम ते पंच जण	एक्कु-वि समरे ण मारियउ ॥	१०

[३]

[दुवई]

भिच्च-गराहिवाण अवरोप्परु ए आलाव जावहिं ।

भीम-किराय-राय-रायहो अणु-रायावसरे तावहिं ॥

दुक्क पास ओणाविय-मत्था	विरइय कर-कमलंजलि-हत्था	
देव देव जले जलयर-क्खोहणु	मंत-जलेण सुत्तु दुज्जोहणु	
सो वोल्लाविउ तिहि-मि सहाएहिं	क्वि-कियवम्म-दोणदायाएहिं	४
णीसरि णाह चयारि-वि जुज्झहुं	पंडव-भडहं भडत्तणु वुज्झहुं	
जइ जम-सासणु ण णिय णिसागमे	तो पइसरहुं जलणे जालुग्गमे	
कुरुव-गराहिउ णिदए भुत्तउ	मणु(रणु?) अवहेरि करेप्पिणु सुत्तउ	
गय ते तिण्णि-वि कहि-मि स-रहवर	अम्हेहिं पत्त वत्त वत्तावर	८
ते परिपुज्जिय वसुमइ-णाहे	धायउ वलु रण-रहसुच्छाहे	

घत्ता

सरु वेढिउ तूरइं ताडियइं	किउ कलयलु हक्कारियउ	
दुज्जोहणु णीसरंतु मरहि	संखेहिं णाइं णिवारियउ ॥	१०

[४]

[दुवई]

सयल-महारहेहिं दुक्कुल्लिउ(दुंदुल्लिउ?) कुरु केत्तहे ण दिट्ठउ ।

पुणु उप्पण्ण भंति मणे सव्वहं दुक्करु जले पइट्ठउ ॥

सयं जुहिट्ठिलेण जोइयं सरं	भमंत-छप्पयं धयारियंवरं	
कुलीर-कुम्म-मच्छ -डिंडुहाउलं	स-सुंसुमार-णक्क-गाह-संकुलं	
अरण्ण-मत्त-हत्थि-जूह-डोहियं	वलाय-चक्क-हंस-कोच-सोहियं	४
पफुल्ल-पुंडरीय-संड-पंडुरं	समीरणाहयं तरंग-भंगुरं	
पयंग-पाय-वोहियारविंदयं	दिवा-पयाव-सुत्त-सप्प-विंदयं	
मुणाल-काय-कंति-लद्ध-गारवं	खलक्खलंति-लच्छि-णेउरारवं	
तुसार-हार-सार-तीर-फेणयं	महा-वलार-वोसरंत-घोणयं	८
अगाह-कद्दमोह-भग्ग-मग्गयं	सहाव-भीयरं सहाव-दुग्गयं	

घत्ता

हक्कारिउ कुरुवइ तव-सुएण एवमि एवमि धुउ मरणु ।

वरि पहरिउ जणहो णियंताहो दुक्कउ पंडव-जमकरणु ॥

१०

[५]

[दुवई]

णिव णिवसंति णवर जले जलयर मणुयहं एउ ण जुज्जइ ।

तुहुं अहिमाणेणं सुहड-चूडामणि अण्णु-वि पुहवि भुज्जइ ॥

उत्तमे सोमवंसे उप्पण्णउ	तहो तेत्तियहो छेय आदण्णउ	
संभरु विसु जउहरु कवडक्खउ	केस-गाहु वण-वसणावेक्खउ	
गो-ग्गहु पंचगावं-अवगण्णणु	जण्णसेणि-दासत्तण-मद्दणु	४
णिरवसेस मारावेवि राणा	अच्छिउ जले पइसिरेवि अयाणा	
णीसरु णीसरु आयहो थामहो	करि आरंभु पुणु-वि संगामहो	
जइ पंचह-मि एक्कु पइं मारिउ	तो महि तुहुं जि भुंजि कें वारिउ	
सरहसु कुरवराउ आहासइ	किं हरिणहं हरिणाहिउ णासइ	८

णवर णराहिव णिदए भुत्तउ

तेण महासरे पइसेवि सुत्तउ

घत्ता

जा जाहि जुहिडिल ताम तुहं हउं णिविण्णु को णीसरउ ।  
जइ तुम्हहं कारणु जुज्झिएण तो एकेकउ पइसरउ ॥

१०

[६]

[दूवई]

तव-सुय मंदवुद्धि दूसासण सरवरे कवण सुत्तहं ।

देहावरण-वूह-जल-दुग्गइं अग्गए रायउत्तहं ॥

अप्पुणु पुणु कायरहं पहाणउ

लक्खाहर-विवरेण पलाणउ

थरहरंतु परियाड्डिउ सीमहो

दाहिणे वाहु-दंडे थिउ भीमहो

समर-काले कुप्पुरिसहं भज्जहि

एवंहिं गलगज्जंतु ण लज्जहि

४

हउं पुणु जइया संकमि पाणहं

णर-णारायण-पेसिय-वाणहं

जिवं तुम्हहं जिवं तुह सामंतहं

तो किं महि देमि मगंतहं

सयण-विवज्जिएण सावज्जे

होउ होउ महो करणे रज्जे

तुहं भुंजहि हउं जामि तवोवणु

अथिरु सरीरु धण्णु धणु जोव्वणु

८

जर उत्थरइ कयंतु वियंभइ

लगमि धम्मे जेण सुहु लब्भइ

घत्ता

विहसेप्पिणु वुत्तु जुहिडिलेण मं करि अवरु वियप्पणउं ।

जो धम्मु सो जि हउं धम्म-सुउ महु जे समप्पहि अप्पणउं ॥

१०

[७]

[दुवई]

जइ तुहं असरणेण अथिरेण किलामिउ मणुय-जम्मणे ।

णीसरु कुरुव-राय तो जुज्झहो विण्णि-वि खत्त-धम्मणे ॥

अच्छउ भीमु पत्थु सहं जमलेहिं

रणपिडु रमहुं णियय-सिर-कमलेहिं

पभणइ कुरु-णरिंदु वहु-जाणउ

तुहं अम्हहं धयरइ-समाणउ

अज्जुणु जमल वाल ते तिण्णि-वि	जुज्झहुं पवण-पुत्तु हउं विण्णि-वि	४
जइ रहु छंडेवि दुक्कइ पाएहिं	चूरहुं एकमेक्कु गय-घाएहिं	
ताम विओयेण हकारिउ	तुहुं मइं पुव्वे जे थुत्थुक्कारिउ	
अच्छमि अज्जु कल्ले किर चूरमि	णिय-वंधवहं मणोरह पूरमि	
ताम णरिंद पइजेणामेल्लिउ	लइ जुज्झहुं रहु एहु आमेल्लिउ	८
मेल्लिउ सीहणाउ अप्फोडिउ	तेण रवेण णाइं णहु फोडिउ	

घत्ता

तं भीमहो वाहु-सट्टु सुणेवि	अमरिसु अंगे ण माइउ ।	
दुज्जोहणु मत्त-गइंदु जिह	पडिगय-गंधं धाइयउ ॥	१०

[८]

[दुवई]

चंचल-चरण-चालणुच्चालिय सयल धरित्ति-मंडलो ।

चल-चिक्कार-फार-विहडाविय-सेस-भुवंग-चुंभलो ॥

णह-मुह-सिहि-सिह-ताविय-सरवरु	पांडरव-खुहिय-सयल-जल-जलयरु	
करयल-कमल-तुलिय-गय-पहरणु	गिरि व स-सिहरु स-पहरणु स-विहरणु	
हरि व स-णहर-पहर-पसरिय-जसु	करि व स-तरुवरु सुमरिय-रणरसु	४
मणे परिहरिय-मरण-भय-अवसरु	अमरिस-रस-वस-किय-दिढ-परियरु	
वयण-कुहर-खर-पसरिय-मलहरु	रसइ व णहयले जुय-खय-जलहरु	
णयण-जुअल-वणदव-हय-गिरिगणु	सिय-कुरुकुल-मल-भय-कय-रण-मणु	
तणु-पह-तडि-णिणहविय-णर-सुरवर	ति-सिहर-कुरुड-भिउडि-भड-भयकरु	८
मउड-घाडिय-मणि-कर-सवलिय-जलु	जल-चलवलण-पहरिसिय-पर-वलु	

घत्ता

उम्मिल्लु मउडु मणि-वेयडिउ	मज्झे असेसहं अलि-गणहं ।	
लक्खिज्जइ ससि परिप्फुरियउ	विज्जु-पुंजु जिह णव-घणहं ॥	१०

[९]

[दुवई]

अद्धुम्मिल्ले मउडे पंडव-वले दिण्णइं तूर-लक्खइं ।

पडह-मुइंग-संख-दंडि-काहल-गोमुह-डंवरक्खइं ॥

जिह गयउरे वसुमइ भुंजंतहो

तूरइं ताइं ते जि सुहि पंडव

ते करि-मयर-मत्त तंवेरम

ते तरंग-तुरंगग्ग-तुरंगम

ताइं सेय-सयवत्तइं छत्तइं

ते परिभमिर-भमर सरे गायर

तं सु-मणोरहु सरवर-राउलु

एम तरंतु तरंतु विणिग्गउ

तिह एवंहि-मि लील-णिग्गंतहो

धवल-धयायवत्त-किय-मंडव

ते धयरट्ट-जाय सु-मणोरम ४

ते ओहार महारह उत्तम

धवल-वलाया-चामर-छत्तइं

ते जलयर किंकर वस भायर

सगुण-सयण-जण-जणिय-रमाउलु ८

माणस-सरहो णाइं सुर-वर-गउ

घत्ता

सहुं कमलेहिं कुरुवइ मुह-कमलु

णं पुण्णिम-इंदु-विंवु थियउं

रय-सियालि-परिचुंवियउं ।

तारा-रिक्ख-करंवियउं ॥ १०

[१०]

[दुवई]

णिग्गउ कुरु-णरिंदु वंचंतु असेसइं वइरि-सेण्णइं ।

कइकय-करुस-कासि-सिवि-सोमय-सिंजय-गण-वरेण्णइं ॥

जिह गउ गय-जूहइं अइसंधेवि

परिवड्ढिय-रण-रहसुच्छाहें

अम्हइं वहुयइं तुहुं एक्कल्लउ

अज्जु-वि तुहुं जे राउ महि भुंजहि

अज्जु-वि ते तुरंग ते गयवर

अज्जु-वि ते-वि भिच्च हियइच्छा

अज्जु-वि तं गयउरु सुहगारउ

धाइउ पवण-पुत्ते लउ वंधेवि

तो वोल्लविउ पंडव-णाहें

खत्तिय-धम्मु कहि-मि णउ भल्लउ ४

अज्जु-वि णिरवसेसु जसु पुंजहि

अज्जु-वि ते णरिंद ते रहवर

अज्जु-वि अम्हइं आणपडिच्छा

अज्जु-वि तं वइसणउ तुहारउ ८



अज्जु-वि विविह ताइं वाइत्तइं  
पहु-वयणावसाणे मणे दुड्डउ

अज्जु-वि ताइं जे चामर-छत्तइं  
पभणइ धायरड्डु आरुड्डउ

घत्ता

एकल्लउ तुहुं अम्हइं वहुय कवण कीड एह भडयणहो ।  
करि-कुंभ-त्थलइं दलंताहो कइ सहाय पंचाणणहो ॥

११

[११]

[दुवई]

कइ जलणहो सहाय वण-डहणे [कइ] पयंगहो तम[ह] णिवारणे ।

एक्कु-वि हणइ वहुय वहुएहि-मि एक्कु ण हम्मइ रणे ॥

मुहियए जे पंडव-परमेसर

महु जे देहि महु तणिय वसुंधर

तुम्हइं तहिं जि काले परिच्छिणी

जिणेवि दुरोयरेहिं तहिं दिण्णी

तेरह वरिसइं अम्हहुं खंती

एवंहिं किंकर सिरेहि विढत्ती

४

णउ भुंजमि णउ देमि कुल-क्खए

जो भावइ सो लेउ परोक्खए

जइयहुं जयमेयहि विण्णि-वि सग्गिय(?) पंचहिं पंच गाम पुणु मग्गिय

तइयहुं स-विणय वाय णिगिण्णी

अच्छउ अद्दु ण थत्ति वि दिण्णी

एवंहिं को सब्भाउ जुहिड्डिल

विण्णि-वि जयसिरि-गहणुक्कंठुल ८

विण्णि-वि एक्क-दव्व-अहिलासिय

विण्णि-वि गयउर-रण-णिवसिय

घत्ता

जिवं तुम्हहुं मइं मुसुमूरिणण जिवं मइं तुम्हहिं घाइएहिं ।

महि भुत्ती सोहइ तुम्ह पर कवणु सोक्खु सहं दाइएहिं ॥

१०

[१२]

[दुवई]

तो तव-णंदणेण सण्णाहु समप्पिउ कउरव-णाहहो ।

सो-वि पइड्डु ताम अब्भंतरे रवि व णवंवुवाहहो ॥

रक्खिउ जो ण दोण-गंगेयहिं

कण्ण-सल्ल-पमुहेहिं अणेयहिं

सो रक्खिज्जइ किं मइं लोहें

रज्जहो तणए काइं किर मोहें

घग्घर-माला-सद्द-सणाहें  
 पुणु सीसक्कु लयउ महिपालें  
 तुलिय गयासणि रोसाऊरिउ  
 पंडव-पत्थिवेण तो वुच्चइ  
 अंतरे ताव परिट्टिउ माहउ  
 आयहो भीमसेणु रणे मुच्चइ  
 भणइ विओयर पीडिय-पूयण

घत्ता

लइ एउ एउ महु संमुहउ  
 जम-काउ करोडिहिं रुहिर-जलु

णं पहु एवं वुत्तु सण्णाहे  
 णं गिरि-सिहरु छण्णु घण-जालें  
 कहिं मह एवंहिं जाहि अ-चूरिउ  
 पंचहं धरहि एकु जं रुच्चइ  
 तुज्झ समुहु ण समिच्छइ आहउ  
 जसु वज्जमउ वि णरु ण पहुच्चइ  
 मं धरि मेळ्ळि मेळ्ळि महसूयण

४

८

दावमि फलु आओहणहो ।  
 पियउ अज्जु दुज्जोहणहो ॥

११

[१३]

[दुवई]

पभणइ पउमणाहु कुरुवेह-परक्कम किण्ण वुज्झहो ।

णिहउ वलेण जेण दूसासणु तेण वलेण जुज्झहो ॥

जेण वलेण हिडिंवु वियारिउ  
 जेण वलेण मंड किम्मीरहो  
 जेण वलेण जडासुरु फेडिउ  
 जेण वलेण विणासिउ कीयउ  
 तेण वलेण विओयर जुज्झहि  
 जुत्ताजुत्तु ण किंचि वियप्पइ  
 विस-जउहर-जूयइं वीसरियइं  
 दप्पुब्भडु पभणइ पवणंगउ

घत्ता

पहु देउ देउ देहावरणु  
 पेक्खेसहि एत्तिउ महुमहण

जेण वलेण वगासुरु मारिउ  
 कड्ढिय पाण-दाण स-सरीरहो  
 जेण जयद्दहु रणे पच्चेडिउ  
 भाणवंतु जम-सासणु णीयउ  
 किं जेड्हो आचरणु ण वुज्झहि  
 को वइरिहे सण्णाहु समप्पइ  
 पइं मारावइ दुण्णय-भरियइं  
 एहु किर कासु ण मज्झे चंगउ

४

८

लेउ लेउ कुरु-विट्टलउ ।  
 मइं किउ मासहो पोड्लउं ॥

१०

[१४]

[दुवई]

कोमल-कमल-वाहु कमलाणु कमल-विसाल-लोयणो ।  
कमलालिंगियंगु कमलुक्कमु कमलालि-भारि-पहरणो ॥

परिमुक्कमल-कमलदल-करयलु	पभणइ णर-सुर-मुरिय-उरत्थलु	
लइ सण्णाहु तुहु-मि तं पावणि	जं आएवि वि गुणहि गयासणि	
वियणे वणंतराले पइसेप्पिणु	भीमसेणु लोहमउ थवेप्पिणु	४
जो सुरवर-णियरेहिं ण जिज्जइ	दंति-दंत-मुसलेहिं ण भिज्जइ	
पर-पहरणइं जंति जहिं भज्जेवि	महिहरे मेह-कुलइं जिह गज्जेवि	
एम वुत्तु जं पंकयणाहें	भणइ भीमु महु काइं सण्णाहें	
देहावरणु सरीरु जे मेरउ	आयहो पासिउ को ण वरेरउ	८
मारुइ एण काइं अवलेवें	मंड मंड परिहाविउ देवें	

घत्ता

जो लोहहो भार-सएण किउ	सव्व-पयारें वज्जमउ ।	
सो भीमहो वड्ढिय-रण-रसहो	फुट्टेवि उरे सण्णाहु गउ ॥	१०

[१५]

[दुवई]

तो सण्णद्ध-कुद्ध उद्धाइय विण्णि-वि एकमेक्कहो ।  
आयउ कामपालु तहिं काले गवेसउ जायवक्कहो ॥

अंधय-विट्ठि-दसारुह-भोएहिं	संकरिसण-गरुडासण-तोएहिं	
णंद-कुंत-पिहु-सिणि-अंकूरेहिं	ओएहिं अवरेहि-मि णर-सूरेहिं	
कामपालु पट्टविउ गवेसउ	सव्वेहिं मिलेवि दिण्णु संदेसउ	४
सच्चइ-वासुएव पेक्खेज्जहिं	जइ जियंति तो एम भणेज्जहि	
जरसंधहो साहणइं अणेयहिं	जिह सायरहो जलइं अ-पमेयइं	
जिह मेहउल-सयइं उत्थरियइं	एत्तिय वासर अम्हेहिं धरियइं	
एवंहिं धरेवि ण सक्कइ माहव	तुम्हं जइ-वि पियारा पंडव	८

जावय-लोउ तो-वि अवलोयहि जो जसु मल्लु तासु तं ढोयहि  
घत्ता

णिय विज्जा-पाणें सयलु वलु रुपिणि-पुत्तें रक्खियउ ।  
जइ एत्तिउ पत्तु ण महुमहणु तो जरसंधें भक्खियउ ॥

१०

[१६]

[दुवई]

मागह-सूय-वंदि-वेयालिय-वहलुच्छल्लिय-मलहरो ।

जुत्त-महातुरंग-रहु ढोइउ चडिउ तुरंतु हलहरो ॥

गउ कुरुखेत्तहो एक्कें पासें  
जसु पुंजोवमेण णिय-गत्तें  
लंगल-पहरणेण वलवंतें  
तुरय-चउक्कें हंस-वियारें

रहवरेण सुरगिरि-संकासें  
सररुह-पंडुरेण वर-छत्तें  
ताल-महाधएण धुव्वंतें  
दारु-महत्तरेण जत्तारें

४

गउ तउ जउ सच्चइ जउ माहउ  
णं जले विरहिउ सायरु जलहरु  
खीर-महोवहि णं उच्छल्लिउ

जउ कुरुवाहिव-भीम-महाहउ  
णं णिल्लंछणु छण-दिण-ससहरु  
णं हिमवंतु कहि-मि संचल्लिउ

८

घत्ता

जो पंडव-वल परिवेढियहो गयउ आसि जम-सासणहो ।  
सो णाइं णियत्तेवि अण्णमउ आउ जीउ दूसासणहो ॥

९

[१७]

[दुवई]

आइउ कामपालु रहु छंडेवि पंच पयाइं पाएहिं ।

देवइ-णंदणु-वि सवडम्महु सहुं कुरु-पंडु-जाएहिं ॥

हरि अवरींडउ रेवइ-कंतें  
णं लवणोवहि खीर-समुदें  
णावइ असिय-पक्खु सिय-पक्खें  
जउण-वाहु णं गंगा-वाहें

अंजण-पायउ णं हिमवंतें  
कालकूड-विस-पुंजु व रुदें  
णावइ अलि-गणु पंकय-लक्खें  
णं वम्महु चंदप्पह-णाहें

४

## रिद्धणेभिचरिउ

२३२

णं णव-काल-मेहु छण-चंदें  
परमासीस-पुव्वु संभासिउ  
तेण-वि दूरवरुज्झिय-संदणु  
तिण्णि-वि एक्कहिं मिलिय सणेहा  
घत्ता

तिह अवरुंडिउ हरि वलहदें  
पच्छए धम्म-पुत्तु आसासिउ  
जयजयकारिउ रोहिणी-णंदणु  
तिण्णि-वि काल-हुवासण जेहा

८

हरि कालउ हलहरु पंडुरउ  
णं वहु-जल-णिज्जल-जलहरुहं

राउ सुवण्ण-वण्ण-णिलउ ।  
तइयउ विज्जु-पुंजु मिलिउ ॥

१०

[१८]

[दुवई]

सव्वहं दिण्णु खेमु संमाणिय सव्वासीस-वयणहिं ।

पुणु पुणु कुरुव-राउ अवलोइउ वाह-भरंत-णयणहिं ॥

एत्तहे कुरुव-राउ मणे रुच्चइ  
एत्तहे कुरुव-राउ एक्कल्लउ  
एत्तहे कुरुव-राउ जइ ईहइ  
थिउ मज्झत्थीभावें हलहरु  
को जाणइ जउ केत्तहे होसइ  
तावं समप्पइ पिहिवि सुधीमहं  
एत्तहे तेत्तहे जाहुं णिरुत्तउं

एत्तहे णिय-भाइहे ण पहुच्चइ  
एत्तहे णरु णारायण-भल्लउ  
एत्तहे पंकयणाहहो वीहइ  
कहिउ असेसु स-वइर-वइयरु  
तं णिसुणेवि महूसूयणु घोसइ  
लउडि-जुज्जु दुज्जोहण-भीमहं  
तं पडिवण्णु जणदण-वुत्तउं

४

८

घत्ता

कुरु-णाहु विओयरु वे-वि जण  
वलएवें धरेवि सयं भुएहिं

स-कवय गरुय-गयाउह ।  
णिय कुरुखेत्तहो संमुह ॥

९

इय रिद्धणेभिचरिए धवलइयासिय-सयंभुएव-कए  
णामेण मउडभंगो अट्टासीमो इमो सग्गो ॥

## णवासीइमो संधि

परिहिय-सण्णाहहो लउडि-सणाहहो परिपारद्धाओहणहो ।  
जिह गयहो महागउ रोस-वसंगउ भिडिउ भीमु दुज्जोहणहो ॥ १

[१]

सरहस दप्पुब्भड भिडिय भीस	वलएवें चालिय वे-वि सीस	
जिह जम-वइसवण पुरंदरेण	जिह उहय-पक्ख छण-वासरेण	
जिह मंदर-मेरु जुअ-क्खएण	जिह जइ-आलाण महागएण	
जिह चंद-दिवायर उग्गमेण	जिह गंग-जउण दह-संगमेण	४
तिह कुरुव-विओयर हलहरेण	रण-रंगहो मज्झे स-मलहरेण	
पइसारिय दुइ-वि स-लउडि-दंड	णं मत्त-महागय उद्ध-सुंड	
णं जमल-जलय विज्जुल-णिसण्ण	णं भीम भुवंगम णाग-कण्ण	
णं तरु स-साह णं गिरि स-सिंग	हय गोमुह डंवर दडि मुइंग	८

घत्ता

भुवणंतर-पूरइं	दिण्णइं तूरइं	वहिरिय-सयल-दियंतरइं ।	
अमुणिय-परिमाणइं	अमर-विमाणइं	णहयले थियइं निरंतरइं ॥	९

[२]

अइरावए सुरवइ सुरए भाणु	अय-पिट्ठि-परिट्ठिउ चित्तभाणु	
जमु महिसे णिसायरु अच्छहले	मयरहरु मयरे मयरेक्क-मल्ले	
मारुउ सारंगे विमाणे जक्खु	वंभाणु हंसे गोविसे तियक्खु	
गोहए रुद्धाणि मऊरे खंदु	मंडुक्के सुक्कु पंचमुहे चंदु	४
अवरेहिं अवर आरूढ देव	थिय अंवरे लंवंवुरुह जेवं	
णाणाहरणाभा-भूसियंग	णाणा-परिहाण-वरुत्तमंग	
णाणाउह णाण-णेयपत्त	णाणा-धय-चामर-सोह-पत्त	
णाणाविह-वर-वाहण-विलग्ग	रण-रंगंगणु जोयणहं लग्ग	८

घत्ता

कुरु-पंडव-वीरेहिं छइय-सरीरेहिं वयणाहोय ण ल्हिक्कविय ।  
 णावइ विहिं मेहेहिं सामल-देहेहिं रुंद-चंद दुइ दक्खविय ॥ ९

[३]

वोल्लंति तावं णहे अच्छराउ एहु भीमुसेणु एहु कुरुव-राउ  
 णउ जाणहुं कवणु अजेउ मल्लु पेक्खहुं अणिरुवमु कोउहल्लु  
 गय-घाएहिं आएहिं एक्कमेक्कु चूरेवउ तोसिउ जाम सक्कु  
 अवरेक्कु पवुच्चइ जुवइ-विंदु मइं थुत्थुक्कारिउ कुरु-णरिंदु ४  
 अवरेक्कए वड्ढिय-मच्छराए णिब्भच्छिय अच्छर अच्छराए  
 किं पइं जे सुपत्तहं दाणु दिण्णु किं पइं जे मत्ते तव-चरणु चिण्णु  
 किं तुज्झु जे जोव्वणु वहु-वियारु किं तुज्झु जे सिरे धम्मिल्ल-भारु  
 किं तुज्झु जे णयणइं दीहराइं किं तुज्झु जे अंगइं मणहराइं ८

घत्ता

किं तुहुं जे भुज्जइ एक्कहिं जुज्जइ सग्गें सहं सग्गाहिवइ ।  
 जं अवरहिं वारहि थुत्थुकारहि अप्पुणु कुरुव-णराहिवइ ॥ ९

[४]

तो णवर हक्कारिउ पंडु-पुत्तेण तव-तणय-जमलज्जुणाणंत-गुत्तेण  
 अणवरय-वज्जंत-वाइत्त-संडेण उदंड-जमदंड-सम-लउडि-दंडेण  
 अप्फोडणोरालि-वहिरिय-दियंतेण भू-भंग-भिउडी-पभेसिय-कयंतेण ४  
 कोवग्गि-जालोलि-पज्जालियंगेण वल-चरण-संचार-चूरिय-भुवंगेण  
 विस-दाण-जउ-जलण-जूयावराहेण णव-रयसला-दोमइ-केस-गाहेण  
 णिव्वास-वणवास-दूसह-किलेसेण मच्छोवसेवा-कयणण्ण-वेसेण  
 भूभंग-बंधेण संधी-णिसंतेण उच्छण्ण-णीसेस-सामंत-रोहेण  
 आएण पावेण पाविट्ट खद्धोसि कहिं जाहि वहुवेण कालेण लद्धोसि ८

घत्ता

वुच्चइ स-कसाएं कउरव-राएं संढहो खलहो अ-लज्जियहो ।  
 आढवियाओहणु हउं दुज्जोहणु किं वीहमि गल-गज्जियहो ॥ ९

[५]

लइ लउडि विओयर देहि घाउ तुहुं पंडु-पुत्तु हउं कुरुव-राउ  
 जाणिज्जइ एवंहिं एत्थु काले गय-गरुय-घाय-घट्टण-वमाले  
 एक्कल्लउ हउं तुम्हइं अणेय पइं सहुं संचूरमि सयल एय  
 धट्टज्जुणु अज्जुणु धम्म-पुत्तु सच्चइ सिहांडि गोविंद-गुत्तु ४  
 पवणंजउ पभणइ वासुएव गय-घाएहिं चूरिउ पेक्खु केवं  
 तव-तणय सइत्तउ होहि अज्जु महु कित्ति-माल तुहुं भुंजि रज्जु  
 आयहो दुणिमित्तइं मउड-भंगु धूमंतु दिसउ कंपउ पयंगु  
 थरहरउ वसुह गह-दुत्थु होउ मइं कुद्धए कुरुहुं ण जीव-लोउ ८

घत्ता

कोवग्णि-पलित्तें मारण-चित्तें भीमें मणि-किरणुज्जलिय ।  
 उग्गिण्ण गयासणि जम-मण-तासणि फुरिय झत्ति णं विज्जुलिय ॥ ९

[६]

गय भामिय भीमें धूधुवंति णं भूक्खिय देवय भूभुवंति  
 णं जलण-जाल जलजलजलंति णं णाग-कण्ण चलचलचलंति  
 णं वइवस-संखल खलखलंति णं काल-जीह ललललललंति  
 णं अब्भ-माल दडदडदडंति णं जम-रंचणि गडगडगडंति ४  
 कुरुवेण-वि भामिउ लउडि-दंडु उड्ढाविउ अमर-विमाण-संडु  
 कंपाविउ महिअलु चालिय गिरिंद आलाणमुवाविय दिस-गइंद  
 ओसरेवि परिट्ठिय दूरे रंगु सो णत्थि ण जसु किउ दिट्ठि-भंगु  
 दुज्जोहण-भीम महागएहिं उवसग्गु णाइं किउ देवएहिं ८



घत्ता

खणे पवणु भयंकरु खणे वइसाणरु खणे पडिसद्दु समुच्छलइ ।  
तुडंतु वलंतउ वाहिरि जंतउ तिहि-मि णएहिं तिहुयणु चलइ ॥९

[७]

भड भिडिय दुइ-वि पिहितणय-मउडि सुर-कुलिस-कढिण-कर-लइय-लउडि  
जिह जमवइ वियलिय कुडिल-भडहं जिह सुरवर-करिवर वलिय समुह  
जिह मयवइ पसरिय-णहर-पहर किय-णिसिय-भिउडि परिफुरिय-अहर  
णिय-णयण-जलण-किय-भुअण-पलय मुह-कुहर-पवण-हय-जलय-वलय ४  
जम-करण-करण-अणुकरण-कुसल रण-कमल-मिलिय-सुर-णयण-भसल  
दह-दह-णह-पह-जिय-तरुण-तरणि कर-चलण-वलण-विलविय-धरणि  
अणवरय-भमिर जस-भरिय-भुवण गय-पहर-मरण-भय-पसर-मुवण  
रण-रस-वस समरे ससमिय दुइ-वि तणु-तडि-णिणहवण-सयण-सम-रुइ-वि८  
[जयदेवेन अचलधृतिरिति पिंगले]

घत्ता

ते भीम-सुजोहण वर-गय-पहरण अहिलसंति महि-विजय-सिरि ।  
दीसंति सुरिंदें णरवर-विंदें णं स-संझ उययत्थ-गिरि ॥ ९

[८]

हरि-करि-आयारेहिं पइसरंति वारहहि-मि सुत्तिहिं संचरंति  
सर-वारण-कोंत-णिवारणेहिं अवरहि-मि वइरि-वियारणेहिं  
वत्तीसहिं करणेहिं वावरंति चूडामणि-पमुहेहिं परिभमंति  
संकोय-विकोयावत्तणेहिं गय-पडियागय-गोमुत्तणेहिं ४  
अहि-दावण-परिधावण-वइहिं उवणत्थोणत्थ-महागइहिं  
अब्भंतर-दाहिण-मंडलेहिं सव्वावसव्व-हुलि-गोदलेहिं(?)  
चउमुह-उद्धर-पडिउद्धरेहिं गय-घाएहिं आएहिं णिद्धरेहिं  
अट्टहि-मि णिवंधेहिं वाहु-दंड वंधंति परोप्परु रणे पचंड ८

घत्ता

तो पसरिय-पसरें लद्धावसरें भीमें आहय गयए गय ।  
रक्खिय तिहिं भंगिहिं खर-पवणग्गिहिं तेण ण सा सय-खंड गय ॥ ८

[९]

तो गया-घट्टणे उट्टिओ पावओ धूम-जालावली-दिण्ण-संतावओ  
तेण तेलोक्क-चक्कं समुदीवियं थावराणं पि उट्टावियं जीवियं  
तेण सट्टेण भिण्णं असेसं जयं छप्पएणं व गुंजावियं कंजयं  
तेण वाएण उट्टाविया मेहया मेहया जिवं मही-मंडलंते हया ४  
ताण संघट्टणे उट्टिया विज्जुला विज्जुला-हम्ममालागिरी-आउला  
भग्ग-सिंगा धरा-मंडलं पाविया पत्त-मत्तेहिं भूमी य कंपाविया  
भूमि-कंपेण रोसाविया पण्णया पण्णया जाय-कोवग्गि-संपण्णया  
तेण कोवग्गिणा सोसिया सायरा सायराणंत-काले सुरा कायरा ८

घत्ता

पइसेवि स-कसाएं कउरव-राएं मत्थए भीमु महा-गयए ।  
हउ अहिणव-मेहें सामल-देहें णं कुल-सेलु व विज्जुलए ॥ ९

[१०]

जं पइसेवि सव्वें मंडलेण हउ भीमु भुत्त-भू-मंडलेण  
तं एक्कु-वि पउ ण पयट्टु वीरु थिउ वलेवि धराधर-धीरु धीरु  
गय भामेवि आहउ कुरुव-राउ दुक्कालु व वंचिउ तेण घाउ ४  
दुज्जोहणु पुज्जिउ सुरवरेहिं जेम धणय-कुमारु पुरंदरेहिं  
आसंक्रिय पंडव तहिं पमाणे णउ जाणहुं होसइ किं णियाणे  
तो हत्थिणायपुर-वासिएण पइसेप्पिणु मग्गे कउसिएण  
पांडवारउ उरयडे दिण्णु घाउ पवणंगउ मुच्छा-विहलु जाउ  
णिक्कलिउ रत्तु सोत्तंतरेहिं गउ मुउ मुउ वुच्चइ भायरेहिं ८

घत्ता

रयणीयरि-कंतहो कुरु-चक्खंतहो जं वहु-कालें वड्डियउ ।  
तं अणयण-जाएं एक्कें घाएं भीमहो लोहिउ कड्डियउ ॥ ९

[११]

जं पडिवउ तेण ण दिण्णु घाउ तं देवें मोहिउ कुरुव-राउ  
वोल्लणहं लग्गु लइ लउडि-दंडु जें जें महु फेडमि समर-कंडु  
हेवाइउ तुहुं रणणीयरेहिं दूसासण-पमुहेहिं कुरु-णरेहिं  
दुज्जोहणु हउं तइलोक-मल्लु सुर-णर-उप्पाइय-कोउहल्लु ४  
तिल-संढे एक्कें कवणु गण्णु लइ एवंहिं उट्टउ को-वि अण्णु  
जोइज्जइ कुरु-मुर-घायणेहिं अवरोप्परु णर-णारायणेहिं  
तहिं काले विवज्जिय-वेयणेण कह कह व समागय-चेयणेण  
सीहेण व आमिस-लुद्धएण कालेण व जगहो विरुद्धएण ८

घत्ता

जमकरणुक्करिसें वद्धामरिसें कुरुवइ-पासु पढुक्कियउ ।  
णयणग्गि-करालेहिं जाला-मालेहिं भीमें झत्ति झुल्लुक्कियउ ॥ ९

[१२]

तो महावीर वीरा समालग्गया साणुमंत व्व उत्तुंग-सिंगग्गया  
कालमेह व्व सोयामणी-दारुणा कालदूय व्व दंडत्थ-कोवारुणा  
मत्त-हत्थि व्व आलाण-उम्मूलया केसरिंद व्व उग्गिण्ण-लंगूलया  
साउहा धाइया भीम-दुज्जोहणा भीम भीसावणा भीम-दुज्जोहणा ४  
एक्क-दव्वाहिलासी महा-पंडवा दो-वि ते धायरट्टाहया पंडवा  
जेण जे आसिया सारसा सारसा तेण ते सामि सासामि सासारसा  
सारसासार साआसिया जेण जे सायसा सारिसा सामिसा तेण ते  
वीर भाए गया आगया भारवी वीरहा सीरिया वारि सीहारवी ८

सावहाणा रसा सारणा हावसा

आइया आसुआ आहया सालसा

घत्ता

णिवडंतुड्ढंतेहिं करणइं देंतेहिं  
णं सुरवर-संढेहिं दोहिं वियड्ढेहिं

रंगभूमि णिरु णिदलिया ।  
एक विलासिणि दरमलिया ॥

१०

[१३]

करण-तंत-कलसुत्त-घाएहिं

संचरंति मग्गेहिं आएहिं

उप्पयंति धावंति आहवे

घाय दिति णिय-णिय-पराहवे

घाए घाए उड्ढंति हुयवहा

घाए घाए घुम्मंति दिसिवहा

घाए घाए डोळ्ळंति महिहरा

घाए घाए कंपइ वसुंधरा

४

घाए घाए ओसरइ सायरो

घाए घाए लंवइ दिवायरो

घाए घाए ओसरइ सुरयणा

घाए घाए उत्थरइ जलयणा

घाए घाए वण-वियण-भेभलो

घाए घाए घोसंति कलयलो

घाए घाए सय-चंदमंवरं

घाए घाए णं मेह-डंवरं

८

घत्ता

हरि पुच्छिउ पत्थें कहि परमत्थें

भीमसेण-दुज्जोहणहं ।

वल-विक्रम-सारहं दिण्ण-पहारहं

कवणु जिणेसइ विहिं जणहं ॥

९

[१४]

णारायणु पभणइ कहमि तुज्झु

आढवहि विओयर कवड-जुज्झु

ण पहुच्चइ णाएं पवण-जाउ

विण्णाणेणं दुज्जउ कुरुव-राउ

लोहमउ करेप्पिणु भीमसेणु

गय गुणिय जेण रण-कामधेणु

तव-तणएं णिय सण्णाहु दिण्णु

तिहिं आएहिं जिणणहं केण तिण्णु

४

जइ कहव तुलगेहिं पहय पाय

तो तुम्हेहिं पिहिविहे सव्वराय

अह हणेवि ण सक्किउ कह व सत्तु

तो वणे पइसरउ अजायसत्तु

णिसुणेवि अणंतहो तणिय वाय

सण्णए णरेण दक्खविय पाय

परियच्छिउ तेण-वि तेत्थु काले

अवसरु ण लद्धु पर भड-वमाले

८

घत्ता

आगारेहिं करणेहिं सुत्तावरणेहिं वंधेवि घाएहिं गयहि रणे रणे ।  
दुज्जोहण पूरउ भीमु अपूरउ तेण विसूरइ पत्थु मणे ॥

९

[१५]

सामरिस स-पहरण सावलेव रुहिरारुण फुल्ल-पलास जेवं  
ओसारु दिंति पडिउत्थरंति णं मंदर विण्णि-वि परिभमंति  
आगरिहिं दसहि-मि पइसरंति सुत्तइं वारह-मि ण वीसरंति  
करणइं वत्तीस-वि दक्खवंति णं सीस परोप्परु सिक्खवंति ४  
अट्टहि-मि णिवंधेवि वंध लेति आहुट्टेहिं घाएहिं घाय दिंति  
उडुंति पडंति वलंति धंति सरहस स-परीसह वीसमंति  
तहिं अवसरे कुरु-परमेसरेण आडोहिय-वास-महासरेण  
दढ-कढिण-पलंव-भुयग्गलेण पइसेवि अब्भंतर-मंडलेण ८

घत्ता

रण-रहसुद्दामे सव्वायामे मेल्लिय लउडि लोह-घडिय ।  
भीमहो भीसावणि मण-संतावणि णं खय-विज्जु जेम पडिय ॥

९

[१६]

जं संख-देसे गय-घाउ दिण्णु णं कुलिस-णिहाएं गिरि व भिण्णु  
घुम्माविउ पाविउ परम मुच्छ चेयण-वि समागय तुच्छ तुच्छ  
उट्टिउ रुहिरारुणु दुक्खु दुक्खु णं कुसुमिउ रत्तासोय-रुक्खु  
णं दंडाहयउ महा-फणिंदु तिण-समउ गणेप्पिणु कुरु-णरिंदु ४  
उद्धाइउ करि करिवरहो जेवं आसण्ण परिट्टिय सव्व देव  
जा मेल्लिय लउडि विओयरेण सा वंचिय कुरु-परमेसरेण  
पडिवारउ उप्परि दिण्णु घाउ उप्पइउ णहंगणे कुरुव-राउ  
उल्लेवि ण सक्किउ णवर दूरु णिवडंतहो आहय वेरिओरु ८

८

घत्ता

भीमहो गय-घाएं विणु ववसाएं कुरुवइ जण्णवडेहिं पडिउ ।  
वसुमइ वि रसोक्खइं लइ णिय-सोक्खइं णं मरिसावउ आवडिउ ॥ ९

[१७]

कह कह व समुट्ठिउ लउडि लेंतु णं करणइं जण्णअडेहिं देंतु  
णं अहि दंडाहउ सलवलंतु णं पक्खि अ-पक्खु पडिक्खलंतु  
णं णिड्डहंतु णयणाणलेण को संदु णिहम्मइ पक्खलेण  
कहिं गयउ आसि विस-जलण-जूवे दोमइ-केसग्गह-समय-भूवे ४  
हउ एवंहिं णिय कालेण खद्धु गउ एम भणंतु धरायलद्धु  
णिवडंतं णिवडिय रय-णिहाय उप्पाय असेसहो जगहो जाय  
महि-कंपु दिवायर-छाय-भंगु आगासहो वरिसइ वहल पंसु  
स-रुहिर दह-कूव-तलाय जाय विवरीय वहाविय णइ-णिहाय ८  
उप्पाय-कवंधइं भीयराइं णच्चिय वहुय-कम-वहु-कराइं

घत्ता

तहिं काले विओयरु वड्ठिय-मच्छरु जहिं दुज्जोहणु तेत्थु गउ ।  
पेक्खंतहं देवहं हरि-वलदेवहं वामें पाएं मउडु हउ ॥ १०

[१८]

जं मलिउ मउडु मारुय-सुएण भुयइंदाहोय-भीयर-भुएण  
तं धिद्धिक्कारिउ सुरवरेहिं णहयले महि-मंडले णरवरेहिं  
मच्छाहिव-सोमय-सिंजएहिं अवरेहि-मि लद्ध-महाजएहिं  
खत्तिय-कुले होएवि किउ अजुत्तु पाएण ण छिप्पइ रायउत्तु ४  
तो विज्जु-पुंजु जिह जलहरेण उग्गिण्णु महाहलु हलहरेण  
अमणूसउ मण्णेवि कामपालु किह पाएं छिप्पइ भूमिपालु  
सिरु णावेवि णिवारिउ माहवेण अवरोप्परु काइं महाहवेण  
पंडवहं म उप्परि करहि रोसु अवराहहं केरउ सव्वु दोसु ८

घत्ता

परिवड्डिय-मलहरु पभणइ हलहरु मुहु जोएवि दामोयरहो ।  
हरि भायरु वुच्चहि तुहुं महु रुच्चहि तेण ण भिडमि विओयरहो ॥ ९

[१९]

गोविंद गयागमे एम वुत्तु	ण णिहम्मइ णाणि हेड्ड जुत्तु(?)	
जिह जिह आहासइ सीर-धारि	तिह तिह पवणंगउ कम्म-कारि	
सय वार करइ सिर-मउड-भंगु	णिहुयउ जे णिहालइ सल्लु रंगु	
गउ णिय-थाणंतरु कामपालु	जहिं जायव-मागह-भड-वमालु	४
तव-सुएण णिवारिउ सीह-चिंधु	एक्कु-वि पहु अण्णु-वि परम-बंधु	
ण णिहम्मइ वारंवार-वार	दुज्जोहणेण सहुं गउ णिरार	
जगे वइरइं मरण-णिवारणाइं	अवराइं महंतइं कारणाइं	
अच्छेवउ अज्जु-वि विग्गहेण	जुज्जेवउ सहुं रणे मागहेण	८
मारेवउ सो पहु मद्दणेण	दसकंधरु जिह रहु-णंदणेण	

घत्ता

पइं मइं अवरेहि-मि जमल-णरेहि-मि समर-महाभर-उव्वहणु ।  
दारावइ-पुरवरु तोसिय-सुरवरु पइसारेवउ महुमहणु ॥ १०

[२०]

तहिं अवसरे पभणइ वासुएउ	लइ एवंहिं किज्जइ काइं खेउ	
दुज्जोहणु दुम्मइ दुकिय-कम्मु	जहिं णिवसइ तहिं देसे-वि अहम्मु	
माराविय जेण सहोयरा-वि	गुरु-पित्त-पियामह किंकरा-वि	
जोइज्जइ मुहु-वि ण तणउ तासु	किं अच्छहुं गम्मउ णिय-णिवासु	४
आरूसेवि पभणइ कुरु-पहाणु	को दुक्किय-गारउ पइं समाणु	
दुव्वयणहो देंतहो वासुएव	सयदलइं जीह मुहे ण गय केवं	

किं महु जे सहोयर तउ ण के-वि माराविय जेण कु-मंतु देवि  
घत्ता

सो सुरेहिं अदुद्धेहिं मण-परितुद्धेहिं वयणइं साहुक्कारियइं ।  
सयं भूमिहे सुत्तहो अणयण-पुत्तहो कुसुमइं सिरे संचारियइं ॥ ८

इय रिद्धणेमिचरिए धवलइयासिय-सयंभुएव-कए ।  
णामेण मउड-भंगो [इमो]णवासीइमो सग्गो ॥



## णवइमो संधि

रण-सिरि-रामालिंगियउ  
देमि जियंतु ण पंडवहं

कुरुवइ पडिउ-वि सुहावइ ।  
थिउ पिहिवि धरेविणु णावइ ॥

१

[१]

महुमहेण विणिवारिज्जंतु-वि  
रुवइ जुहिड्डिलु अंसु मुवंतउं  
बंधउ जइ-वि सुड्डु कलियारउ  
जइ-वि कियइं विस-जउहर-जूवइं  
दुब्बयणाइं कहि-मि णिसुणेसहुं  
कुरुव-गराहिवेण तो वुच्चइ  
किं णउ रुणणएण अहो राणा  
जइ जीवमि तो पंच-वि मारमि

भीमज्जुण जमले-वि णिज्जंतु-वि  
अवगुण-गुण-वयणइं सुमरंतउ  
मरणे देइ दुक्खु सय-वारउ  
एवहिं ताइ-मि दूरीहूवइं  
णिय-संपयउ कसु दावेसहुं  
कुसुम-वासु ण कबंधहो मुच्चइ  
जाहि जाहि मं मरहि अयाणा  
तेण हियत्तणेण विणिवारमि

४

८

घत्ता

मइं दुज्जोहणे जीवियए  
जेण हणाविय ओरु महु

तुम्हेहि-मि एत्तिउ कज्जु ।  
तं माहउ मारमि अज्जु ॥

९

[२]

गयइं पंडु-वलइं भंडागारइं  
कंचण-मणि-रयणइं अ-पमाणइं  
चामर-पुंडरीय-धय-चिंधइं  
विविहासणइं विविह-वाइत्तइं  
गुड-पक्खर-सरीर-तणु-ताणइं  
कंवल-पडिपावरण-सहासइं  
दासी-दास महिस-गो-वंदइं  
लइ लइ पंडवेहिं जा तिण्णइं

तुंगइं गिरिवर-सिहारागारइं  
हय-गय-रह-वाहण-जंपाणइं  
विविहाउहइं विविक्क-णिसिद्धइं  
तंविय-रुप्पिय-कंचण-पत्तइं  
दूसावास-भिसिय-पल्लाणइं  
चेलियाइं णिय-णाम-पगासइं  
एमावरइ-मि णयणाणंदइं  
दुक्खिय-दीणाणाहहं दिण्णइं

४

८

घत्ता

कमल-णिहेलण कमल-कर  
कुरुव-णराहिवु परिहरेवि

कमलाणण कमल-दलच्छि ।  
संकमिय जुहिड्डिले लच्छि ॥

९

[३]

कुरुवइ-कोसु असेसु लइज्जइ  
खंडव-डामर वइरि-पुरंजय  
उतिण्णु तुरंतु पुरंदर-णंदणु  
हरि परिपुच्छिउ सिर-गिरि-धारा  
तो सब्भावे अक्खइ महुमहु  
कण्णु सहोयरु तिण्णि-वि पावइं  
दड्ढु तेहिं तव केरउ संदणु  
हउं हयासु गइ कवणु लहेसमि

तो णारायणेण वोळ्ळिज्जइ  
रह-सिहरहो ओयरहि धणंजय  
दड्ढु हुआसणेण तो संदणु  
कोउहल्लु इउ काइं भडारा  
जं माराविउ स-गुरु-पियामहु  
थियइं दइव्वइं हुआसण-दावइं  
आसंकिउ मणेण तव-णंदणु  
कवणुत्तरु णारइयहं देसमि

४

८

घत्ता

वंधव लक्खइं घाइयइं  
एउ ण जाणमि दुम्मइहे

वलु जीविउ रज्जु असारु ।  
महु होसइ किह उत्तारु ॥

९

[४]

जइ गंधारि रिसत्तणु दावइ  
णिरुवद्वव-परिपालिय-रट्टहो  
तइयहं धाए णिवद्वइं णयणइं  
तेण सइत्तणेण महु भावइ  
सउ पुत्तहं तहो केरउ मारिउ  
दुदम-दाणव-देह-विमद्वण  
तिह करि जिह उवसमइ महत्तरि  
विणु कारणेण करेवि आओहणु

तो अम्हहं एक्कु-वि ण पहावइ  
जइयहं दिण्ण आसि धयरट्टहो  
पर-पुरिसहं ण णिहालमि वयणइं  
जइ-वि ण डहइ तो-वि फलु दावइ  
णउ जाणहि किह होसइ भारिउ  
हत्थिणायपुरु जाहि जणद्वण  
को-वि दोसु पंडवहं ण उप्परि  
णिय-चरिएहिं पत्तु दुज्जोहणु

४

८

घत्ता

तुहु-मि भडारिए जाणहि जो मग्गंतहं अद्धु ण दिण्णु ।  
पुणु पच्छए भीमज्जुणेहिं कुरुवइ तरु-वल्लरि जिम्ब छिण्णु ॥ ९

[५]

तं णिसुणेवि पयट्टु जणदणु दारुएण ढोइज्जइ संदणु  
स-धउ स-चामरु सायववारुणु गिरि-गोवद्धण-धारण-धारणु  
तहिं आरूद्धु सुरिंद-विहोएं अम्मणुअंचिउ पंडव-लोएं  
णाहु णियत्तिउ पंकयणाहें रहु ओवाहिउ वाहा-वाहें ४  
गयणु पियंत जंति णं घोडा कंचण-संखल-पग्गल-तोडा  
णं वसुमइ ण छिवंत पधाइय हत्थिणायपुर-णयरु पराइय  
पट्टणु तेण दिट्ठु विच्छाइउ दुक्खिउ दुम्मणु दीणु अणाहउ  
केस-विसंतुलु अविरल-वाहउ थामे थामे आमेल्लिय-धाहउ ८

घत्ता

जं मणु-पंडव-कउरवहं सव्वहं पुरवरहं पहाणु ।  
गयउरु दिट्ठु जणदणेण णं धूमायंतु मसाणु ॥ ९

[६]

रह-सिहरहो उत्तरेवि उविंदे पुणु धयरट्टु दिट्ठु गोविंदे  
पुणु गंधारि महत्तरि दिट्ठी हियए जाहे दुह-चडुलि पइट्ठी  
गंगा-सायर इव आउण्णइं विण्णि-वि धरेवि परोप्परु रुण्णइं  
केम-वि उवसम-भावहो दुक्कइ दुक्खु दुक्खु दुक्खेण विमुक्कइ ४  
करेवि महत्तराण अहिवायणु दिण्णासणे णिविट्ठु णारायणु  
भणइ ण थत्ति देमि तुह सोयहो तुहुं अरक्खण-पाणिउ लोयहो  
तुहुं सु-णिमित्तु सु-मंगलु रड्डहो सय-वडाय तुहुं धरे धयरट्टहो  
बंधव-सयणहं तुहुं गइ तुहुं मइ तुहुं पंडवहं कोति महु देवइ ८

अच्छइ धम्म-पुत्तु रोवंतउ

तुम्हहं मुह-दंसणु मगंतउ

घत्ता

ण किय संधि दुज्जोहणेण  
एवहिं पुत्त-सयहो तणियतहिं काले तुहु-मि पच्चक्ख ।  
मा भाय करहिं अवक्ख ॥

१०

[७]

जे मुय ते मुय सोउ ण किज्जइ  
पुत्त-कलत्तइं मोहण-जालइं  
तडिणि-तरंग-समउ संपत्तिउ  
धणइं इंदधणु-अणुहरमाणइं  
जीवियाइं जलविंदु-विलासइं  
पेम्मइं संज्ञा-राय-वियारइं  
रवि-अत्थवण-समइं अवसाणइं  
चलइं सरीरइं सुविणय-भावइंदस-विहु परम-धम्मु णिसुणिज्जइ  
वंधव वंधु णाइं असरालइं  
णरय-दुक्ख-दुसह-उप्पत्तिउ  
जोव्वणाइं तरु-छाहि-समाणइं  
लायण्णइं विज्जुल-संकासइं  
दविणइं गिरि-णइ-पवहागारइं  
सोहगाइं णव-कुसुम-समाणइं  
विसय-सुहइं विस-विसम-सहावइं

४

८

घत्ता

आयइं हलहर-कुलयरहं  
अम्हहं तुम्हहं अवरह-मिचक्कवइहिं तित्थयराहं ।  
थिर-भावइं हूवइं काहं ॥

९

[८]

जीउ जमोरणेण भक्खिज्जइ  
जइ-वि तुरंगमेहिं णिरु रुंभइ  
जइ-वि कूव-विवरंतरे धिप्पइ  
जइ-वि कह-वि पायाले थविज्जइ  
हरिणु व वाहें करि व मइंदें  
वसहु व वाघें मच्छु वएण व  
मे सुवण्णु मे धणु मे जोव्वणु  
मे मे मे भणंतु कड्ढिज्जइअसरणे असरणु केण रक्खिज्जइ  
जइ-वि लोह-मंजूसहिं छुभइ  
जइ-वि ण रवियर-किरणेहिं छिप्पइ  
तो-वि कयंतें मंडु लइज्जइ  
णउलें अहि अक्खु व भुयगिंदें  
ससि व विडप्पें कवलु गएण व  
मे कलत्तु मे घरु मे परियणु  
जइ-वि पुरंदरेण रक्खिज्जइ

४

८

घत्ता

जावहिं मरणु समावडइ तावहिं कहिं तणिय गवेस ।  
रकखेवि सक्कइ को-वि ण-वि महि दिज्जइ जइ-वि असेस ॥ ९

[९]

को-वि ण जगे जीवहो सयणिज्जउ एक्कु-वि एक्कहो जणु ण सहेज्जउ  
तिहुयणु भमइ जीउ एक्कल्लउ अच्छउ एक्कु अणेयहो भल्लउ  
अवियण-भावे लइज्जइ काएं वज्जइ मुच्चइ कम्म-विहाएं  
एक्कु अणेयइं मरणइं पावइ ++++++ ४  
एक्कु अणेयइं लेइ सरीरइं एक्कु अणेयइं सोसइं णीरइं  
एक्कु अणेय वार जं भुज्जइ तहो मेरु-वि वड्ढिमए ण पुज्जइ  
एक्कु अणेय वार जं रुण्णउ तेण जलेण महण्णउ पुण्णउ  
एक्कु अणेय वार जं दड्डउ तेण रएण होइ वेयड्डउ ८

घत्ता

जावहिं वाहि समावडइ तावहिं जइ को-वि होइ सहाउ ।  
तो किं सव्वहं मिलियाहं एक्कल्लउ कणइ वराउ ॥ ९

[१०]

जइ अण्णत्तण्णु तणु ण समंडइ तो किं रणे वणे दहे पहे छंडइ  
अण्ण-भाउ जइ सिरु ण पियावइ तो किं सूलारोहणु पावइ  
जइ ण थियइं णयणइं अण्णत्तणे तो किं मरइ पयंगु हुवासणे  
अण्ण-भाउ जइ सुइहिं विरुद्धउ तो किं हरिणु जाइ जहिं लुद्धउ ४  
अण्ण-भाउ जइ होइ ण घाणउ तो किं भमरु जाइ अवसाणउ  
अण्ण-भाउ जइ जीह ण मग्गइ तो किं झसु गल-पासए लग्गइ  
अण्ण-भाउ जइ करहो ण भावइ तो किं अंगुलि खंडणु पावइ  
अण्ण-भाउ जइ फरिसु ण इच्छइ तो किं वंधणु हत्थि पडिच्छइ ८

अण्ण-भाउ जइ कमेहिं ण किज्जइ तो किं णेतु जेत्यु सिरु छिज्जइ  
घत्ता

अण्णइं आयइं अवरइ-मि जगे जीवहो को-वि ण अत्तु ।  
अण्णहिं कारणे मोहियउ भव-लक्खेहिं काइं ण पत्तु ॥

१०

[११]

भमइ जीउ संसारे असारए झसु जिह पारावारे अपारए  
लयणि-मज्झे जिह गोंदले झिंदुउ जिह अरहट्ट-जंते घडि-गड्डुउ  
जिह णड्डु रंगे अण्येहे गारिहिं ++++++  
जिह मायाविउ मायारूवेहिं जिह जलु णइ-तालाय-दह-कूवेहिं ४  
कवणु भक्खु भक्खिएण ण भक्खिउ कवणु देसु जो तेण ण लक्खिउ  
आउसु कवणु तेण ण णिवद्धउं कवणु देहु जो तेण ण खद्धउ  
भइणि जणेरि दुहिय कुलउत्ती कवणु णारि जा तेण ण भुत्ती  
खज्जइ खाइ मरइ मारावइ रम्मइ रमइ रुवइ रोवावइ ८

घत्ता

अद्धुउ असरणु एकु जणु परिरक्खणु अण्णु ण कोइ ।  
भमइ चउव्विह-भव-गहणु जेण धम्मे णं लग्गइ तोइ ॥

९

[१२]

मोक्ख-णयरु जो गंपि ण सक्कइ सो तिहुअणहो मज्झे परिसक्कइ  
जिह जर-पूसउ आयस-पंजरे जिह भुवंगु वम्मीयब्भंतरे  
तेम तिवाय-वल्लय-अब्भंतरे णिवडइ भमेवि भमेवि भुवणोयरे  
जिह वणट्टउ खप्परे तत्तए जिह चाउलु अदहणे कढंतए ४  
सुर-णिरएहिं दस सहस णिराउसु तेत्तीसोवहि उवहि-चिराउसु  
मज्झिम-गइहिं ति-पल्ल वरिड्डउ जीवइ खुद्द-भवाइं कण्णिड्डउ  
णिच्च णिगोय तिसाड्डि सहासइं तिह तिण्णि सयाइं छत्तीसइं  
मरणहं एक-समय-अब्भंतरे खुद्द-भवाइं ताइं भुवणंतरे ८

८

सत्त वार पण्णारह वासरे वारह मास सट्ठि संवच्छरे  
 वारह रासिणवंसय-वत्तइं सत्तावीस जोय-णक्खत्तइं  
 घत्ता

आयइं अंतरवत्तियउ णासइ उप्पज्जइ जीउ ।  
 खणे उल्हाइ खणे पज्जलइ जिह भवणहो मज्झे पईवउ ॥ ११

[१३]

लोयालोय-पमाण-पगासहो थिय तइलोकु मज्झे आयासहो  
 तंतिवाय-वलएण णिवद्धउ पुक्खर-भंडहं कक्कर-वद्धउ  
 उद्धु चउद्दह रज्जु-पमाणं दिट्ठु जिणिंदहो केवल-णाणं  
 सत्त एग पंचेग विसालउ पुगल-जीवरासि-परिपालउ ४  
 हेट्ठिम-मज्झिम-उवारिम-भाएहिं णारय-णर-सुर-सासय-थाएहिं  
 वेत्तासण-झल्लरि-संकासेहिं मुख-मज्झ-छत्त-संकासेहिं  
 तहो मत्थए थिय सिद्ध भडारा पुण्ण-पवित्त सुमंगल-गारा  
 घत्ता

अक्खय अव्वय जीव घण अगरुग-लहु अव्वावाहे ।  
 जेण पमाणेहिं सिद्धि गय थिय तेण पमाणे णाहे ॥ ८

[१४]

अइ-सुहयहो परिवड्ढिय-णेहो अत्तागमणु ण गम्मइ देहो  
 जइ गम्मइ तो असइ अणेयहिं णिरु णिट्ठीवण-वमण-विरेयहिं  
 सव्वहं जगे सरीरु अपवित्तउ तमि असरीरु तेण जं छित्तउ  
 ताम महीयले अब्भुरुहुल्लइं जाम ण अब्भिडंति सिरे फुल्लइं ४  
 भोयणु ताम महग्घु विसिद्धउ जावं ण दंत-पंति परिघिट्ठउ  
 ताम सुवंधइं आवण-दव्वइं जाम सरीरे भिडंति ण सव्वइं  
 ताम मणोहराइं वर-वत्थइं जाम ण णारि णरेहिं णियच्छइ  
 पाणिउ ताम पवित्तु विसिद्धउ जाम ण णह विहुरेहिं पइद्धउ ८

घत्ता

दुष्टिम पेक्खु पयावइहे णउ विवरे ण घल्लिउ णीरे ।  
जं विरुयउं जं विट्ठलउं तं तं संकमिउ सरीरे ॥ ९

[१५]

मिच्छा-संजम-जोय-कसाएहिं	कारणभूयहिं चउहि-मि आएहिं	
पावइं अल्लियंति जगे जीवहो	तम-पडलइं जिह मंद-पईवहो	
जलहर-जालइं जिह अहि-मयरहो	सरिया-सोत्तइं जिह मयरहरहो	
दंसण-णियम-विराम-णिरोहेहिं	एवमाइं संवर-संदोहेहिं	४
विण्णि-वि आसव संवरि एवा	कालोवाएहिं णिज्जरि एवा	
वद्ध-बंध-सिंगब्भा-भावेहिं	तडिणि तरंति तारु जिह णावेहिं	
कोट्टवात्तु जिह कोट्टइं देप्पिणु	पुरइ पंति चर णीसारेप्पिणु	
णियय-तलायइं जिह कत्तारेहिं	रक्खिज्जंति बंध-णिरोहेहिं	८

घत्ता

सव्वेहिं जीवें जाइएण अप्पउं रक्खेवउ तेवं ।  
आसव-संवर-णिज्जरेहिं पावइं दुक्कंति ण जेवं ॥ ९

[१६]

एवंहिं धम्मु भडारीए सीसइ	परु अप्पाण-समाणउ दीसइ	
सो जि धम्मु जहिं हिंस ण किज्जइ	सो जि धम्मु जहिं दय जाणिज्जइ	
सो जि धम्मु जहिं वउ पालिज्जइ	सो जि धम्मु जहिं डंभु ण किज्जइ	
सो जि धम्मु जहिं मज्जु ण पिज्जइ	सो जि धम्मु जहिं मासु ण खज्जइ	५
सो जि धम्मु जहिं वयउ ण भज्जइ	+++++	
सो जि धम्मु जो णिहसहो दुक्कइ	जिह सुवण्णु णियरेहिं ण चुक्कइ	
सो जि धम्मु जहिं परु ण विरुज्जइ	सो जि धम्मु जहिं पाणि ण दुज्जइ	
सो जि धम्मु जहिं जीउ ण हम्मइ	सो जि धम्मु जहिं मोक्खहो गम्मइ	
लोइए लोउत्तरि सव्वेव्वहो	सो जि धम्मु पर-तत्ति ण जेत्तहो	८



घत्ता

किं बहु-वाय-वित्थरेण एत्तिउ परमत्थु महंतु ।  
खज्जइ माणुसु माणुसेण जइ जिण-धम्मु ण होंतु ॥ ९

[१७]

जीवं धम्मु एम मंतेवउ वोहि-समाहि-लाहु चिंतेवउ  
जम्मे जम्मे महु मंगलगारउ होउ सामि अरहंतु भडारउ  
जम्मे जम्मे तव-दंसण-णाणइं संभवंतु सम्मत्त-पहाणइं  
जम्मे जम्मे मय-मोह-विणासणे णिम्मल-वुद्धि होउ जिण-सासणे ४  
जम्मे जम्मे जिण-धम्मु लइज्जउ जम्मे जम्मे सुह-गइ पाविज्जउ  
जम्मे जम्मे अजरामर-थत्तिउ संभवंतु जिण-गुण-संपत्तिउ  
जम्मे जम्मे संसारुत्तरणइं संभवंतु सल्लेहण-मरणइं  
जम्मे जम्मे अवहत्थिय-दुक्खइं संभवंतु कम्म-क्खय-सोक्खइं ८

घत्ता

अवयरणाहिसेय-समए णिक्खवणे णाणे णिव्वाणे ।  
जाइं जिणिंदहं मंगलइं महु ताइं होंतु अवसाणे ॥ ९

[१८]

कहेवि एव वारह अणुपेहउ पभणइ णव-घण-सामल-देहउ  
लंवइ सूर-विंवु आयासहो जामि भडारिए णिय-आवासहो  
अच्छइ दोण-पुत्तु स-पइज्जउ माण-वडेसइ कहि-मि स-तिज्जउ  
दुक्ख-पमुक्कए उत्तउ णारिए ता आसीस दिण्ण गंधारिए ४  
णंद वद्ध जय जाहि जणदण पालहि पंच-वि पंडुहे गंदण  
गउ गोविंदु पासे तव-तोयहो पेसणु दिण्णु णराहिव-लोयहो  
तुम्हहिं सव्वहिं एउ करेवउ सिविरु असेसु अज्जु रक्खेवउ  
मइं वलएव-सामि अणुणेवउ खंधावारु सयलु रक्खेवउ ८  
चक्कु हरेवउ रज्ज-मयंधहो परए भिडेवउ तहो जरसंधहो

घत्ता

जमल-जुहिङ्गल-सिणि-तणय भीमज्जुण सत्तमु विट्ठु ।  
करेवि सयं भुव भुव-जुयले सव्वेहिं सीराउहु दिट्ठु ॥

१०

इय रिट्ठणेमिचरिए धवलइयासिय-सयंभुएव-कए ।  
गंधारी-उवसम-करणं णामो णवइमो सग्गो ॥

## इक्काणवइमो संधि

कियवम्म-किवासस्थामेहिं कहिउ ताम चक्केसरहो ।  
दुज्जोहणु चूरिउ भीमेण जिवं पहरहुं जिवं ओसरहुं ॥ १

[१]

तो अट्टारहमउ दिवसु गउ जगु गिलेवि णाइं थिउ णिसि-समउ  
धयरट्ठं संजउ पेसियउ दुज्जोहणु तेण गवेसियउ  
रण-रंगे लुलंतु णिहालियउ णं सुरवइ सग्गहो ढालियउ  
णं गहवइ गह-मुह-गाह-हउ णं दिणमणि सीयल-भाव-गउ ४  
णं काणणु दहेवि दवग्गि थिउ णं सोसहो पारावारु णिउ  
णं भग्ग-सिंगु गिव्वाण-गिरि कमलायरु णं ओसरिय-सिरि  
णं पवण-पणोळ्ळिउ साल-तरु णं सीह-विहट्ठिउ करि-पवरु  
णं विसहरु तक्ख-पक्ख-झडिउ तिह दीसइ कुरुव-राउ पडिउ ८

घत्ता

जो पंडु-सुयहं मग्गंतहं पंच-वि गाम ण दिण्ण चिरु ।  
सो पेक्खु कम्म-विहि-छंदेण लुलइ धूलि-धूसरिय-सिरु ॥ ९

[२]

एहिय अवत्थ कुरुवइहे जहिं सामण्णहो किण्ण म होउ तहिं  
कर-कमल-कयंजलि विण्णवइ हउं संजउ कुरुव-णराहिवइ  
पट्टविउ आसि जो वारवइ जसु केरी केण-वि ण किय मइ  
अट्टारह वासर जुज्झियइं जहिं अवसरे सउणि-णिरुज्झियइं ४  
तहिं अवसरे गयउर-णयरु गउ पडिउ आइउ वत्तावरउ  
धयरट्ठु भडारा धुउ मरइ जच्चंधु अयंगमु किं करइ  
गंधारि स-दुक्ख-भारु रुवइ भाणुवइ अगाह धाह मुवइ  
अंतेउरु मुच्छागय-विहलु परियणहो ण थक्कइ अंसु-जलु ८

घत्ता

जगे सव्वहो डाहु महंतउ तुह मुह-दंसण-वज्जियहो ।  
पर एक्कहो दिहि दुज्जोहण पंडव-वलहो अलज्जियहो ॥

९

[३]

दुज्जोहणु पभणइ माण-गिरि  
जसु वणु हिंडंतहो कालु गउ  
तहो णामु म लेहि अलज्जियहो  
मइं दीणाणाहहं दिण्णु धणु  
संतणु विचित्तुवीरिउ अवहि  
एवहिं जगे अवर ण का-वि धर  
जं तो-वि सरीर-चाउ ण किउ  
सो एवहिं पेक्खहुं किं करइ

णंदउ म जुहिड्डिलु लद्ध-सिरि  
सिविणे-वि ण जाणिउ सोक्खु कउ  
पिसुणहो परिवाडि-विवज्जियहो  
परिपालिउ सयलु-वि वंधु-जणु  
ण जियंतं दाइहिं दिण्ण महि  
अच्छइ मरिएवउ एक्कु पर  
तं दोण-पुत्तु स-पइज्जु थिउ  
किय पंडव मारइ किय मरइ

४

८

घत्ता

जरसंधु अद्ध-भरहाहिवइ करयले चक्क-रयणु धरइ ।  
सहुं वासुएव-वलएवेहिं पेक्खहुं रण-मुहे किं करइ ॥

९

[४]

तहिं काले कालणग्गोह-वणे  
कियवम्म-किवासत्थाम थिय  
दस-सहस णिवण्णहं वायसहं  
लद्धोवएस खर-वासरहो  
जाणाविउ कुरुव-राउ पडिउ  
सम्माणहिं ताम जाम जियइ  
विकखेवु देव महु पंडवेहिं  
तिह करि जिह जणण-वइरु हणमि

पारोह-साह-फल-पत्त-घणे  
कउसिएण ताम तहिं खयहो णिय  
णिदालस-भाव-परव्वसहं  
गय तिण्णि-वि घरे चक्केसरहो  
स-महारहु भारहु णिव्वडिउ  
सो कासु-वि पासे ण अल्लियइ  
किय किंकर णर सुर पड्डवेहिं  
रिउ-तरुवर-मूल-जालु खणमि

४

८

घत्ता

ताव चक्काहिवेण स-हत्थेण पट्टु वद्धु गुरु-णंदणहो ।  
सेणावइ होहि महारउ उप्परि जाहि जणट्टणहो ॥

९

[५]

गुरु-तणयहो दिण्णइं साहणइं	रह-माणुस-घोडा-साहणइं	
कालायस-कंस-कवय-धरइं	पहरण-पब्भार-भयंकरइं	
दुगंधइं धूम-समप्पहइं	रिक्खंकरइं रिक्ख-महारहइं	
गो-महिय भवइ कुसासिरइं	खर-केस-तुरंग-केस-सिरइं	४
णित्तिंसइं रोमु सप्पु खुसइं	लंवोट्टु(?) -दंतुर-पट्टिसइं	
कण्णथियावरिया भणइं	ओयइं अवराइ-मि साहणाइं	
दस सहस गइंदहं मत्ताहं	किंकरहं कोडि पहरंताहं	
हयवरहं लक्खु रण-भर-सहहं	पंचास सहास महारहहं	८

घत्ता

तो दीसइ आसत्थामेण कुरुव-णाहु विहलंघलउ ।  
पंडवेहिं णिवंधेवि छंडिउ णाइं कसायहो पोट्टलउ ॥

९

[६]

पभणिउ गुरु-सुएण रुअंतएण	वहु-धाह-पवाह-मुवंतएण	
तुहं देव देव तुहं वंधु-जणु	तुहं गुरु तुहं सामिउ तुहं सरणु	
पइं होतें धण-धण्णइं वहलइं	मणि-कंचण-रयणइं केवलइं	
पइं होतें धयइं महत्तरइं	वाइत्तइं छत्तइं चामरइं	४
पइं होतें अम्हहुं एहु किय	वंभणहं कहि-मि किं राय-सिय	
उवयारहो तहो एत्तिउ करमि	जिवं पंडव मारमि जिवं मरमि	
जिवं अवसरु सारिउ तुहं तणउ	जिवं गउ णिय-तायहो पाहुणउ	
जिवं तुहं वइसारिउ वइसणए	जिवं अप्पउ दड्डु हुवासणए	८

८

घत्ता

जिवं अद्ध-रत्ते पडिवण्णए वइरिहिं सीसइं आणियइं ।  
जिवं कल्लए वंधव-लोएहिं दिण्णइं अम्हहं पाणियइं ॥ ९

[७]

परमेसर महि-परमेसरेण महु पट्टु वद्धु चक्केसरेण  
विकखेउ दिण्णु वलु अप्पणउ स-रहु स-वाहु सवारणउ(?)  
मोत्तिय-पवाल-माला-फुरिउ णिय-जाणु णरेदें पट्टविउ  
चडु कुरुवइ पेक्खंतहो जणहो धरु गम्मउ पत्थिव पत्थिवहो ४  
दुज्जोहणु पभणइ तुड्ड-मणु छुडु सामि वइरु गुरु-वइरु हणु  
हउ गयउ जाहि तुहुं तुरिउ तहिं तव-णंदण-दूसावासु जहिं  
जो वद्धु पट्टु मगहाहिवेण सो मइ-मि विवद्धु कुरु-पत्थिवेण  
गउ आसत्थामु ण कहि-मि थिउ किव-भोएहिं कउरव-णाहु णिउ ८

घत्ता

सो महि-तिखंड-परिपालेण पिय-पुव्वेहिं सम्माणियउ ।  
लक्खिज्जइ सुहु जीवंतेण णिय-विणासु णं आणियउ ॥ ९

[८]

उत्तम-सल्लेहण-मरण-मइ वोल्लाविउ कुरुव-णराहिवइ  
धयरट्ट-पुत्त एत्तिउ भणमि स-दसारुह णंद-गोव हणमि  
तुहुं जेहिं हणाविउ जेहिं हउ रणे ताह-मि तेहि-मि करमि खउ  
रक्खंति जइ-वि जम-वइसवण खंदेद-चंद-हुयवह-पवण ४  
ओए-वि अवर-वि रक्खंति जइ दक्खवमि तो-वि अवसाण-गइ  
यहु पाविवि(?) किव-कियवम्म गय सोवण्ण-वसह सोवण्ण-धय  
जहिं वाहिणि गुरु-तणयहो तणिय सिल-धोय-समुज्जल-पहरणिय  
ते तिण्णि-वि तहिं एक्कहिं मिलिय णं काल-कयंत-मित्त मिलिय ८

घत्ता

किउ कलयलु दिण्णइं तूरइं  
चउ-पासेहिं मागह-लोएण

छुडु परिणमिय-महावलहो ।  
वेढिउ सिमिरु जुहिडिलहो ॥

९

[९]

गुरु-कुरुवइ-रवियर-तावियउ  
स-कसाउ स-कवउ स-पहरणउ  
किव-कियवम्महं वारंताहं  
पर-वले पइसरइ पलंव-भुउ  
लगइ ण हेइ एकहो-वि करे  
परिचिंतिउ मणे धड्डज्जुणेण  
तहिं अवसरे दिव्वु समुट्टियउ  
पज्जलिय-जलण-जाला-वयणु

दुज्जोहण-परिहव-परिहविउ  
साहारु ण वंधइ गुरु-तणउ  
मागहहं णियंत-णियंताहं  
अरि-सत्थु पयत्थु भयत्थु हुउ  
सण्णाहु ण पावइ णिद-भरे  
पहरंतउ दिड्डु ण अज्जुणेण  
गिरि-सिहरागार-परिड्डियउ  
खय-चंदाइच्च-हित्त-णयणु

४

८

घत्ता

पहरंतहो आसत्थामहो  
जिह णइवइ णिय-णइ-णीरइं

दुद्धम-देह-वियारणइं ।  
गिलइ असेसइं पहरणइं ॥

९

[१०]

दोणायणेण तो संभरिय  
फणि-फड-फुक्कार-भयंकरिय  
डमरुव-रव-भरिय-दियंतरिय  
+++++  
ता पेक्खेवि सहसुप्पण-भउ  
गुरु-णंदणु पर-वले पइसरइ  
रह चूरइ करि-कुंभइं दलइ  
धय-चामर-छत्तइं मोडियइं

णामेण विज्ज माहेसरिय  
उडुवइ-कड-जूडालंकरिय  
फुरियाहर-विसम-विलोयणिय  
सूलाउह-गो-विस-वाहणिय  
ओसरेवि दिव्वु केत्तहि-वि गउ  
तं मारमि जो पहरणु धरइ  
हय हणइ णराहिव दरमलइ  
पंचालहं सीसइं तोडियइं

४

८

घत्ता

वलु घाएवि हुयवहु लाएवि सिरइं लएप्पिणु णीसरइ ।  
वाहिय-रहु पुण्ण-मणोरहु घरु जरसंधहो पइसरइ ॥ ८

[११]

कुरु-जंगल-परिपालण-मणहो अग्गए खिवियइं दुज्जोहणहो  
परमेसरु करि वद्धावणउं णिरवज्जु रज्जु लइ अप्पणउं  
सीहासणु छत्तइं-चामरइं उवसमियइं सव्वइं डामरइं  
उब्भावहि मणिमय-मंडविय किय सयल पुहवि णिप्पंडविय ४  
पंचह-मि सिरइं मइं तोडियइं सुर-गिरि-सिहराइं व मोडियइं  
पेक्खेप्पिणु कुरुव-राउ भणइ को गुरुसुव पंडु-पुत्त हणइ  
अवरेहि-मि जेण णिरत्थ किय गंगेय-कण्ण-दोणहिं ण जिय  
एयइं पुणु कलुण-जणेराइं सीसहं पंचालहं केराइं ८

घत्ता

हउं एक्के पवणहो पुत्तेण लउडि-पहारेहिं चूरिउ ।  
को पंच-वि हणइ रणंगणे जाम ण हरि सर-पूरिउ ॥ ९

[१२]

दुज्जोहणु एम चवंतु थिउ गुरु-तणयहो धिद्धिक्कारु किउ  
वद्धारिय-जय-जय-मंडवहं जाणाविउ केण-वि पंडवहं  
तव-तणयहो भीमहो अज्जुणहो अणिरुद्धहो संवहो पज्जुणहो  
हलहरहो अणंतहो सच्चइहे गय-घाय णिएविणु कुरुवइहे ४  
सेणावइ आसत्थामु थिउ विक्खेउ णरिंदे पट्टविउ  
विद्दाविउ तेण सयलु सिमिरु सो ण भडु ण तोडिउ जासु सिरु  
धट्टज्जुणु सवलु सिहांडि मुउ गुरु-सामिय-परिहव-पट्टु धुउ  
सोमय-सिंजयह-मि करेवि खउ पंचालहं सीसइं खुडेवि गउ ८



घत्ता

उव्वरिउ ण को-वि जियंतउ कह-वि कह-वि सोयाउरइं ।  
कंदंतइं धाह मुवंतइं पर चुक्कइं अंतेउरइं ॥

१०

[१३]

तं वयणु सुणेवि असुहावणउं	गोविदें किउ वद्धावणउं	
जइ अम्हहं सत्त-वि तेत्थु थिय	आमिसहो रासि तो आसि किय	
तव-णंदणु पभणइ णिएवि मुहु	लइ णच्चहि अम्हहं कवणु सुहु	
तो भायर इयर चयारि जण	उद्धाइय अमारिस-कुइय-मण	४
भीमज्जुण गय-गंडीव-धर	सहएव-णउल असि-कुंत-कर	
णारायणेण पडिवंधु किउ	सब्भावें अग्गए गंपि थिउ	
जइ जीविउ लेमि ण मागहहो	पइसरमि मज्झे तो हुयवहहो	
पत्थेण वुत्तु एत्तिउ करमि	गुरु-सुयहो सिहा-मणि अवहरमि	८

घत्ता

पइज्जावसाणे किउ कलयलु तूरइं हयइं पयट्टु पहु ।  
गय रयणि दिवायरु उग्गमिउ ताम सयं भूसंतु णहु ॥

९

इय रिद्धणेमिचरिए धवलइयासिय-सयंभुएव-कए ।  
पंडव-वल-पलयकरो इक्काणवइमो सग्गो ॥

## दो-उत्तर-णवइमो संधि

कुरु-पंडव-वलेहिं सम्मत्तेहिं रण-रस-रहस-पसाहणइं ।

आभिद्वइं उत्तर-दाहिणइं मागह-माहव-साहणइं ॥

१

[१]

अट्टारहम्मि दिवसे बोलीणए  
पाडिए सव्व-भउमि दुज्जोहणे  
तुसिउ मइंदु जेम गय-गंधें  
हत्थु उत्थल्लिउ णरवर-विंदहं  
कोंकण-तामलित्त-तोक्खारहं  
पत्थल-मेहल-कोहड-जट्टइं  
ओड-पउंड-मुंड-ओवीरहं  
तुंडिए-कालेरंवड्डहं

कुरु-वले णिरवसेसे परिखीणए  
परिसमत्ते पंचालाओहणे  
ताडिय समर-भेरि जरसंधें  
पारय-दरय-कुणीर-कुणिंदहं  
मागह-सूरसेण-गंधारहं  
वव्वर-टक्क-कीर-खस-भोट्टइं  
कइवय ++-मरुव-कम्हीरहं  
कण्णावरण-पमुह-वहु-रड्डहं

४

८

घत्ता

णव कोडिउ पवर-तुरंगहं सोलह सहस णरेसरहं ।

चउरासी लक्खइं रह-गयहं संख ण णावइ किंकरहं ॥

९

[२]

कालजमण-वल-विक्रम-सारहं  
अलमल-वल-भरिया सारंधें  
सेणावइ करेवि गुरु-णंदणु  
रण-रहसुब्भडु कहि-मि ण माइउ  
तं सर्याडिंव-भएहिं तो वुच्चइ  
वासुएव-वलेएवहं लग्गहिं  
किज्जउ संधि काइं संगामें  
किं वसुएव इड्डि ण णिहालिय

सय-सहसइं णिग्गयइं कुमारहं  
वूहइं विरइयाइं जरसंधें  
सुरेहिं समाणु णाइं सकंदणु  
णं उत्तर-मयरहरु पधाइउ  
किं ति-खंड वसुमइ ण पहुच्चइ  
गयमणि पंचयण्णु धणु मग्गहिं  
दुल्लह होइ जयंगण णामें  
रोहिणि जइय मंड उद्दालिय

४

८

घत्ता

गोवद्धणु जेण समुद्धरिउ कालिउ दमिउ कंसु वहिउ ।  
सो केण पराजिउ समर-मुहे केसउ कामपाल -सहिउ ॥

९

[३]

णवमउ वासुएवु अवइण्णउ पडिकेसव-विणासु उप्पण्णउ  
कोडि-सिला सि जेण उच्चाइय जइयहुं सच्चहाम करे लाइय  
उद्ध करावहि तुलिय तिविट्ठे उत्तमंगु तणुरंत-दुविट्ठे  
कंठावहि सयंभु अहिहाणे पुरिसुत्तमेण उरेत्ति पमाणे ४  
पुरिस-सीह-णामेण हि पत्ती पुंडरीय-पहुणा कडि-मेत्ती  
ऊरु-पमाण उच्चाइय दत्ते जाणुच्छेह सुमिन्ता-पुत्ते  
चउरंगुल-मज्जाय उवेदे किज्जउ संधि समउ गोविंदे  
णउ अ-पमाणु होइ रिसि-भासिउ अम्हहं धुउ विणासु तहो पासिउ

घत्ता

जहिं णर-णारायण-साहणइं अतुल-वलइं पत्थिव-साराइं ।  
अण्णण्णइं तहिं मेलाइयइं किं करंतिं तुम्हाराइं ॥

८

[४]

जहिं एक्केक्क पहाण महारह गय-दुंदुहि-अंकूर-विओरह  
सिणि-अणिरुद्ध-संवु-मयरद्धय विम्हि-सुभाणु-भाणु-भोयंधय  
सच्चइ-चारु-जेट्ठु दसारुह पंडव पंच-वि सम-विसमाउह  
कउरव खयहो णीय जेहिं आहवे तो को जिणइ जियंत महाहवे ४  
तुहुं वेयारिउ अलइय-णामेहिं तिहिं किव-कियवम्मासत्थामेहिं  
गुरु-वहे कवणु कवणु किर जुज्झिउ पइं परमेसर कज्जु ण वुज्झिउ  
णउ लग्गणउ को-वि सयणिज्जउ कालजमणु एक्कु पर सहिज्जउ  
तं णिसुणेवि णरवइ आरुद्धउ णं विसहरु विस-दोसें दुट्ठउ ८

८

घत्ता

किं भग्नु पयाउ ण कंस-वहे  
अच्छंतेहिं दिवसे दिवायरहो

अम्हहिं विहिं णारायणहो ।  
कवणु तेउ तारायणहो ॥

९

[५]

ण कियाइं वयणाइं एवं चवंताइं  
जम-घोरणा-घोर-णिग्घोस-तूराइं  
मयरहर-गिरि-कुम्मओहट्टणाइं व  
विज्जुल्लया-पडण-पवियंभणाइं व  
भंभंत-भंभोह-भंकार-भीमाइं  
दडडददंताइं दड -दगाडि-घोसेहिं  
झिमिझिमिझिमंताइं झिक्किरि-विलासेहिं  
हूहूहवंताइं सय-संख-सद्देहिं  
डमडमडमंताइं डमरु-वमालेहिं  
ढढढढढंताइं ढङ्गिय-णिणाएहिं

तो तेण देवाविया वायणंताइं  
दस-दिसिवहभंभंतरालाण पूराइं  
उप्पाय-णिग्घाय-आवेट्टणाइं व  
गज्जंत-घण-पाउसारंभणाइं व  
उं-अं-हुडुक्का-परिछित्ति-धीमाइं  
घुमुघुमुघुमंताइं घुम्मुक्क-कोसेहिं  
खुमुखुमुखुमंताइं खुंखुण-सहासेहिं  
धूधूधुवंताइं काहल-णिणदेहिं  
सलसलसलंताइं कंसाल-तालेहिं  
एएहिं अवरेहिं अण्णण्ण-घाएहिं

४

८

घत्ता

तं तेहउ तूर-सहु सुणेवि  
णं वण-दउ उप्परि महिहरहो

रण-रसु कहि-मि ण माइउ ।  
हरि जरसंधहो धाइयउ ॥

११

[६]

पचलइं हरि-वल-वलइं विरुद्धइं  
किय-कलयलइं दिण्ण-वाइत्तइं  
विरइय-वइरि-वूह-पडिवूहइं  
उज्जिय-धयइं लइय-तणु-ताणइं  
दूर-वरुज्जिय-रण-भर-पसरइं  
अवहत्थिय-णिय-पुत्त-कलत्तइं  
रणवहु-अंगालिंण-लोलइं

जय-सिरि-तियस-विलासिणि-लुद्धइं  
पहु-पसाय-रिण-फेडण-चित्तइं  
चोइय-रह-गय-तुरय-समूहइं  
कर-कङ्गिय-वाणासण-वाणइं  
मरण-मणोरह-लद्धावसरइं  
वसुह-वरंगण-गहण-पसत्तइं  
जल-वोलीण-वहल-हलवोलइं

४

कोव-जलण-जालोलि-पलित्तइं	जय-वडाय-उद्दालण-चित्तइं	८
घत्ता		
पडिकेसव-केसव-साहणइं	रहसें कहि-मि ण माइयइं ।	
णं उत्तर-दाहिण-सायरहं	जलइं परोप्परु धाइयइं ॥	९

[७]

भिडियइं उब्भिड-भिउडि-करालइं	वलइं वे-वि बहु-वहल-वमालइं	
मुक्क-णिरंतर-सरवर-जालइं	तुलिय-भयंकरेण करवालइं	
हरि-धुय-धूली-धूसर-चिहुरइं	पहरण-घण-वण-वेयण-विहुरइं	
सोणिय-कद्दम-खुत्त-गइंदइं	कंचण-खंचिय-रहवर-विंदइं	४
रत्त-तरंगिणि-अमुणिय-थाहइं	सिर-सय-उप्परि-वाहिय-वाहइं	
तहिं अवसरे ण-रहसुदामहो	धाइउ अज्जुणु आसत्थामहो	
णिक्कवि किवहो भीमु किव-जेड्हो	सच्चइ भोयहो भोय-वरिड्हो	
स-कलुसु कालजमणु तालद्धहो	सइं णक्खत्तणेमि जरसंधहो	८
घत्ता		

पज्जुण्णहो सव्वइं साहणइं	संवुहे सच्चुकुमार-वलु ।	
जम-धणय-पुरंदर-पेक्खएहिं	णं झुल्लाविउ गयणयलु ॥	९

[८]

ताम धणंजएण गुरु-णंदणु	संदाणिउ संदणेण स-संदणु	
आहय हय धणु पाडिउ हत्थहो	लेवि सिहा-मणि घल्लिउ तत्थहो	
गुरु-सुउ भणेवि णरेण ण घाइउ	ताम विओयरेण किउ छाइउ	
सो-वि पणहु मुएवि णिय-संदणु	तहिं गउ जहिं गउ दोणहो णंदणु	४
सच्चइ जिणेवि ण सक्किउ भोएं	ल्हसिउ सो-वि जयलच्छि-विओएं	
तिण्णि-वि कुल-परिवाडिहे चुक्का	कहि-मि सलज्ज तवोवणु दुक्का	
कालजमणु कालाणल-दूसहु	काल-जलय-अलयालि-समप्पहु	
कालकूड-विस-विसम-विलोयणु	मलय-महागिरि-मंदर-चोयणु	८

घत्ता

स-सरासणु पेसिय-सर-णियरु  
धाराहरु धाराधारयरु

धाइउ उप्परि जलहरहो ।  
णं हिमवंत-महीहरहो ॥

९

[९]

तओ महा-करेणुणा  
कयंत-रूव-धारिणा  
पडीभ-कुंभ-मद्दिणा  
मयाणियालि-पंतिणा  
करगच्छत्त-भाणुणा  
सयामयालसच्छिणा  
असंत-कण्ण-वाउणा  
मणप्पहंजणासुणा

मयंवु-सित्त-रेणुणा  
सुगंध-गंधि-धारिणा  
विसाल-णालि-अद्दिणा  
जियामरिंद-दंतिणा  
खयायवच्च-थाणुणा  
जियारि-राय-लच्छिणा  
सहासहाय-णाउणा  
जियारि-साहणासुणा

४

८

घत्ता

णहर-दसण-पुच्छाउहेहिं  
तं तिण-समु मण्णे-वि सीहु जिह

जगडिउ जायव-णाह-व्लु ।  
णवर परिड्डिउ एक-व्लु ॥

९

[१०]

तो संकरिसणेण किय-थाणें  
विहि णारायणेण णाराएहिं  
तिहिं सिणि-णंदणेण उवदुक्कें  
पंचहिं तोमरेहिं अणिरुद्धें  
सत्तेहिं गुरुहिं विओरह-णामें  
णव कण्णिय तव-सुएण सुधीमें  
एयारह वइहत्थि पयत्थें  
तेरह तीरिय भाणुकुमारें

विद्धु महाकरि एकें वाणें  
अप्पासंग-भुअंग-णिराएहिं  
सव्वें थूणाकण्ण-चउक्कें  
छहिं तोलिएहिं मजरेण(?) विरुद्धें  
अट्ट वराहकण्ण सइकामें  
वच्छदंत दस पेसिय भीमें  
वारह भल्ल गए णर-हत्थें  
विद्धु असेसें खंधावारें

४

८

घत्ता

वइसारिउ कुंजर समर-मुहे कह-वि ण कालजमणु पाडिउ ।  
उप्पएवि णहंगणे णं घणेण करणे कंचण-रहे चडिउ ॥

९

[११]

वाहिउ रहु पर-वलहो रउदहो  
पंचहिं पंचहिं सव्व परज्जिय  
तेण-वि वीस वीस आमेल्लिय  
तेण-वि सट्ठि सट्ठि सरलाइय  
तेण-वि ताहे महद्धय ताडिय  
स-फरु स-मंडलगु उद्धाइउ  
सारणेण सो एंतु पाडिक्खिउ  
भिडियब्भंतर-वाहिर-मग्गेहिं

मंदरु भमइ व मज्झे समुदहो  
तेहि-मि दस दस तासु विसज्जिय  
तेहि-मि तीसहिं तीसहिं भेल्लिय  
तेहि-मि तासु तुरंगम घाइय  
तेहि-मि तासु सूअ-रह पाडिय  
णं दइवेण दवाणलु लाइउ  
जाउ महाहउ अमरे णिरिक्खिउ  
विहि-मि परोप्परु तच्छिउ खग्गेहिं

४

८

घत्ता

तो लद्धावसरे सारणेण कालजमणु जम-सयणु णिउ ।  
जय-तूरइं दिण्णइं जायवेहिं कलयलु देवेहिं गयणे किउ ॥

९

[१२]

कालें कालजमणु जं कड्डिउ  
तो तिखंड-महिमंडल-पालें  
सव्वइं साहणाइं पड्डिवियइं  
वाणर गिरि-पमाण उप्पाइय  
अण्णेत्तहे-वि विसम महाफणि  
सरह-वराह-महिस-विस-भीयर  
भमर-रिद्ध-सलहुंदुरइत्तिउ  
अण्णेत्तहे सवाहु वइसाणरु

हरि-वल-वले परिओसु पवाड्डिउ  
सुय-विओय-घुम्मविय-णिडालें  
ताइ-मि पज्जुणेण णिड्डिवियइं  
किलिगिलंत खायंत पधाइय  
फुप्फुवंत-विप्फुरिय-फणामणि  
वग्घ-मइंद-रिक्ख-रयणीयर  
मक्कुण-दंस-मसय-घुण-लित्तउ  
धूलि-तमंधयारु घण-डंवरु

४

८

घत्ता

पण्णत्ति-पहावें पर-वलइं सव्वइं भग्गइं पज्जुणेण ।  
 उवयार-सहासइं णासियइं णावइ एक्कें अवगुणेण ॥ ९

[१३]

णिय-वले भज्जमाणे वलसारहं धाइय पवर कुमार कुमारहं  
 ते जयलच्छि-सुरंगण-लुद्धेहिं दुंदुहि-गय-कुमार-अणिरुद्धेहिं  
 भाणु-सुभाणु-संव-पज्जुणेहिं चारु-जेट्ट-उद्धएहिं सउण्णेहिं  
 णिसढ-विओरह-जर-अंकूरेहिं किय-कलयलेहिं समाहय-तूरेहिं ४  
 के-वि णिवद्ध के-वि संदाणिय के-वि भग्ग के-वि वसुह-पराणिय  
 तहिं अवसरे अच्चंत-मयंधे पभणित णिय-सारहि जरसंधे  
 वाहि वाहि रहु जउ तउ तूरइं कण्ण-कंदरोयर-पडिपूरइं  
 वाहि वाहि तुहुं जउ तउ छत्तइं णंदगोव-पज्जुण्णइं पत्तइं ८

घत्ता

वयणु सुणेवि चक्काहिवहो उहय-कराहय-हय-पवरु ।  
 रहु वाहिउ सूएं णवरु तहिं जहिं हलहरु सारंग-धरु ॥ ९

[१४]

भिडिय वे-वि पडिकेसव-केसव आसग्गीव-तिविट्ट णरेस व  
 रावण-रामाणूण धणुद्धर सुवइ गयविलास विसकंधर  
 दुद्धम देह दुइ-वि दुइक्कम कारण-वारण-वारण-विक्कम  
 दुसह-दिणमणि-दित्त-समुज्जल भासुर-भुअ-भुअंग-भुयगल ४  
 दिण्ण-तूर-परिवड्ढिय-मलहर णं उत्थरिय स-जल णव-जलहर  
 अरिगण-पहरण-पहर-किणंकिय सायकुंभ-सण्णाह-अलंकिय  
 रहवर-भर-भारिय-वीसंभर सरवर-णियर-भरिय-वसुहंवर  
 मउड-पहोहामिय-रवि-मंडल चंद-सूरप्पह-जिय-मणि-कुडंल ८



घत्ता

चक्काहिव-पडिचक्काहिवइ वावरंति लद्धावसर ।  
णिवडंति झत्ति णिग्घाय जिह णहयल-भरिउव्वरिय सर ॥ ९

[१५]

विहि-मि सरेहिं णहंगणु छाइउ कह-वि कह वि सुर-सेण्णु ण घाइउ  
कह-वि कह-वि रवि रहवरु खंचइ वंतु वाउ वाएवउ वंचइ  
तेहिं पंडतेहिं वणियइं सेण्णइं रहवर-जोह-तुरंग-वरेण्णइं  
तेहिं पंडतेहिं फुडिय वसुंधर तेहिं पंडतेहिं पडिय धराधर ४  
तेहि पंडतेहिं भिण्ण भुवंगम आवय पाविय थावर जंगम  
तेहिं पंडतेहिं भरिय दियंतर तेहिं पंडतेहिं सोसिय सायर  
तेहिं पंडतेहिं जणवउ घोसइ णउ जाणहुं किह एवंहिं होसइ  
ता उप्पण्णु कसाउ णरिंदहो मुक्कु भुवंगमत्थु गोविंदहो ८

घत्ता

धणु-गुण-वम्मीय-विणिगयइं विसहर-लक्खइं धाइयइं ।  
उप्फड-फुक्कार-भयंकरइं जले थले गयणे ण माइयइं ॥ ९

[१६]

तो गोविंदें गोविस-कंधहो पेसिउ गारुडत्थु जरसंधहो  
जायइं गरुयइं गरुड-सहासइं परिपिहियइं जल-थल-आयासइं  
तिल-तुस-मेत्तु-विसुण्ण ण तेत्तहो णाय ण णाय आय गय केत्तहो  
खगवइ खज्जमाणु पारक्कउ पाडिय-पडउ पणहु ण थक्कउ ४  
पायवत्थु पत्थिवेण विसज्जिउ महुमहेण हुयवहेण परज्जिउ  
वारुणु मागहेण परिपेसिउ माहवेण वायवेण विहासिउ  
माहिहरत्थु महिहरेण पमेल्लिउ केसवेण कुलिसत्थे भेल्लिउ  
तामसत्थु दिणयरेण विणासिउ अवरें अवरु पवरु-विद्धंसिउ ८

घत्ता

गीसेसइं अत्थइं मुक्काइं एक्कु सरासणु णउ मुअइ।  
 अवसाणे काले सव्वहो णरहो धम्महो उप्परि होइ मइ ॥ ९

[१७]

पवलामलवल-वल-वलवंतें लयउ अणंतेहिं सरेहिं अणंतें  
 पेक्खंतहो पवरामर-सत्थहो कह व कह व धणु पाडिउ हत्थहो  
 छिण्णु महारहु सारहि घाइउ असिवरु फरु फेरंतु पधाइउ  
 खंडिय ते-वि वे-वि विहिं वाणेहिं कुलिस-दंड-जम-दंड-समाणेहिं ४  
 लइय सत्ति सहस त्ति विसज्जिय तिहिं भल्लेहिं भदिण्ण परज्जिय  
 मुक्क महागय गय गयणद्धें धरेवि ण सक्किय केण-वि जोद्धें  
 अरिगण-घण-पहरणेहिं ण भग्गी कह-वि कह-वि केसवहो ण लग्गी  
 पज्जुण्णेण पण्णत्तिय-पाणें किय सय-खंडइं हणेवि क्किवाणें ८  
 मागहेण अगणिय-पडिवक्खें लइउ महा-रहंगु सविलक्खें

घत्ता

तं चक्क-रयणु चक्काहिवेण दारुणु दाहिण-करे कियउ ।  
 अत्थइरिहे मत्थए अत्थवणे दिणयर-विंवु णाइं थियउ ॥ १०

[१८]

तं चक्कवइ-चक्कु चमु-चक्खणु जक्ख-सहासु जासु परिक्खणु  
 दस-सयारु वहु-वारु सिला-सिउ गंध-धूव-वहु-कुसुमेहिं वासिउ  
 मुक्कु ति-खंड-पिहिवि-परिपालें णं खय-काल-चक्कु खय-कालें ४  
 धाइउ थरहरंतु आयासें अमर परिट्ठिय एक्कें पासें  
 धरिउ ण णर-णारायण-वाणेहिं णउ मदीसुअ-कोत-क्किवाणेहिं  
 णउ पवणंगय-वर-गय-घाएहिं णउ हलहर-हल-मुसल-णिवाएहिं  
 णउ मयरद्धय-पमुह-कुमारेहिं णउ पहरणेहिं सिला-सिय-धारेहिं  
 सव्वेहिं धरेवि ण सक्कउ एंतउ हरि-करे लग्गु ति-भामरि देंतउ ८

घत्ता

परिणयणे कुमारी-रयणु जिह दुक्कु चक्कु केसव-करहो ।  
जं जेण दिण्णु जं जेण किउ तं तहो सइं जेपइ घरहो(?) ॥ ९

[१९]

जं उप्पण्णु चक्कु गोविंदहो तं परिओसु पवड्डिउ इंदहो  
णच्चिउ णारउ दुंदुहि ताडिउ कुसुम-वासु केसव-सिरे पाडिउ  
वुच्चइ सरहसेण वलएवें मागह जाहि काइं अवलेवें  
अज्जु-वि खमइ वीरु करि वयणइं देहि ति-खंड पिहिवि णिहि-रयणइं ४  
दोच्छिउ पत्थिवेण ण-वि थक्कें कवणु गहणु महु एक्कें चक्कें  
सीहहो कइ सहाय किर काणणे तो-वि मरंति दंति तहो आणणे  
मुए मुए णंदगोव किं अच्छहि णं तो णियय-णिहेलणु गच्छहि  
इत्ति पलित्तु णवर गरुडासणु णं धिय-धारए सित्तु हुवासणु ८

घत्ता

केसवेण लेवि पडिकेसवहो चक्क-रयणु रयणग्घविउ ।  
अत्थइरिहे उयय-महीहरेण सू-विंवु णं पट्टविउ ॥ ९

[२०]

धाइउ चक्क-रयणु रयणुज्जुलु तेओहामिय-दिणमणि-मंडलु  
जाला-मालालिंगिय-सुरवरु णिय-पडिरव-पूरिय-भुअणोयरु  
महि-कारणे रणे किय पडिवंधे धरेवि ण सक्किउ तं जरसंधें  
णिवाडिउ विप्फुरमाणु थणंतरे विज्जुल-वलउ णाइं गिरि-कंदरे ४  
पहु ओणल्लु रहंगहो घाएं णं णगोहु भग्गु दुब्बाएं  
णं आयासहो पडिउ दिवायरु णं परिसोसहो गउ रयणायरु  
तो अणेय उप्पाय समुट्टिय णिप्पह चंदाइच्च परिट्टिय  
कंपिय धरणि धराधर डोल्लिय णरवर माया-रुहिर-जलोल्लिय ८

घत्ता

जलजलइ णहंगणु जगु भमइ धूमायंति दियंतरइं ।  
केसवेण सइं भूसावियइं णिय जसेण वसुहंवरइं ॥

९

इय रिट्टणेमिचरिए धवलइयासिय-सयंभुएव-कए ।  
जरसंध-वहो णामो दो-उत्तर-णवइमो सगो ॥

[जुज्झ-कंड-उवसंहार-वयणाइं]

तेरह जायव-कंडे, कुरु-कंडे एऊणवीस संधीओ ।  
तह सट्ठि जुज्झ-कंडे, एवं वाणवदि संधीओ ॥  
सोम-सुयस्स य वारे, तइया-दियहम्मि फग्गुणे रिक्खे ।  
सिउ-णामेणं जोए, समाणियं जुज्झ-कंडं य ॥  
छव्वरिसाइं ति-मासा, एयारस वासरा सयंभुस्स ।  
वाणवदि-संधि-करणे, वोलीणो इत्तिओ कालो ॥



